

CURSUS
THEOLOGICUS

A D

*Usum Tyronum elucubratus, & in
quotidianis Praelectionibus*

A.R.P. DOMINICO VIVA
S.J. SACRÆ THEOLOGIÆ
PROFESSORE

Suis Auditoribus traditus

In Palæstra Collegii Neapolitani ejusdem
Societatis Cupientibus, atque instantibus
Theologiæ Candidatis.

IN LUCEM PUBLICAM EDITUS

A. D. IGNATIO VIVA
AUCTORIS NEPOTE.

PARS SEXTA


De Divini Verbi Incarnatione.



COLONIÆ AGRIPPINÆ,

umptibus WILHELMI METTERNICH, Bibliop.
Sub Signo Gryphi. Anno M. D. CC. XVI.

Cum Permissu Superiorum ac Privilegio.



INDEX QUÆSTIONUM

De Divini Verbi Incarnatione.

DISPUTATIO I.

DE possibilitate, & necessitate Incarnationis. 2

QUÆSTIO I.

AN saltem negativè ostendi possit Incarnationis possibilitas?

ART. I. *Negativè ostenditur possibilitas Incarnationis.* ibid.

ART. II. *An possit etiam positivè demonstrari possibilitas, & existentia Incarnationis?* II.

QUÆST. II. *Utrum in Deo detur necessitas ad optimum, atque adeò ad ponendam Incarnationem.* 16

ART. I. *Explicatur status Quæstionis.* 17

ART. II. *Stabilitur in Deo necessitas moralis ad optimum.* 20

ART. III. *Occurritur objectis.* 24

QUÆST. III. *Utrum necessaria fuerit Incarnatio ad condignè satisfaciendum pro mortali?* 33

* 2

ART. I.

I N D E X

ART. I. *An possit justus condignè satisfacere pro mortali, si supponatur gravitatis finitæ?*

34

ART. II. *An possit justus saltem mereri de condigno peccatori gratiam remissivam peccati?*

45

QUÆST. IV. *An peccatum sit gravitatis infinitæ.*

53

ART. I. *Stabilitur ratione prioristica infinita peccati gravitas.*

ibid.

ART. II. *Roboratur idem posterioristicè.*

58

ART. III. *Objectis satisficit.*

63

QUÆST. V. *Utrum satisfactio, & meritum Christi D. fuerit valoris infiniti, & superabundans.*

72

QUÆST. VI. *Utrum satisfactio Christi D. fuerit ex rigore justitiæ?*

83

DISPUTATIO II.

DE impeccabilitate Christi, & libertate ad merendum, & ad satisfaciendum requisita.

89

QUÆSTIO I.

U*trum Christus peccare potuerit in sensu composito Unionis.*

90

QUÆST. II. *An potuerit Christus impeccabilis præcepto pressè dicto ad mortem acceptandam obligari?*

96

QUÆST. III. *An fuerit in Christo libertas ad actus inæqualis perfectionis? Ubi, An fuerit aliquando humana Christi voluntas Divinæ voluntati contraria.*

103

QUÆST.

Q U Æ S T I O N U M.

3

QUÆST. IV. *Utrum Humanitas assumpta peccare potuerit in sensu diuiso ab Unione Hypostatica, & visione beata.* 114

ART. I. *An Humanitas assumpta prout videns Deum peccare possit peccato impeditivo, aut destructivo visionis beate.* ibid.

ART. II. *Utrum Humanitas assumpta peccare etiam possit peccato impeditivo, aut destructivo unionis hypostaticæ?* 122

QUÆST. V. *Quomodo concilietur Christi impeccabilitas cum libertate, & Merito in acceptatione mortis præceptæ.* 129

ART. I. *Rejicitur via Thomistarum, & Scatistarum.* 131

ART. II. *Rejicitur via recurrentium cum Suario ad principium proximum indifferens.* 135

ART. III. *Rejicitur via P. Vasquii per libertatem ad mortis circumstantias.* 141

ART. IV. *Refellitur via Cardinalis de Lugo per libertatem ad petendam dispensationem.* 145

ART. V. *Munitur via ad conciliandum in præsentiprovidentia meritum obedientiæ cum impeccabilitate Christi.* 147

D I S P U T A T I O III.

DE causa finali, & meritoria Incarnationis. 152

* 3

QUÆ

I N D E X

QUÆSTIO I.

Utrum Adam non peccante Verbum fuisset incarnatum. ibid.

QUÆST. II. *Utrum Deus prædefinierit Incarnationem in remedium peccati in prioribus ad scientiam Visionis de peccato absolute futuro?* 164

ART. I. *Explicatur status Quæstionis* ibid.

ART. II. *An Deus unico, & simplicissimo decreto omnia decernat, præsertim Incarnationem, ut redemptivam, & permissionem peccati.* 168

ART. III. *Diluuntur objecta.* 175

QUÆST. III. *De merito Christi relatè ad unionem hypostaticam, & alia bona sibi, & nobis collata.* 188

ART. I. *An Christi Humanitas mereri potuerit unionem per operationes naturæ priores, aut posteriores ad illam?* ibid.

ART. II. *An Christus meruerit sibi unionem per operationes tempore posteriores: Et quomodo Gratias Sanctis Patribus meruerit.* 194

ART. III. *Quid Christus D. sibi, & nobis meruerit.* 200

QUÆST. IV. *An SS. PP. de congruo meruerint Incarnationem, & B.V. etiam de condigno Maternitatem.* 203

DISPU.

QUÆSTIONUM.

DISPUTATIO IV.

DE *Unione Hypostatica, & ejus Extremis.*
210.

QUÆSTIO I.

Utrum unio immediate terminetur ad so-
lam Verbi Personalitatem, an etiam ad
Naturam? 211

QUÆST. II. Utrum detur in Natura di-
vina subsistentia absoluta, quæ possit unio-
nem hypostaticam terminare. 225

QUÆST. III. Utrum unio hypostatica san-
ctificet Humanitatem non solum ut quæ sed
etiam ut quod? 232

QUÆST. IV. Utrum B. Virgo physicè in u-
nionem hypostaticam influxerit, & quomo-
do. 241

QUÆST. V. An plures Personæ possint ean-
dem naturam assumere, & una Persona
plures Naturas. 248

QUÆST. VI. An possit à Deo assumi Na-
tura irrationalis, & forma accidentalis.
253

QUÆST. VII. Quid de facto assumpserit
Verbum in Christi Humanitate. 261

DISPUTATIO V.

DE *Termino unionis Hypostaticæ seu dei p-
so Christo D.* 268

QUÆ-

INDEX QUÆSTIONUM.

QUÆSTIO I.

AN Christi Persona sit composita, & quomodo trahat idiomatum communicationem. 269

QUÆST. II. de Christi Sanctitate. 274

ART. I. An Christi Humanitas formaliter sanctificetur à sanctitate Increata, & An etiam physicè, ac infinitè. ibid.

ART. II. Utrum fuerit in Christo etiam Sanctitas accidentalis. 284

QUÆST. III. De multiplici Christi scientia. 289

ART. I. Quotuplex scientia fuerit in Christo D. 290

ART. II. Utrum Christus Dominus clarè, & distinctè cognoscat in Verbo omnia possibilia, aut saltem omnia futura. 293

QUÆST. IV. de Christi D. Sacerdotio, Adoratione, Passionibus, & quodnam sit ejus dominium in temporalia. 299



CUR-



CURSUS THEOLOGICUS

Ad usum Tyronum elucubratus.

PARS SEXTA,

DE DIVINI VERBI
INCARNATIONE.

PROOEMIUM.



Explicandum hoc anno Myſterium , cujus non modò exiſtentia, ſed etiam poſſibilitas , creatæ mentis aciem obtundit : ut proinde Apoſtolus illud vocet : *Sacramentum abſconditum à ſæculis* ; & ab Epheſino nuncupetur *Ineffabile, & incomprehenſibile*.

Gordius ſanè nodus , quem redordiendo impediamus verius, quàm expediamus. Angelicus poſtquam de ultimo fine hominis, ac de peccatis , per quæ ab eo homo recedit, & de Gratia, ac Virtutibus, per quas ad eundem regreditur abundè diſputavit, aggreditur diſputationes de totius humanæ naturæ Redemptore , ac Salvatore Chriſto Jeſu ; *Per quem*, ut loquitur Apoſt. *habemus acceſſum per fidem in gratiam iſtam , in qua ſtamus , & gloriamur in ſpe gloria filiorum Dei*. Nos Angelici Præceptoris veſtigiiſ in hærentes diſputabimus I. De Poſſibilitate , ac neceſſitate Incarnationis. Deinde ut liquidius conſtent ea, quæ in eadem prima diſputatione de Chriſti ſatiſfactione , & Merito diſcutienda ſunt, agemus de Chriſti impeccabilitate, & libertate ad merendum, & ſatiſfaciendum requi-

Pars VI.

A

ſita;

sita, in quibus conciliandis tantopere desudat Theologia. II. De causa finali, & meritoria Incarnationis. III. De Unionem hypostatica, tum secundum se, tum ex parte Personæ assumptæ, & Naturæ assumptæ. Denique de termino unionis, nempe de Christo Domino, quoad ejus Personam, & Naturas, communicationem idioma- tum, Scientiam, Sanctitatem, necnon de reliquis ad ipsum spectantibus, si fortè Deus ibi possit esse dicibilis, ubi voluit esse visibilis.

DISPUTATIO I.

De Possibilitate, & Necessitate Incar- nationis.

AD significandum hoc Mysterium usus est Hilarius verbo *Incorporationis*, & Damascen. lib. 3. de fide cum Chalcedonenſi Concilio verbo *Inhumanationis*; usitatissimum tamen fuit apud Græcos, & Latinos PP. ut notat Amicus, nomen *Incarnationis*, fortè ex illo Joan. 1. *Verbum Caro factum est*; ubi per Synecdochē pars pro toto accipitur. Quamvis enim Verbum totam naturam humanam assumpserit, cujus Caro est pars, & quidem ignobilior; dicitur tamen Carnem induisse, ut liquidius constet mirabilis illa dignatio Filiū Dei semetipsum exinanientis usque ad substantialem unionem pretiosissimæ suæ divinitatis cum lutea parte humanitatis nostræ. Inquiremus hīc I. An possit Incarnationis possibilitas saltem negativè demonstrari? II. An ejus existentia fuerit simpliciter necessaria, eò, quòd Deus ad optimum necessitetur? III. An fuerit necessaria ex suppositione peccati, aut ad condignam satisfactionem exhibendam, aut ad condignè merendam peccati remissionem, sive peccatum mortale statuatur infinitæ, sive finitæ gravitatis in linea injuriæ? Ubi etiam: An possit Justus mereri alteri de condigno gratiam peccati remisivam? Denique num satisfactio, & meritum Christi fuerit valoris infiniti, ac superabundans, necnon de rigore Justitiæ?

QUES

QUÆSTIO I.

An saltem negativè ostendi possit Incarnationis Possibilitas?

Nestorius negavit in Christo Domino unitatem Personæ, ac B. Virginem fuisse Dei Matrem, dicens Humanitatem solum affectivè unitam fuisse Verbo, non realiter, & unione hypostaticâ, seu Personali. Eutyches contra, negavit in Christo Domino dualitatem Naturarum, dicens per unionem Naturam Divinam, & humanam fuisse permixtas, & in unam transiisse. Contra utramque Hæresim docet Fides Catholica in Christo Domino unam esse Personalitatem, nempe Verbi, ac duas naturas. Ex eo autem, quod de fide sit huiusmodi Incarnationem esse de facto positam, de fide pariter est, eam esse possibilem. Dubitatur tamen, utrum Naturali lumine isthæc possibilitas demonstrari possit negativè? ostendendo fuitiles esse objectiones Hæreticorum; & an possit etiam demonstrari positivè?

ARTICULUS I.

Negativè ostenditur possibilitas Incarnationis.

I. Dico equidem cum Martinon. Arriaga, & aliis, posse naturali lumine negativè demonstrari Incarnationis possibilitatem, quatenus difficultates omnes, quibus Hæretici mysterium impetunt, dilucidè possunt solvi.

Conclusio constabit vindicando mysterium à præcipuis difficultatibus, præsertim, quomodo verbum non mutetur intrinsecè, & quomodo ex duobus entibus in actu fieri possit unum per se.

II. *Obijciunt itaque 1.* Si Verbum incarnaretur, mutaretur intrinsecè; sequela repugnat ex conceptu Divinitatis immutabilis, juxta illud: *Ego Deus, & non mutator*; ergo repugnat Verbum incarnari. *Probatur sequela:* Si Verbum incarnaretur, uniret sibi substantialiter, & intrinsecè humanitatem; ergo de novo acquireret intrinsecè unionem substantialem, quam non præ-

habebat; sed habere de novo aliquid intrinsecè, est aliter se habere intrinsecè, seu mutari; ergo verbum mutaretur intrinsecè. Et sanè certum est ex Symbolo Divi Athanasii, quòd sicut Anima, & Caro unus est homo, ità Deus & homo unus est Christus; sed anima separata, si de novo uniretur substantialiter corpori, mutaretur intrinsecè, ergo etiam verbum: Sicut etiam Angelus mutaretur intrinsecè, si uniretur hypostaticè humanitati. Et hinc est, quòd Decreta libera non possint de novo Deo advenire; quia Deus intrinsecè mutaretur.

Neque dici potest, quòd verbum non mutaretur, quia est incapax mutationis. Nam ex hoc inferunt hæretici Incarnationem esse impossibilem, quia scilicet deberet Deus mutari; sicuti in exemplo adducto, ideò Decreta libera non possunt de novo Deo advenire, quia utraque pars contradictionis sequeretur; quòd scilicet Deus mutaretur acquirendo de novo actum vitalem, qui essentialiter est intrinsecus, & quòd non mutaretur; quia cum sit cumulus omnis perfectionis, non potest de novo ullam perfectionem acquirere: Sic etiam communiter dicimus contra Thomistas nonnullos repugnare Deo Prædeterminationem ad peccatum; quia si Deus prædeterminaret creaturam ad peccatum, amaret illud, & simul non amaret, ratione suæ bonitatis.

Hæc, ut notant Suar. & Amic. est una ex potissimis totius Theologiæ difficultatibus, quæ vix possit ab humano ingenio explicari; nec mirum, nam ut loquitur Concil. Tolet. XI. *Si ratione hoc mysterium colligeretur, non esset mirabile, si exemplo, non esset singulare*: Ea tamen non sunt tanti facienda, ut propter arduitatem ab explicando tanto Mystério desistere debeamus. In quo, ut habet Justinus lib. de recta ratione: *Sicuti nullibi operosius, ita nullibi fructuosius humanum ingenium elaborat*; ex ipsa enim Mysteriorum incomprehensibilitate doni excellentiam intelligimus. Varias itaque DD. inière vias ad salvandum, quomodo verbum non mutetur, ut videre est apud Lugo, Rhodes, Martinon. Aliqui dixerunt unionem hypostaticam esse verbo extrinsecam, & idcirco non mutari intrinsecè; sic Bonac. in 3. d. 1. ubi habet: *Verbum per unionem incipit denominari unitum, sicut unum Album, posito altero albo, incipit denominari simile, qua est denominatio extrinseca*. Idem videtur sentire D. Tho. qu. 16. a. 1. Scotus

in

in 3. d. 1. Lell' &c. Alii verò putant, unionem esse verbo intrinsecam non ut subiecto, sed ut termino, quia per illam non perficitur Verbum, sed solum perficit humanitatem terminando illam, complendo, & sustentando. Alii docent unionem identificari realiter cum ipso Verbo; sicut Decreta libera identificantur cum Deo, quamvis indigeant complemento extrinseco ad denominandum juxta celebrem multorum sententiam in tractatu de Divina Voluntate.

III. Equidem suppono hic ex dicendis, unionem esse entitatem modalem, substantialem, distinctam à Verbo, & Humanitate instar unionis inter animam, & corpus. Non potest enim dici, quòd realiter identificetur cum Verbo, sicut Decreta libera, quia, ut notat Amic. esto posset dari unio ex parte Verbi cum ipso identificata, deberet tamen ex parte Humanitatis etiam dari unio intrinseca humanitati, ut dicatur humanitas intrinsecè unita, unde de hac secunda unione recurrit difficultas, num dicenda sit intrinseca, an extrinseca Verbo? & quomodo Verbum per illam non mutetur.

Censeo deinde cum Amic. *disp. 1. sec. 3* Platel. & aliis, unionem hypostaticam neque esse absolutè intrinsecam neque absolutè extrinsecam Verbo, sed esse mediam, atque adeò (juxta laudatum Concil.) singularem: Unde dicenda verbo intrinseca solum terminativè, non subje-ctivè; & ideo verbum non mutari.

Prob. 1. Pars, quòd sit media inter intrinsecam, & extrinsecam, convenit enim cum aliis unionibus intrinsecis, quatenus facit unum per se, exigit praesentialitatem verbi in humanitate, & est ratio, quâ communicantur humanitati perfectiones, & praedicata verbi, adeò ut habeatur communicatio idiomatum; cum Deus dicatur passibilis, mortalis, &c. & hic homo impassibilis, immortalis. Convenit etiam cum unionibus extrinsecis, per hoc, quòd non subiectionetur in verbo, sed ad illud purè terminetur; Non secus ac Amor, & cognitio terminantur ad suum objectum, ergo unio hypostatica neque est absolutè intrinseca, neque absolutè extrinseca verbo, sed media inter utramque, & propterea à DD. cum Angelico, & Scoto juxta hos varios sensus, modò appellatur intrinseca, modò extrinseca.

Prob. Deinde, quòd dicenda potius sit intrinseca terminativè, non subje-ctivè Nam ex una parte praestat ea

omnia, quæ præstantur ab unionem intrinseca, nempe facere unum per se, exigere præsentialem mutua extremorum, & ferre mutua communicationem prædicatorum, seu idiomatum: Ex altera parte non respicit verbum ut subiectum physicum, seu potentiale, & perfectibile, sed tanquam purum terminum, qui complet, perficit, ac sustentat humanitatem; ergo dicenda est intrinseca Verbo terminativè, non subiectivè: Cujusmodi est unio inter materiam, & formam in sententia admittentium duplicem unionem, quarum altera subiectetur in materia, & terminetur ad formam, diciturque receptio; altera in forma, quæ dicitur informatio; sicut etiam in sententia admittente inter partes quantitatis duas uniones, quarum una sit in parte A, & terminetur ad B, altera è converso.

IV. *Resp.* nunc ad argumentum *Nego sequelam. Ad prob. dist. min. subs.* Acquirere de novo aliquid intrinsecè, est mutari, si acquiratur per modum subiecti physici potentialis, & perfectibilis; *Conc.* si acquiratur per modum termini purissimi, qui perficiat, non perficiatur; seu per modum subiecti Logici, quod habet novam denominationem absque nova perfectione, *Neg. min. & Conseq.* Sicut enim Deus de novo denominatur creans mundum absque nova perfectione, ita denominatur de novo intrinsecè unitus humanitati, absque mutatione intrinseca. Hinc pater, quare Anima separata, si de novo uniretur Corpori, mutaretur intrinsecè; Ratio est, quia anima, cum sit limitata, & perfectibilis, est subiectum physicum unionis, non logicum, seu purus terminus, sicut est verbum. Utrum autem possit Angelus hypostaticè uniri humanitati? infra examinabitur; Transmisso, quod sit possibile, dico, quod si unio respiceret Angelum ut purum terminum, juxta doctrinam Albertini apud Platel. nu. 6. & sicut unio Accidentium Eucharisticorum in multorum sententia respicit corpus, & sanguinem Christi, Angelus non mutaretur intrinsecè per talem unionem, secus verò, si Angelus esset subiectum physicum unionis. Ex quibus sequitur, quod Verbum acquirendo de novo unionem sibi terminativè intrinsecam, habeat aliud intrinsecum de novo, quin tamen se habeat aliter intrinsecè, quia intrinsecè non mutatur; nec novam perfectionem acqui-

acquirat: Ad eum modum, quo si infinitis hominibus addas 10. alios homines, infinitum illud non fit majus, nec se habet aliter, licet habeat aliud. Et ratio à priori est, quia verbum præcontinet eminenter omnes perfectiones creatas, atque adeò ipsam unionem hypostaticam; propterea sicut complexum ex Deo & creatura non est quid perfectius Deo tantum, ita complexum ex verbo, & unione terminativè intrinsecà non est quid perfectius solo Verbo.

Ad 1. paritatem de Decretis, verum est, quod Deus perficeretur, & mutaretur intrinsecè, si de novo illi advenirent decreta libera; at non mutatur, si de novo adveniat illi unio hypostatica. Disparitas est, quia de ratione actus vitalis est perficere potentiam, cum sit ultima ejus perfectio, sicut de ratione potentiae est perficere naturam; ergo si decreta, seu actus vitales à Deo distinguerentur, ab iis perficeretur Deus, essetque illorum subjectum physicum, quod repugnat. Contra verò non est de ratione unionis, quod perficiat extremum unitum, (ut patet in sententia admittente duas uniones in composito substantiali, & inter partes quantitatis, quarum quælibet subijceretur in una parte, & terminetur ad alteram) ergo verbum, per hoc, quod intrinsecè uniatur humanitati, non debet eatenus perfici, nec mutari. Secunda paritas de prædeterminatione physica ad peccatum non est ad rem; Nam, ut diximus in de Gratia, qui vult A. ad quod tanquam à priori sequitur B, censetur velle ipsum B; qui v. gr. vult ebrietatem, ad quam sequitur homicidium, vult etiam homicidium; ergo si Deus vellet prædeterminationem, ad quam sequitur peccatum, censetur velle, & amare peccatum, quod Divinae bonitati repugnat: At esse intrinsecè unitum, de se non fert necessariò perfici ab ea unione, si A uniatur tanquam purus terminus, qui perficiat, non perficiatur, eo modo, quo verbum unitur humanitati.

V. *Objec. 2.* Si Verbum posset incarnari, posset ex verbo, & humanitate fieri unum per se, sed hoc repugnat, ergo &c. *Prob. min.* Ex duobus entibus in actu, seu completis, non potest fieri unum per se. Neque dici potest, quod ens in actu, nempe Verbum non adveniat Humanitati, nisi ut carenti propriâ subsistentiâ; atque adeò

ut enti in potentia, seu incompleto ; Nam adhuc hoc dato, neque potest fieri unum per se ex uno ente in actu completo. & altero in potentia ; v. gr. ex Angelo, & materia prima ; atqui verbum est ens completissimum ; ergo nequit fieri unum per se ex verbo , & humanitate.

Confirm. Ut possit Verbum , & humanitas facere unum per se, debent hæc extrema habere proportionem ad invicem, sed inter verbum infinitum , & humanitatem finitam non habetur proportio, quia finiti ad infinitum nulla proportio : si enim ex substantia, & accidente non potest fieri unum per se, quia sunt diversi generis ; à fortiori ex Verbo , & Humanitate, quæ magis inter se distant, quàm substantia creata, & accidens.

Resp. nego min. Ad probationem *conc.* partes substantiales debere esse incompletas, ut faciant unum per se in ratione naturæ, seu principii operativi , quia altera debet esse principium Activum , altera Passivum : unde utraque debet esse perfectibilis, & incompleta , & ideo ex Angelo , & materia prima nequit fieri unum per se in ratione naturæ ; sicut neque ex duobus entibus in actu etiam incompletis, puta ex duabus formis substantialibus : contra verò ut fiat unum per se in ratione habentis, & habitus, ex termino, & terminabili, ex sustentante, & sustentabili, sufficit, quòd altera tantum pars, quæ in tali composito perficitur, & sustentatur , sit incompleta, potentialis, & perfectibilis ; & ideo ut fiat unum per se ex verbo, & humanitate, sufficit, quòd humanitas, quæ sola perficitur, & sustentatur , sit incompleta, seu carens propriâ subsistentiâ ; siue subsistentia creata dicatur consistere in modo substantiali superaddito naturæ, ut docent communius Recentiores , siue in negatione duplicis dependentiæ aptitudinalis , & actualis , seu in negatione unionis hypostaticæ, ut docent Scotistæ ; siue in natura prout est, sui juris , ut docent Nominales , putantes humanitatem posse facere unum per se cum Verbo, in ratione habentis , & habitus absque carentia ullius perfectionis naturaliter debitæ ; quod explicant exemplo circuli minoris , qui ut contineatur à majori , seu ut compnat cum majori unum in ratione continentis , & contenti , non debet habere ullum defectum in ratione circuli : & Cyrillus explicat exemplo ignis , qui ut contineatur in

in carbone , non debet habere defectum in ratione ignis.

Ad Confirm. Ut verbum facere possit unum per se cum humanitate, sufficit, ut notat Valentia , proportio habitudinis, quâ possit unum habere alterum, quam non impedit distantia entitativa infinita, sicut ad videndum objectum sufficit proportio habitudinis, quâ possit potentia objectum repræsentare ; quam proportionem non impedit distantia infinita inter intellectum creatum , & Deum ; potest enim intellectus Deum videre, quamvis non possit oculis videre Angelum, à quo distat finitè ex defectu talis proportionis, & ideò neque potest fieri unum per se ex substantia, & accidente , quamvis finitè distent.

VI. *Objic.* 3. Implicat humanitatem subsistere subsistentiâ alienâ, ergo repugnat Incarnatio. *Prob. antec.* Subsistere est stare per se , subsistere verò subsistentiâ alienâ , est stare per aliud, sed implicat idem stare per se, & stare per aliud, ergo &c.

Confirm. 1. Si subsistentia est modus , ut supponimus, implicat humanitatem subsistere subsistentiâ alienâ, non secus ac Petrum sedere, aut ubicari sessione , aut ubicatione alienâ.

Confirm. 2. Non potest humanitas ubicari immensitate Divinâ, ergo nec subsistere subsistentiâ Divinâ.

Confirm. 3. Quia si una Persona Trinitatis incarnaretur ; Tota Trinitas deberet dici incarnata : *Prob. sequela*, quia operationes Trinitatis ad extra sunt indivisæ, eò quòd sint à Deitate, quæ est una in Tribus.

Resp. nego antec. Ad probationem , si subsistere sumatur pro stare per se, seu vi, & efficaciâ propriâ, transmitto repugnare aliquid subsistere subsistentiâ alienâ , dixi transmittito , quia puto posse idem subsistere simul subsistentiâ propriâ, & alienâ, ut docet Arriaga in metaphysica : At si subsistere sumatur, pro ut hîc sumitur , pro eo quod est habere ultimum complementum in linea substantiæ, eo modo , quo accidentia per inhærentiam habent ultimam perfectionem propriam accidentium, poterit aliquid subsistere, seu compleri subsistentiâ alienâ.

Ad 1. Confirm. Subsistentia creata , quæ est purus modus non potest reddere subsistentem , nisi propriam naturam, sicut nec ubicatio Petri potest ubicare Paulum, quia aliter non esset ultima actualitas , sed posset ulterius

actuari, quod est contra definitionem modi: At subsistentiæ Divinæ non sunt puri modi, & licet non sint tres Res, nec tria entia substantivè, cum una sit essentia, seu substantia: sunt tamen tres realitates, seu entitates invicem inter se realiter distinctæ, ut docent communissimè Theologi cum Magist. D. Thom. 1. p. q. 23. a. 3. ex Aug. l. 1. de Doctr. Chr. c. 5. & ideo possunt ita naturam Divinam terminare, & substantialiter complere, ut possint etiam complere, & terminare naturam creatam.

Ad 2. Ratio, quare immensitas divina non possit ubicare Creaturam, est, quia ubicatio, ut denominet subiectum ubicatum, debet habere rationem formæ physicæ, quæ perficiat, & perficiatur, non verò puri termini, qui perficiat, non perficiatur; aliter Humanitas Christi domini, quæ de factò est unita Immensitati, esset formaliter immensa, quæ est hæresis Ubiquetariorum: contra verò; Ut subsistentia denominet humanitatem subsistentem, & sanctitas divina infinitè sanctam, sufficit quod humanitas illis uniatur tamquam termino purissimo, à quo perficiatur, quin perficiat, propterea subsistentia, & sanctitas divina possunt denominare Humanitatem formaliter subsistentem, & sanctam, per hoc præcisè quod sint formæ logicæ: At non potest humanitas Christi denominari formaliter immensa, omnipotens, æterna; quia immensitas &c. vel deberent physicè humanitatem informare, vel deberet dari confusio naturæ divinæ cum humana, juxta hæresim Euthichianorum. Quare solum per communicationem idiomatum de hoc homine in concreto, nempe de Christo dici potest, quod sit immensus, Omnipotens, æternus, non tamen de humanitate in abstracto, quamvis de ea dici possit, quod sit subsistens, & sancta formaliter per subsistentiam, & sanctitatem verbi, sufficit enim quod humanitas illis uniatur, ut sit substantialiter completa, & infinitè sancta, seu summe amabilis? At non sufficit, quod uniatur immensitati existenti ubique, ut ipsa sit immensa, & ubique, sicut non satis est, quod manus uniatur animæ existenti in capite, ut manus sit in capite, quavis enim unum extremum intrinsecè unitum alteri debeat esse ubi est alterum, non tamen ubicumq; est illud.

Ad 3. Nego sequelam: ad probationem verum est operationes divinas ad extra esse toti Trinitati commu-

nu-

munes, unde non solum Pater, sed etiam Filius, & Spiritus Sanctus Cœlum creârunt, at influxus sustentativus, quo subsistentia verbi sustentat, perficit, ac terminat humanitatem, non est influxus effectivus, cum nihil in Humanitate producat, dum subsistentia verbi supplet defectum subsistentiæ creatæ, sicut nec materia aliquid producit, dum sustentat formam, differt tamen influxus sustentativus verbi in humanitatem ab influxu materiæ in formam, quia verbum sustentat pure terminando, & complendo, quin compleatur, & perficiatur, secus verò materia, & ideo verbum est purus terminus, materia verò est subjectum physicum formæ. Hinc quamvis Incarnatio pro ut est actio unitiva humanitatis cum verbo. seu productio unionis hypostaticæ tribuitur toti Trinitati, non tamen pro ut est unionis terminatio, & sustentatio, ac ultimum complementum humanitatis, unde solum verbum est incarnatum, quamvis etiam Pater, & Spiritus Sanctus incarnaverint, seu produxerint unionem verbi incarnativam.

ARTICULUS II.

An possit etiam positivè demonstrari possibilitas, & existentia Incarnationis.

VII. **D**emonstrare positivè est cognoscere cognitione perfecta per medium sive prioristicum, sive posterioristicum, quod aliquid non repugnet, sicut demonstrare negativè rei possibilitatem, est cognoscere non repugnantiam per meram solutionem difficultatum, atque adeò solum cognitione imperfecta: propterea ex vi demonstrationis positivæ dicimus absolute rem esse possibilem, ex vi demonstrationis negativæ, dicimus solum non apparere repugnantiam, atque adeò esse possibilem secundum quid, seu conditionatè, spectatis scilicet iis, quæ apparent.

Dico nunc cum communi, Nequit lumine naturali positivè demonstrari possibilitas, aut existentia Incarnationis, atque adeò nequit evidenter cognosci absoluta possibilitas, vel existentia unionis hypostaticæ.

Prob. 1. Quia passim Scripturæ, & PP. docent mysterium hoc esse absconditum à sæculis, investigabile, ineffabile. D. Aug. habet: *Hic si ratio quaratur, non erit mirabile, si exemplum poscitur, non erit singulare, Demus Deum aliquid posse,*

posse, quod nos fateamur investigari non posse: in talibus rebus tota ratio facti est potentia facientis. D. Dionys. Ipsa inquit, *ÆSU* in Carne apparitio, & ineffabilis est sermone omni, & omni ignota intelligentie.

Prob. 2. Ratione: duplici viâ potest aliquid positivè demonstrari, altera à priori, vel per causam, vel immediate attingendo prædicata intrinseca rei, alterâ à posteriori attingendo rem ipsam in suo effectû, sed neutro modo potest naturali lumine evidenter attingi in Deo vis assumptiva humanitatis, seu possibilitas Incarnationis; ergo nequit positivè demonstrari. Probatur minor, non potest enim immediate attingi in Deo vis ista assumptiva humanitatis, quia immediata Dei visio cuiusque Creaturæ est naturaliter indebita, ut hîc supponimus ex prima parte; Neque possunt evidenter inferri ex ipso conceptu Dei cumuli omnium perfectionum, sicut non infertur mysterium Trinitatis, seu vis productiva ad intra, utrumque enim mysterium est absconditum à sæculis, ergo possibilitas Incarnationis demonstrari non potest à priori, nec quasi à priori, ut potest in mea sententia demonstrari possibilitas, & existentia Dei.

Neque potest à posteriori evidenter attingi in aliquo effectû, cum quo prædicatum illud divinum evidenter connectatur, nihil enim assignari potest, quod connectatur cum vi assumptiva humanitatis, quæ est in Deo, ergo sicut nequit etiam à posteriori demonstrari Trinitas Personarum, quia nihil datur in natura, quod cum eo mysterio formaliter connectatur, ita nec possibilitas Incarnationis. Denique ipsa existentia unionis hypostaticæ, cum sit entitativè, & quoad substantiam supernaturalis, nequit lumine naturali attingi, quia quod habet entitatem supernaturalem, habet etiam proprietates, atque adeo species impressas, & cognoscibilitatem etiam supernaturales, & toti naturæ indebitas.

VIII. Objic. 1. Potest possibilitas alicujus doni supernaturalis evidenter cognosci, præciso lumine supernaturali, ergo etiam possibilitas unionis hypostaticæ: *Prob. anteced.* quia lumine naturali evidens est Omnipotentiam infinito excessu superare quamcumque exigentiam, & meritum naturæ Creatæ, ergo evidens est posse ponere bona supernaturalia excedentia exigentiam totius naturæ,

Resp.

Resp. 1. Nego antecedens cum D. Th. & aliis communius; ex eo enim quod omnipotentia sit virtutis infinitæ, solum sequitur, quod possit ponere bonum præstantius, & præstantius in infinitum, non tamen sequitur quod sit absolutè possibile accidens supernaturale indebitum cuicunque naturæ, seu substantiæ creatæ; sicut in communissima sententia non sequitur quod sit possibilis substantia supernaturalis, cui sit debita connaturaliter visio Dei. Deinde omisso antecedente, *nego conseq.* quamvis enim evidens sit dari posse aliquod ens supernaturale, non proinde sequitur possibilitas hujus determinati entis supernaturalis: ex Regula enim summæ philosophicæ A genere ad speciem, & à specie ad individuum non tenet consequentia affirmativa.

Objic. 2. Debita est Angelo comprehensio omnium inferiorum: ergo evidenter Angelus cognoscit lumine naturali quodcumque prædicatum humanitatis, sed in humanitate est hoc prædicatum, quod possit à divina persona assumi; ergo Angelus evidenter attingit hoc prædicatum, atque adeò possibilitatem incarnationis. Neque dicas, quod, licet non sit in humanitate repugnantia, ut assumatur, possit tamen dari in Persona divina repugnantia ad assumendam humanitatem; Nam impossibile est in prædicatis respectivis repugnantiam esse in uno tantum extremo, ergo si non datur repugnantia in humanitate, ut assumatur, neque dabitur in persona divina ut assumat.

Conf. De facto Angelus naturali lumine cognoscit in humanitate Christi non adesse propriam subsistentiam, nec subsistentiam aliam creatam, ergo evidenter infert Humanitatem Christi terminari subsistentiâ divinâ, atque adeò cognoscit Incarnationis possibilitatem.

Resp. Ad comprehensionem humanitatis debitam Angelo spectare solum, quod evidenter attingat omnia prædicata humanitatis absoluta, non tamen respectiva; Etenim cum non possit prædicatum respectivum evidenter attingi, nisi evidenter attingatur utrumque extremum, nec possit naturaliter Angelus evidenter attingere possibilitatem divinam, ad quam dicit respectum humanitas ut assumibilis; ideo non spectat ad comprehensionem humanitatis, quod evidenter attingatur ejus assumibilitas à Persona divina: quare Angelus dum comprehendit humanitatem, ita attingit omnia prædi-

cara

cata absoluta humanitatis , ut non cognoscat in ea esse repugnantiam ad assumi, quin tamen evidenter cognoscat, non dari istam repugnantiam ut assumatur aliud autem est non cognoscere repugnantiam , aliud verò cognoscere evidenter , quod non detur repugnantia, ex eo quod non cognoscatur repugnantia , habetur cognitio possibilitatis solum secundum quid , & conditionatè, hoc est spectatis iis, quæ apparent, quin habeatur cognitio possibilitatis perfecta, evidens, & absoluta, quæ solum habetur , quando evidenter cognoscitur per demonstrationem, sive prioristicam, sive posterioristicam, nullam dari repugnantiam.

Ad Confirm. Angelus non cognoscit in Humanitate Christi domini adesse substantentiam propriam , vel alienam Creatam, non tamen cognoscit evidenter eam non dari , quamvis enim si daretur in Christo substantia creata , naturaliter deberet Angelus illam cognoscere : potest tamen divinitus ea occultari , unde ex hoc, quod non videat Angelus in humanitate Christi substantentiam creatam , solum potest inferre disjunctivè , vel quod Deus velit illam occultare , vel quod humanitas subsistat substantia increata , unde non infert evidenter possibilitatem Incarnationis , præterquam quod dubitare etiam potest , An ea humanitas subsistat substantia Angeli superioris , cujus comprehensio non est ei debita.

IX. *Objic. 3.* Dæmon nullam habet cognitionem supernaturalem, & tamen cognoscit evidenter Incarnationem existere , ergo lumine naturali cognoscitur existentia, atque adeò possibilitas Incarnationis. *Antec.* quoad primam partem supponitur , quoad secundam probatur, primò quia Luc. 4. dicitur : *Non sinebat ea loqui, quia sciebant ipsum esse Christum.* Secundò quia Dæmon cognovit vocem illam, *Hic est filius meus dilectus*, non fuisse prolatam à Creatura, sed à Deo, qui mentiri non potest. Tertiò Novit Dæmon ipsum Christum suam divinitatem testatum fuisse, & miraculis confirmasse, ergo evidenter novit Dæmon Incarnationis existentiam.

Resp. *Nego secundam partem antecedentis.* Ad primam probationem dico cum Angelico 3. qu. 43. art. 1. Quod illud scire erat potius secundum suspicionem, quam certitudinem ; constat enim ex Ambros. Chrysost. & aliis PP. quod Dæmon visis miraculis ex qua-

dam

dam suspitione solum conjecturaverit, eum esse Filium Dei. Ad secundam, non erat evidens demoni, quod vox illa non fuisset edita à creatura aliqua superiore, nec erat evidens, de quam filiatione loqueretur, de naturali, an de adoptiva? Ad tertiam, neque erat evidens demoni, quod testificatio illa esset à Filio Dei naturali, nec quod miracula excederent omnem virtutem creatam, & transmissio quod hoc esset illi evidens, non erat evidens, quod miracula illa essent à Deo ut loquente, ita ut non possent falsum comprobare.

X. *Objic. ultimd.* Demonstratur quasi à priori expressis, & notissimis existentia, & possibilitas Dei sub Conceptu entis optimi includentis omnem perfectionem, & excludentis omnem imperfectionem, juxta ratiocinationem D. Ansel. & Perez, ut fuse diximus in de Deo *disp. 1. q. 1. ar. 3.* ergo etiam similiter demonstrari potest possibilitas, si minus existentia Incarnationis. Antecedens à nobis admittitur: consequentia prob. Sic demonstratur Dei existentia: Nulla chymæra excludit contradictionem; ergo. Nulla chymæra excludit aliquam imperfectionem (nempe illam, quæ imbibitur in contradictione, quæ imperfectio est, & malum reddens frustrabilem divinam volitionem) ergo nulla chymæra excludit quancumque imperfectionem (quod enim includit aliquam imperfectionem, non potest excludere quancumque nec distributivè, nec collectivè) ergo id, quod excludit quancumque imperfectionem, nempe Ens optimum, non est chymæra. Hæc ultima consequentia sequitur juxta Regulam summulisticam, quod propositio universalis negativa convertatur simpliciter, v.g. Nullus homo est lapis, ergo nullus lapis est homo, unde si nulla chymæra excludit quancumque imperfectionem, evidenter sequitur hæc consequ. ergo Nihil, quod excludat quancumq; imperfectionem, est chymæra, atque adeò Ens optimum non est chymæra, sed possibile, Atqui si est possibile, evidenter existit, quia si careret existentia, non excluderet quancumq; imperfectionem, ergo Ens optimū, seu Deus evidenter existit. Quod autem hæc omnia vera sint tum in actu signato, tum in actu exercito, ex eo apparet, quia similiter demonstratur à contrario Ens pessimū esse impossibile, dicendo sic: Nullum possibile excludit perfectionem possibilitatis, ergo

nul-

nullum possibile excludit aliquam perfectionem ; ergo nullum possibile excludit quamcumque perfectionem , ergo quod excludit quamcumque perfectionem, nempe Ens pessimum, non est possibile , sed repugnat, atque adeò non existit. Probatur nunc , quòd si ista demonstratio sit efficax, demonstretur etiam possibilitas Incarnationis : Nam si evidenter ostenditur non esse chymæram, quod excludit quamcumque imperfectionem , seu Deum ; evidenter etiam sequitur non esse chymæram in Deo vim assumptivam humanitatis excludentem quamcumque imperfectionem , atque adeò possibilem esse Incarnationem.

Respondeo Bene demonstrari Deum ens optimum non esse chymæram, sicut bene etiam demonstratur Ens optimum non esse Creaturam , atque adeò Creaturam optimam repugnare , dicendo similiter : Nulla Creatura excludit dependentiam, ergo neque excludit aliquam imperfectionem , ergo neque quamcumque, ergo quod excludit quamcumque nempe ens optimum , non est Creatura. Nego tamen posse similiter demonstrari possibilitatem Incarnationis , sicut nec Trinitatis , seu quòd non sit chymæra in Deo vis assumptiva humanitatis , aut Trinitas Personarum ; quia ex ea ratiocinatione non sequitur absolute quòd vis assumptiva humanitatis , aut Trinitas excludant imperfectionem , sed solum sequitur conditionatè , quòd si excluderent quamcumque imperfectionem , non esset chymæra ; quòd Deus possit incarnari, & sit Trinus : contra verò absolute sequitur , quòd Deus non sit chymæra, & existat , ut fusè ostendimus loco laudato in prima parte pervestigantes , quomodo existentia Dei demonstrari possit lumine naturali adversùs Atheos.

Q U Æ S T I O II.

Utrum in Deo detur necessitas ad optimum, atque adeo ad ponendam Incarnationem.

Q Uòd Incarnatio fuerit Deo conveniens optimè ostendit D. Th. hic q. i. ; Cùm enim Divina natura sit essentia bonitatis , & ad rationem boni spectet , esse diffusivum sui, seu aliis se communicare, & extra se ferri, ut notat D. Dionysius *de div. Nom.*, ideò conveniens fuit sum-

immæ divinæ bonitati perfectissimo modo se communicare ad extra , atque aded non solum dando Creaturis quandam sui similitudinem secundum esse naturale , & participationem divinæ naturæ per gratiam supernaturalem, sed etiam conferendo naturæ creatæ propriam personalitatem, aded ut idem simul sit Deus , & homo , quo communicationis genere ad extra majus dari non potest. Quod verò etiam fuerit conveniens Universo, cui maximam contulit perfectionem , nemo dubitat; sicut etiam quod fuerit conveniens naturæ humanæ : per incarnationem enim Natura humana ad solium Divinitatis attollitur , & nos Christi membra per gratiam efficimur divinæ consortes Naturæ , & Christi veluti Palmites , quod expendit Aug. in illud *Ego sum vitis &c.* dicendo, *Unius quippe natura sunt vitis , & palmites, cum ergo esset Deus, cujus natura non sumus, factus est homo , ut in illo esset vitis humana natura , cujus nos palmites esse possemus.*

Dubitatur tamen, an fuerit etiam necessaria Incarnatio sive simpliciter ex quadam Dei necessitate morali ad ponendum opimum , sive saltem ex suppositione peccati ad exhibendam Deo condignam satisfactionem. Illud prius in præsentī quaestione discutiemus , hoc in sequenti.

ARTICULUS I.

Explicatur Status Quaestionis.

I. CERTUM est 1. Deum esse plenè liberum ad quascumque Creaturas producendas, nec ullâ necessitate metaphysicâ, aut physica cogi ad aliquid producendum ; nec potest id sinè errore negari , ut notat Ruiz q. 11. de vol. Dei; dicitur enim Psalm. 113. *Omnia quacumque voluit, fecit, & Judith. 9. Hoc factum est, quod ipse voluisti : & ratio est , quia ad conceptum Aseiratis , ac independentiæ spectat posse Deum ad libitum carere quolibet à se distincto. Sicut autem potest Deus liberè se non communicare Creaturæ , ita potest liberè se communicare hoc, vel illo pacto, pro ut libuerit : etiam si talis communicatio sit minùs perfecta objectivè. Propterea sancti P.P. communiter docent, potuisse Deum reparare homines lapsos alio pacto, circumscriptâ Incarnatione, quod non esset verum, si debuisset perfectissimo*

modo se communicare. Athan. habet or. 3. contra Ari-
nos. *Poterat sine ullo adventu Christi solummodo loqui Deus
& solvere maledictionem.* Similiter loquuntur Aug. Beru.
apud Maur. q. 50. de Deo. Quare errarunt Calvin. Lu-
ther. Bucer. &c. putantes apud Bellar. l. 3. de Gr. c. 15.
Deum non posse facere, nil ea, quæ facit; Nec non Phi-
losophi, qui cum Aristotele, Avicen., Averr. aliqui-
bus in locis negarunt Dei libertatem, eò quòd non
poterant percipere mysterium illud Decretorum libe-
rorum, quod videtur sibi necessitatem, & contingent-
iam identificare.

Certum est 2. Deum de facto semper fecisse opti-
mum in iis, in quibus non proceditur in infinitum, v. g.
quia melior est existentia, universi, quàm non existen-
tia, Incarnatio, quàm non Incarnatio, ordo super-
naturalis, quàm ejus negatio, positio omnium gene-
rum entium, quàm non positio &c. idè de facto
Deus hæc omnia posuit. Constat hoc tum ex Concilio
Francofordienti, ubi dicitur: *Credamus eum omnia velle,
qua meliora sunt*: tum ex sensu communi Philosopho-
rum, Theologorum, & Patrum. Aristoteles 2. de Cœl.
34. habet: *Natura semper facit eorum, quæ fieri possunt, quod
optimum est.* D. Th. 1. p. 47. a. 3. *Natura facit, quod melius
est, & multo magis Deus.* Aug. l. 1. de lib. Arb. c. 5. *Quid-
quid tibi vera ratione melius occurrit, hoc scias fecisse Deum,
tamquam bonorum omnium Conditorem.* Idemque do-
cent alii P. P., & Scholastici apud Ruiz. loco citato
disp. 19.

Neque dicas; Deum fecisse de facto optimum, vel
quia semper facit quod est conforme primæ Regulæ, seu
voluntati divinæ, vel quia semper habet pro fine suam
gloriam, & pro mensura manifestationis suæ glo-
riæ, quam intendit, semper adhibet media opportu-
niora, vel quia semper operatio Dei, utpote divina, est
optima, & honestissima, unde Deus semper fecit opti-
mo modo potius, quàm optimum, seu optimum forma-
liter, non materialiter, & objectivè.

Nam contra est, quia juxta has explicationes univer-
sum deberet dici optimum, etiam si esset tuguriolum, in
quo pauci homines, cæci, & claudi cum Zoophitis de-
gerent; quod tamen est alienum à communi sensu:
Neque enim dicimus esse optimam sanitatem, quam
ponit v. gr. Diabolus, juxta mensuram à se intentam,
si ea

si ea sanitas sit imperfecta; Neque Conciones dicuntur optimæ, si ad finem à Concionatore præstitutum pertingant, quando Concionator sibi finem imperfectum præstituit; Quare illud dicitur optimum, quod inter reliqua simpliciter præstat, & in hoc sensu dicimus Deum fecisse universum optimum. Si enim decet Deum optima media ponere ad finem sibi præstitutum manifestationis suæ Gloriæ, à fortiori decet Deum præstituere sibi finem optimum, atque adeò voluisse suam gloriam manifestare optimo modo. Idcirco D. Th. 1. p. q. 47. a. 2. *Deus fecit universum optimum, secundum modum Creaturæ*: modus autem Creaturæ est, ut sit optima non solum formaliter, sed etiam materialiter, ergo Deus fecit universum utroque modo optimum, ponendo scilicet in illo, quod melius est in iis, in quibus non est abire in infinitum. In speciebus autem, & in individuis est abire in infinitum, ac proinde in iis optimum non est possibile; ideo in universo optimo nec datur optima species, nec optimum individuum, nec omnia simul, cum supponantur impossibilia, sed datur in iis dumtaxat optimum relatè ad ordinem universi, in quo sensu Sap. 11. dicitur: *Universa in pondere, mensura, & numero disposuisti*; sicuti quamvis oculus præstet pedi, at relatè ad Corpus humanum præstat dari duos oculos, & duos pedes, quàm quatuor oculos sine pedibus, etenim ut dicitur 1. Cor. 12. *Si totum Corpus oculus, ubi auditus, ubi odoratus? &c. & si omnia essent unum membrum, ubi Corpus?*

Hinc PP. communissimè docent, convenientius fuisse ad perfectionem Universi Primò, quòd assumeretur natura humana potius, quàm Angelica, eò quòd sic utraque Natura, intellectualis simul, & corporea assumpta quodammodo videatur. Secundò, quòd incarnatio fieret in medio temporum, ut magis æstimaretur. Tertiò, quòd Deus permiserit peccata, quia ut habet Aug. in Enchir. c. 27. *Melius judicavit de malis bona facere, quàm mala nulla esse permittere*: & ideo Ecclesia canit, *O felix culpa qua talem, ac tantum habere meruit Redemptorem*. Quartò quòd Incarnatio Christi domini facta fuerit in Carne passibili; sic enim elucet magis divina Justitia, & misericordia; nec non Christi domini Charitas: Idemque dicas in innumeris aliis Dei operibus, in quibus PP. conantur semper ostendere sapien-

tissimè, & convenientissimè fuisse sic disposita ; qui conatus procul dubio fuisset inanis, nisi fixum, ratumque fuisset apud PP. Deum semper fecisse optimum.

II. Quæstio nunc est, Utrum Deus semper posuerit optimum ex mero decreto suo libero, an verò ex quadam inclinatione, seu necessitate morali. Ruiz de Dei vol. diss. 9. Gran. ib. d. 3. P. Thyrsius Gonz. c. 33. d. 11. Maur. de Deo d. 51. docent dari in Deo moralem necessitatem ad optimum, adeò ut moraliter certum sit, optimum à Deo esse ponendum, & non nisi imprudentissimè negetur positum, sicut homo sinè auxilio speciali Dei moraliter necessitatur ad succumbendum alicui veniali ; cum hoc tamen discrimine, quod in Creaturis necessitas moralis stet cum difficultate in oppositum, in Deo verò sit defæcata ab hac imperfectione, & veluti metaphorica ; eo pacto, quo metaphoricè dicitur Deus irasci, pœnitere, cogi ad miserendum, ad puniendum, &c. quatenus ea præstat, quæ solent homines præstare, quando irascuntur, dolent, coguntur ; absque ulla tamen perturbatione, aut difficultate. Propterea putant, quod licet omnipotentia æquilibrer se habeat ad utranque partem, Bonitas tamen divina inclinet omnipotentiam ad ponendum optimum præ non optimo, eà tamen inclinatione, quæ non extenuet æquilibrium potentiaæ physicae, sed solum reddat inopinabilem effectum non optimum : sicut inopinabile est, quod Tali millies projecti idem punctum sint daturi : nec non quod ea puncta, quæ in primis mille projectionibus dederunt, sint iterum eodem ordine daturi, si centies millies projiciantur, unde necessitas ad optimum in Deo non est physica, sed moralis. Ex quo fit, quod si Deus non poneret optimum, non sequeretur, quod Deus non esset Deus, ut putat Gran. loc. cit. ; Nam sic metaphysicè ad optimum necessitaretur ; sed solum sequeretur, quod uteretur suo dominio, ac libertate pro ut potest.

A R T I C U L U S II.

Stabilitur in Deo Necessitas Moralis ad Optimum.

III. **D**ico nunc 1. Deus neque metaphysicè, neque physicè necessitatur ad optimum ponendum. Ità communiter.

Pri-

Prima pars Conclus. constat ex dictis articulo antecedenti; quia necessitas metaphysica in Deo ad ponendum aliquid extra se, derogat Aseitati, Independentiæ, ac Libertati divinæ. Secunda pars etiam patet, quia si necessitaretur physice, seu ex exigentia propriæ naturæ, necessitaretur etiam metaphysice; Cum non possit Deus contra propriam naturam operari: Ideo enim potest miraculose contra exigentiam causarum secundarum operari, quia illis est superior, potestque ad arbitrium disponere contra earum exigentiam, non est tamen se ipso superior, unde nequit exigentiam propriæ naturæ frustrare.

IV. Dico 2. Neque ex suppositione, quod velit Deus condere universum, tenetur metaphysice, aut physice illud condere optimum. Ità etiam communiter contra Raym. Lullum putantem, quod aliter derogaretur Divinæ Sapientiæ

Prob. ex dictis articulo superiore, quia spectat ad libertatem, & Aseitatem Dei posse carere quolibet à se distincto, ergo etiam posse ponere Creaturas, quas maverit, etiam si non optimas; atque adeo potest condere universum non optimum. Probatur consequentia, quia utrumque consonat Libertati, & independentiæ divinæ; nec dissonat Sapientiæ, ad quam non spectat ponere optimum materialiter, sed formaliter, hoc est ex fine honesto manifestandi gloriam suam, & adhibendo media idonea ad talem finem, quin teneatur intendere manifestationem summam gloriæ suæ. In tantum Creaturæ rationales eligentes minus bonum præ majori minus sapienter, ac honestè operantur, quia sic minus bene se habent in ordine ad finem ultimum, & propriam felicitatem: At Deus perinde est felix, & semper optimè se habet in ordine ad finem suum, siue ponat minus bonum, siue optimum, ergo æque sapienter, ac honestè semper operatur. Imò sicut perfectissimè, quoad artem operatur Pictor, quando affabre monstrum depingit, ità sapientissimè operatur Deus, si universum non optimum velit ponere; quando ex tali opere manifestatur summa ejus independentia, & libertas. Quod ex eo etiam patet, quia ex communi PP. sensu, potuit in universo non ponere Incarnationem, ergo potuit condere universum non optimum.

V. Dico 3. Cum DD. laudatis contra Lugo d: In-

carnatio. disp. 2. Arri. Lumbier, & Alios. Datur in Deo inclinatio, seu moralis necessitas ad ponendum optimum, atque adeò ad Incarnationem ponendam: Necessitas tamen hæc est potius metaphorica, non secus ac metaphorice dicitur Deo irasci, ac poenitere, cum non imbibat difficultatem in oppositum, sed solum fundet Judicium prudens de optimo ponendo, & imprudentissimum, ac inopinabile de eo non ponendo.

Prob. 1. ex Scripturis cum Ruiz. & P. Tyrso loco citato Lucæ 11. dicitur: *Si vos cum sitis mali, nostis bonadata dare filiis vestris, quanto magis Pater vester de Cælo dabit spiritum bonum petentibus se?* & Isa 49. Numquid oblivisci poterit mulier infantem suum &c. & si illa obliviscitur, ego non obliviscar tui? In quibus textibus ostenditur, quod si datur moralis necessitas in Parentibus malis ad amandos filios, à fortiori ea datur in Deo Optimo; atque adeò Deus non ex mero libero arbitrio, sed ex morali necessitate, seu inclinatione fundata in sua bonitate dat spiritum bonum petentibus se, ergo datur in Deo moralis ista necessitas ad optimum.

Prob. 2. Ratione: quia negatâ in Deo necessitate morali ad optimum, rueret scientia naturalis, seu de naturis rerum; nec posset à nobis cognosci, num ignis v. gr. Naturâ suâ calefaciat, an frigefaciat. Sequela est absurda, ergo & id, unde sequitur, probatur sequela, quia Negatâ in Deo eâ necessitate, sequeretur, quod Deus tum physicè, tum moraliter esset æquilibrium indifferens, vel ad secundandas, vel ad frustrandas exigentias rerum; hoc est vel ad operandum ut Author naturæ, dando substantiæ qualitates exigas, vel miraculosè, ut author operum mirabilium, dando substantiæ qualitates contrarias; ergo ex hoc, quod hætenus dederit igni calorem, non bene posset inferri, quod calor sit exigitus ab igne, atque adeò non possemus cognoscere naturam, seu exigentiam naturalem ignis. Præterea sequeretur, quod quamvis hætenus ignis semper calefecerit, & nix frigefecerit, imprudenter tamen hic & nunc expectaremus ab igne potius calorem, quam frigus, & imprudenter potius ad ignem, quam ad nivem accederemus, ut calefiamus. Probat sequela: quia si Deus caret necessitate morali ad secundandas rerum exigentias, eo ipso est omnino indifferens ad concurrendum cum igne

igne potius, quàm cum nive ad calorem, & licèt per tot sæcula ignis semper calefecerit; Deus tamen ab æterno sicut fuit indifferens ad decernendum primâ vice, quòd cum igne potius, quàm cum nive concurreret ad calorem, ita fuit indifferens ad decernendum, quòd hætenus per tot sæcula ignis calefecerit, & amplius non calefaciat, ergo stante hac Dei æquilibri indifferentiâ ad hoc potius, quàm illud decretum, omnino imprudenter expectaremus ab igne potius calorem, quàm frigus, tam primâ vice, quàm nunc, & sanè quia Deus fuit indifferens v. gr. ad ponendum numerum parem, vel imparem Astrorum, vel Angelorum, omnino imprudenter, ac temere assereremus, Deum posuisse numerum parem potius, quàm imparem, ergo si fuit ab æterno indifferens ad decernendum, vel quod hætenus tantùm ignis calefaciat, & non amplius, vel quod ulterius etiam calefaciat, omnino imprudenter expectaremus nunc calorem ab igne: ab indifferenti enim quâ indifferenti, nihil potest inferri determinatum.

Neque dicas, esse communem persuasionem, quòd Deus servet solitum, & quod secundet exigentias rerum: Nam si Deus est indifferens tam ad decernendum, quod servetur solitum in posterum in natura, quàm ad decernendum oppositum, recurrit, quòd ista persuasio, quòd solitum sit servandum, sit omnino imprudens, & sine ullo fundamento.

Prob. Denique quia lumine naturæ videtur notum, Deum non æquilibrer se habere moraliter relatè ad quamcumque suam operationem, vel ejusdem omissionem, quamvis æquilibrer se habeat physicè, ergo admittenda est in Deo inclinatio aliqua seu necessitas moralis ad aliquam operationem physicè liberam, ergo etiam relatè ad optimum, ad quod essentia bonitatis summe inclinatur. Antecedens constat multipliciter: Nam primò non eodem modo se habet Deus ad preces exaudiendas, vel non exaudiendas, sed ex sua benignitate inclinatur potius ad illas exaudiendas, sicut magis inclinatur ad exaudiendas preces Sanctorum, Beatissimæ Virginis: ac ipsius Christi domini, quàm alicujus hominis scelestissimi: secundò non æquilibrer se habet ad præmiandas, vel non præmiandas bonas operationes, aut ad puniendas malas. Hinc Clémentis Rom. l. 3. Reco. docet, ex

justitia Dei rectè inferri animæ immortalitatem , ut post hanc vitam detur bonis , ac malis operibus sua retributio , quæ sæpè non datur in hac vita : quod si ista necessitas moralis in Deo non daretur , nulla esset isthæc ratiocinatio. Tertiò ex sua misericordia magis inclinatur ad miserandum , quàm ad puniendum. Quartò ex sua Providentia magis inclinatur ad secundandas naturæ exigentias , quàm ad frustrandas , ut ostendimus. Quintò magis inclinatur ad eligendam Christi matrem immaculatè conceptam , quàm maculatam , aliter insufficiens esset illa celebris ratiocinatio : Potuit Deus eligere immaculatam , decuit ; ergo voluit. Quare idem dicendum de Inclinatione ad optimum , Et ratio à priori est , quia ex D. Dionys. *Bonum est diffusivum sui* , seu inclinatur ad se aliis communicandum , ergo Deus summè bonus , est sui summè diffusivus , & ad perfectissimam sui communicationem inclinatur , atque adeò ad condendum Universum optimum.

Neque dicas , quod deberet inclinare ad condendos plures mundos , ut perfectiori modo se communicet. Nam , ut notat D. Th. 1 p. q. 47. ar. 3. Plures mundi non essent quid perfectius , quàm unus , nisi tantùm materialiter : Agens autem perfectissimum , ut est Deus , non intendit pluralitatem materialem , ut finem ; quia hæc de se non habet certum terminum : si enim 10. mundos posuisset ; quare non 20. ? non 30. ? &c. Idcirco non nisi unus mundus debuit poni , ut perfectissimo modo se diffunderet Deus ; Præsertim quia quæ unitatis ordinem habent , perfectiora sunt.

A R T I C U L U S III.

Occurritur Objeclis.

VI **O**BJicies primò. Necessitas ista moralis , etiam si improprie dicta , & depurata ab omni difficultate in oppositum , Deo repugnat ; ergo non est admitenda ; antecedens probatur : nam vel tollit à voluntate divina æquilibrium ad utramque partem , vel non ? si tollit , jam tollitur à Deo perfecta libertas , ratione cujus , ut loquitur Aug. lib. 13. de Trinit. cap. 3. divinæ potestati omnia æqualiter subjacent ; si non tollit , ergo nulla datur in Deo propensio ad opti-

optimum, unde morali evidentiâ certum sit, optimum potius, quàm non optimum esse ponendum.

Confir. 1. Quia inclinatio divina identificatur cum ipsomet Deo; ergo debet esse infinita; inclinationi autem infinitæ ad ponendum optimum vel non potest à Deo resisti, vel potest. Si primum, inclinatio ista parit necessitatem metaphysicam, si secundum, jam non poterit resisti, nisi per aliam inclinationem infinitam ad ponendum non optimum, ut ostendatur divinum Dominium, & libertas: unde æqualis esset vis inclinans ad optimum, & non optimum, proinde non potest potius inferri, quòd sit ponendum unum, quàm alterum.

Confir. 2. Quia ut arguit Aug. l. 83. q. 22. *Ubi nulla indigentia, nulla necessitas, ubi nullus defectus, nulla indigentia, nullus autem defectus in Deo, nulla ergo necessitas.* Ergo sicut repugnat in Deo necessitas metaphysica, aut physica ad optimum, ita etiam moralis.

Resp. Argum. ab Adversariis solvendum in exemplis adductis. In forma, *Nego antec.* ad probationem necessitas moralis non tollit æquilibrium à libertate physica, sed perinde se habet, ac si difficultatem Deus experiretur ad ponendum non optimum; unde imprudenter dubitatur, num Deus sit politurus optimum; sicuti imprudenter dubitatur, an crastinâ sol sit oriturus; & an Tali millies projecti sint daturi puncta difformia: tollitur igitur per hujusmodi inclinationem æquilibrium à divina libertate morali, non à physica relatè, ad quam solum verificatur dictum Augustini laudatum.

Ad 1. Confir. Recurrunt instantiæ, & dico, inclinationem Divinam esse entitativè infinitam, utpote identificatam cum ipsomet Deo, sed terminativè, ac virtualiter habere suam latitudinem: Sicut enim immensitas infinita coëxistit spatio majori, vel minori, per majorem, vel minorem virtualitatem, seu quatenus præcontinet majorem, aut minorem ubicationem; idèmq; dicas de æternitate; ita inclinatio divina, quamvis infinita, magis, aut minus inclinat ad bonum majus, vel minus, prout est virtualiter majus, aut minus; sic Deus peccato resistit, adeò ut invitus dicatur ad illud concurrere; ista tamen resistantia, licèt subjectivè sit infinita, & cum Deo identificata, terminativè tamen est finita, & eò major, quòd gravius est peccatum.

Ad 2. Si Deus haberet necessitatem physicam, aut

metaphysicam, haberet defectum, aut indigentiam, & ideo essentialiter illam excludit: necessitatem verò moralem ad optimum non habet ex defectu, sed ex abundantia bonitatis, quæ exigit infinitè se communicare ad intra, & cum omnimoda libertate inclinat se ad communicandum ad extra, quia bonum est diffusivum sui, modo sibi consentaneo.

VII. *Objic.* 2. Si Deus nullum peccatum permisisset, universum esset perfectius, & tamen de facto peccata permisit, ergo non posuit optimum; atque adeo ad optimum nullatenus necessitatur: *Antecedens probatur* tum ex D. Tho. 1. sent. d. 46. a. 1. ubi ait: *Si nullus homo peccasset, universum genus humanum perfectius foret*; tum quia in tantum dici potest perfectius esse universum peccato permisso, quàm non permisso, quia sic magis manifestatur Dei Justitia, ac misericordia: atqui, ut notat Arriaga, posset hoc Deus manifestare citra permissionem peccati, infundendo creaturis rationalibus clarissimam notitiam de summa Dei Justitia, ac misericordia; ergo, &c.

Confirm. Si Deus necessitaretur ad id, quod de facto fecit, frustra essent nostræ preces, quibus à Deo poscimus bona; ut quid enim ea posceremus, si ad ea conferenda Deus habet necessitatem? Præterea oratio Christi Domini, ut transfret à se Calix, non fuisset digna Christo, voluisset enim à Deo non poni, quod summè necessarium erat ad Divinam Gloriam manifestandam perfectissimo modo. Denique beneficia Dei maximè deprimerentur, conferret enim Deus illa non liberaliter, sed veluti coactus.

Resp. nego antec. Communissimè enim PP. docent apud Ruiz *loc. cit.* convenientius fuisse, quòd peccata permitterentur: Ansel. in elucid. hæc habet: *Sicut Pictor nigrum colorem substernit, ut albus, vel ruber pretiosior sit, sic collatione malorum, Justi clariores sunt*: Et alibi dicit: *Ordinem seculorum tamquam pulcherrimum carmen quasi quibusdam Antithetis honestavit*. Ipse D. Tho. 1. p. q. 48. a. 3. Deus, inquit, est addè potens, quòd etiam bene potest facere de malis, unde multa bona tollerentur, si Deus nullum malum permitteret: neque enim laudaretur Justitia vindicans, & patientia sufferens, nisi esset iniquitas. Hinc multi apud Maur. q. 33. de Deo docent, D. Thom. seniore, & doctiorem factum retractasse in summa, quæ Junior in Sententiis docue-

docuerat. Neque facit ad rem, quod addit Arriaga, potuisse scilicet Deum citra peccati permissionem manifestare sua attributa: Nam diversimodè Deus commendatur, per hoc, quod fecerit, quàm per id, quod facere potuerat; magisque Deo gratias agit iustus, dum videt aliorum lapsum, quàm si non videret; & in Patria *latabitur iustus, cum viderit vindictam*, ut dicitur Ps. 57. quâ lætitiâ careret, si non videret vindictam.

Ad Confirm. Nostræ preces non sunt frustra, quamvis Deus ad optimum necessitetur, tum quia Deus potest assequi optimum in universo, etiam si non conferat nobis beneficia, dummodo conferat aliis; tum etiam, quia ad ea, ad quæ determinatè inclinatur, putà ad Incarnationem, ad multorum Prædestinationem &c. est physice plenè liber; tum demum, quia quædam beneficia melius est, ut conferantur postulata, quàm præcibus non præmissis; & idèò preces non sunt frustra ex hoc, quod Deus inclinetur ad optimum, sed maximè necessariæ. Præterea oratio Christi Domini, ut transiret Calix, non intendebat, quod Deus non poneret optimum, sed quod poneret optimum alio pacto, sublatâ ejus passione, & innumerorum damnatione, prout poterat. Quia tamen hoc ipsum erat melius, videlicet ponere optimum cum permissione peccati, damnatione multorum, Passione Christi Domini, & cum ejusdem oratione, ut Calix transiret, idcirco aptissimè eam posuit orationem. Denique beneficia Dei ex hac necessitate non deprimuntur, tum quia cum plenissima libertate physica possunt simpliciter omnibus denegari; tum quia cum libertate morali possunt denegari nobis, dummodo aliis conferantur; tum demum, quia necessitas ista moralis non oritur ex meritis nostris, sed ex divino ingenio, & perfectissimo modo operandi; unde bona, quæ confert, uni ipsi debemus, & humillimæ gratiæ rependendæ.

VIII. *Obje.* 3. Libertas est perfectio, ergo libertas perfectissima est summa perfectio Deo tribuenda, atqui libertas tum physica, tum moralis perfectior est, quàm sola physica, ergo utraque Deo tribuenda.

Confirm. Libertas moralis ad eligendum bonum minus præ majori, competit creaturæ, ergo à fortiori Deo, qui perinde est felix, quodcunque ponat, vel non ponat, extra se.

Resp.

Resp. Deo tribuendam libertatem perfectissimam; sicut autem ex cap. perfectissime libertatis excluditur à Deo libertas physica ad non diligendum se ipsum, aut ad amandum malum morale, ita excluditur libertas moralis ad non optimum; atque adeò sicuti quia est perfectissimè liber, ideò metaphysicè necessitatur ad amorem sui, & odium peccati, ita quia est perfectissimè liber, ideò necessitatur moraliter ad optimum, adeò ut apprehensa Divinâ bonitate inferatur cum evidentia morali, optimum esse ponendum.

Ad Confirm. Nego consequ. Voluntas creata ex imperfectione habet, quòd ad optimum non necessitetur; Deus verò necessitatur moraliter ex summa sua bonitate, ita ut quatenus virtualiter præcontinet minus bonum, inclinetur minus ad tale bonum ponendum, & quatenus virtualiter præcontinet majus, inclinetur magis; sicuti majorem habet complacentiam de bono majori, minorem de minori; & majorem displicentiam de peccato graviore, quàm de leviori, quia tamen se solo Deus est felicissimus, ideò cum hac inclinatione est plenissimè liber ad nihil ponendum, aut ad ponendum universum non optimum.

Objic. 4. Si Deus inclinaretur ad optimum, & posset huic inclinationi resistere, posset ponere actum secundum quid involuntarium: sequela videtur absurda; ergo, *prob. sequela*, quia actus voluntatis positus contra inclinationem naturalem est involuntarius secundum quid; cujusmodi sunt actus ex metu positi, & coacti. Cum enim voluntarium sit: *Quòd procedit ab intrinseco cum cognitione finis*: sicut est simpliciter involuntarius actus aut non procedens ab intrinseco, aut sine cognitione finis, ita est secundum quid involuntarius actus procedens ab intrinseco cum cognitione finis, si sit contra naturalem inclinationem.

Confirm. Vel inclinatio Dei ad optimum esset efficax, vel inefficax, si primum inferret necessitatem metaphysicam ad optimum: si secundum, non fundat probabilitatem de optimo ponendo; sicut inclinatio Dei inefficax de omnium salute non fundat probabilitatem, quòd omnes omninò sint salvandi.

Resp. Deum metaphoricè posse resistere suæ inclinationi ad optimum, sicut metaphoricè necessitatur ad optimum, eò, quòd citra difficultatem in oppositum. Hinc potest

potest cum eadem metaphora dici, quod Deus resistendo huic suæ inclinationi, ponat actum secundum quid involuntarium: & in hoc sensu PP. communiter docent, Deum coactum ab humanis culpis, & invitè ad opera Justitiæ descendere: & Isaïæ 28. Punitio dicitur esse *Opus peregrinum, & alienum a Deo*. Quare in creatura actus secundum quid involuntarius ita est contra naturalem inclinationem, ut molestiam afferat operanti, eò, quod operans careat bono, ad quod inclinatur, spectans ad felicitatem creaturæ, secus in Deo.

Ad Confirm. Inclinatione Dei ad optimum neque est efficax simpliciter, seu metaphysicè, neque inefficax, sed est efficax moraliter; quatenus morali certitudine certum est, quod Deus efficiat id, ad quod inclinatur. Voluntas salvandi omnes est inclinatio Dei efficax, quantum est ex parte ipsius, inefficax tamen, quantum est ex parte creaturæ; cum non teneatur Deus dare omnibus auxilia efficaciam; & ideo ex ista Dei inclinatione non infertur omnes esse salvandos.

IX *Objic. ult.* Si Deus ad optimum necessitaretur, deberet in universo ponere ordinem gratiæ, & gloriæ, & ipsam incarnationem, sine quibus universum non est optimum, sed hoc repugnat conceptui gratiæ, ergo nullatenus ad optimum ponendum necessitatur, ne moraliter quidem: *Prob. min.* Gratia ex suo conceptu superat omnem exigentiam tum physicam, tum moralem totius naturæ, atqui si Deus necessitaretur ad gratiam ponendam, gratia poneretur in universo ut exigita, unde non superaret quamcunque exigentiam, ergo necessitas moralis in Deo ad ponendam gratiam in universo repugnat conceptui Gratiae.

Confirm. 1. Incarnatio appellatur à D. Th. *Miraculum miraculorum*, sed implicat miraculum, quod essentialiter est contra exigentiam naturæ, esse simul iuxta exigentiam universi, ergo implicat Incarnationem exigi in universo, & Deum ad illam ponendam necessitari moraliter. Neque dici potest miraculum hoc non exigi ab universo, sed exigi in universo ab ipsa divina bonitate, quæ inclinat ad summam communicationem ad extra. Nam cum miraculum invertat ordinem naturæ, deberet dici, quod Deus Author Naturæ exigat inverti ordinem Naturæ, quod nemo dixerit.

Confirm. 2. Si Deus necessitaretur ad incarnationem ponendam

ponendam, sequeretur, quod Philosophus Gentilis cognoscendo lumine naturali hanc Dei inclinationem inferret certitudine morali existentiam Incarnationis, atque adeo Incarnatio esset naturaliter cognoscibilis. Adde, quod deberet inferri, Incarnationem fuisse positam in naturæ incommutabilis, imò etiam ab æterno. Denique ex eo, quod universum sit optimum, deberet inferri, Deum nihil posse ei addere, aut demere, unde non esset verum, quod Deus posset condere mundos perfectiores in infinitum.

Resp. Ordinem gratiæ, & gloriæ esse supra quamcunque exigentiam naturæ, eò, quod à nulla natura, seu substantia particulari creata, aut creabili exigatur gratia, vel Dei visio. Cum hoc tamen stat, quod possit ordo gratiæ, & gloriæ, ac ipsa Incarnatio exigi in universo ab infinita Dei bonitate summè sui diffusiva; proinde inclinatio Dei ad ponendam gratiam non repugnat conceptui gratiæ, ut notat Suar. *dis. 35. Metaph.*

Ad 1. Confirm. Miraculum, quod est contra exigentiam Naturæ naturatæ, est juxta exigentiam, & propensionem Naturæ naturantis, seu Dei: Cum enim ad perfectionem Universi spectet, quod aliquando accidant in eo miracula, & quod non desit miraculum omnium præstantissimum, nempe Incarnatio, idè Deus inclinatus ad optimum inclinatur pariter ad patranda aliquando miracula, & ad Incarnationem ponendam; quamvis autem miraculum violet, & invertat leges naturæ particularis, perficit tamen, non invertit ordinem naturæ universalis, seu Universi; & idè potest Author naturæ exigere, quod in Universo sint aliquando miracula.

Ad 2. Philosophus Gentilis non potest inferre existentiam Incarnationis, cum non possit lumine naturali ejus possibilitatem agnoscere. Quare ex inclinatione Dei ad optimum solum infert, quod si possibilis sit Incarnatio, ea detur in universo, pro quando expedit ad universi perfectionem, quia tamen ad perfectionem universi, & ad excellentiam mysterii spectat, quod post innumeras SS. Patrum preces ponatur jam diu expectatum, idè non debuit inferri, quod extiterit ab orbe condito, & multò minùs ab æterno, cum ad manifestandam Dei independentiam consonum fuerit, Mundum poni in tempore, et si poni potuisset ab æterno. Denique
sicut

sicut in instrumentis musicalibus harmonia haberi potest cum alio, & alio numero chordarum, ita optimum in Universo haberi poterat cum aliis, & aliis creaturis perfectioribus. & perfectioribus, dummodo dicant proportionem inter se, & relatè ad finem. Et juxta hunc sensum Eccl. 3. dicitur: *Non possumus eis qui dquam addere, nec auferre, quia fecit Deus, ut timeatur*: quatenus non potest universum condi perfectius neque relatè ad finem, qui est manifestatio Divinae gloriae, nec relatè ad ordinem creaturarum; Cùm Deus omnia in mensura, & numero, & pondere disposuerit, ut dicitur Sap. 11. nec relatè ad genera, & gradus entium, cùm contineat omnia rerum genera, & omnes gradus entium, in quibus specialis aliqua Divina perfectio relucet, ea quippe finita sunt, cùm nequeat dari genus entium majus intellectivo, in quo Deus ipse continetur.

X. Ex haecenus dictis colliges 1. Dari in Deo moralem necessitatem ad optimum, atque adedò ad Incarnationem ponendam, quæ necessitas sit metaphorica quoad modum, quatenus caret difficultate in oppositum, non tamen metaphoricâ, & impropriâ quoad effectum, infert enim certitudine morali optimum ponendum; sicut necessitas moralis in matre ad amandum filium infert certitudine morali, quòd Berta filium amet. Hinc quando Augustinus dicit: *Facilius iram, quam misericordiam continebit Deus*, non est sensus, ut notat Ruiz, quòd difficultatem Deus patitur in continenda misericordia, sed quòd nos facilius credamus, esse iram continendam; cùm Deus magis inclinetur ad miserendum, quàm ad irascendum.

Colliges 2. Hujusmodi necessitatem in Deo non oriri ex indigentia, & defectu, sed ex abundantia perfectionis, inclinatur enim ad optimum, non ut ab eo perficiatur, sed ut illi se communicet, illudque perficiat.

Colliges 3. Necessitatem istam spectare ad perfectissimam libertatem, non secùs ac necessitas metaphysica ad non peccandum; unde sicut Deus, ut loquitur Aug. 5 de Civ. 20. *Quia est omnipotens, multa non potest*, putà chymæram, peccatum &c. ita quia est perfectissimè liber, moraliter necessitatur ad optimum.

Colliges 4. Universum esse perfectum, & optimum tum formaliter, tum materialiter, & inde sequi, quòd omnes gradus & genera entium possibilia de facto contineat.

neat, quòd sit perfectum , & numeris omnibus absolutum, constat, illud enim dicitur perfectum , quod congruit fini suo ; sic gladius dicitur perfectus, si feriat, serra si secet, quia ad hos fines ordinantur; atqui finis Universi est manifestatio Divinæ gloriæ , tum quia *universa propter semetipsum operatus est Dominus*, ut dicitur Proverb. 16. tum quia omne agens intendit in effectu suo ponere realem sui imaginem quoad ejus fieri potest perfectam : ad hunc autem finem manifestandi Divinam gloriam , ac Divina Attributa , Universum est maximè idoneum , ut fert omnium sensus, juxta dicta *art. 1.* ergo est perfectissimum. Quòd verò hinc sequatur contineri in Universo omnia entium genera, sic ostenditur. Sicut cognitio est imago intentionalis objecti , ita effectus est imago realis suæ causæ , sed cognitio non est perfecta , nisi exprimat omnia prædicata objecti ; ergo neque effectus est perfectus nisi exquirat omnia prædicata suæ causæ: Universum autem per hoc dicitur exprimere omnia prædicata, & attributa Divina, quia continet omnia entium genera, quibus perfectiones Divinæ, quæ non possunt à singulis ple- adumbrari, adumbrentur ab omnibus, ergo Universum, ex hoc , quòd sit perfectum , debet omnia entium genera continere.

Colliges 5. Regulam istam generalem ex Suar. *disp. 35. met. sect. 1.* Quoties aliquis gradus entium præsefert specialem perfectionem , si non constat illud repugnare , dicendum, quòd de facto detur : aliter Universum non esset optimum. Et hinc ostenditur ratione naturali , Angelos de facto dari : Contra verò quoties aliquis Gradus entium non datur de facto , ut est creatura creatrix, impeccabilis, indestruibilis, intelligens per propriam substantiam, substantia supernaturalis &c. dicendum ea repugnare ; aliter si essent possibilia, & non darentur de facto, Universum non esset optimum , ut fusè ostendimus in de Angelis; ubi diximus, quòd Corpus simplex, & materia Spiritualis non inferantur impossibilia ex eo, quòd non dentur de facto , quia non continent specialem aliquam perfectionem , quæ in aliis entibus naturalibus non contineatur modo perfectiori, simplicitas enim entis completi, quæ habetur in corpore simplici, reperitur perfectiori modo in Angelo , in quo pariter reperitur perfectiori modo ratio substantiæ spiritualis, quæ competit materiæ spirituali.

Colliges ultimò. Puerilem esse huiusmodi argumentationem, necessitas ad optimum est in Deo: ista necessitas identificatur cum esse physico Dei, ergo necessitas ad optimum in Deo est physica, non moralis; sicut pueriliter quis diceret, necessitas ad non peccandum, quæ est in Deo, identificatur cum esse physico Dei, ergo est necessitas physica, non metaphysica: Committitur enim fallacia accidentis, ut si dicatur: Hæc Capra est mater: Hæc Capra est Petri, ergo est mater Petri, consequentia legitima est, ergo aliquid, quod est Petri, est mater: excludendo à consequentia *Capram*, quæ est medius terminus: & in casu nostro consequentia legitima est, ergo aliquid, quod physicè identificatur cum Deo, est necessitas ad optimum, non verò ergo necessitas ad optimum est physica: Illa enim dicitur necessitas physica, quam potest Deus ratione supremi domini in creaturas, & in earum exigentias, miraculosè superare, & illa dicitur necessitas metaphysica, quæ sinè contradictione superari non potest: At necessitas ad optimum, sinè miraculo, & sinè contradictione superari potest à Deo, ergo non est necessitas physica, aut metaphysica, sed moralis.

QUÆSTIO III.

Utrum necessaria fuerit Incarnatio ad condignè satisfaciendum pro Mortali.

I. CERTUM est Incarnationem non fuisse simpliciter necessariam, etiam ex suppositione peccati, quia poterat Deus, aut nolle peccatum remittere, aut velle illud remittere sive per gratiam, sive per condonationem extrinsecam, non exhibitâ prius condignâ satisfactione. Quare solùm quæritur, An fuerit necessaria Incarnatio ad condignam satisfactionem pro mortali exhibendam? Qua in re notandum primò: In peccato distinguendam esse malitiam ab offensa, cum enim malum sit carentia boni debiti, malitia peccati mensuratur à bonitate Actûs, cui opponitur; propterea major est malitia in odio Dei, quàm in infidelitate, vel inobedientiâ, quia odium Dei opponitur charitati, quæ præstantior est fide, vel obedientiâ, & quia magis opponitur objecto virtutis actus malus intensior, & diuturnior, ac cum majori advertentia positus, ideo major est malitia peccati in

Pars VI.

C

actu

actu intensiori, ac diuturniori, & cum majori advertentia elicitio. Offensa verò, seu injuria mensuratur à dignitate Personæ offensæ, unde gravior est offensa irrogata Regi, quàm Principi, aut plebejo. Pariformiter in actu satisfactorio, & meritorio distinguenda est bonitas à satisfactione, & obsequio; Bonitas mensuratur à præstantia, & circumstantiis objecti, propterea melior est actus charitatis, quàm fidei, aut obedientiæ; satisfactio verò mensuratur à dignitate Personæ satisfaciendæ, propterea major est satisfactio exhibita à Rege, quàm à Principe, aut Plebejo.

Notandum ulterius illam dici satisfactionem condignam, quæ in morali æstimatione in linea obsequii commensuratur gravitati offensæ, ut proinde extinguat in offenso Jus ad odium, & vindictam adversus offenso-rem: sicuti illa dicitur Restitutio adæquata, quæ extinguit debitum. Indubitatum est, quòd si mortale supponatur gravitatis infinitæ, nulla pura creatura poterit condignam satisfactionem exhibere pro mortali; atque adeò ad condignè satisfaciendum pro mortali necessaria fuisset Incarnatio; Ratio est, quia quælibet satisfactio præstita à pura creatura utpote finita, est incommensurabilis cum offensa Dei infinita. Si verò supponatur mortale esse gravitatis finitæ, procedit quæstio, Utrum necessaria fuerit Incarnatio ad condignè satisfaciendum, an verò possit etiam Justus, vel Beatissima Virgo condignam hanc satisfactionem exhibere? Deinde quærendum: Num fuerit etiam necessaria Incarnatio ad condignè merendum peccatori gratiam remissivam peccati? Tertiò, an re verâ mortale sit gravitatis Infinitæ?

A R T I C U L U S I.

An possit Justus condignè satisfacere pro mortali, si supponatur gravitatis finitæ?

II **N**otat D. Thom. qu. 1. a. 2. ad 2. Satisfactionem dupliciter posse esse adæquatam: Primo, si sit perfecta secundum se, & ex valore ejus, quod retribuitur pro offensa; sicuti est in debito reali restitutio, quæ adæquet debitum: Secundò, si sit sufficiens ex acceptatione ejus, cui satisfit, ut si pro debito 100. aureorum creditor contentus sit gemmâ valente 10. aureis. In hoc tantum

tum secundo sensu Scot. Gabr. & alii apud Martin. *disp.* 2. *sect.* 6. docent, potuisse puram creaturam satisfacere ad æqualitatem pro mortali. Imò Mastrius *disp.* 4. *q.* 5. expresse docet, nunquam fuisse de mente Scoti, quod possit pura creatura condignè satisfacere, hoc est juxta primum sensum, quidquid Scotistæ doceant. Communissimè etiam Theologi, & PP. idem docent apud Suar. *dis.* 4. *sect.* 2. Lugo d. 5. dicit enim Athan. Or. 2. contra Arian. *Si Dominus homo factus non fuisset, nunquam nos a peccatis vindicati resurrexissimus*: Et D. Basil. in illud Ps. 48. *Frater non redimit, redimit homo*; addit: *Non nudus homo, sed homo Deus Jesus Christus, quia nullus alius poterat condignum offerre pretium*. Verum in assignanda ratione hujus communissimæ doctrinæ variant Theologi.

III. Dico equidem: etiam transmissio, quod peccatum fit finitæ gravitatis, non potest Justus condignè satisfacere promortali. Ità communiter contra nonnullos apud Gonet. citantes pro se Scot. Palud. Duran. Richar. & contra alios Recentiores putantes, quod si Justus afficiatur gratiâ importante donationem, & appropriationem Spiritûs Sancti, juxta sententiam Lessii, & Petavii, quam explicavimus in de Gratia, possit condignè pro mortali alieno satisfacere.

Prob. Conclusio. Ratione, quam tradit Angelicus, & promovet Suar. *d.* 4. *sect.* 7. (quamvis illam impugnet Gonet. *d.* 4.) videlicet ex diversitate ordinis inter offensam Divinam, & satisfactionem creatam. Impossibile est ea, quæ sunt in ordine diverso, invicem cœquari; sed mortale, (quamvis esset gravitatis finitæ) & satisfactio puræ creaturæ sunt in ordine diverso; ergo non possunt cœquari, hoc est non potest in morali æstimatione esse tanti valoris in linea honorationis satisfactio puræ creaturæ, quanti ponderis est in linea dehonorationis offensa erga Deum; atque adeò non potest Justus condignè satisfacere pro mortali. Major est certa, & constat inductione; infinita enim venialia cœquari non possunt cum uno mortali ob ordinis diversitatem; sicut neque infinitæ operationes meritorix naturales cum uno actu supernaturali, ut proinde non possint operationes naturales etiam si crescant in infinitum, mereri, ne de congruo quidem, unum gradum Gratiæ: similiter infinita corpora non possunt cœquari cum uno

Angelo, nec infinita accidentia cum una substantia, nec infiniti argentei cum uno aureo in ea ratione, in qua diversificantur substantialiter, quamvis multi argentei in ratione pretii, in qua conveniunt cum aureis, coæquari possint cum uno aureo, quia scilicet ratio pretii in utroque metallo habetur à voluntate Principis ordinantis Monetam ad eundem finem.

Prob. itaque min. Quia, ut notat Philosophus 5. *Eth.* & D. Th. *disp.* 1. q. 2. offensa est est gravior, quod dignior est Persona offensa, & satisfactio, seu submissio est est præstantior, quod dignior est Persona satisfaciens; ergo in æstimatione morali peccatum reponitur in ordine Divino, & summo, in quo est Deus offensus, satisfactio vero creaturæ, etiamli affectæ gratiâ sanctificante, reponitur in ordine creato, & infimo, in quo est creatura satisfaciens, atque adeo in æstimatione morali coæquari non possunt: Cum enim satisfactio sit quidam honor exhibitus ab offensore submittente se offenso ad compensandam dehonorationem, & injuriam illi factam, quâ voluit illum sibi subicere; idcirco in eo ordine debet esse dignitas Personæ satisfaciens, in quo est dignitas Personæ offensæ, ut possint in æstimatione morali gravitas offensæ, & valor satisfactionis coæquari: & propterea sola satisfactio Christi Domini utpote Personæ infinite dignæ exhibita pro peccatore coæquari potest gravitati mortalis, quod est offensa Personæ dignitatis etiam infinite.

Neque obstat, quod offensa irrogata Deo supponatur finitæ gravitatis, adeo ut dignitas infinita Dei offensi non descendat secundum se totam ad gravificandam offensam, sed pro mensura cognitionis magis vel minus claræ, quâ Deus cognoscitur, cum gravior sit offensa, si clarius Deus cognoscatur. Nam cum hoc etiam stat, quod offensa Divina sit in ordine supremo, & divino, non solum terminativè, & extrinsecè, sicut est actus amoris Dei, sed etiam moraliter, quatenus in morali æstimatione, si minus mensuratur Arithmetice offensa à dignitate Personæ offensæ, saltem in eo ordine reponitur, ergo cum satisfactio creaturæ non reponatur in eodem ordine summo, sed in infimo creato, non possunt moraliter coæquari: Neque enim sufficit ad condignam satisfactionem pro mortali, quod satisfactio dicat ordinem ad Deum, tamquam ad terminum extrinsecum, sicut mor-

mortale dicit ordinem ad eundem Deum : Hinc enim sequeretur, quod etiam actus Amoris Dei naturalis posset esse condigna satisfactio pro mortali, quod nemo somniavit : Non enim plenè satisfacit amando Deum, qui Deum offendit ; sicut Plebejus, qui Regem offendit, non plenè satisfacit, amando Regem : & ratio à priori est, quia satisfactio mensuratur à dignitate Personæ satisfaciæntis & injuria à dignitate Personæ offensæ, ut diximus ex Angelico.

Confirm. itaque Conclusio. Quia, si sufficeret, quod Persona satisfaciens pro mortali dicat respectum ad Deum tanquam filius Dei adoptivus, sequeretur, quod etiam homo carens gratiâ habituali posset condignè pro mortali satisfacere, per hoc, quod sit servus Dei, & creatura Dei, & sic dicens etiam respectum ad Deum : sequela non admittitur, ergo nec id, unde sequitur. Hinc communiter docent, quod neque satisfactio præstita à Deipara sit condigna pro mortali, quia per illam non submittitur Persona Divina, prout requiritur ad compensandam offensam divinam.

IV. Hinc sequitur, quod etiam transmissâ possibilitate gratiæ importantis donationem Spiritûs Sancti, juxta sententiam laudatam Leslii, adhuc satisfactio præstita ab homine habente appropriatum sibi Spiritum Sanctum, non erit condigna pro mortali ; quandoquidem etiam isthæc satisfactio esset præstita à Filio Dei adoptivo, atque adeò à creatura : ergo non pertingeret ad ordinem divinum, in quo est offensa. Verum quidem est ; quod filiatio Dei adoptiva per donationem Spiritûs sancti in suo esse reali sit altioris ordinis, quàm Gratia, quæ de facto datur importans participationem Naturæ Divinæ tantum similitudinariè ; Nihilominus in utroque casu satisfactio esset puræ creaturæ, atque adeò in ordine creato, & infimo, unde non posset coæquari cum offensa divina, quæ est in ordine summo.

Neque dicas, quod si peccatum sit gravitatis finitæ, sicut finitè descendit Deus ad gravincandam offensam juxta mensuram cognitionis, ita finitè descendit Persona Spiritûs Sancti ad dignificationem satisfactionis Iusti, juxta mensuram donationis Spiritûs Sancti ; ergo satisfactio, & offensa possunt coæquari.

Nam contra est. quia quamvis coæquari possint in intentione cognitio, quæ mensurat gravitatem offensæ, &

donatio Spiritûs Sancti, quæ mensurat valorem satisfacti-
onis (sicut coæquari possunt in intensi-*o*ne, v. gr. actûs
supernaturalis & naturalis) semper tamen est in diver-
so ordine offensa, & satisfactio; offensa enim est divina,
quia Deus offenditur, satisfactio verò non est divina,
quia non satisfacit Spiritus Sanctus, sed satisfacit Justus
habens sibi appropriatum Spiritum Sanctum; ergo si-
cut satisfactio Deiparæ licet dignificatæ à Deo veniente
in obliquo non coæquatur offensæ divinæ, quia Mater
Dei, non Deus satisfacit; ita satisfactio Justi licet digni-
ficati à Spiritu Sancto venientæ in obliquo non coæqua-
tur offensæ divinæ, quia homo habens Spiritum San-
ctum, non verò ipse Spiritus Sanctus satisfacit. Quod
explicatur exemplo Oratoris Regii, qui si nomine pro-
prio satisfaciat pro offensa regia, non satisfacit ad æqua-
litatem, quia quamvis ejus satisfactio dignificetur mo-
raliter à dignitate Regia veniente in obliquo: tamen
non est Rex, qui satisfacit, sed Orator Regis nomine
proprio. Quod si satisfaciat nomine Regis, tunc satis-
factio erit Regia perinde ac si ipse Rex immediatè se sub-
mitteret, & tunc coæquaretur offensæ Regiæ talis satis-
factio.

V. *Objic.* 1. Potest Plebejus condignè satisfacere pro
injuriam irrogatam Regi, si v. gr. ad conservandam Regi vi-
tam & Regnum, exponat se millies discrimini vitæ, er-
go poterit etiam creatura justa satisfacere pro offensa ir-
rogata Deo, si multiplicet in immensum suas satisfactio-
nes. Antecedens videtur certum, quia in morali æsti-
matione offensa Regia potest compensari illis submissio-
nibus. *Consequentia probatur*, quia si supponatur pecca-
tum esse gravitatis finitæ, poterit multiplicatione satis-
factionum in morali æstimatione coæquari.

Confirm. Offensa Deo irrogata supponitur gravitatis
finitæ, ergo non exigit satisfactionem infinitam, sed fini-
tam, ergo possunt ad eam multiplicari satisfactiones puræ
creaturæ, ut illam adæquent.

Resp. 1. Argumentum probare, quod etiam per actus
naturales possit peccator satisfacere pro peccato proprio
si satisfactiones multiplicet. Directè, multi negant ante-
cedens, putantes esse in diverso ordine offensam Regiam,
ac satisfactionem Plebeji; unde quamvis congruum vi-
deatur, quod Rex positus innumeris submissionibus Ple-
beji odium deponat, & liberaliter condonet, non putant
tamen ad id teneri.

Equi-

Equidem transmissio antecedente cum Haunol. *Nego consequ.* Disparitas est, quia dignitas Regia est finita, & accidentalis, & ideo compensabilis ab ingentibus Plebeji submissionibus, dignitas verò Divina est infinita, & essentialis, & ideo Dei offensa incompenfabilis est à satisfactione, quæ non sit infinita. Per hoc, quòd dignitas Regia sit accidentalis. & finita, potest Rex aliquando indigere Plebejo, ut ejus ope Regiâ dignitas sibi conserveatur, & ideo in morali æstimatione tanti fit offensa Regia, quâ Plebejus vult dignitatem Regiam deprimere, quanti fit satisfactio, quâ eadem dignitas Regia labens fulcitur: At dignitas Divina est essentialis, unde nunquam potest Deus indigere ope creaturæ, ut sibi ea dignitas conservetur, atque adeò quidquid præstet creatura erga Deum, nunquam tanti fit, quanti offensa Divina.

Ratio à priori est, quia in morali æstimatione magna utilitas æquiparatur honori; unde aptè matrimonium inquitur inter maritum divitem, & uxorem nobilem: ergo si Rex offensus hanc utilitatem habeat à Plebejo, quòd ejus opere retineat dignitatem Regiam cæteroqui labentem, poterit hæc satisfactio in morali æstimatione æquiparari dehonorationi per offensam irrogatæ: Cum autem Deus nullam habere possit utilitatem à creatura, nunquam poterit ejus dehonoriatio per quamcunque submissionem creaturæ compensari. Et ratio ulterior est, quia submissio nihil est aliud, quàm itio in inferiorem locum ad compensandam offensam, ut accidit, cum quis osculatur pedes offensi; At creatura semper est in infimo loco respectu Dei; atque adeò sicut Plebejus, qui Pontificem offendit, non habet vim compensandi offensam, osculando pedes Pontificis, quia Plebejus relatè ad Pontificem est in humili loco; ità à fortiori quæcunque submissio puræ creaturæ facta erga Deum, in æstimatione morali nullum pondus habet ad compensandam offensam, quia creatura est in infimo loco relatè ad Deum.

Ad Confirm. *Dist. consequ.* Offensa divina si supponatur esse gravitatis finitæ non exigit satisfactionem infinitam per se, *conceda*; per accidens, *nego consequentiam*. Finitum per se non nisi finito cœquatur, & ideo offensa finita secundum se non nisi satisfactioni finitæ adequatur; quia tamen satisfactio æqualis positivè pro

mortali repugnat; & solum dari potest satisfactio Christi Domini superabundans, & æqualis solum negativè, hoc est non minor, ideò per accidens requiritur satisfactio infinita ad condignè satisfaciendum pro mortali.

VI. *Objic. 2.* Si mortale ratione Personæ offensæ infinitæ esset in superiori ordine ad quamcunque satisfactionem creaturæ, esset pariter in superiori ordine veniale, sequela communiter non admittitur, quia de ratione offensæ levis inter amicos est, quòd facile condonetur, & quòd possit de facili dari pro ea condigna satisfactio, ergo mortale non est in superiori ordine ad quamcunque satisfactionem creaturæ. *Prob. sequela*; Ideò mortale esset in superiori ordine, quia offensæ in eo ordine, & gradu reponitur, in quo est dignitas Personæ offensæ, satisfactio verò in eo ordine, in quo est dignitas Personæ satisfaciendæ sed hoc probat etiam veniale esse superioris ordinis ad quamcunque satisfactionem creaturæ; ergo.

Resp. Cum communi contra Petrum Soto, Rhodes, & alios apud Gody de Incarn. qu. 1. nu. 61. Nego sequelam, ad probationem dico cum Amic. d. 5. n. 201. Peccatum veniale non esse offensam Dei strictè dictam, quâ scilicet Deus contemnatur, & rescindatur ejus amicitia, quandoquidem per infinita venialia, ne unus quidem gradus gratiæ diminuitur; sed esse offensam Dei analogicè, quatenus macula peccati venialis purissimos Dei oculos offendit, & per veniale fervor charitatis negligitur. Hinc veniale non reponitur in ordine divino, nec ejus gravitas mensuratur à dignitate Dei, cujus voluntas non contemnitur, sed à bono creato, seu à fervore charitatis, qui solum contemnitur per veniale. Quare sicut satisfactio Justī, vel Dei paræ non est in ordine Divino, quia non mensuratur à dignitate Divina, quæ venit tantum in obliquo, non in recto, quatenus non Deus, sed filius adoptivus, vel Mater Dei satisfacit; ita offensæ venialis non est in ordine Divino, quia non mensuratur à dignitate Divina, quæ venit tantum in obliquo, quatenus non offenditur rigore Deus, sed fervor amicitie erga Deum. Hinc mortale dicitur tollere à Deo rationem ultimi finis, atque affectivè Deum destruere, ejusque amicitiam contemnere; secus verò veniale; quamvis utrumque sit verè peccatum, seu contra voluntatem Dei; definitur enim ex

Aug.

Aug. peccatum. *Dictum, factum, concupitum contra legem æternam Dei.*

Hinc fit quod quia veniale in statu elevationis est contemptus fervoris gratiæ supernaturalis, ideo in statu elevationis non potest haberi condigna satisfactio pro veniali, nisi per actum supernaturalem, quia satisfactio debet esse in eo ordine, in quo est id, quod contemnitur, quia verò in pura natura peccatum veniale non esset contemptus fervoris gratiæ supernaturalis, sed rectæ dispositionis naturalis ad assequendum ultimum finem, ideo in pura natura, ut notat Amic. haberi posset condigna satisfactio pro veniali per amorem Dei naturalem. Quamvis etiam requiratur acceptatio Dei in utroque statu, ut optimè ostendit Mart. Perez d. 10. de Peen. sect. 4. quia nostræ operationes sunt Deo debitæ independentè à culpa præterita, multis aliis titulis, unde librum est Deo eas in satisfactionem pro peccatis acceptare, vel non acceptare.

VII. *Obje.* 3. Potest unus aureus in morali æstimatione, & quoad pretium coæquari multis argenteis, sic etiam visio beatifica collata pro uno instanti compensatur æternâ beatitudine naturali, adeò ut mallet quis beatitudinem naturalem in æternum, quam pro uno instanti Deum videre, & deinde carere omni bono: Sic mallet quis visionem beatam in perpetuum, quam pro uno tantum instanti unionem hypostaticam, ergo quæ sunt ordinis diversi, possunt moraliter coæquari, atque adeò diversitas ordinis inter mortale, & satisfactionem creatam non obstat, quo minùs possint in morali æstimatione æquiparari.

Confirm. Saltem juxta sententiam Vasq. docentis, actum contritionis, vel charitatis supernaturalis formaliter justificare, potest homo per contritionem satisfacere condignè pro mortali, aliter contritio non esset forma justificans deletiva mortalis; Nam mortale vel expungitur per condonationem, vel per condignam satisfactionem: contritio non est condonatio, ergo est condigna satisfactio.

Resp. Ea, quæ sunt ordinis diversi coæquari posse solum in iis, in quibus conveniunt, & ideo argentum, & aurum, quæ in ratione physicâ coæquari non possunt, æquiparari possunt in ratione pretii, in qua conveniunt, seu in ordine ad utilitatem, quam potest quis percipere

ex permutatione monetæ cum mercibus, juxta ordinationem Principis; Sic Beatitudo supernaturalis instantanea, quæ non potest intrinsecè cœquari cum beatitudine naturali æterna, potest cum eadem cœquari in ordine ad perficiendum subiectum rationale, in quo ambæ conveniunt, adeò ut fortè magis perficiatur subiectum à Beatitudine naturali æterna, quàm à supernaturali instantanea, unde illa huic præferatur; idemque dicas de unione instantanea hypostatica relatè ad beatitudinem supernaturalem æternam, at in honoratione, & displicentia, quam habet Deus ob unum mortale, cœquari non potest cum honoratione, & complacentia, quam habet de omnibus actibus possibilibus puræ creaturæ ob ordinis diversitatem, ergo nulla creatura potest condignè satisfacere pro mortali.

Ad Confirm. Diximus in de gratia, contritionem, & dilectionem Dei supernaturalem non esse de facto formam justificantem. Sed transmissio, quòd justificet formaliter, & sit impossibilis cum peccato, non per hoc sequitur quòd sit condigna satisfactio, quamvis enim posset de se formaliter extinguere peccatum, seu reatum odii Divini, & pœnæ æternæ, adhuc posset relinquere debitum ad non tot, quin plura obsequia exigenda à Deo propter peccatum; eo modo, quo in Sacramento Pœnitentiæ, quamvis per gratiam formaliter remittatur peccatum, adhuc sæpè remanet reatus pœnæ temporalis; unde stare potest quòd contritio sit forma justificans, & non sit satisfactio condigna.

VIII. *Objic. 4.* Dignitas Personæ offensæ infinita non impedit, quo minùs possit pura creatura condignè satisfacere pro mortali; ergo: *Prob. antec.* Si Plebejus furetur à Rege mille aureos, satisfacit adæquatè, si eos reddat, non obstante dignitate Regiâ offensò, ergo pariter si quis mortaliter peccet, tollendo à Deo debitum honorem, adæquate satisfacit ponendo honorationem debitam, quam abstulit.

Confirm. Plebejus, & Nobilis eandem legem transgredientes eodem modo offendunt legislatorem humanum, & eodem modo satisfaciunt, si statutam pœnam solvant, ergo de materiali se habet dignitas Personæ satisfaciendæ ad condigne satisfaciendum pro mortali, si ponatur quidquid per peccatum à Deo sublatum est, nempe honoratio debita.

Resp.

Resp. Nego antec. ad probationem satisfactio, & restitutio conveniunt in hoc, quod utraque sit *Redditio æquivalentis*, differunt tamen quia Restitutio præsupponit offensam realem, hoc est circa res, seu bona Personæ, & respicit æqualitatem inter damnum illatum, & bonum, quo idem damnum compensatur, propterea Restitutio fieri potest à quacunque Persona cujuscunque dignitatis sit; satisfactio verò præsupponit offensam Personalem, seu inhonorationem Personæ & per se respicit æqualitatem inter dignitatem Personæ offensæ, & satisfaciens, unde offensa Personalis irrogata Regi à Plebejo non potest à Plebejo compensari, nisi fortè ratione magnæ utilitatis, quam Regi afferret. Hinc fit, quod furtum sit levius, si sit contra Personam locupletiore, offensa sit gravior, si sit contra Personam digniorem, quia illud fert damnum minus, hæc fert injuriam graviolem. Quod docuit Philosophus 5. Eth. dicens: *Si is, qui Magistratum gerit, alium percutiat, non est reperiendus, at si quisquam eum percussit, non solum est reperiendus, sed etiã supplicio afficiendus*, idq; ob dignitatē offensi

Ad Confirm. diversimodè se habet transgressor legis erga legislatorem humanum, & divinum: legislator humanus per se loquendo non offenditur à transgressore (nisi fortè lex respiciat, quæ ad dignitatem, & incolumitatem legislatoris spectant) imò sæpè eandem amicitiam cum transgressore continuat, & sine indignatione in persona repetit ab eo statutam pœnam, & ratio est quia legislator humanus suâ lege spectat tantam, quod Resp. quiete & pacificè regatur: At transgressio legis divinæ non stat finè contemptu legislatoris, ut proinde amicitiam rescindat, quia Deus suâ lege ordinat Creaturam rationalem ad suum ultimum finem, & habet pro fine ultimato se ipsum, & gloriam suam, propterea offenditur, si postponatur Creaturis, & in iis à peccatore finis ultimus reponatur

X. *Obje. 4.* Si pura Creatura prædita esset gratiâ sanctificante infinite intensâ, non est cur non posset satisfacere pro mortali, quod supponatur finitæ gravitatis, ergo ut prius. Probatur antecedens, quia in tali casu, sicut offensa, eò quod esset Personæ infinite dignæ, sed per finitam cognitionem applicatæ offendenti, esset in ordine summa, sed finitæ gravitatis; ita satisfactio, eò quod esset personæ habentis gratiam justificantem, atque aded

par-

participantem naturam divinam, sed finito modo, erit pariter summa in ordine, & finiti valoris, ergo æquiparentur offensa & satisfactio. Neque obstat quod Persona offensa sit Deus, & Persona satisfaciens sit Persona Creata participans solum per gratiam divinam naturam. Nam ad condignam satisfactionem non requiritur, quod æquiparentur Persona offensa, & Persona satisfaciens (aliter non posset Plebejus in nullo casu satisfacere pro offensa irrogata Regi, quod communius non admittitur, ut dictum est in responsione ad primam objectionem) sed solum requiritur, quod in æstimatione morali æquiparentur injuria, & satisfactio, atque adeo, tanti fiat in linea dehonorationis offensa, quanti æstimatur in linea honorationis & submisionis satisfactio, per hoc enim, quod offensa irrogata Deo sit offensa Personæ divinæ finito modo applicatæ per cognitionem finitam, videtur sufficienter cœquari cum satisfactione, quæ procedit à Persona participante naturam divinam in gradu infinitè intenso per Gratiam, ergo.

Resp. Argumentum probare nimis; probat enim quod Creatura affecta uno tantum gradu gratiæ possit condignè satisfacere pro mortali, eò quod etiam per unum gradum gratiæ participat naturam divinam, quatenus gratia est divinæ naturæ participatio. Directè dico non æquiparari in æstimatione morali injuriam irrogatam Personæ divinæ cum satisfactione quæ procedat à Persona Creata, etiam si affecta gratia infinitè intensa, eò quod injuria illa reponatur in ordine divino, & satisfactio ista in ordine creato, qui ordines ob summam eorum distantiam nunquam possunt æquiparari in æstimatione morali. Et sanè infinitè satisfactiones, quæ procedunt ab infinitis creaturis denudatis gratiâ sanctificante, etiam per Adversarios non satisfaciunt condignè pro mortali; ergo neque si sint præditæ gratiâ sanctificante utut infinita, eò quod pariter ista infinitas continetur intra fines ordinis creati incomparabiliter distantis ab ordine divino. Nec facit quod gratia sit Naturæ divinæ participatio. Nam licet Persona affecta hac gratiâ dicatur participare naturam divinam, non proinde fit, quod satisfactio præstita ab hac persona sit satisfactio ullatenus divina, ita ut Deus veniat in recto ad satisfaciendum, sicut offensa irrogata Deo est verè divina, quatenus Deus in recto veniens est offensus. Aliter
crea-

creatura amans Deum amore naturali infinitè intenso deberet etiã posse satisfacere condignè pro mortali, quia satisfactio hujus creaturæ etiã dignificatur ab amore Dei, atque adeo à Deo veniente in obliquo ad dignificandam hanc satisfactionem.

Obje. ult. quantum crescit offensa divina ex dignitate Personæ offensæ, tantum decrescit ex ignobilitate objecti, quod respicit, videlicet, boni creati delectabilis, quod præfertur honesto, contra verò satisfactio creaturæ quantum decrescit ex vilitate Personæ satisfaciens, tantum crescit ex dignitate objecti, nempe Dei, qui est objectum satisfactionis, ergo potest compensari offensa, quæ respicit Personam infinitam, & objectum finitum, cum satisfactione, quæ respicit Personam finitam, & objectum infinitum.

Resp. 1. Hoc probare, quod etiam sine gratia sanctificante possit homo satisfacere pro mortali: deinde probat, quod etiam offensa illata Regi à Plebejo possit compensari per quodcunque obsequium præstitum Regi ab eodem Plebejo. Tertio dico, offensam crescere moraliter ex dignitate Personæ, & decrescere physice ex ignobilitate objecti, sicut etiam satisfactio ex vilitate Personæ decrescit moraliter, & crescit solum physice ex præstantia objecti: propterea offensa, & satisfactio moraliter sunt in ordine diverso, & ideo moraliter inadæquabiles, solum autem proportio moralis attendenda est inter offensam, & satisfactionem, unde quamvis physice ratione objecti præstet offensa divina satisfactioni creaturæ, non ideo possunt coæquari.

ARTICULUS II.

*An possit Iustus Mereri saltem de Condigno Peccatori
Gratiam remissivam Peccati.*

X. Diximus inde Merito, satisfactionem condignam in eo differre à merito condigno, quod satisfactio condigna dicat æqualitatem arithmeticam cum offensa, qualis est v. gr. inter pretium, & mercem, meritum verò condignum dicat solum æqualitatem geometricam cum præmio, qualis est v. gr. inter semen, & fructum maximum, siquidem quod major est Munificentia præmiantis, eò majus præmium est condignum eidem me-

meritò; propterea actus nostri supernaturales, licet finiti, possunt de condigno mereri gloriam æternam. Diximus etiam quod in alia Providentia possit justus mereri de condigno alteri immuni à peccato gratiam sanctificantem, sicut enim potest Justus in præsentī Providentia mereri sibi de condigno augmentum Gratiæ, ita potest in alia Providentia mereri eandem gratiam aliis saltem in gradu remissiori.

Quærimus nunc, Utrum justus impotens de condigno satisfacere pro mortali, possit saltem mereri de condigno in alia providentia alteri peccatori gratiam remissivam peccati; An verò necessaria fuerit Incarnatio sicut ad satisfaciendum pro mortali, ita etiam ad merendam condignè remissionem peccati.

Supponimus hic ex dictis in de Gratia, præter gratiam præsentis ordinis essentialiter impossibilem cum peccato, atque adeo formaliter justificantem, & sanctificantem, dari posse in alio ordine gratiam habitua-lem, quæ pariter sit Natura supernaturalis, seu radix habituum supernaturalium, non tamen habeat impossibilitatem cum mortali, nec formaliter justificet; sicut de facto habitus supernaturales Fidei, & spei impossibiles sunt cum mortali, nec justificant. Quo posito, præsens Quæstio procedit de gratia præsentis ordinis.

XI. Certum autem videtur, quòd possit Justus mereri de condigno peccatori gratiam alterius ordinis, quæ non sit formaliter remissiva peccati, & solum sit prima radix habituum, & actuum supernaturalium. Ratio est, quia potest Justus mereri de condigno alteri à peccato immuni gratiam præsentis ordinis, quæ reddit hominem filium Dei adoptivum, amicum, & hæredem, & est impossibilis cum peccato, ut ostendimus in de merito, ergo à fortiori potest Justus mereri alteri peccatori gratiam alterius ordinis jam explicatam; quandoquidem majus beneficium confertur Innocenti in pura natura, per gratiam præsentis ordinis, qua fit Filius Dei, amicus, & hæres, quam fiat peccatori per gratiam alterius ordinis, quæ non est remissiva peccati, eligibilis enim est innocenti habere illam gratiam, quàm peccatori habere istam.

Neque dicas 1. quòd spectatâ indignitate subjecti, nempe peccatoris, majus beneficium sit, conferre peccatori gratiam alterius ordinis, sine remissione pec-

peccati, quam Innocenti gratiam præsentis ordinis; quia æstimatione beneficii major est, quo major est indignitas subjecti. Nam contra est 1. quia Argumentum probat quòd neque posset Iustus mereri de condigno peccatori auxilia supernaturalia, aut de resurgendum, aut saltem ad ponendum actum fidei, vel misericordiæ, quod nemo dixerit. Directe dico: Tunc indignitatem subjecti augere æstimationem beneficii, ita ut beneficium coæquetur indignitati, quando per bonum, quod confertur, tollitur talis indignitas, secus verò si non tollatur, ut accidit in Casu nostro, & ideo si peccatori conferatur auxilium naturale ad resurgendum, non dicitur conferri beneficium adæquans ejus indignitatem.

Neque dicas 2. Donum collatum indigno conjungi cum Amore benefactoris superante resistentiam ortam ab indignitate subjecti, quæ retardat collationem beneficii, ergo beneficium, quod confertur peccatori, per collationem gratiæ alterius ordinis, tantum est, quanta est indignitas subjecti, seu malitia peccati retardantis benefactorem à collatione beneficii, atque adeò si non potest Iustus mereri peccatori remissionem peccati, nec poterit illi mereri gratiam alterius ordinis.

Nam contra est, quia hoc etiam probat, quòd neque possit iustus mereri peccatori auxilium ad resurgendum, quare quamvis ceteris paribus major sit Amor benefactoris erga indignum, quàm erga dignum, si utrique idem donum conferat, falsum tamen est, quòd quodvis donum collatum peccatori sit beneficium, quod coæquetur malitiæ peccati, & indignitati subjecti, aliter etiam collatio boni naturalis facta peccatori esset beneficium ordinis supremi, sicut est in supremo ordine peccatum, quare hoc solùm verum est, quando bonum est destructivum indignitatis subjecti, quod non habetur in casu nostro.

XII. Dico nunc: Iustus non potest mereri de condigno peccatori gratiam præsentis ordinis formaliter remissivam peccati: imò nec nudam extrinsecam condonationem peccati. Ità Vasq. Lugo d. 5. n. 144. Maur. q. 50. de Gratia, P. Thyrs. Gonzal. 10. 3. d. 7. & Alii contra Suar. Disp. 4. sect. 7. Ripal. disp. 96. sect. 4.

Ante probationem Præmitto ex D. Th. Duplex dari malum, Alterum absolutum, & negativum consistens

stensen Carentia boni debiti, ut est carentia frigoris in aqua, vel quinti digiti in manu, ignorantia in intellectu, Carentia Concursus divini exigit in voluntate: Alterum Respectivum, & positivum, consistens in entitate positiva dissona subjecto, ut est calor relatè ad aquam, sextus digitus in manu, febris, dolor, error in intellectu, & peccatum in voluntate, quod proinde in de Gratia diximus consistere in positivo. Proportionaliter duplex etiam datur bonum; Alterum positivum consistens in entitate positiva consona alicui subjecto, ut est frigus relatè ad aquam; Alterum verò negativum consistens in ablatione mali positivi, v. gr. in ablatione erroris, febris, peccati: propterea sicut malum absolutum, seu negativum mensuratur à bono debito, unde tanta est v. gr. malitia in ignorantia, quanta est bonitas in scientia debita, & malum positivum mensuratur ab entitate positiva formæ dissonæ subjecto; unde tanta est malitia erroris, febris, peccati, quanta est entitas dissona intellectui; corpori, naturæ rationali &c. Ità pariter bonum positivum mensuratur ab entitate positiva formæ subjecto convenientis; unde tantum bonum confertur animæ, v. gr. quando ei confertur gratia, vel scientia, quanta est bonitas gratiæ, vel scientiæ. Bonum verò negativum mensuratur à malo, quod tollitur; unde tantum bonum negativum confertur intellectui, quantus est error, qui tollitur; & tantum bonum confertur animæ, quanta est malitia peccati, quod remittitur. Hoc posito.

Prob. Concl. Bonum negativum, quod confertur peccatori per gratiam remissivam peccati, imò per ipsam condonationem peccati extrinsecam, tantum est, quanta est malitia peccati, quod tollitur; sed malitia peccati vel est infinita, vel in ordine supremo, & divino, ergo pariter bonitas negativa remissionis peccati est vel infinita, vel in ordine divino; atqui Justus non potest Condignè mereri, quæ sunt in ordine divino, putà unionem hypostaticam, sicut nec potest homo in pura natura mereri gratiam, ergo neque potest justus condignè mereri remissionem peccati alieni.

Confirm. Quamvis inter meritum condignum, & præmium non debeat intercedere proportio Arithmetica, ut inter satisfactionem, & offensam, sed geometrica, adeò ut possit meritum leve, spectata munificentia remu-

remuneratoris, condignè mereri præmium ingens, & ideo momentaneæ, & leves naturæ operationes supernaturales æternum gloriæ pondus merentur; Nihilominus non propter quodcumque meritum Creatum potest à Deo dari quodcumque præmiu n habens rationem præmi, & non doni; neque enim operatio meritoria naturalis potest exigere in præmiu bonu supernaturale, nec operatio supernaturalis iusti potest condignè mereri unionem hypostaticam: & ratio est, quia Dei dona vilescerent, & Deus non liberalitatem, sed prodigalitatem exerceret, si tantis donis vellet hæc merita compensare, ergo pariter propter operationem iusti non potest conferri peccatori in præmiu condignum remissio peccati: *prob. hæc consequentia*: Ideo non potest propter operationem naturalem conferri in præmiu condignum gratia supernaturalis, quia sunt in diverso ordine illud meritum, & hoc præmiu: Rursus ideo non potest propter operationem iusti conferri in præmiu condignum unio hypostatica, quia quamvis utrumque sit in ordine supernaturali, meritum tamen iusti est in gradu infimo creato relatè ad unionem hypostaticam, quæ est in gradu summo, & divino; atque adeo carent æqualitate tum arithmetica, tum etiam geometrica, seu proportionis, atque etiam remissio peccati est bonum negativum in ordine, & gradu divino, in quo est peccatum, quod per illam tollitur, non secùs ac unio hypostatica est bonum positivum in ordine, & gradu divino, & supremo, ergo sicut operatio iusti non habet æqualitatem geometricam cum unione hypostatica, ita nec cum remissione peccati, atque adeo iustus potest quidem utrumque hoc præmiu mereri de congruo, non tamen de condigno.

Confirm. 1. In Phylis tanta debet esse activitas agentis, quanta est resistentia superanda in passo, v. gr. si à passo tollendi sunt sex gradus frigoris, debet in Agente dari vis productiva saltem sex graduum Caloris, ut possit resistentiam frigoris superare, ergo & in moralibus ut possit tolli peccatum, quod est malum in ordine supremo, & divino resistens introductioni gratiæ, debet in Agente morali, seu in merente dari meritum, quod etiam sit in ordine divino, cuiusmodi est solum meritum Christi Domini, atque adeo solus Christus dominus potuit de condigno mereri nobis remissionem mortalis.

XIII. *Objic. 1.* Remissio peccati solum terminativè, & extrinsecè est in ordine divino, non secus ac Gratia, quæ est participatio naturæ divinæ, ergo sicut potest Justus mereri in alia Providentia alteri Innocenti gratiam, ita potest peccatori mereri de condigno remissionem peccati.

Confir. si non posset Justus mereri remissionem mortalis alieni, nec posset mereri remissionem venialis proprii; Cum utrumque sit contra voluntatē Dei, sequela non admittitur, ergo nec id unde sequitur.

Resp. Quamvis peccatum esset finitæ gravitatis, & solum terminativè infinitum, quia tamen est offensa Dei, quæ moraliter est in ordine divino, idè remissio peccati est bonum negativum in ordine divino: unde nullam æqualitatem habet cum merito justī, quod est in ordine creato, & idè meritum Justī non potest ad hoc præmium se extendere: contra verò gratia collata innocenti est in eodem ordine, ac gradu, in quo est meritum justī, & idè sicut potest Justus in præsentī providentia mereri sibi condignè augmentum gratiæ, ita potest in alia providentia mereri gratiam alteri immuni à peccato, quare transmissio antecedente, nego consequentiam, quia non eodem modò moraliter est in ordine divino remissio peccati, & gratia.

Ad Confirmationem diximus pro veniali posse justum etiam condignè satisfacere, quia non est offensa Dei strictè dicta, nec contemptus divinæ amicitiae, sed solum opponitur fervori Charitatis, & amicitiae cum Deo, unde non est in ordine supremo, & divino, sicut est mortale.

XIV. *Objic. 2.* Potest justus mereri de Condigno sibi impeccabilitatem; ergo à fortiori alteri remissionem peccati. Consequentia videtur sequi, quia meritum, quod est proportionatum ad præmium majus, à fortiori est proportionatum ad minus, sed majus præmium est impeccabilitas, quàm remissio peccati, hæc enim est mera carentia peccati, illa verò est positiva impotentia ad peccandum; ergo si merito justī proportionatur impeccabilitas, à fortiori remissio peccati. Antecedens itaque probatur quia potest justus mereri de condigno sibi gloriam, ad quam consequitur impeccabilitas, ergo potest sibi mereri impeccabilitatem.

Resp. Nego consequentiam: ad probationem dico, quod

licet materialiter sit præmium majus, & utilius impeccabilitas, quam remissio peccati; At formaliter in ratione præmii, remissio peccati est major, & moraliter æstimabilior, fert enim victoriam mali summi; unde est bonum negativum summum; sic immortalitas est quid materialiter majus & utilius, quam resurrectio mortui, hæc tamen formaliter in ratione præmii est quid æstimabilius; sic etiam utilior est peccaturo dementia, quam auxilium supernaturale inefficax, hoc tamen est præstantius; utilior etiam est famelico panis, quam aurum, hoc tamen est æstimabilius. Hinc quàmvis possit iustus condignè sibi mereri gloriam, & impeccabilitatem, non per hoc potest alteri mereri remissionem peccati, quæ suam bonitatem summam desumit à malo, quod per ipsam tollitur.

Instabis: Quia remissio peccati tollit malum summum, hoc est peccatum, idè est summè bona negativè, ergo quia impeccabilitas impedit summum malum, nempe peccatum, erit pariter summè bona negativè, & simul positivè magis bona, quàm remissio peccati, unde tenet vis argumenti, quòd si potest iustus mereri impeccabilitatem, poterit etiam remissionem peccati.

Resp. Impeccabilitatem haberi posse etiam in lapide, quin lapis carens summo malo dicatur summè bonus negativè; quare non tanti æstimatur, quod impedit malum nondum contractum, quanti ipsa mali sublatio, sic majus bonum est Cæco, vel mortuo restitutio visus, vel vitæ, quàm videnti, & viventi impotentia ad Cæcutiendum, & immortalitas, universim enim moraliter pluris æstimatur bonū minus, præsentè contrario, quod superatur, quàm bonum majus, non præsentè contrario.

XV. *Obje. 3. ex Ripal. loc. cit.* meritum Iusti habet proportionem geometricam cum Gloria æterna, ergo etiam cum Remissione peccati: probatur consequentia, idè infinita duratio Gloriæ proportionari potest merito finito Iusti, quia Deus præmians est infinitus, ergo ex hoc capite potest etiā proportionari remissio peccati.

Confr. Potest Iustus mereri sibi vitam æternam, ergo etiam alteri remissionem reatus pœnæ æternæ, atque adeò remissionem peccati, quod cum reatu pœnæ æternæ commensuratur.

Resp. Argumentum probare, quòd possit etiam Iustus mereri unionem hypostaticam ob infinitam munificentiam

tiam Dei præmiantis. In forma nego consequentiam: ad Probationem nego etiam consequentiam: disparitas est, quia Gloria, quamvis æterna, adhuc est in eodem ordine cum merito supernaturali iusti; At remissio peccati est in ordine supremo, ut unio hypostatica.

Ad Confir. Resp. 1. per instantiam, calor ut 10. potest causare calorem ut 8. principaliter, ergo potest etiam principaliter causare ignem, qui exigit calorem ut 8. quod nemo dixerit Quare transmissio, quod possit Iustus mereri remissionem reatus pænæ æternæ, in hypothesi, quod hic sit separabilis à reatu culpæ, seu odii divini, nego quod possit etiam mereri remissionem peccati exigentis pœnam æternam; peccatum enim est in ordine supremo, & commensuratur reatui pænæ æternæ tantum geometricè, tanquam cum sua proprietate.

XVI. *Objic. ult.* Potuit Adam per peccatum ab eo commissum condignè mereri nobis privationem gratiæ, ergo poterit etiam Iustus ita constitui caput morale hominum, ut possit condignè mereri aliis restitutionem gratiæ, & remissionem peccati, probatur consequentia: si præstantia gratiæ non impedit, quo minus ejus privatio ceciderit sub demeritum Adæ, poterit eadem dignificare meritum iusti, ut restituatur peccatori.

Confir. Quia D. Th. 3. p. 2. 64. ar. 4. docet, potuisse Deum ministris suis talem plenitudinem gratiæ communicare, ut eorum meritum operaretur ad effectus sacramentorum: atqui inter effectus sacramentorum est remissio peccati: ergo potest ex D. Th dari meritum iusti ad remissionem peccati.

Resp. 1. Per instantiam potuit Adam per peccatum mereri alteri etiam privationem unionis hypostaticæ, ergo potest Iustus ita constitui caput morale hominum, ut possit aliis mereri unionem hypostaticam. Secundò nego consequentiam, major enim est malitia mortalis, quam bonitas actus supernaturalis iusti, & ideo plus potest demereri peccatum, quam possit mereri actus honestus, hinc mortale independentè à liberalitate divina exigit pœnam æternam, habetque cum illa proportionem arithmeticam; actus verò bonus habet cum vita æterna solum proportionem geometricam, ut dicemus quæstione sequenti.

Ad Confir. Angelicus ibi loquitur de merito congruo,

gruo, ut interpretatur Vasq. in tertiam Partem *disp. 135. c. 2.* quod nos admittimus tum relatè ad remissionem mortalis, tum relatè ad unionem hypostaticam.

Q U Æ S T I O IV.

An Peccatum sit gravitatis infinitæ.

Diximus quæstione antecedenti malitiam peccati mensurari ab honestate objecti, cui opponitur, & à circumstantiis; Injuriam verò mensurari præsertim à dignitate offensi; sicut submissio à dignitate satisfaciētis. Certum autem est quòd, ut offensa Dei sit rigorosè offensa, seu peccatum mortale, requiratur plena advertentia, & libertas in peccatore, aliter nec potest esse in supremo ordine, nec infinita. Quærimus nunc, An sicut cognitio creata peccatoris, quæ est in ordine infimo, non impedit, quominus offensa divina reponatur in ordine summo; ita nec cognitio finita impediat, quominus offensa sit gravitatis simpliciter infinitæ; eò modò, quo intensio, vel duratio, aut cognitio finita objecti in operationibus Christi domini non impedit, quominus operationes satisfactionis Christi sint valoris infiniti, seu moraliter infinitæ?

Prima sententia docet, mortale ab infinita Dei dignitate contrahere gravitatem simpliciter infinitam. Ità communiter Thomistæ apud Godoy, & Gonet. cum Cajet. Med. & ex nostris. Bernal, Conink, Martin. Hurt. Tanner. Secunda sententia vult, mortale esse finiti ponderis etiam in statera injuriæ, sed in ordine superiori ad quamcumque offensam Creatam, sicut visio Dei est in superiori ordine ad quamcumque cognitionem objecti Creati, itaque adeò solum esse infinitam terminativè, extrinsecè, & secundum quid. Ità Scotistæ, & communius Recentiores, cum Suar. Vasq., Lugo, Espar., Maur.

A R T I C U L U S I.

Stabilitur Ratione Prioristica Infinita Peccati gravitas.

IDico equidem cum prima sententia, Peccatum esse gravitatis simpliciter infinitæ in linea injuriæ, quamvis quoad malitiam sit finitum. Ità videtur

aperte docere D. Th. 3. p. q. 1. ar. 2. ad secundum ubi habet: *Peccatum quandam infinitatem habet ex infinitate maiestatis divina*; idcirco autem dicit, habere quandam infinitatem, quia non habet infinitatem phylicam, sed solum moralem, nec in ratione malitiæ, sed in ratione injuriæ. Similiter enim q. 29. de verit. ar. 3. dicit: meritum Christi habere *quandam infinitatem ex circumstantia Personæ infinitæ*. Præterea 1. 2. q. 87. ar. 4. absolute dicit, peccatum esse infinitum, his verbis: *In peccato tuo sunt Aversio à bono infinito, unde ex hac parte peccatum est infinitum, & conversio ad commutabile, & finitum bonum, & ex hac parte peccatum finitum est, tum quia est finitum huiusmodi objectum, tum quia ista conversio est actus finitus.* Ecce quomodo Angelicus distinguit in peccato injuriam à malitia, & esse morale à phylico.

Prob. Conclusio 1. à priori ex Philos. D. Th. & aliis communissimè; Offensa mensuratur à dignitate personæ offensæ, non secus, ac satisfactio à dignitate satisfaciens, ergo sicut satisfactio est infinita moraliter, si dignitas Personæ sit infinita; ita pariter offensam erga Deum est infinita. Antecedens constat ex doctrina Philosophi, & ex celebri illo effato, *offensa moraliter est in offenso, sicut honor in honorante*, & sensus est, quod sicut valor honoris, & satisfactionis desumitur à dignitate honorantis, & satisfaciens, ita gravitas offensæ à dignitate Personæ offensæ, ergo sicut satisfactio, & honor mensurantur arithmetice, non geometricè ab ea dignitate, ita etiam offensam. Et quidem à fortiori, nam satisfactio infinita mensuratur à dignitate verbi, quod submittit se, & satisfacit solum per communicationem ideomatum, denominativè, & in alio, nempe in natura assumpta; offensam verò mensuratur à dignitate divina, quæ offenditur in se, & formaliter, & propterea in aliqua ratione magis Deus aggravat offensam, quam valeret, & dignificet satisfactionem; quamvis ex alio Capite major sit satisfactio Christi, quam offensam divina, quia illa est submissio, & depressio effectiva dignitatis infinitæ, offensam verò solum est affectiva depressio Dei.

II. Dices 1. Offensa divina limitatur à cognitione divina, quæ impedit, quominus infinita Dei dignitas secundum se totam descendat ad offensam aggravandam, ergo non est gravitatis infinitæ.

Resp.

Resp. 1. Per instantias adductas, Cognitio peccatoris, quæ est in ordine creato, & infimo, non impedit, quominus offensa reponatur in ordine supremo, & divino, ergo neque quod sit infinita. Deinde actus Christi domini quamvis sit finitè intensus, finitè durans, sub cognitione objecti finita, adhuc infinitè dignificatur à verbo, & ea limitatio non impedit, quominus infinita verbi dignitas secundum se totam descendat ad dignificandam infinitè Christi satisfactionem, ergo etiam in casu nostro. Directè nego offensam Dei limitari, ac mensurari moraliter à cognitione finita, & ratio est, quia ut offensa sit infinita, non requiritur quod sit infinita cognitio, sed quod sit infinita persona cognita, quæ offenditur, sicuti ut offensa sit Regia, non debet esse regia cognitio offendentis, sed persona offensa cognita, & ut offensa sit in supremo ordine, non debet cognitio esse in ordine supremo etiam per ipsos adversarios, sed debet esse in ordine supremo Persona offensa cognita. Et ratio à priori est, quia potest actus contrahere infinitatem, aut aliam denominationem ex una forma, esto non contrahat illam ex alia. Sicut Christi satisfactio contrahit valorem infinitum à Persona illam dignificante, & non à cognitione prævia, quæ non est infinitè intensa, nec ab ipsa intentione actus satisfaciens ut quo, cum actus humanitatis assumptæ supponantur esse finitæ intentionis.

III. Dices 2. Quo clarior est cognitio Personæ, quæ offenditur eò gravior est offensa, & si nulla sit cognitio, nulla est offensa, ergo offensa mensuratur à cognitione: contra verò satisfactio mensuratur à principio dignificante operationes, cum operationes sint Suppositorum, nec requiritur in satisfaciente cognitio propriæ dignitatis, ut operatio dignificetur, nam quamvis iustus ignoret se esse in gratia, adhuc ejus operatio dignificatur à gratia, & de condigno meretur vitam æternam, unde dispar ratio inter offensam, & satisfactionem.

Resp. 1. Per instantiam, quo actus submissionis est inferior, vel diuturnior, vel cum cognitione vividior boni delectabilis, quod contemnitur præ honesto, eo submitio, & satisfactio est major, quia tamen etiam quo dignitas satisfaciens est major, eò major est satisfactio, ideo satisfactio Christi domini non limitatur ab intentione, duratione &c. limitata actus, sed infinitus est valor

satisfactionis tam in submissione intensa, quàm in remissa, tam in Crucifixione, quàm in genuflexione, ergo licet verum sit, quod quod clarior est cognitio Personæ offensæ, eo gravior sit offensæ; quia tamen cæteris paribus eò gravior est offensæ, quo Persona est dignior, ideo offensæ divina non limitatur à cognitione finita peccatoris.

Directè dico, verum esse, quod secundum se quæ Persona, quæ offenditur est finita, cognitio mensuret offensam, ità ut cognitio clarior relatè ad eandem Personam reddat offensam graviolem, cum hoc tamen stat, ut etiam mensuret offensam dignitas Personæ offensæ, ità ut stante eadem claritate cognitionis, eo offensæ sit gravior, quo Persona est dignior, ergo quamvis peccatum non hauriat infinitatem ex vi cognitionis finitæ, haurit tamen infinitatem ex dignitate Dei offensæ & recurrit alia instantia intercalaris; Nam per adversarios quamvis cognitio clarior reddat offensam graviolem, & si non detur plena advertentia, non dabitur offensæ strictè dicta, non per hoc fit, quod offensæ divina præcisè ratione Personæ non reponatur in ordine supremo, ergo nec fit quominus sit infinita.

IV. Hinc habes, Non solum malitiam, sed etiam injuriam de se esse majorem, si clarius cognoscatur Persona offensæ, quando hæc est dignitatis finitæ, quando verò est dignitatis infinitæ, tunc injuria est simpliciter infinita, adeò ut ex hac circumstantia cognitionis clarioris solum crescat malitia peccati, non verò injuria, utpote infinita. Sicut satisfactio de se est major, si actus submissivus sit intentior; quando tamen Persona satisfaciens est infinita, tunc satisfactio est simpliciter infinita, adeò ut ex hac circumstantia submissionis intentioris crescat solum bonitas actus, non satisfactio.

Hinc etiam fit, quod sicut operationes Christi sunt solum inæquales ratione bonitatis, non ratione satisfactionis, ità peccata sunt inæqualia solum in ratione malitiæ, non injuriæ: malitia enim in peccato, ut notat Godoy, respicit malum peccatoris, qui per peccatum privatur bono finito, & ideo malitia est finita; injuria verò respicit malum offensæ (unde largo modo etiam injuria dicitur malitia) quatenus per injuriam offendens vult deprimere dignitatem offensæ, & ideo injuria nō mensuratur ab honoratione debita offenso, sed

ab

ab ipsa offensi dignitate; Cum autem peccator affectivè velit tollere à Deo dignitatem infinitam, nempe rationem finis ultimi, atque adeò velit irrogare Deo malum infinitum, ideo peccatum in ratione injuriæ est infinitum.

Denique infertur, quòd cognitio in peccatore sit mera conditio requisita, ut infinita Dei dignitas secundum se totam descendat ad aggravandam offensam; sicut in Christo domino influxus physicus humanitatis in operationes Theanthricas, est conditio requisita, ut dignitas verbi transfundat infinitum valorem, propterea licet influxus physicus possit esse major, vel minor, prout est magis, vel minus intensus actus humanitatis, semper tamen est infinitus valor satisfactionis, & meriti.

V. Dices ultimò. Etiam visio Dei, & amor Dei sunt in ordine divino, & moraliter mensurantur à dignitate objecti, & tamen non sunt infiniti, nisi tantum terminativè, ergo etiam peccatum.

Resp. 1. Disparitatem dandam ab Adversariis: Nam amor Dei, licet sit summus terminativè, moraliter tamen non est in ordine supremo, cum non sit bonum morale summum; majus enim bonum est Amor Dei supernaturalis, quàm naturalis, & amor Dei elicited à Christo, quàm à Justo; & magis æstimabilis est unio hypostatica. Contra verò peccatum est in ordine supremo, adeò ut non possit dari malum majus ex genere suo. Directè disparitas est, quia in morali æstimatione honor est in honorante, & offensa est in offenso, juxta celebre effatum; propterea sicut honor, & satisfactio moraliter est in honorante, quamvis respiciat honoratum, ita offensa moraliter est in offenso, quamvis physicè sit in offendente; contra verò Amor Dei, & visio Dei non sunt moraliter in objecto divino, quandoquidem in morali æstimatione non tanti fit amor objecti, quanti objectum amatum, ubi tanti fit honor, quanti Persona honorans, & tanti fit offensus, quanti Persona offensa. Propterea Deus non solum est objectum, & terminus offensæ, sed etiam est subjectum, & forma moralis, sicut verbum est subjectum, & forma moralis satisfactionis. Deus est subjectum morale offensæ, per hoc, quòd Deus dicatur offensus; & simul est forma moralis hujus denominationis, per hoc, quòd à Deo moraliter informatur offensa, ut satisfactio.

VI. Hinc confirm. Conclus. Nam in morali æstimatione non tanti æstimatur amor terminatus ad Deum, quanti offensa, sicut non tanti æstimatur amor Plebei erga Regem, quanti offensa Plebei erga Regem; nec alia potest adduci ratio, nisi quia dignitas divina, & Regia relatè ad amorem se habent ut purus terminus, ad offensam verò ut forma moralis, sicut etiam relatè ad satisfactionem: quod diximus de amore Dei, dicas de visione Dei, quamvis enim visio à præstantia objecti hauriat aliquam moralem æstimabilitatem, at non tanti æstimatur, quanti ipsum objectum; non enim visio Regis tanti æstimatur, quanti ipsa dignitas Regia; & ideo visio Dei, quamvis magis æstimetur, quàm visio cuiuscunque objecti creati; unde sit in ordine supremo, non per hoc tamen est moraliter infinita.

ARTICULUS II.

Roboratur idem Posteriorificè.

VII. **P**RObatur deinde Conclus. à posteriori: Deus ratione offensæ potest à creatura exigere quamcumque submissionem, & satisfactionem etiam cruciativam, acerbiolem, & diuturniorem in infinitum, quousque extinguatur reatus culpæ, quin unquam sit possibilis condigna satisfactio præstita à pura Creatura, etiam si se cædat flagris, scorpionibus &c. & quamcumque submissionem doloriferam exhibeat, ergo offensa peccati mortalis est gravitatis infinitæ. Antecedens quoad primam partem patet, sicut enim offensa realis, putà furtum, trahit jus ad restitutionem, quousque extinguatur offensa Realis, ita offensa personalis trahit jus ad satisfactionem, quousque extinguatur; quoad secundam verò partem, quòd scilicet nulla Creatura possit condignè satisfacere pro mortali, supponitur ex dictis quæstione antecedenti: probatur itaque consequentia. Impossibile est causam moralem continere effectus infinitos syncategorematicè, & non esse categorematicè infinitam; sicut impossibile causam physicam non esse infinitam categorematicè, si potest producere effectus syncategorematicè infinitos; v. g. Ignis habet activitatem categorematicè infinitam, si potest producere calorem tum extensivè, tum intensivè in infinitum syncategorematicè, potest quidem ignis finitus habere superioritatem ordinis ad calorem.

calorem infinitum, non potest tamen non esse infinitus, si potest causare calorem syncategorematicè infinitum, eò, quòd debeat actu infinitum hunc effectum præcontinere: atqui peccatum est causa moralis continens satisfactiones etiam cruciativas syncategorematicè infinitas tum intensivè, tum extensivè, cum det jus ad illas exigendas; ergo peccatum est causa moralis categorematicè infinita, atque adeò gravitatis infinitæ. Ob hanc rationem Suar. *disp. 7. de peccatis sect. 3. nu. 11.* docet, Probabiliorē esse sententiam Almain. Parisiens. & Aliorum putantium, quòd mortali debeat omnis poena tum extensivè, tum intensivè infinita, sicut meritis Christi debetur omne præmium. Quod docent etiam Bernal. Aldrete. & alii cum Godoy. *nu. 256.* qui putat, hoc idem doceri implicite ab omnibus, qui tenent peccatum esse gravitatis infinitæ. Verum, quid hac in re sentiendum, dicemus art. sequenti.

Confirm. Comparando offensam Rēalem cum Personali: offensa realis, v.g. furtum, mensuratur arithmetice à re, quæ surripitur: unde si quis furetur infinitos aureos, offensa ista in morali æstimatione, censetur infinite gravis ex hoc etiam capite, quòd causet effectus morales syncategorematicè infinitos, conferendo jus ad exigendam restitutionem majorem, & majorem in infinitum; ergo pariter offensa Personalis mensuratur arithmetice à dignitate Personæ depressa, & contempta; unde si quis contemnat infinitam Dei dignitatem, offensa ista censetur infinite gravis, ex hoc etiam capite, quòd causet effectus morales syncategorematicè infinitos, conferendo Jus Deo ad exigendas satisfactiones majores, & diuturniores in infinitum: sicut merita Christi sunt infinita ex hoc etiam capite, quòd possint mereri quodvis præmium, & satisfacere pro culpis syncategorematicè infinitis; ut docet Clem. VI. in Extrav. *Unigenitus*, ubi habet: *timendum non est, ne abundantia peccatorum thesaurus Ecclesia extinguatur propter infinita merita Christi.*

Dices: Si pro veniali exhibeantur à Justo satisfactiones naturales majores, & diuturniores in infinitum, non per hoc tollitur culpa venialis, quæ unice per satisfactiones supernaturales deleri potest, & tamen veniale non habet infinitam gravitatem, sed solum est in superiori ordine, ergo etiam mortale.

Resp.

Resp. Nego Conseq. Disparitas est, quia licet culpa venialis non tollatur per satisfactiones naturales utcumque cruciativas; at Deus non potest exigere pro veniali nisi satisfactionem consentaneam poenae debitae, cum non possit punire veniale magis ac magis in infinitum; at pro mortali potest exigere satisfactiones majores, & diuturniores in infinitum, quippe quae nunquam proportionantur poenae aeternae debitae; ergo solum mortale est causa moralis continens effectus syncategorematicè infinitos, unde est infinita categorematicè.

Prob. denique Conclus. Quia transmissio, quod non possit Deus exigere à peccatore pro mortali satisfactiones doloriferas syncategorematicè infinitas, negari non potest, quod mortali debeatur poena aeterna; ergo ut arguit Angelicus in 2. dist. 43. q. 1. ar. 5. peccatum est infinitae gravitatis. *Prob. Consequentia*: Primò, quia duratio poenae aggravat poenam (adeò ut poena diuturnior æqualeat intensiori minus duranti,) & culpam mensurat arithmeticè, quatenus quod poena debita est diuturnior, eò culpa sit gravior, ut patet in poena debita venialibus in purgatorio, & in humanis, ubi carcer v. g. diuturnior debetur delicto graviori; ergo si mortali debetur poena diuturnissima, & aeterna, illud erit gravissimum, & infinitum. Secundò, quia si mortali deberetur poena infinitè intensa, sed temporanea, putà per horam, mortale esset infinitae gravitatis; ergo à fortiori, si debeatur mortali poena aeterna, quamvis finitè intensa, quia poena aeterna est gravior, & ineligibilior, quam poena infinita, & instantanea, sicut eligibilior est beatitudo finitè intensa, & aeterna quam infinitè intensa, & instantanea.

Ob hanc etiam rationem multi probabiliter colligunt, quod mortali debeatur omnis poena tum extensivè, tum, intensivè infinita: sicut meritis Christi debetur omne præmium, etenim quaelibet poena syncategorematicè major, & diuturnior in infinitum est eligibilior, & minor quam sit poena aeterna; ergo si mortali debetur poena aeterna, à fortiori debetur illi poena syncategorematicè infinita, atque adeò omnis poena, ut dicemus in ultima objectione.

VIII. Dices 1. Etiam actus supernaturales Iusti merentur de condigno vitam aeternam, nec proinde sunt infiniti valoris, & meriti, ergo quamvis mortale mereatur poenam aeternam, non proinde est infinitae gravitatis in linea demeriti.

Resp.

Respond. nego consequ. Disparitas est, quia meritum dicit proportionem ad præmium solum geometricam, seu spectata munificentia præmiantis; demeritum verò dicit proportionem arithmetica cum poena, & ideo ex infinitate poenæ debitæ arguitur infinitas demeriti; ex infinitate verò præmii exigiti solum arguitur infinita munificentia præmiantis; meritum enim non dicit exigentiam præmii absolutam, sed respectivam, quia respicit facultatem moralem tum merentis, tum præmiantis; Cum ita debeat se habere merens ad meritum; sicut se habet præmians ad præmium, ut quantum de bonis suis spoliatur se merens ponendo meritum, tantum spoliatur se bonis suis præmians conferendo præmium: propterea idem meritum majus præmium exigit à præmiantem opulentiorē; ut propterea Alexander ei, cui ob leve obsequium concesserat ingens præmium, dixerit: *Non quero, quid te oporteat accipere, sed quid me dare.* Hoc etiam communiter docent PP. apud Conink. Hurt. Rip. d. 16. sect. 4. Basilius in Psal. 114 dicit: *Vita aeterna non secundum meritum operum reddenda est*, (id est secundum meritum absolute condignum spectatā tantum ipsorum Naturā) *sed secundum gratiam munifici Dei.* Similiter loquuntur Aug. Hil. Athan. & Concil. Senonense Decr. 16. hæc habet: *Faciet tandem Deus omnis misericordia locum unicuique juxta merita operum suorum, non absolutā condignitate, neque enim condigna sunt passionibus hujusmodi ad futuram Gloriam, sed gratia magis, & liberali promissione.*

Dices 2. Ex æternitate poenæ debitæ mortali non inferitur infinita peccati gravitas, quia æternitas poenæ non debetur culpæ ob ejus gravitatem, sed ob irreparabilitatem, seu quia non potest peccator pro illa unquam satisfacere; unde quia culpa in inferno durat in æternum, ideo æternum durat reatus poenæ, quæ est passio culpæ, sicut si sol duraret æternum, æternum causaret lucem, quin proinde sol esset activitatis infinitæ; sic etiam in moralibus, contractus v. gr. Census, vel emphyteusis semel celebratus parit obligationem solvendi pensionem, seu Canonem, donec retractetur, quamvis non habeat vim obligandi infinitam.

Resp. Falsum esse, quod Culpa præcisè ob diuturnitatem non liberam mereatur poenam diuturniorem; fingamus enim mendacio, A, deberi in purgatorio poenam annuam; si quis post tale mendacium incidat in amentiam,

tiam.

tiam, & in ea perseveret per 100 annos, & deinde moriatur, adhuc per annum puniendus est in Purgatorio, quamvis culpa duraverit 100. annis. Similiter si Deus nollit in Purgatorio remittere culpam talis mendacii, nisi post mille annos (ut posset in alia Providentia) non per hoc mereretur, nisi pœnam annuam: & ratio à priori est, quia in termino, hoc est post hanc vitam non habetur amplius novum meritum, aut demeritum; ergo in inferno ob æternam diuturnitatem culpæ non habetur demeritum ad pœnam æternam, sed præcisè ob ejus gravitatem; sicut enim calor debet esse infinitè intensus, si possit producere calorem in sphæram infinitè extensam, ita culpa est infinitè gravis, si producat moraliter pœnam in æternum. Propterea D. Tho. loco citato dixit: *Debetur peccatori pœna infinita, quia tamen non potest esse infinita acerbitate, eò, quòd in creatura finita non potest esse qualitas infinita, ideò compensatur per durationem infinitam.* Sic Christo Domino propter unionem hypostaticam deberetur gratia habitualis infinitè intensa, quia tamen hujusmodi qualitas infinita repugnat, ideò habet gratiam finitè intensam in æternum in gradu consentaneo, ut docent communius cum D. Tho. Suar. contra Major. & Almain. apud Lugo d. 16. sect. 6.

Ad paritatem de sole, & contractu patet disparitas; Ideò sol (idèmq; dicas de contractu) si perseveret æternum, æternum causat lucem, quamvis sit activitatis finitæ, quia Conservatio solis æquivaleret novæ productioni ejusdem, vel alterius solis, cum universim conservatio sit continuata productio: contra verò peccatum, dum perseverat citra libertatem peccatoris, non æquivaleret novis, & novis peccatis; nec punitur crastina, eò, quòd perseveret usque ad Cras; nec veniale in inferno punitur æternum juxta probabiliorem sententiam, quamvis culpa venialis perseveret in æternum; propterea in Purgatorio, & in humanis diuturnitas pœnæ non mensurat diuturnitatem, sed gravitatem culpæ; ergo mortale non meretur pœnam æternam ob irreparabilitatem, & diuturnitatem æternam, sed ob infinitam gravitatem; ex eo enim, quòd sit irreparabile, solum sequitur, quòd non possit peccator amplius pro illo satisfacere in inferno, non verò, quòd non possit satisfacere, ut dicitur probabilius de veniali in inferno, pro quo dari potest satisfactio, non satisfactio.

ART.

ARTICULUS III.

Objectionibus satisfi.

IX. *O* *Bjic.* 1. Si mortale esset gravitatis infinitæ, omnia mortalia essent æqualia, eandemque pœnam mererentur, ut somniabant Stoici; sequelam autem esse absurdam, constat ex illo Joan. 10. *Qui me tradidit tibi, majus peccatum habet.* Neque dicas, peccata esse inæqualia in ratione malitiæ, licet non in ratione injuriæ. Nam magis est injuriosus Deo contemptus formalis, quam virtualis, & major injuria divinæ Majestati irrogatur, si clarius cognoscatur, ergo etiam in ratione injuriæ sunt inæqualia.

Confirm. Quia magis contemnitur Deus pluribus peccatis, quam paucioribus, ergo ratio injuriæ in mortali non consistit in indivisibili.

Resp. Peccata esse inæqualia in ratione malitiæ, esse verò simpliciter æqualia in ratione injuriæ, non secus ac submissiones Christi Domini sunt inæquales in ratione bonitatis, in ratione verò obsequii, & satisfactionis sunt simpliciter æquales. Error Stoicorum, ut notat Godoy, n. 138. fuit, quod peccata in omni ratione essent æqualia, sicut etiam virtutes. Ad id, quod additur, dico peccata in ratione injuriæ solum secundum quid, & spectato tantum modo contemptus posse esse inæqualia, non tamen simpliciter, & spectatis omnibus: injuria enim ex duplici Capite crescit, & ex modo contemptus, & ex dignitate Personæ offensæ: Contemptus formalis Dei si præcisè spectetur, gravior est contemptu virtuali, quia tamen ex dignitate Personæ infinitæ uterque contemptus haurit infinitatem, ideo uterque simpliciter, & spectatis omnibus, est æqualiter Deo injuriosus; sicut submitio Christi Domini in Crucifixione solum secundum quid, seu spectato tantum modo submissionis, major est submissione ejusdem per genuflexionem; utraque tamen submitio utpotè infiniti valoris ex dignitate Personæ satisfaciens spectatis omnibus est æqualis. Sic complexum ex Deo, & Angelo simpliciter, & spectatis omnibus non est majus complexo ex Deo, & homine, quamvis illud sit majus secundum quid, hoc est spectato tantum Angelo relatè ad hominem; sic etiam si dentur duæ quantitates infinitè longæ, quarum una sit bipalmaris secundum latitudinem, altera palmaris

maris

maris, illa est major secundum quid, non simpliciter, cum utraque æquivalet corpori immenso, & eodem pacto peccatum gravius meretur graviolem pœnam solum secundum quid, non simpliciter, si verum est, quod cuius mortali omnis pœna debeatur, sicut cuius merito Christi debetur omne prœmium.

Ad Confirm. Sicut plures actiones meritorie Christi domini, vel plurium humanitatum assumptarum sunt magis satisfactorie solum extensive, materialiter, & secundum quid, non verò intensive, formaliter, & simpliciter; ita plura peccata sunt magis injuriosa Deo solum extensive, & secundum quid; Sic in physicis plures infinitates hominum sunt quid majus solum materialiter, & extensive, quàm una infinitas, non verò formaliter, & simpliciter.

X. *Obje. 2.* Cum Scotistis: Peccati gravitas conflatur ex finita entitate actus, & infinita maiestate Dei offensæ; ergo peccati gravitas non est infinita simpliciter. *Prob. consequentia*, Quia quod conflatur ex finito, & infinito, non est infinitum simpliciter, sed secundum quid, ut linea infinita solum secundum longitudinem.

Confir. Si peccatum esset infinite gravitatis deberet moraliter informari ab infinita Dei dignitate, atqui dignitas infinita non est forma moralis, sed purus terminus offensæ, ergo peccatum non est gravitatis infinite. *Prob. min.* Si dignitas divina esset forma moralis offensæ, denominatio offensæ constitueretur per hanc formam; unde Deus odio habens offensam, odio haberet se ipsum tamquam constitutum offensæ. Cum non possit odio haberi constitutum, quin odio habeantur constitutiva. Adde, quod Deus magis odio haberet se ipsum, quàm peccatum, quia propter quod unumquodque tale, & illud magis, ergo si peccatum odio habetur à Deo propter infinitam dignitatem offensam, à fortiori ista odio haberetur.

Resp. Recurrere instantiam meritorum Christi domini, quæ in communissima sententia sunt infiniti valoris, quamvis conflentur ex entitate finita actus, & infinitate Personæ operantis. Quare nego consequentiam. Ad probat. Quando pars infinita continet eminenter, seu æquivalenter partem finitam, tunc quod conflatur ex finito, & infinito, est simpliciter infinitum, sicut complexum ex Deo, & Creatura est quid simpliciter infinitum, & linea infi-

infinita, quia æquivaleret quantitati immensæ, ideo est
quantitas simpliciter infinita: gravitas peccati desumpta
ex dignitate Personæ, cum sit infinita, continet æquiva-
lenter gravitatem desumptam ex objecto, & circumstan-
tiis, & ideo gravitas peccati est simpliciter infinita, quam-
vis actus physicè sit limitatus.

Ad Confirm. *Nego min.* Ad probationem *Nego sequelam*,
sicut enim Deus odio habens comestionem prohibitam,
non odit prohibitionem, seu divinam legem prohiben-
tem, à qua constituitur denominatio prohibiti; & qui
amat pœnam æqualem culpæ, non amat culpam, à qua
constituitur denominatio isthæc æqualis; ita Deus odio
habens offensam constitutam formaliter à dignitate di-
vina, non odit divinam dignitatem; Et ratio est, quia
odit offensam denominativè non quidditativè, seu con-
stitutivè; hoc est actum peccatoris, qui denominatur
offensa, non tamen odit omnia constitutiva of-
fensæ.

Ad id, quod additur, sicut propter prohibitionem o-
dio habetur comestio prohibita, nec proinde magis o-
dio habetur lex prohibens; sicut etiam propter vinum
homo est ebrius, nec proinde vinum est magis ebrium.
ita odio habetur offensam propter dignitatem personæ of-
fensæ, nec proinde hæc magis odio habetur. Ratio est,
quia illud axioma habet locum, quando idem prædica-
tum convenit utrique extremo, v.gr. quia prædicatum
Amabilis convenit tam medio, quàm fini, qui amat me-
dium propter finem, à fortiori amat finem: contra verò
quia prædicatum odibilis convenit comestioni prohi-
bitæ, non tamen prohibitioni (sicut prædicatum ebrii
convenit homini, non vino;) ideo non sequitur, quòd
qui odit comestionem propter prohibitionem, à fortiori
odio habeat ipsam prohibitionem: ita in casu nostro.

XI. *Objic. 3.* Peccatum est malum peccatori, quia privat
illum bono debito, & est malum, seu injuriosum Deo,
quia privat Deum bono, seu honoratione debitâ; ergo
tanta est injuria irrogata Deo, quanta est honoratio illi
debita; sicuti tanta est malitia peccati relatè ad peccato-
rem, quantum est bonum, quo privat illum; atqui hono-
ratio debita Deo à Creatura non est nisi finita, cum non
possit Creatura ponere honorationem infinitam, & ne-
mo teneatur ad impossibile: ergo injuria in peccato non
est, nisi finita.

Confir. Si ratione formæ teneret, hæc argumentatio, quò Persona offensa est dignior, eò gravior est offensa, ergo si Persona sit infinitæ dignitatis, offensa est infinitæ gravitatis; sequeretur, quòd etiam offensa venialis sit infinita; quia eò est gravior, quòd persona leviter offensa est dignior; Sic donum à Persona infinitè digna esset infinitæ æstimabilitatis, & visio objecti infiniti esset infinita, ergo argumentum calculatorium non infert, nisi superioritatem ordinis in peccato.

Resp. Si verum esset, quòd gravitas peccati mensuretur ab honoratione debita Deo, sequeretur, quòd posset Creatura satisfacere condignè pro mortali, quia potest Creatura ponere honorationem Deo debitam, commensuratam dehonorationi positæ per peccatum; quare sicut injuria irrogata Regi moraliter non commensuratur cum honoratione debita Regi, ita injuria irrogata Deo non commensuratur cum honoratione illi debita; & ratio est, quia honor est in honorante, offensa in offenso, & ideò honor, & inhonoratio non cœquantur. Hinc injuria solùm mensuratur à dignitate offensi, & à malo, quod vult offendens illi irrogare deprimendo ejus dignitatem; unde Mortale est infinitæ gravitatis.

In forma: *transmitto primam partem antecedentis.* Quòd scilicet peccatum sit malum peccatori præcisè, quia privat illum bono debito; diximus enim in de Gratia, quòd peccati malitia non consistit in negativo, seu in carentia rectitudinis debitæ, sed in positivo malo voluntatis, sicut error in positivo malo intellectûs. *Distinguo tamen secundam partem antecedentis.* Peccatum est injuriosum Deo, præcisè quia privat honoratione debitâ. *Nego;* quia privateâ honoratione, ponendo inhonorationem indebitam, ac deprimendo affectivè ejus dignitatem infinitam, *concedo antecedens, & nego Consequentiam.* Si peccatum ideò præcisè esset Deo injuriosum, quia privat illum honoratione debitâ, sequeretur, quòd non peccaret, qui peccat, pro quando non tenetur ponere ullam honorationem; sed posset licitè ludere, vel dormire. Quare ideo homo peccat, non solùm quia privat Deum honoratione aliquando debitâ, sed etiam quia ponit inhonorationem positivam indebitam, tollendo à Deo affectivè rationem ultimi finis, quam reponit in Creatura supra Deum amata. Hæc autem inhonoratio erga Personam

nam infinitæ dignitatis non potest non esse gravitatis infinitæ in linea injuriæ.

Ad Confirm. Argumentum illud calculatorium non tenet vi formæ, sed concludit in casu nostro vi materiæ, in qua procedit; propterea infinitatem in peccato non ostendimus vi solius argumenti calculatorii, sed ex illo communi effato: Offensa est in offenso, ut honor, & satisfactio in honorante, & satisfaciente, à quibus arithmetice ea mesurantur: Cujus ratio à priori est, quia sicut per offensam deprimitur dignitas offensi, ita per satisfactionem deprimitur dignitas satisfaciente; unde utrobique Calculatio procedit arithmetice, quod etiam evincit paritas offensæ Realis, quæ mesuratur à re, quæ subripitur; ergo etiam offensa personalis arithmetice mesuratur à dignitate offensi, quæ subripitur affectivè: contra verò offensa venialis, cum non sit rigorosè offensa, nec contemptus dignitatis leviter offensæ, non tanti æstimatur, quanti dignitas leviter offensa; sicut visio non tanti æstimatur, quanti dignitas visa, nec donum quanti dignitas donantis, & ideo hæc crescunt solum geometricè ad dignitatis incrementum.

XII. *Obje. 4.* Si mortale esset infinitæ gravitatis, mereretur omnem pœnam tum intensivè, tum extensivè infinitam; sequela non videtur admittenda, utpote contra communissimum sensum, ergo non est gravitatis infinitæ. Major patet tum paritate meritorum Christi, quibus debetur omne præmium, tum quia infinitum in una linea, est æquivalenter infinitum simpliciter, & in omni linea. *Min. prob.* Si mortale mereretur omnem pœnam, non esset superabundans Christi satisfactio (de qua dicitur in Scripturis: *Copiosa apud eum Redemptio. Empti estis pretio magno. Non sicut delictum, ita & donum.*) Et ratio est, quia sicut peccatum meretur omnem pœnam possibilem, ita meritum Christi omne præmium, unde tam peccatum mereri posset, ne satisfactio Christi applicetur peccatori, quam meritum Christi mereri posset, ne peccatum tollatur, atque adeò invicem sepelirentur.

Neque dicas, quòd Christi satisfactio sit superabundans, quia est in ordine superiori, eò, quòd sit submissio, ac depressio effectiva dignitatis verbi; peccatum verò sit depressio Dei affectiva. Nam saltem satisfactio Christi non esset superabundans relatè ad Christicidium, quod est offensa Dei effectiva denominativè, & in natura

assumpta , non secus ac satisfactio Christi est depressio verbi effectiva denominativè , & in natura assumpta.

Confr. 1. Si peccatum meretur omnem pœnam, meretur etiam , quòd careamus Redemptore; unde plus meruisset peccatum, quàm Christus; Nam Christus non meruit nobis se ipsum; peccatum verò meruisset nobis carentiam Christi. Secundò, peccatum mereretur, ne acceptentur à Deo merita Christi, & sic demeritum peccati prævaleret meritis Christi. Denique sequeretur, quòd peccatum, utpote malum infinitum , non posset à Deo permitti.

Resp. Mortale de facto in inferno puniri pœnâ finitè intensâ, & æternâ, ità ut finita intensio respondeat gravitati peccati finitæ in ratione malitiæ, & conversionis ad Creaturas; æternitas verò respondeat gravitati infinitæ in ratione injuriæ, & aversionis à Deo, dicitur enim Apoc. 18. *Quantum glorificavit se, & in delitiis fuit, tantum date illi tormentum, & lucum.* Utrùm autem mortale mereatur omnem pœnam etiam infinitè intensam? (quæ tamen non infligatur, vel quia, ut docet Angel. *loc. cit.* est impossibilis, vel quia juxta commune Theologorum axioma Deus ex sua benignitate semper punit citra condignum) Problema est habens utrinque graves DD. & fundamenta. Quòd mortali omnis pœna debeatur, docent expressè Lumb. Godoy, Bernal. Aldret, Almain. Parisiens. & implicitè idem docent, ut notat Godoy, quotquot cum Cajet. Medin. Alvar. & Aliis Thomist. ex Angelico docent, peccatum esse gravitatis infinitæ; Et ratio est, tum quia Deus potest exigere à peccatore quâmcunque submissionem cruciativam acerbiolem, & diuturniorem in infinitum, ut diximus Art. superiori; tum etiam, quia pœna æterna peccato debita major est quâvis pœnâ finitâ in infinitum; tum intensivè, tum durativè, atque adeò si mortali debetur pœna æterna, à fortiori debetur pœna syncategorematicè infinita tum secundum intensiorem, tum secundum durationem, atque adeò omnis pœna. Alii verò putant mortali solum deberi pœnam æternam ob infinitam gravitatem intrinsecam, non tamen pœnam infinitè intensam; sicut meritò Justis ob infinitatem extrinsecam divinæ munificentiae debetur de condigno gloria æterna, non infinitè intensa: sic meritis merè naturalibus Christi Domini debetur præmium infinitum naturale, non verò præ-

præmium supernaturale, ut notat Godoy n. 79. juxta dicta à nobis in de Merito, q. 1. ar. 2. Ex D. Thom. 1. 2. d. 109. ar. 7. quod scilicet meritum, & præmium debent esse in eodem ordine; sic etiam, si Justus haberet gratiam infinitè intensam, mereri posset de condigno infinitam gloriam, non tamen unionem hypostaticam; quare licet infinitum physicum, quod est in una linea infinitum, esset infinitum simpliciter, & in omni linea, infinitum tamen morale sicut potest esse infinitum solum moraliter, & non physice, ita videtur posse esse infinitum in una tantum linea; unde peccatum, quod est infinitum solum in ratione injuriæ, poterit mereri pœnam infinitam in una tantum linea, nempe æternam, non verò infinitè intensam; quamvis meritum Christi, quod ex multiplici capite est infinitum, ut dicemus quæst. sequenti, mereatur præmium æternum simul, & infinitum.

XIII. Equidem primam sententiam censeo probabiliorem, quæ immeritò dicitur esse contra sensum communissimum, cum à tot gravibus DD. doceatur, & ab ipso Suar. qui est in opposita sententia, vocetur probabilis disp. 7. de pecc. sect. 7. n. 11. Constat enim magis arduum esse explicare, quod mortale mereatur pœnam æternam, ut docet fides, quàm explicare, quod mereatur omnem pœnam, posito, quod mereatur æternam.

In forma: *Transmitto majorem, & nego minorem*; ad probationem dico, Christi satisfactionem esse superabundantem, quippe quæ est in ordine superiori, cum sit depressio effectiva dignitatis divinæ, peccatum verò solum affectiva; in morali autem æstimatione præstat una tantum satisfactio effectiva v.g. Regis, plurimis offensis Regiis merè affectivis; quare sicut unus Angelus ob ordinis superioritatem præstat infinitis Corporibus, ita una Christi satisfactio infinitis peccatis: Neque est novum, quod duo sint in eodem ordine divino, & tamen diversimodè in tali ordine reponantur; nam tam Deus est infinitè sanctus, quàm Christi humanitas: Deus tamen præstantiori modo participat sanctitatem infinitam per identitatem, quàm Christi humanitas per solam unionem cum illa: sic operationes Dei, & operationes humanitatis Christi longè diversam habent infinitatem, sic actus Christi naturales meritorii, & actus supernaturales diversam infinitatem habent in ratione meriti, cum illi mereantur præmium infinitum duntaxat naturale,

isti verò omne omnino præmium, sic in humanis ab eadem dignitate Regia diversimodè informatur moraliter satisfactio Regis, & offensa Regi irrogata, ergo dignitas divina potest etiam diversimodè informare Christi satisfactionem, & offensam infinitam, adeò ut illa sit in ordine superiori, & præstet omnibus offensis. Unde fit, non posse demeritum peccati impedire, quo minus satisfactiones Christi applicentur peccatori, eò, quòd peccati demeritum, utcumque sit infinitum, est tamen in ordine inferiori ad Christi merita, & satisfactiones.

Ad id, quod additur de Christicidio, dico primò satisfactionem, cæteris paribus præstare offensæ, v g. satisfactio Regis effectiva præstat offensæ Regiæ effectivæ; atque adeò satisfactio verbi effectiva in natura assumpta præstat offensæ Dei effectivæ, quæ pariter fiat in natura assumpta, hoc est Christicidio. Quare sicut per adversarios unum mortale præstat infinitis satisfactionibus creatis ob meram ordinis superioritatem, quamvis utrisque competat infinitas solum extrinseca, ità una Christi satisfactio præstat infinitis Christicidiis ob ordinis superioritatem, quamvis utrisque competat infinitas intrinseca.

Deinde adverto cum Martinon. n. 68. quòd actus externus juxta dicta in de Merito, non addat actui interno novum meritum, aut demeritum, nisi fortè per accidens ratione novi actus interni; propterea Christicidio de se non est magis demeritorium, nec peccatum gravius, quàm mera voluntas interna occidendi Christum, quæ est offensa merè affectiva: contra verò in Christo Domino etiam solus actus internus, quo *tradidit semetipsum pro nobis oblationem, & hostiam Deo*, ut dicitur Eph. 5. est submissio verbi effectiva; cùm enim omnes actiones sint suppositorum, etiam per hunc actum internum ipsa Persona verbi humiliavit, & exinanivit semetipsam, quamvis non formaliter, sed denominativè, & in natura assumpta. Quare quælibet Christi satisfactio, etiam si fiat per solum actum internum, cùm sit effectiva, præstat Christicidio, quod de se non est gravius, quàm offensa Dei affectiva.

Ad 1. Confir. *Concedo*, quòd peccatum mereatur Carentiam Redemptoris; unde ex sola Dei benignitate, qui, ut dicitur Joëlis 2. *Præstabilis est super malitia*, nos redempti sumus: *Concedo etiam*, quòd Christus non meruerit

meritum se ipsum ; At non proinde demeritum peccati prævalet meritis Christi , quandoquidem Christus semetipsum non meruit, non quia non meruit omne præmium possibile, sed quia hoc præmium erat sibi impossibile ; Cum principium meriti non cadat sub meritum ; quamvis autem seipsum non meruerit , poterat tamen mereri infinitas alias uniones hypostaticas aliis.

Ad 2. Si supponatur doctrinæ plurimum Recentiorum cum Vadingo, quod merita Christi exigant infruſtrabiliter à Deo acceptari in ordine ad præmium, ad quod à Christo diriguntur , non sequitur, quod peccatum mereans omnem pœnam possibilem, mereri etiam debeat, quod merita Christi non acceptentur à Deo , cum huiusmodi pœna in hac sententia supponatur impossibilis. Quod si supponamus cum communiori, merita Christi illud non exigere infruſtrabiliter concedo, quod peccatum mereatur, ne merita Christi acceptentur in ordine ad applicandas nobis suas satisfactiones, & quod solum ex divina misericordia in ordine ad hunc effectum acceptentur : Neque hinc sequitur, quod demeritum peccati præstet meritis Christi, qui ideo non meretur, quod infruſtrabiliter sua merita acceptentur à Deo, quia licet non potest sub meritum cadere principium meriti, ita nec acceptatio proprii meriti.

Ad ultimam recurrit paritas meritorum Christi, quæ quamvis infinitè digna, & amabilia, non per hoc sunt necessariò amanda, & ponenda à Deo, quia habent infinitatem solum moralem, non physicam, ergo pariter peccatum, quia habet infinitam odibilitatem, & malitiam solum moralem, non physicam, non per hoc necessariò excluditur, quin possit à Deo permitti. Adde, quod licet peccatum etiam veniale, utpote malum morale, non possit amari à Deo, at permissio peccati, utpote bona, & melior, quàm ejus Carentia, relatè ad universum, non solum potest à Deo amari, sed etiam necessitatur moraliter Deus ad illam ponendam, ut diximus questione 2. propter majus bonum Redemptionis, quod provenit ex culpa :

adeò ut Ecclesia canat ;

O felix culpa.

Q U Æ S T I O V.

Utrum Satisfactio & Meritum Christi Domini fuerit Valoris infiniti, & superabundans?

I. **C**ertum est ex Trid. Sess. 6. c. 6. Christum Dominum meruisse, ac pro culpis nostris satisfecisse. Indubitatum etiam est Christum de facto meruisse in actu secundo præmium finitum, & satisfecisse pro culpis finitis; Et ratio est, quia non nisi præmium finitum fuit illi à Deo promissum, & solum pro culpis finitis omnium hominum usque ad diem Judicii futurorum ejus satisfactio fuit acceptata; constat autem ex dictis in de Merito, quod ut possit operatio meritoria condignè mereri in actu secundo præmium aliquod, requiratur divina promissio; sicuti etiam, ut possit satisfactio extinguere culpam alienam, debet pro illa acceptari ab offenso; nemo enim tenetur, secluso pacto, aut dare præmium, aut cedere juri suo, etiam si alius offerat obsequium, vel pretium æquivalens; & à fortiori Deus, qui potest quodcunque obsequium à Creatura, & ab ipsa etiam Humanitate assumpta exigere, ut sibi debitum multis titulis. Denique certum est, quod Christus Dominus pro omnibus omnino hominibus suas satisfactiones obtulerit, ut constat ex proscriptione ultimæ Thesii Jansenii dicentis: *Semipelagianum est, Christum pro omnibus omnino mortuum esse, aut sanguinem fudisse*; Quamvis enim non pro omnibus fuderit sanguinem quoad efficaciam, fudit tamen quoad sufficientiam pro omnibus, atque adeò etiam pro reprobis, quatenus si per ipsos non staret, quominus sibi Sacramenta, Passionis instrumenta applicentur, etiam ipsis remitterentur peccata, & salvarentur.

Dubitatur solum, utrum Christi operationes fuerint infiniti valoris in actu primo tum in linea meriti, tum in linea satisfactionis, adeò ut potuerint quodvis præmium syncategorematicè infinitum contignè mereri, si promitteretur, & pro culpis syncategorematicè infinitis superabundanter satisfacere, si pro iis acceptarentur?

III. Dico equidem, operationes honestas Christi Domini fuisse in actu primo infiniti valoris ad satisfaciendū & merendum. Ità communissimè Theol. apud Suar. d. 4. sect. 4. contra Duran. Med. Gabr. & contra Scotum, qui juxta

juxta sua Principia negat operationibus meritoriis , & satisfactoriis quamcunque virtutem independentem ab acceptatione divina , & quia Deus acceptavit merita Christi relatè ad præmium finitum , idèò dicit merita Christi fuisse valoris finiti. Sed communiter Theologi docent , Acceptationem divinam , & ordinationem ad præmium non requiri ad actum primum meriti , sed ad actum secundum, unde quamvis merita Christi in actu secundo fuerint valoris finiti, quatenus de facto finitum præmium meruerunt ; Non proinde fuerunt finiti valoris in actu primo, de quo solùm est controversia.

Prob. 1. Ex scripturis. dicitur enim Cor. 6. *Empti estis pretio magno* : ergo meritum , & satisfactio Christi fuit valoris infiniti , & superabundantis pro quavis culpa. *Prob. consequentia* , quia si juxta sententiam Scoti Satisfactio Christi esset finita, quia mensuratur ab acceptatione Dei, sequeretur , quòd tantus esset ejus valor, quanta est gravitas, & multitudo culparum, pro quibus acceptatur : ergo satisfactio Christi non fuisset pretium magnum, sed æquale, cum autem sit magnum , dicendum, esse valoris infiniti, & superabundantis. cùm non habeat, unde limitetur.

Confir. Authoritate Clem. VI. in Extrav. *Unigenitus*, ubi docet, non esse timendum, quod Thesaurus satisfactionum Christi Ecclesiæ relictus exhauriatur per quamcunque remissionem culparum, & infusionem gratiarum, quia (inquit Pontifex) *Infinita sunt Christi merita* : & inferiùs addit, Christum dominum non effudisse guttam sanguinis modicam, quæ tamen propter unionem ad verbum pro redemptione humani generis suffecisset, quod etiam docuit Ansel. c. 14. dicens : *Potest Christi satisfactio sufficere ad solvendum pro peccatis totius mundi, plusquam in infinitum.* Quòd si valor sanguinis Christi non fuisset infinitus, sed mensuraretur ab acceptatione divina, non esset verum, quòd modica gutta sufficeret ad Redemptionem, sed requireretur integra passio, & mors Christi domini, quia juxta omnium Theologorum sententiam, integra passio, & mors fuit oblata à Christo, & à Deo acceptata in satisfactionem adæquatam. Tamen posita hac definitione Clem. VI. censet temerariam esse sententiam oppositam. Sed ab his censuris abstinendum ; cùm Sacra Congregatio Pauli V. Jussu declararit , immunem esse à Censuris Doctrinam Scoti,

præceperitque liberorum censoribus, ne unquam typis prohiberent, quod certè contaret à Scoto deproptum. Et quamvis verum sit, quòd docet Maitrius, Scotum hac in re non recedere à sententia Communissima, cum solum velit merita Christi fuisse finita in actu secundo, non in actu primo, adhuc à censuris abstinendum, quia Innoc. XI. post propositiones illas damnatas, in virtute Sanctæ obedientiæ præcepit, ne propositiones, quæ inter Catholicos controversantur, ulla censura, aut nota mirantur.

III. *Prob. 2.* Conclus. iisdem rationibus, quibus ostendimus infinitam peccati gravitatem; Et primum à posteriori, quia quælibet causa continens effectus syncategorematicè infinitos, est categorematicè infinita, atque Christi satisfactio continet effectus syncategorematicè infinitos, nempe extinctionem Reatus culparum non tot, quin plurimum, ergo est valoris categorematicè infiniti. Minor patet tum ex definitione Clem. VI. tum ex communi sensu PP. & locutione Scripturarum, dicitur enim Esai. 1. *Si fuerint peccata vestra, ut coccinum, quasi nix dealbabuntur;* ubi ly, *ut coccinum* dicitur emphaticè, ut PP. interpretantur, & sit sensus, quod peccata ut ut multa, & gravia, per poenitentiam, vi satisfactionum Christi deleantur.

Deinde ratio à priori est, quia juxta commune effatum *Actiones sunt suppositorum*, adeò ut magis tribuantur supposito operanti ut quod, quam naturæ operanti ut quo; sic in divinis, Pater v. gr. dicitur generare, non natura divina, quamvis principium quo, juxta celebriorem sententiam, sit sola Natura divina, ergo actiones humanæ Christi principaliter sunt Verbi, quam Humanitatis operantis ut quo, & instrumentaliter: ut proinde à Dionysio appellentur Theanthricæ, seu *Dei viriles*, & à Damasc. Divinæ, seu deitate perfusæ, ergo in ordine ad merendum, & satisfaciendum illam æstimabilitatem habent, quam habet verbum principaliter operans, atque adeò infinitam. *Prob. consequentia*, quia Actio suam æstimabilitatem sumit à præcipua ejus circumstantia, quæ est circumstantia Personæ, ut proinde damnata sit à Pio V. & Greg. XIII. propositio XX. Baji dicentis: *Opera justitia, & temperantia, quæ Christus fecit, ex dignitate Personæ non traxerunt majorem valorem*, ergo, si operationes sint à Persona infinite dignæ, infinitam habent æstimabilitatem.

tatem ; Cum in morali æstimatione tant. i fiat operatio, quanti dignitas operantis.

Confirm. ex Valsq. d. 6. Quia idem actus physicè invariatus ex diversa circumstantia Personæ potest variari moraliter, v. gr. idem actus fidei supernaturalis, si fiat à peccatore, non est meritorius vitæ æternæ ; secus verò si à iusto , ergo actus procedens à supposito divino est infinitè meritorius, & satisfactorius. *Prob. conseq.* quia quoties idem actus physicè invariatus à nova forma morali haurit novam æstimabilitatem à forma morali infinita, haurit æstimabilitatem infinitam ; Nam sicut potest moraliter mutari, quin mutetur physicè, ita potest moraliter infinitari, quin physicè infinitetur.

IV. *Obic.* 1. Dignitas Verbi infinita non transfundit moraliter suam dignitatem infinitam in operationes Christi domini, cum limitetur ab unionē hypostatica limitata, sicut communius docent, infinitam Dei dignitatem non descendere secundum se totam ad gravificandam Dei offensam, sed limitari à cognitione limitata, ergo operationes Christi domini non sunt dignitatis infinitæ.

Resp. Quamvis posset Dei offensa limitari à cognitione, non per hoc valor operationis Theanthricæ limitari potest ab unionē hypostatica limitata. Disparitas est, quia si supponatur mortale esse finitæ gravitatis, & non informari moraliter à Deo offenso, eo ipso offensa respicit Deum, ut terminum, & objectum, quod de se potest varias cognitiones specificare ratione diversæ influxus, & sic ratione diversæ cognitionis terminare diversos speciei actus voluntatis, qui non aliam habeant infinitatem, nisi extrinsecam, & terminativam, ut cognitiones : At in casu nostro dignitas verbi satisfaciētis non se habet, ut objectum, seu forma moralis extrinseca, sed ut forma moralis intrinseca, quæ nullatenus potest limitari ab unionē hypostatica physicè finita, cum enim forma identificetur adæquatè cum effectu formali, quem constituit, implicat formam esse infinitam, & effectum formalem non esse pariter infinitum.

Quòd autem dignitas verbi sit forma moralis intrinseca relatè ad operationes Christi, patet, quia in morali æstimatione operationes sunt suppositorum, & quamvis Verbum non influat immediatè in operationes huma-

ni-

nitatis, adhuc istæ operationes dicuntur esse Verbi principaliter operantis per voluntatem humanitatis, tamquam per aliquid physice suum, sicut licet solus pennicillus concurrat immediate in picturam, & Ars, quæ est in intellectu pictoris concurrat mediatè, nobilitas, & excellentia picturæ tribuitur potius arti principaliter concurrenti, quam pennicillo concurrenti instrumentaliter.

V. *Objic. 2.* Si operatio Christi hauriret dignitatem infinitam à Persona Verbi, sequeretur, quod productio vermis facta à Deo, esset pariter infinitè digna ob infinitam dignitatem Dei producentis, imò ipse vermis esset infinitè dignus.

Confirm. Quia etiam somnus, & alia operatio naturalis, vel indifferens Christi domini esset infinitè digna, & infinitè meritoria, quod nemo dixerit.

Resp. Si loquamur de Decretis divinis seu de voluntate producendi vermem, proculdubio sunt infinitè digna, si verò de ipsa productione vermis, cum ipso verme identificata, incapax est, ut denominetur sancta, & digna à sanctitate, & dignitate Dei, producentis vermem. Solum enim actio libera, & honesta capax est huius denominationis; productio autem vermis non est ipsa actio libera divina, sed terminus divinæ voluntatis, & ideo denominari non potest sancta, & infinitè digna intrinsecè, sed solum extrinsecè, quatenus dicit habitudinem ad Deum producentem; sicuti in Rege voluntas equitandi habet dignitatem Regiam, Equus verò Regius non habet dignitatem Regiam, nisi extrinsecè per habitudinem ad Regem, qui illo utitur ad equitandum.

Ad Confirm. Nec operationes Christi non liberæ, ut somnus; nec operationes liberæ moraliter indifferentes, (hoc est neque honestæ, neque inhonestæ) possunt esse meritoria, quia ad meritum essentialiter requiritur libertas, & honestas actus; unde solum extrinsecè dignificantur à Verbo.

Objic. 3. Si dignitas, & Sanctitas Verbi tribueret operibus Christi valorem infinitum ad merendum, & satisfaciendum, sequeretur 1. quod actus naturales honesti elicti à Justo dignificarentur à gratia habituali, & essent meritorii vitæ æternæ. Secundò quod Justus præditus gratiâ ut 8. eliciendo actum remissum haberet meritum

ut

ut 8. unde magis mereretur actu remisso, qui habet gratiam intensam, quàm actu intenso, qui habet gratiam remissam, quod videtur falsum, & contra illud Scripturæ. *Reddet unicuique juxta opera sua* 3. quòd vilitas, & indignitas Personæ operantis redderet operationes malas magis demeritorias; unde majus esset demeritum peccatoris scelestissimi, quàm non peccatoris, in hypotheli, quòd idem peccatum committant, quod nemo dixerit.

Resp. Nego 1. sequelam, meritum debet esse in eodem ordine, ac præmium, & ideò actus naturales tam justi, quàm ipsius Christi non exigunt præmium supernaturale. Sed transmissio quòd operationes naturales Christi possent dignificari à subsistentia divina ad meritum supernaturale, non per hoc operationes naturales justi dignificarentur à gratia habituali ad merendum præmium supernaturale. Disparitas est, quia, ut notat Amic. n. 80. Suppositum Verbi etiam relatè ad operationes naturales Christi est Principium quod, & ideò illas dignificat: contra verò gratia in justo non est principium operationum naturalium, sed supernaturalium tantum, ad quas influit per habitus supernaturales, & ideò gratia solum actus supernaturales dignificat ad præmium supernaturale.

Ad 2. Verum est ex D. Tho. quòd opera Justis habentis majorem gratiam, cæteris paribus, sint magis meritoria, quia gratia in ordine supernaturali tenet locum naturæ exigentis habitus infusos tamquam potentias, & proprietates; Cum autem natura se transfundat in operationes suas, ideò pro excessu bonitatis in tali natura inducitur in operationem major æstimabilitas. Utrum autem habens gratiam v. gr. ut 8. per quemvis actum remissum mereatur augmentum gratiæ ut 8. adeò ut dignificetur arithmetice meritum à gratia præexistente; Varia Varii apud Lugo d. 6. sect. 2. Lumb. n. 538. & Gonetius putant, Gratiam dignificare actum juxta conatum physicum, quem pro libito exhibet voluntas, cui subditur. Equidem transmitto, quòd habens gratiam ut 8. per actum remissum mereatur solum v. gr. gratiam ut 4. nempe dimidium gratiæ præhabitæ, & habens gratiam ut 4. per consimilem actum mereatur augmentum gratiæ ut 2. atque adeò cum proportionem solum geometricam; Cum hoc tamen stat, quòd si justus haberet gratiam

infinitam, meritum cujuscunque actus esset infinitum, quia dimidium infiniti est etiam infinitum, unde actus Christi dignificatus à Verbo est infinite meritorius.

Ad illud Scripturæ : *Reddet unicuique juxta opera sua*, Respondet Lugo, sensum esse, quod Deus non respiciat opera nudè sumpta, sed prout hic & nunc à gratia dignificantur ad præmium, unde eidem operi majus præmium confertur, si illud procedat ab habente gratiam intensiorem.

Ad 3. Dico, duplicem dari vilitatem in creatura, alteram essentialem, quatenus relatè ad Deum est quælibet creatura infinite vilis, alteram accidentalem, quam habet peccator ob sua crimina : Vilitas substantialis creaturæ reddit offensam Dei infinite gravem, non secus ac infinita dignitas Dei offensi; Nam sicut in physicis per idem habetur profunditas, & altitudo, ita in moralibus per eandem circumstantiam habetur vilitas offendentis, & dignitas offensi, ista tamen vilitas substantialis non reddit alias operationes creaturæ infinite viles, & indignas; Cum vilitas ista sit quid negativum, contra verò dignitas personæ infinite, cum sit quid positivum complens principium operativum, & moraliter se transfundens in operationes, reddit illas infinite dignas.

Vilitas verò accidentalis, quam habet peccator, non reddit novum peccatum magis indignum, & demeritorium, quia non se habet, ut natura relatè ad operationes malas, gratia verò quia se habet, ut natura supernaturalis, quæ per suas potentias, hoc est per habitus infusos influit ad actus supernaturales, dignificat illos ad majus præmium. Neque dicas, quod sicut per gratiam participamus naturam divinam, ita per peccatum, naturam diaboli, juxta illud Jo. 8. *Vos ex Patre diabolo estis*; Nam diaboli natura non participatur realiter, sicut participatur natura divina per gratiam, sed metaphoricè, per hoc quod imitemur operationes diaboli per peccatum.

VII. Ex dictis sequitur 1. In hoc differre sententiam catholicam ab hæresi Jansenii admittentis etiam sufficientiam sanguinis Christi ad omnium redemptionem; quod Jansenius voluerit, sanguinem Christi potuisse offerri, & acceptari pro omnibus, de facto tamen non fuisse oblatum, & acceptatum pro Reprobis, sicut

sicut non fuit oblatum, & acceptatum pro Redemptione demonum, quamvis enim intuitu meritorum Christi demonibus collata sit gratia sufficiens ad non peccandum, non tamen ad resurgendum. Verum Catholici docent, non solum pro Prædestinatis oblatam fuisse Christi passionem, sed etiam pro Reprobis hominibus, quibus Christus meruit etiam auxilia ad resurgendum, dicente Apostolo: *Dedit semetipsum pro omnibus, ut nos redimeret ab omni iniquitate.* Hinc diximus in de Gratia, etiam Parvulis decedentibus in utero matris Deum providisse de remedio ad salutem.

Sequitur 2. Non esse admittendam Scotistarum sententiam putantium meritum, sicut etiam satisfactionem Christi à dignitate Personæ crescere geometricè, atque adeò non esse simpliciter infinitum, sed solum in superiori ordine ad omnes offensas; Ratio est, quia quod continet moraliter effectus syncategorematicè infinitos, non solum est in superiori ordine, sed est etiam categorematicè infinitum: atqui Christi satisfactio de se extinguit reatum culparum syncategorematicè infinitum, ergo est categorematicè infinita. Admittimus tamen sententiam Scoti, juxta interpretationem Mastrii, quod meritum Christi in actu primo ex dignitate Personæ crescat arithmetice, quamvis enim de condigno, & in actu secundo meruerit præmium finitum, ob promissionem præmii finiti, de congruo tamen, scilicet in actu primo meritum est infinitum, quatenus si præmium infinitum promissum fuisset, illud condignè meruisset, & pro infinitis culpis condignè satisfacisset, si pro infinitis fuisset oblatum,

Sequitur 3. Satisfactionem Christi, esse superabundantem ad omnes culpas, quamvis mortale sit infinitæ gravitatis, sicut in omnium sententia est superabundans ad peccata infinita. Ratio est, quia modus, quo deprimitur Verbum in satisfactione præstat modo, quo deprimitur in offensa; Cum satisfactio sit depressio effectiva, peccatum verò affectiva. Nec mirum, quod duo sint infinita, & in ordine supremo, atque adeò æqualia relatè ad terminum, & simul sint inæqualia in modo, quo terminum participant: Sic actus charitatis Christi præstat actui misericordiæ, & actus Christi supernaturalis actui naturali, quamvis omnes sint infinitè meritorii; sic sanctitas Dei præstat sanctitati Humanitatis Christi.

Christi quoad modum ; quatenus à Deo habetur peridentitatem , ab humanitate per unionem. Et ratio à priori est, quia solus Deus est infinitus omni modo ; infinitum verò, quod moraliter tantum participiat infinitatem, quoad modum , quo participat divinam infinitatem, est limitatum ; & ideo quoad hunc modum potest crescere.

Sequitur 4. operationes Christi esse æquè dignas , sanctas, & Deo gratas, ac operationes Dei, imò, ac ipsam Personam Verbi ; quamvis non sint dignæ eodem modo ; etenim Verbum est infinitè dignum , & sanctum per sanctitatem infinitam identificatam, merita verò, & ipsa Humanitas Christi, sunt infinitè digna, & sancta per eandem Verbi sanctitatem communicatam, & participatam. Unde quoad modum, quo sanctificantur , habent limitationem, non verò quoad ipsam sanctitatem.

Sequitur 5. Singulas Christi operationes fuisse æquè dignas , & meritorias in actu primo cujuslibet præmii possibilis, quamvis in actu secundo non nisi omnes simul fuerint à Deo acceptatæ relatè ad præmium finitum , ut passim docent PP. tribuentes integræ passioni Redemptionem , juxta illud Is. 53. *Si posuerit pro peccato animam suam, videbit semen longævum.*

Sequitur 6. Quid dicendum si Duo Christi , alter peteret , quod Petrus moriatur & salvetur ; Alter verò, quod Petrus vivat , & habeat opportunitatem ulterius merendi. Nonnulli apud Haunol. docent ad divinam providentiam spectare , quod duo Christi non petant contraria : Alii docent, quod uterque in actu primo exigeret tale præmium ; atque adeò solum de congruo, quin teneatur Deus illud conferre , ille tamen mereretur de condigno, cui Deus præmium promitteret, quin tamen possit Deus utrique simul Christo præmia illa opposita promittere.

Sequitur ultimò, Christum non satisfacisse ut purum hominem, nec ut purum Deum, sed ut Deum hominem, quia , ut Deus fuit Principium quod satisfaciens , ut homo verò fuit principium quo : Neque hinc sequitur, quod idem omninò Deus sit satisfaciens , & cui satisfit ; Nam Deus fuit satisfaciens solum per operationes humanitatis : unde satisfactio fuit ad alterum , imò etiam de rigore justitiæ, ut dicemus quæst. sequenti.

VIII. Dubitatur hic , An satisfactio & meritum Christi sint

sint infiniti valoris non solum ratione Personæ operantis, sed etiam ratione rei oblatae infinitæ? Negant Suar. *d. sect. 4. Vasq. d. 6. c. 2.* Quia licet res oblata à Christo domino, nempe propria vita, fuerit infinitè digna, actus tamen circa tale objectum fuit infinitus, & ex modo tendendi limitatus: propterea sicut oblatio Christi domini facta à B. Virgine, & à Simeone in templo non fuit valoris infiniti, ita nec oblatio propriæ vitæ facta à Christo domino.

Affirmat Amic. *d. 6. sect. 3. ex D. Th. q. 48. ar. 3.* Ubi infinitatem satisfactionis Christi deducit etiam ex infinita dignitate vitæ Deo in satisfactionem oblatae, præsertim quia PP. etiam superabundantiam satisfactionis referunt tum ad dignitatem Personæ operantis, tum ad dignitatem Rei oblatae. Ratio ex Amico est, quia idè operatio Christi haurit infinitum valorem à Verbo, tamquam à Principio dignificante, quia immediatè conjungitur Humanitati unitæ Verbo, & sic mediatè unitur physicè ipsi Verbo, atqui pariter eadem Christi operatio, quæ offert Patri se ipsum, suam vitam, corpus, & sanguinem, immediatè unitur huic termino oblato, nempe Humanitati, quæ physicè unitur Verbo, ergo hujusmodi operatio infinitè dignificatur tum à principio dignificante, tum à termino oblato infinito.

Confirm. Ad valorem satisfactionis, meriti, & sacrificii à Christo oblato concurrat non minus persona operans, quàm res oblata (quamvis Persona concurrat, ut Principium quod, res verò oblata, ut terminus intrinsecè conjunctus cum eadem operatione) ergo si infinita dignitas Personæ transfundit valorem infinitum in satisfactionem, etiam transfundet dignitas infinita rei oblatae.

Ad id, quod obijcitur à Suar. & Vasq. Respondet Amicus, Tunc actum ad objectum infinitum limitari à modo tendendi, quando respicit objectum, ut purum terminum, seu, ut formam moraliter extrinsecam, non verò quando respicit illud, ut effectum moraliter operabilem, seu, ut rem offeribilem, cum qua intrinsecè conjungatur; tunc enim haurit ab eo dignitatem, tamquam à forma morali intrinseca, non secus ac à principio operativo, quia talis actus sicut conjungitur cum principio operativo, ita etiam cum termino oblato. Et per hæc patet disparitas, cur oblatio Christi facta à B.

Virgine, & à Simeone non fuerit moraliter infinita ratione rei oblatae; quia scilicet res oblata non erat intrinsecè conjuncta cum oblatione facta à B. Virgine, sicut est conjuncta cum oblatione facta ab eodem Christo domino, sicut eim Persona operans solum dignificat, & moraliter informat operationes sibi intrinsecè conjunctas, non verò alias, ad quas concurrit (puta si Christus physicè concurrat ad conversionem D. Pauli) ità res oblata dignificat, & moraliter informat operationem, seu oblationem, sibi intrinsecè conjunctam, & cujus est effectus operabilis, non verò alias oblationes.

Dices: Oblatio pecuniæ infinitæ esset infiniti valoris, sicut etiam infinitè grave furtum infinitæ pecuniæ, ergo etiam oblatio Christi facta à B. Virgine erit infiniti valoris ratione Rei oblatae; quinimo etiam Voluntas erogandi stipem infinitam, & voluntas furandi pecuniam infinitam, aut occidendi infinitos homines, & contemnendi omnes Creaturas, contrahunt infinitatem, non secus ac mortale, necnon & satisfactio Christi.

Resp. nego consequ. & 1. quidem, sicut per Adversar. isti actus non sunt in ordine supremo; ità nec per nos infiniti: Deinde oblatio pecuniæ infinitæ solum posset esse infinitæ æstimabilitatis ratione utilitatis infinitæ, quam afferret. & furtum infinitum esset infinitè grave ratione damni infiniti, voluntas tamen offerendi, vel tollendi pecuniam infinitam nullam habet infinitatem, nisi extrinsecam, & terminativè, quia hujusmodi voluntas de se non habet efficaciam infinitam, sicut haberet voluntas efficaciter oblativa, vel dativa pecuniæ infinitæ; similiter voluntas occidendi omnes homines, & contemnendi omnes creaturas est solum terminativè infinita, quia in morali æstimatione, offensa plurium in confuso minoris fit, quàm offensa plurium in individuo: unde sicut per Adversarios voluntas ista non est in supremo ordine offensa, ità nec per nos habet infinitatem. Denique oblatio Christi facta à Beata Virgine neque fuit infiniti valoris in linea obsequii, quia obsequium mensuratur à dignitate offerentis, quæ in casu nostro est finita; neque fuit infiniti valoris in ratione utilitatis, quam posset afferre tale donum infinitum, quia Christus non fuit datus B. Virgini, ut offerret, nisi ob effectum, & utilitatem finitam, ipse verò Christus utpote adæquatè sui juris

po-

poterat se ipsum offerre ob quemcunque effectum syn-
categorematicè infinitum, & idèd solùm oblatio Christi
à se ipso facta erat infiniti valoris tum in linea obsequii,
tum in ratione utilitatis, quam posset asserre hujusmodi
res oblata infinita.

Q U Æ S T I O VI.

Utrum Christi satisfactio fuerit ex ri- gore Justitiæ.

I. **N**Egant Vasq. d. 7. Lugo d. 3. Amic. , Less. , & Alii
putantes Christi Satisfactionem quamvis pro of-
fensa superabundantem , deficere à rigore Justitiæ , ed
quòd defint illi nonnullæ ex conditionibus requisitis ,
ut satisfactio sit actus justitiæ. Affirmant tamen Tho-
mistæ apud Gonetum d. 4. cum Suar. d. 4. Haunol. n.
87. Martinon. d. 2. , & Aliis communius. Nos sup-
ponentes ex dictis anno superiore possibilem esse Justi-
tiam inter Deum, & Creaturam, inquirimus, An de fa-
cto adfuerint in Christi satisfactione omnes Conditio-
nes ad actum rigorosæ justitiæ requisitæ, adeò ut pos-
sit dici , tam Christum exercuisse actum Justitiæ erga
Deum exhibendo pro nobis suas satisfactiones , quàm
Deum actum justitiæ erga homines exercere remitten-
do culpas post Christi satisfactiones juxta acceptatio-
nem, & promissionem præviam?

Dico 1. Christi Satisfactionem de facto fuisse de toto
rigore justitiæ.

II. *Prob. 1.* Ex Scripturis dicentibus, Nos emptos ef-
se magno pretio, & Christum delevisse chirographum,
quod erat nobis contrarium, quæ phrasès ad veram, &
propriam justitiam spectant. Sic PP. communiter lo-
quuntur apud Martinon. *præf. Aug. 13. de Trin. 13.* ubi
habet : *Diabolus non potentiâ Dei, sed Justitiâ superan-
dus erat.*

Prob. 2. Ratione ; In satisfactione Christi nulla deest
conditio requisita ad actum justitiæ pressè dictæ ; ergo
Prob. antecedens : Conditiones ad actum justitiæ requi-
sitæ sunt : Prima, quòd hujusmodi actus sit ad alterum,
cùm non possit idem erga se ipsum justitiam exercere.
Secunda quòd solvatur æquale. Tertia, quòd solutio
non fundetur in gratia creditoris. Quarta, quòd
repudiari non possit. Quinta, quòd non fiat ex bonis

creditoris. Sexta, quòd non fiat ex aliàs debitis. Atqui nulla ex his defuit conditio in Casu nostro, ergo : *prob. min. per partes.*

III. Non defuit 1. Conditio, scilicet quod detur Alteritas Jurium, quia Christus dominus, ut habens naturam humanam satisfecit Deo habenti voluntatem divinam, hypostasis enim Verbi præcisè spectata non satisfecit, sed solum dignificavit operationes Humanitatis, quibus Christus satisfecit, unde quamvis non interfuit dualitas, seu alteritas Personalitatum; interfuit tamen alteritas Voluntatum, & jurium sufficiens ad actum justitiæ, sicut enim sola distinctio voluntatum sufficit, ut Christus dicatur Deo obedire, gratias agere, &c. ità etiam sufficit, ut dicatur ex justitia satisfacere Deo offenso, eadem enim Persona sub duplici Voluntate divina, & humana, gerere potest vices Creditoris, & Debitoris: sicut in humanis, quando Tutor v.g. nomine pupilli solvit sibi debitum, idem Tutor gerit vices Creditoris, & Debitoris, sicut etiam, quando Minister Regius publico nomine exigit à se ipso contributionem.

IV. Neque defuit Secunda conditio: nempe æqualitas inter Satisfactionem, & debitum, seu inter jus passivum, & activum, esto verum sit quod satisfactio fuerit superabundans, atque adeò non positivè æqualis. Nam primò ad solvendum ex justitia sufficit æqualitas negativa, seu quòd non sit majus debitum, quàm sit solutio, etiamsi hæc admisceat liberalitatem quoad modum, ut si debens 100., det gemmam valentem mille. Deinde quamvis secundum se pro mortali non debeat satisfactio superabundans, tamen posito pacto oneroso inito inter Deum, & humanitatem, quod mortale non remittatur, nisi positâ satisfactione istâ superabundanti, tenebatur Christus Fidejussor ad illam ponendam, quæ licet esset pro peccato superabundans, erat tamen æqualis obligationi ex justitia à se susceptæ, ratione pacti onerosi. Sic licet mille aurei excedant valorem equi, si tamen quis obliget se ex justitia ad dandum mille pro equo (dummodo non se obliget titulo emptionis, de cujus ratione est, quod pretium sit justum) Certè ex justitia teneturolvere mille, dum accipit equum.

V. Neque defuit tertia Conditio quod scilicet Christi

Sa-

Satisfactio non fundetur in gratia Dei offensi, & Creditoris, ne quantum admiscetur gratiæ, tantum de iustitia detrahatur: Ad hoc ostendendum, duplex distinguenda est gratia Creditoris, altera, quæ suppleat defectum valoris satisfactionis, v. gr. Si Creditor debenti 100. donet 30., & consentiat quod dentur solum 70., vel si pro debito 100. accipiat gemmam valentem 50.: Altera, quæ non suppleat defectum valoris, & condignitatis, sed det ipsi operi valorem, & condignitatem, adeo ut valor operis fiat æqualis debito. Ex his duabus, Prior gratia procul dubio impedit, ne actus satisfactivus sit rigorosæ iustitiæ, non tamen secunda gratia, quæ solum habetur in Casu nostro, Deus enim gratis per unionem hypostaticam dignificat operationes humanitatis assumptæ, qua condignitate, & valore posito, satisfactio fit æqualis offensiæ, ergo hæc tertia Conditiō non desuit.

Dices: Si Petrus debens 100. Paulo, dono accipiat à Paulo etiam 100., sub conditione, quod illos restituat eidem Paulo creditori pro suo debito; Certè Petrus restituendo 100. non ponit actum iustitiæ, quia restitutio ista fundatur in gratia Pauli creditoris, ergo neque in Casu nostro.

Resp. Nego consequentiam: Disparitas est, quia Paulus in Casu posito non donat Petro 100. absolute, sed conditionate, hoc est, dummodo restituat; unde Petrus non habens dominium absolutum illorum 100. non restituit de bonis propriis, & ideo non ponit actum iustitiæ restituendo, secus verò in Casu nostro, unde paritas retorquetur; Nam si Paulus donet absolute 100. Petro, & hic illos restituat deinde eidem Paulo pro suo debito, certè ponit actum iustitiæ, quamvis talis actus fundetur, & præsupponat gratiam Creditoris, quod accidit in casu nostro.

VI. Neque desuit Quarta, quod scilicet satisfactio Christi repudiari non possit à Deo offenso; quamvis enim possit universum offensus repudiare satisfactionem præstitam ab alio, quam ab offendente (sicut potest Creditor repudiare pretium iustum, v. g. equi furto sublato, quando potest restitui idem equus in individuo.) Nihilominus, posito contractu inter Christum, & Deum consentientem in satisfactionem exhibendam à Christo Fideiussore, non potuit deinde Christi satisfactio

à Deo repudiari. Hinc non obstat satisfactioni à Christo præstitæ, quo minus sit actus rigorosæ justitiæ per hoc, quod non ponatur illa à peccatore, sed à Christo, qui non peccavit; sufficit enim, quod Christus fidejussit pro peccatore, ut debitum sit moraliter proprium Christi, & satisfactio moraliter dicatur esse ab ipso offensore. Hinc in Psalmis dicitur: *Longe à salute mea Verba delictorum meorum*, quia per fidejussionem contraxit Christus debitum satisfaciendi, perinde ac si ipse peccasset, sicut autem peccatum nostrum ratione fidejussionis dicitur peccatum Christi, ita satisfactio Christi exhibita pro nobis, dicitur satisfactio nostra.

Ubi adverte, quod licet Christi satisfactio pro omnibus culpis hominum exhibita, & acceptata sit, non per hoc omnia peccata extinguit in actu secundo, ut enim loquitur Trid. sess. 6. c. 3. *Etsi pro omnibus mortuus est Christus, non omnes tamen mortis ejus beneficium accipiunt, sed ii dumtaxat, quibus meritum passionis ejus communicatur, & ratio est, quia Christi satisfactio non fuit à Deo acceptata, nisi juxta pactum inter Deum, & Christum, quod scilicet Passio, & mors Redemptoris eorum peccata deleret, quibus applicaretur vel per contritionem extra sacramentum, vel per ipsam sacramenti susceptionem.*

VII. Neque defuit Quinta conditio, quod scilicet Solutio fiat ex bonis Debitoris, Nam quamvis omnes actus humanitatis sint sub dominio Dei, hoc non obstat, quo minus etiam sint sub dominio pleno ipsius Humanitatis, ut explicavimus anno præterito, admittentes in Deo, & creatura dominium in solidum positivè. Quare sicut potest Creatura in omnium sententia mereri ponendo actus liberos proprios, qui pariter sunt sub dominio Dei præmiantis; ita potest Christi Humanitas satisfacere ponendo actus proprios, qui simul sunt sub Dei dominio; tam enim ad satisfactionem, quam ad meritum requiritur, ut ponatur opus proprium.

VIII. Neque defuit Ultima Conditio, quod scilicet Solutio non fiat ex aliis debitis, etiam si Deo multis titulis Humanitas, & quævis Creatura debeat suas operationes. Nam primò Christus non tenebatur mori, etenim, ut dicemus infra, incapax erat præcepti rigorosi obligantis in conscientia, ob suam impeccabilitatem, proinde dicitur. *Is. 53. Oblatus est, quia ipse voluit, adeò ut ci-*

tra ullam inobedientiam, & imperfectionem moralem, potuisset non mori, & nolle pro nostris delictis satisfacere; unde ex aliis indebitis satisfecit. Deinde etiam dato, quod Christi humanitas habuerit præceptum rigorosum de morte subeunda, adhuc Christus ponendo satisfactionem, exercuit actum iustitiæ simul, & obedientiæ; sicut si quis voveat solvere, quod debet ex iustitia, dum solvit, exercet actum iustitiæ simul, & Religionis; sic etiam, ut notat Haunol., si Superior præcipiat solutionem debiti, solvens ponit actum iustitiæ simul, & obedientiæ, ergo si Christo, posito contractu de satisfaciendo pro hominibus, præcepta fuit mors, ponendo mortem, exercuit actum iustitiæ simul, & obedientiæ, quod enim debetur ex contractu, debetur ex iustitia.

IX. *Objic. 1.* Ut solutio facta à Christo fidejussore sit actus rigorosæ iustitiæ, debuit Christus solvere, seu ponere satisfactionem, quam tenebatur ponere peccator principalis debitor, sed peccator non tenetur ad satisfactionem infinitam, cum nemo obligetur ad impossibile, ergo Christus ponendo satisfactionem infinitam, non exercuit actum rigorosæ iustitiæ.

Resp. Peccatorem non teneri ad satisfactionem infinitam à se ponendam, sed teneri vel exhibere satisfactionem Personæ infinitè, si fortè ab amante Redemptore ea sibi offeratur, & ab offensore acceptetur; vel si nolit illam exhibere, tenetur subire poenas æternas, posito hoc debito disjuncto, dum ponitur à Christo Vade, & sponse satisfactio oblata peccatori, tunc ponitur actus rigorosæ iustitiæ tam ab ipso peccatore, qui illam sibi oblatam debet, & exhibet, quam ab ipso Christo domino, qui etiam debet illam, quatenus est Fidejussor. In forma *conc. maj.*, & *distinguo min.* peccator non tenetur ponere satisfactionem infinitam propriam, *concedo*, alienam, si offeratur, *subdistinguo*, non tenetur determinatè, *concedo*; vage, videlicet vel illam sibi oblatam exhibere, vel pati in æternum, *nego min.*, & *consequentiam*.

X. *Objic. 2.* Si Christi Satisfactio esset de rigore iustitiæ, extingueret omnem Culpæ reatum, sed non extinguit; ergo. *Prob. min.* Culpa meretur peccatori Carentiam auxilii tam efficacis, quam sufficientis ad resurgendum, atqui Christi satisfactio nobis applicata hunc

reatum non tollit; Cum auxilium supernaturale sufficiens detur peccatori liberaliter, antequam satisfactio Christi illi applicetur per susceptionem Sacramenti, vel per contritionem, ergo.

Confirm. Satisfactio Christi non potest extinguere Culpas commissas post Christi passionem, quia satisfactio præstatur solum pro culpa præterita, non pro futura aut possibili. Denique si Christi satisfactio omnem culpam extingueret, esset infinita non solum in actu primo, sed etiam in actu secundo, quia tolleretur offensam gravitatis infinitæ.

Resp. Christi Satisfactionem extinguere omnem reatum, quia intuitu satisfactionum, & meritorum Christi Deus liberaliter post peccatum confert peccatori auxilia ad resurgendum, antequam applicentur per Sacramenta Christi satisfactiones in ordine ad defendendum Reatum odii, & poenæ æternæ. Delet itaque Christus reatum peccatoris carendi auxiliis ad resurgendum, per hoc, quod ea meruerit; quæ tamen dicuntur dari peccatori liberaliter, & misericorditer, quia quamvis dentur ex meritis Christi, non dantur tamen ex ullo merito peccatoris, imò cum positivo demerito.

Ad Confirm. Christi Satisfactio tunc extinguit Culpas, quando applicatur per Sacramenta peccatori, applicatur autem post culpas patratas, & ideo extinguit omnes culpas post Christi passionem futuras, postquam tamen sunt commissæ. Adde, quod sicut meritum Christi mereri potuit gratias datas antiquis PP. adeò ut præmium meritis præiret, prout infra explicabimus; ita Christi satisfactio utpote infinita satisfacere potuit pro culpis futuris, ita ut satisfactio culpas antecederet.

Denique Christi satisfactio dicitur in actu secundo finita, quatenus pro multitudine culparum finita satisfecit, hoc tamen non obstat, quominus positâ infinitâ gravitate peccati, dici etiam possit infinita in actu secundo relatè ad delendam istam maculam infinitæ gravitatis; sicut etiam meritum Christi dici potest in actu secundo infinitum, quatenus condignè meretur præmium æternum, non quidem condignitate merè respectivâ, seu propter infinitam munificentiam præmiantis, prout iustus meretur vitam æternam, sed condignitate absolutâ, cum dicat de se proportionem arithmetica

meticam

meticam ad quodcumque præmium, etiam ad infinitas uniones hypostaticas.

XI. Dico 2. Etiam Deus, positâ Christi Satisfactione, exercet actum rigorosæ justitiæ remittendo Culpas, pro quibus ea satisfactio oblata, & acceptata fuit, dummodo peccatori per Sacramenta applicetur.

Prob. Ut Deus in hoc casu exerceat actum rigorosæ justitiæ, solum requiritur, quod obligaverit se contractu oneroso ad culpas remittendas, si ponantur, & applicentur Christi Satisfactiones, atqui de facto ita se obligavit, ergo min. constat ex illo Is. 53. *Si posuerit pro peccato animam suam, videbit semen longævum*; quare quamvis Deus gratis, & ex misericordia remittat nobis peccata, spectatâ tantum satisfactione à nobis exhibitâ, spectatâ tamen satisfactione exhibitâ à Christo, condonat Culpas ex justitia: proinde dicamus oportet cum Psalmista Psal. 70. *Domine memorabor justitiæ tuæ solius*, nempe hujus, quæ sola est, in qua *Justitia, & Pax osculata sunt*. Objectiones contra hanc conclusionem dissolvimus, dum ostendimus posse Deum exercere justitiam erga Creaturam posito contractu oneroso.

DISPUTATIO II.

De Impeccabilitate Christi, & libertate ad merendum, & satisfaciendum requisita.

Nodum hunc penè inextricabilem, quomodo scilicet concilietur Christi impeccabilitas cum libertate ad meritum requisita in acceptatione mortis præceptæ, postremo loco dissolvere decreveram, post ritè perpensas alias Christi Domini proprietates indaginis non adeò operosæ: Verum ut altius intelligantur, quæ hætenus diximus de Christi merito, & satisfactione, Disputationem hanc præcedenti annecto; & in ea quærendum 1. An Christus peccare potuerit in sensu Composito unionis hypostaticæ, componendo scilicet unionem cum peccato? Scotistæ enim putant Christum Dominum fuisse impeccabilem formaliter, solum ratione visionis beatæ, & radicaliter ratione unionis, unde si careret visione Beatâ, possent unio hypostatica, & peccatum

tum conjungi. Secundò: An fuerit capax præcepti obligantis in Conscientia? Tertiò: An habuerit libertatem indifferentiæ ad actus inæqualis perfectionis? Quartò: An Christi Humanitas peccare potuerit peccato vel impeditivo, vel destructivo tum visionis Dei, tum unionis hypostaticæ? Denique quomodo concilietur impeccabilitas cum libertate in acceptance mortis, præceptæ?

Q U Æ S T I O I.

Utrum Christus peccare potuerit in sensu composito Unionis?

I. **I**N Christo nullum fuisse peccatum, est de fide; Joan. 18. dicitur: *Quis ex vobis arguet me de peccato?* Et 1. Pet. 2. *Qui peccatum non fecit; nec inventus est dolus in ore ejus.* Quæritur itaque, an peccare potuerit independentè à visione beata, spectatâ duntaxat unionè hypostaticâ?

Dico equidem cum Communissimâ contra Scotistas, Christum præcisè ratione unionis esse formaliter impeccabilem in sensu Composito, adeò ut non posset Unionem, & peccatum conjungere, etiamsi careret visione beatificâ. Hæc Conclusio usque adeò à Theologis censetur vera, ut multi putent oppositam esse temerariam.

Prob. 1. Autoritate Communissimâ Conciliorum, & PP. apud Vasq. d. 61. c. 3. in 6. Synodo, Act. 8. dicitur: *Per ipsam assumptionem voluntas Christi impeccabilis facta est.* Dionys. Alexan. *Nisi esset Deus, non posset esse alienus à potestate peccandi; nemo enim est, qui peccare non possit, nisi unus Christus, sicut Pater Christi, & Spiritus Sanctus.* Ubi vides impeccabilitatem tribui Christo Domino ratione Unionis, non ratione Visionis beatæ. Neque dicant Scotistæ, tribui ratione unionis radicaliter, non formaliter. Nam, cum inquiratur ratio formalis impeccabilitatis Christi, minus aptè assignaretur ratio radicalis, præsertim quia nusquam PP. tribuunt visioni hanc impeccabilitatem.

Prob. 2. Ratione: Filiatio Dei adoptiva, & imperfecta, quæ habetur per gratiam præsentis ordinis, est impossibilis cum culpa gravi, ergo à fortiori filiatio Dei naturalis, cum sit filiatio perfectissima, quæ habetur per unionem hypostaticam, erit impossibilis cum culpa
etiam

etiam levi : Et sanè filiatio naturalis est summa communicatio , & unitas cum Deo , ergo debet fundare summam amicitiam, & excludere quodvis peccatum ; Cum omnis communicatio faciat ad amicitiam ; unde est illud , Amicorum omnia communia.

Neque dicas , Filiationem naturalem in creatis stare posse sinè amicitia inter Patrem, & Filium , multi enim filii odio habentur à Parentibus ob crimina , ergo idem dici poterit de filiatione divina naturali , quæ est in Christo domino. Negatur enim consequentia : Filiatio enim Creatæ, cum non sit summæ amabilitatis , conjungi potest cum aliqua odibilitate , secus verò filiatio naturalis divina , quæ est infinitè perfecta ; unde humanitas habens filiationem Dei naturalem conjungi nequit cum culpa, & odibilitate ; quòd si sola filiatio adoptiva divina est inconjungibilis cum peccato, à fortiori filiatio naturalis Christi.

Confirm. Si posset Humanitas assumpta cum peccato conjungi, Verbum diceretur propriè peccator, & odibile à Deo ; sequela est absurdissima ; ergo : *prob. sequela* : sicut enim Deus verè patitur , moritur , per hoc quod humanitas sit principium *quo* , ita verè Deus peccaret, & esset odibilis , quamvis principium *quo* esset humanitas, quia principium *quod* esset Verbum , & operationes sunt suppositorum ; adeò ut magis tribuantur Principio *quod*, quam principio *quo* ; & ideo sicut Deus propriè dicitur homo per humanitatem , ita propriè dicitur operans per eandem humanitatem , atque adeò si humanitas peccaret, Deus propriè diceretur peccare, & esse odibilis, ac contemptibilis, quod horrorem ingerit. Et Ratio ulterior, quare nec possit Humanitas assumpta peccare, nec Verbum possit denominationem peccantis suscipere, est , quia unio hypostatica trahit sanctitatem increatam Verbi in humanitatem , illamque sanctificat substantialiter , perfectissimè, & infinitè (ut ostendemus, cum de sanctitate Christi , quidquid sit An ipsa etiam Unio hypostatica sit forma sanctificans ut *quod* , de quo infra) atque cum sanctitate summa, & infinita Humanitatis quævis culpa etiam levissima est impossibilis , ut patet , ergo impossibile est Humanitatem assumptam in sensu composito unionis peccare, & Deum etiam per communicationem idiomatum , esse peccantem.

II. Ex dictis sequitur 1. Verbum non solum non posse cum peccato actuali Humanitatis componi, sed neque cum habituali; atque adeo nequit Deus assumere humanitatem, quæ peccavit, ita ut retineat reatum culpæ. Ratio est eadem, quia tunc etiam Deus esset peccator, & odibilis. Adde ex Vasq. contra Suar. apud Platel. n. 284. Nec posse Verbum assumere naturam, quæ solum retineat reatum poenæ; quia unio hypostatica constituit Filium Dei naturalem, & dat jus ad perfectam beatitudinem statim habendam, unde formaliter destruit omnem reatum poenæ.

Sequitur 2. Quod si Christus sit hic, & sola humanitas replicetur Romæ, non replicatâ unione, ne Romæ quidem Humanitas peccare posset, quia adhuc illa humanitas esset Verbi.

Sequitur 3. ex Suar. d. 34. & Amic. d. 24. quod nec possit Christus admittere motus inordinatos in appetitu sensitivo, aut actus indeliberatos tendentes in malum in appetitu rationali; atque adeo nec fomitem peccati, seu appetitum sensitivum expeditum per motus inordinatos ad præveniendam rationem. Ratio est, quia Suppositum intellectuale tenetur hos motus non admittere, si potest illos cohibere, quia dedecet, & ad peccatum de se inducunt; propterea si Verbum eos admitteret in Humanitate, peccaret Verbum, quamvis humanitas non peccaret, unde totus Christus esset odibilis, & malus: si ve solum Verbum, si ve sola humanitas peccaret; sicut totus homo est malus, & odibilis, & reus poenæ, quamvis sola anima peccet; Bonum enim ex integra causa, & malum ex singulis defectibus.

III. *Objic. 1.* Potest Verbum per communicationem idiomatum flagellari, & mori: ergo etiam peccare. *Prob. Consequentia*: Quia non minus dedecet Deum immortalem mori, quam Deum Sanctum peccare; ergo si potest primum, & secundum.

Resp. Immortalitatem Verbi per unionem hypostaticam non communicare Humanitati immortalitatem; sicut nec immensitas Verbi communicat immensitatem, contra verò Sanctitas increata Verbi communicat humanitati summam, & infinitam Sanctitatem, & ideo Verbum per communicationem idiomatum mori potest, non verò peccare. Ratio, cur humanitas per unionem fiat infinite sancta, non verò fiat immortalis, & immensa, est.

est, quia per hoc præcisè, quòd sit conjuncta Deo conjunctione substantiali, redditur summè amabilis, ut dicemus, cum de Christi Sanctitate; at non redditur immortalis, & immensa: Aliter mori non potuisset, & sicut brachium per hoc, quòd uniatur animæ existenti in pede, ita humanitas per hoc, quòd uniatur Verbo existenti ubique, non ponitur ipsa ubique, nec redditur immensa.

Disparitas ulterior est, quia potest Deo tribui mors, error, & quodcumque malum physicum Humanitatis, cum possit Deus esse author mali physici, non potest autem Deo tribui malum morale, cum non possit esse author peccati, & volens illud. Si Verbum per communicationem idiomatum peccaret, Verbo principaliter operanti tribueretur peccatum, unde esset author peccati; sicuti, quia homicidium v.g. tribuitur principaliter mandanti, quàm exequenti, mandans dicitur author, & volens homicidium; ex Aug. enim: *Illo authore cum dicimus, illo volente dicimus.* Denique ut notat Bonav. in 2. d. 12. dedecet Verbum per humanitatem peccare, non verò mori, quia potest Deus mortem suæ Humanitatis ordinare ad finem nostræ Redemptionis, non verò culpam, nisi tantum permittendo illam in puris Creaturis, unde potuit ad miseriam physicam descendere Deus, & dici moriens, non verò ad miseriam moralem, & dici peccans.

IV. *Obije. 2.* Voluntas humanitatis per assumptionem non immutatur intrinsecè, ergo peccare potest, non secùs, ac si non esset assumpta.

Resp. Licet Voluntas non immutetur intrinsecè quoad principia influxiva in suos actus, adhuc tamen habet modum essendi post assumptionem eversum libertatis ad peccandum, utpote impossibilem cum peccato, & impedibilem ab ipsa voluntate; non secùs ac potentia progressiva sibi compedibus non potest liberè ambulare, & ad eum modum, quo voluntas non remanet libera, si conferat illi Deus auxiliùm de se indifferens, determinativè tamen nolit concurrere ad actum malum; hoc enim Dei decretum quamvis extrinsecum voluntati, redderet illam impotentem ad ponendum actum malum, atque adeò libertatem everteret.

V. *Obije. ult.* Potest Deus assumere humanitatem, quæ peccavit, ergo etiam humanitatem, quæ peccet. *Prob. consequ.*

conseq. Si repugnaret, quòd Verbum dicatur peccans per humanitatem suam, deberet etiam repugnare, quòd dicatur peccasse per humanitatem sibi unitam.

Confirm. Non repugnat in humanitate assumpta potentia ad peccandum, ergo nec peccatum: *Antecedens prob.* Si humanitati in priori natura ad assumptionem præcipiatur actus v. gr. spei, & in præmium promittatur illi unio hypostatica conferenda in eodem instanti simul cum gratia, in tali casu, si humanitas poneret actum spei præceptum, haberet in eodem primo instanti potentiam ad peccandum, & unionem hypostaticam; Cum enim posset humanitas omittere actum spei præceptum, posset peccare, & quia simul habet in eodem instanti unionem hypostaticam, & gratiam in præmium spei positæ, ideo simul esset potentia ad peccandum, & unio hypostatica.

Resp. nego consequentiam. Disparitas est, quia in eo casu, ut rectè notat Suar. contra Vasq. apud Platel. nu. 282. non posset dici Verbum peccare, quia non peccavit suppositum Verbi, sed humanitas, unde solum dici posset, Verbum est suppositum naturæ, quæ ante assumptionem peccavit. Ratio à priori est, quia communicatio idiomatum non datur inter duo supposita ejusdem naturæ, sic licet Pater Æternus generet, non proinde dicitur generare Filius habens eandem naturam; ergo, licet suppositum humanum peccaverit, non proinde dici potest peccasse Verbum habens eandem naturam, quæ ante assumptionem peccaverat. Dicitur quidem de Christo per communicationem idiomatum: Hic homo creavit mundum, quia idem suppositum Verbi mundum creavit; At non potest dici: Hic homo peccavit, quia non peccavit suppositum hujus hominis, nempe Verbum; sed suppositum humanum ante assumptionem hujus humanitatis.

Ad Confirm. Respondeo primò per instantiam, potest cum gratia componi potentia ad peccandum, ut patet in casu argumenti; ergo potest etiam cum gratia componi peccatum. Directè *admiſſo antecedens*, discutiendum quæstione 4. & *nego consequentiam*: Disparitas est, quia in casu adducto, in quo cum humanitate assumpta datur potentia ad peccandum, non dicitur Verbum potens peccare, sed sola humanitas, quæ potest omittere actum spei præceptum in sensu diviso ab unionem; seu pro

pro quando, si poneretur peccatum, non daretur unio hypostatica, nec Christus; sicuti quando Justus potest peccare in sensu diviso à gratia, fit sensus, quod habens gratiam specificativè sumptus, possit ponere peccatum, quod si poneretur, non daretur tunc gratia. Contra verò, si cum unione hypostatica conjungeretur peccatum, tunc Verbum, & Christus diceretur peccans, quod repugnat.

VI. Ubi in obsequium Christi Domini, adverte primò casum in argumento adductum admitti solùm de potentia extraordinaria Dei; quia naturaliter non potest humanitas operari in priori ad suam subsistentiam, à qua substantialiter completur, & consequenter humanitas assumpta naturaliter operari non potest in priori ad unionem hypostaticam, sicut nequit operari anima in priori ad unionem cum corpore, à quo completur substantialiter.

Adverte secundò, admitti quidem à nobis, quod divinitus possit humanitas assumpta peccare in sensu diviso ab unione, juxta casum adductum; sed non admitti hunc modum loquendi, quod Christus possit peccare in sensu diviso ab unione, qui tamen admittitur à P. Thyrso Gonzalez d. 30. n. 16. Ratio est, quia sola humanitas assumpta potest per operationes proprias ponere peccatum, & sic dividere se ab unione, quod tamen non potest Christus, nec Verbum; unde sola humanitas assumpta potest dici peccabilis in sensu diviso ab unione, non tamen Christus, aut Verbum; Sicuti si humanitas assumpta ante assumptionem peccaverit, non potest dici, quod Christus, aut Verbum peccaverit. Quare negamus mordicè cum communissima PP. & Theologorum, possibilem esse Christum peccabilem, sive in sensu composito, sive in sensu diviso ab unione: quamvis admittamus possibilem humanitatem assumptam specificativè acceptam, peccabilem in sensu diviso ab unione.

Dices: Quia habens gratiam potest peccare in sensu diviso, bene sequitur, quod etiam Justus peccare possit in sensu diviso à gratia; ergo si admittimus, quod humanitas assumpta peccare possit in sensu diviso ab unione hypostatica, tenemur admittere, quod etiam Christus peccare possit, in sensu diviso ab unione.

Resp.

Resp. Nego Conseq. Disparitas est, quia suppositum, seu persona iusti, quæ propriè dicitur operari, conjungi potest cum peccato, tamquam cum propria operatione exclusivæ gratiæ, contra verò suppositum Christi, seu humanitatis assumptæ, quod est, Verbum componi non potest cum peccato, quod sit propria ejus operatio excludens unionem hypostaticam, & ideo sola humanitas assumpta peccare potest in sensu diviso ab unionem, non verò Christus.

QUÆSTIO II.

An potuerit Christus impeccabilis præcepto strictè dicto ad mortem acceptandam obligari?

I. **D**ico 1. Christum Dominum ratione impeccabilitatis fuisse incapacem præcepti rigorosi obligantis in conscientia, & comminativi odii, ac pœnæ æternæ in hypothesi transgressionis. Ità D. Ansel. Lorca, Bernal. Esparz. Pallavic. & alii apud Haunol. n. 295.

Prob. Præceptum rigorosum obligans in conscientia, ut notat Suar. d. 43. includit hanc comminationem : Si hoc non feceris, eris meus inimicus, & reus pœnæ, atqui hæc comminatio cadere non potest in Christum essentialiter impeccabilem, ergo Christus ratione impeccabilitatis incapax fuit rigorosi præcepti. *Min. prob.* Primò à posteriori; Deridetur, & indigna Deo est hæc comminatio, v. g. Detrudam Petrum ad tartara, si viderit auribus lucem, vel si amaverit malum ut malum, quia hoc est impossibile; ergo indigna etiam Deo est ea comminatio facta Christo, si non feceris, quod præcipio, hoc est si peccaveris, ero tibi inimicus : tam enim est impossibile, Christum peccare, quàm Petrum auribus videre lucem. Secundò à priori, quia comminatio illa facit hunc sensum : si exercueris potentiam proximam, quam habes, non faciendi quod præcipio, eris meus inimicus, ergo ea comminatio supponit in Christo potentiam proximam peccandi, quod est falsum; unde ea comminatio in Christum cadere non potest. Tertiò, ea comminatio importat in Deo voluntatem paratam ad odio habendum Christum sub conditione impossibili, quod peccet, atque adeò importat in Deo voluntatem paratam ad

chymæ-

chymæram; non secus ac si Deus decerneret odio habere se ipsum, in hypothesei impossibili, quod peccet.

Confirm. Promissio divina v. gr. de condendo altero mundo sub hypothesei impossibili, quod detur chymæra, est indigna Deo, ergo etiam comminatio de odio habendo Christum in hypothesei impossibili, quod peccet; comminatio enim in eo differt à promissione, quod illa sit voluntas promittens bonum, ista verò malum, seu poenam.

II. Obje. 1. Passim in Script. dicitur Christus habuisse praeceptum de morte subeunda, Joan. 10. *Si praecepta mea servaueritis, manebitis in dilectione mea; sicut & ego Patris mei praecepta servavi.* Roman. 5. Obedientia Christi opponitur inobedientiae Adami, ergo sicut Adam habuit praeceptum rigorosum, ita & Christus.

Confirm. 1. Christus non habuit merum consilium de morte subeunda, ut nos habemus de Cælibatu, quia in Scripturis nusquam dicitur habuisse consilium, sed praeceptum, ergo.

Confirm. 2. Si Christus caruisset verò praecepto mortis, non fuisset verè obediens; quod tamen test contra sensum PP. & contra Apostolum dicentem: *Factus obediens usque ad mortem.*

Resp. Ex ipsis Scripturis constare, quod praeceptum de morte subeunda non fuerit rigorosum: cum dicatur de Christo: *Oblatus est, quia ipse voluit*; & Chrysost. explicans textum adductum Joannis, aperte dicit, quod nomine mandati, & praecepti veniat solum beneplacitum Patris æterni, quod non necessitabat Christum ad mortem. Quod autem in Scripturis nomine praecepti non semper veniat praeceptum rigorosum, patet, nam Matth. 19. dicitur, Moyses praecepisse repudium uxoris; & Marc. 10. dicitur, Moyses repudium uxoris permisisse; ergo praeceptum de Repudio non erat rigorosum. Præterea etiam in Scripturis sæpè dicuntur praecepta Christo Domino omnet aliæ operationes, juxta illud: *In capite libri scriptum est de me, ut faciam voluntatem tuam. Quæ placita sunt ei, facio semper*; & tamen nemo dixerit, quod ad omnes operationes, quas elicuit Christus, obligaretur in conscientia, ut ostendemus quaestione sequenti; ergo nec ad mortem obligabatur in conscientia praecepto rigorofo.

Ad 1. Confirm. Sæpè nomine praecepti, & mandati

in Scripturis venit purum consilium, ut notat Ruiz de Prov. tr. 2. d. 9 sect. 7. dicimus tamen, quod Christus Dominus non habuerit merum consilium, sed mandatum de morte subeunda, instar legis pœnalis, seu consilii onerosi, ut mox explicabimus.

Ad 2. Christus fuit verè obediens usque ad mortem, quamvis non habuerit verum præceptum mortis. Nam ex D. Thom. 2. 2. qu. 104. a. 2. habetur vera obedientia etiam sine vero præcepto superioris, imò eò perfectior est obedientia, quò magis præceptum prævenitur; sufficit enim ad obedientiam, quod cognita voluntate superioris ponatur opus, quia illi est gratum. Hanc perfectionem obedientiæ voluit Patriarcha Ignatius in Societate, tamquam spiritualis ædificii fundamentum. Et ratio à priori est, quia specialis honestas obedientiæ consistit in reverentia exhibenda voluntati superioris; quæ eò major est, quò minus est coacta per præceptum.

III. *Obje. 2.* Christus tenebatur præceptis naturalibus, v. g. amandi Deum, non pejerandi, ergo erat etiam capax præcepti positivi de morte subeunda.

Confirmatur 1. Christus quà homo, erat Dei servus; sed servus potest à Domino obligari per præceptum rigorosum, ergo &c.

Confirm. 2. Angelus, quamvis in patria peccare non possit, potest tamen à Deo obligari præcepto rigoroso, v. gr. ad homines custodiendos, & Gabriel ad B Virginis salutationem, &c. ergo impeccabilitas non tollit capacitatem præcepti rigorosi.

Resp. Dist. antec. Christus præceptis naturalibus obligabatur obligatione in conscientia, importante in Deo voluntatem odio habendi, & puniendi Christum, in hypothesei transgressionis, *nego antecedens*; obligabatur præceptis naturalibus, quatenus necessitate metaphysicâ ob impeccabilitatem tenebatur ea servare, non secus ac Deus tenetur amare se ipsum, & sicut Beati necessariò Deum amant, & servant divina mandata, *conc. antec. & dist. pariter consequentiam*: Christus est capax præcepti positivi de morte subeunda, obligantis instar præceptorum naturalium, *Concedo*; obligantis in conscientia, *nego consequentiam*. Hinc fit, quòd Christus observando præcepta naturalia me. eri non poterat quoad substantiam operis præcepti, sed solum mereri poterat quoad circumstantias

tias non præceptas, quia ratione impeccabilitatis, solum quoad circumstantias habere poterat indifferentiam, & libertatem requisitam ad meritum. At relatè ad mortem subeundam habuit meritum quoad substantiam, & liberè mortuus est; ergo non habuit de morte subeunda præceptum obligans, & necessitans metaphysicè instar præceptorum naturalium.

Ad 1. Confirm. Ut aliquis dicatur verè, & strictè servus, tria requiruntur: Primò, quòd teneatur obedire. Secundò, quòd non sit sui juris, sed alterius. Tertio, quòd non communicet in bonis, & honore cum Domino, nec habeat jus ad hæreditatem, talis enim est servus, quæ inter homines contrahitur jure belli, nativitate, emptione. Christus Dominus utpote Filius Dei naturalis carebat tertio hoc requisito, & ideo non erat servus strictè dictus; unde solum in lata significatione dicitur servus Is. 53. *Justificabit ipse justus servus meus multos*; quatenus tenebatur Deo obedire, & erat juris Dei, non secus ac filii respectu Patris, & quælibet creatura respectu Dei, ut dicemus *disp. ult. qu. ult. nu. 8.* Notat tamen Haunol. ab hoc vocabulo servi abstinendum, ne videamur concedere Christo cum Felice, & Elipando damnatis à Concilio Francfordiensi, servitutem strictè dictam impossibilem cum filiatione Dei naturali. His positis, transmitto, quòd Christus, quæ homo, dici possit Servus Dei; ad rationem tamen servi solum spectat, quòd Dominus possit ab eo obtinere, quod libuerit, vel obligando illum in conscientia, vel necessitando metaphysicè, si servus sit impeccabilis, ut in casu nostro.

Ad 2. Angeli utpote impeccabiles solum possunt à Divina voluntate dirigi ad aliquid necessariò præstandum, sicut diriguntur à præceptis naturalibus ad ea præstanda, quæ ex dictamine rationis sunt debita, non possunt tamen obligari, aut præcepto rigoroso importante comminationem odii, & vindictæ, ut diximus de Christo Domino; aut præcepto necessitante (prout Christus Dominus à præceptis naturalibus necessitabatur) quòd tamen cum libertate cohæreret; sicut in Christo mandatum de morte subeunda cohærebat cum libertate ad non moriendum, ut mox ostendamus.

IV. Dico 2. Quamvis Christus potuerit præcepto mortis minus rigorofo dirigi, ac necessitari ad mortem acceptandam, sicut necessitatur à præceptis naturalibus citralibertatem in contrarium: de facto tamen præceptum mortis non fuit hujusmodi. Ità D. Thom. *qu. 46. a. 2.* ubi, ut notat Haunol, docet, Christum necessariò calicem bibisse, necessitate tantum consequente, hoc est positâ præscientiâ, & prædefinitione Dei de ejus passione, non verò necessitate antecedente everfivâ libertatis ad non moriendum: Idémque docet 4. contra Gent. ubi soli charitati tribuit acceptationem mortis toleratæ à Christo, negatâ vi coactivâ ex ullo præcepto.

Prob. 1. Ex Scripturis, & PP. Isa. 53. Oblatus est, quia ipse voluit; quod etiam apertissimè dixit Christus Jo. 10. Ego pono animam meam, & iterum sumo eam, nemo tollit eam à me, sed ego pono eam à me ipso: potestatem habeo ponendi eam, & potestatem habeo iterum sumendi eam. Hoc mandatum accepi à Patre meo. Aug. 4. de Tr. 13. Quia voluit, quando voluit, & quomodo voluit, mortuus est Christus. Idémque docent communissimè PP. apud Platel. loc. cit. præsertim Anselmus dicens: Non illi Pater ut moreretur, cogendo præcepit, sed ille, quod Patri placiturum, & hominibus profuturum intellexit, hoc spontè fecit.

Prob. 2. ratione: Si præceptum mortis metaphysicè necessitaret Christum ad mortem acceptandam, mors non fuisset libera, & consequenter nec meritoria, & redemptiva: ergo præceptum mortis non fuit necessitas citralibertatem ad non moriendum. Antecedens quoad primam partem patet, siquidem necessitas, & libertas apertè opponuntur: quoad secundam partem verò constat ex dictis in de Actibus Humanis *diss. 8. qu. 6.* ubi ostendimus ad meritum requiri libertatem indifferentiæ, nec sufficere libertatem à coactione, non solum in statu naturæ lapsæ, ut definitum est contra Jansen. sed etiam relatè ad Christum Dominum, ut videre est apud eundem Platel. *nu. 311.* quia si obsequium caret libertate indifferentiæ, non meretur recompensationem, & præmium, quamvis mereri possit laudem per solam libertatem à coactione.

Confirm. Amori Patris erga Christum filium naturalem, & fiduciæ de ejus virtute, nec non dignitati Filii consonum erat, quòd divinum beneplacitum de morte subeunda solum insinualetur citra præceptum læsivum liber-

libertatis, siue rigorosum obligans in conscientia, & moraliter, siue minus rigorosum necessitans metaphysicè ad mortem acceptandam, ergo praeceptum mortis cohaerebat cum libertate ad non moriendum.

V. *Obje. 1.* Christus Dominus lege naturali tenebatur ad redimendum genus humanum, ergo praeceptum mortis metaphysicè necessitabatur ad mortem subeundam, non secus ac à praeceptis naturalibus. *Prob. antec.* Quia lex naturalis dictat contemnendam esse vitam propriam corporalem pro salute spirituali aliorum. Hinc in Scripturis dicitur: *Oportuit Christum pati, &c. Filius hominis, prout definitum est, vadit.*

Resp. nego antec. Purus homo tenetur lege naturali pro salute spirituali proximi mortem acceptare, non tamen Christus homo Deus, ut notat Vading. cujus dignitas infinita postulat, ut permittenda sit potius omnium damnatio, quam aliquod ejus minimum malum, etiam temporale; propterea ex sola charitate, non ex ulla obligatione mortuus est, ut dicitur Eph. 7. *Christus dilexit nos, & tradidit semetipsum pro nobis.* Oportuit tamen Christum pati, videlicet ex suppositione, quod voluerit offerre Deo satisfactionem condignam pro nostris culpis, & habere glorificationem corporis, & nominis ex merito.

VI. *Obje. 2.* Christus à praecepto mortis fuit coactus ad moriendum; aliter non dixisset: *Pater, si possibile est, transeat à me calix iste;* si liberè poterat mortem declinare, ergo non fuit liber ad moriendum.

Resp. Nego antec. Christus, ut notat Arriaga, oravit, ut transiret Calix, si poterat sine mandati transgressionem transire, quamvis enim mandatum mortis non obligaret in conscientia, nec necessitaret ad mortem, nolabat tamen illud transgredi Christus, cum esset perfectissimè obediens.

VII. Dico ult. Praeceptum mortis Christo impositum non fuit propriè poenale; sed instar legis poenalis, seu consilii onerosi, quatenus si noluisset mori, non solum non incurreret culpam, aut imperfectionem moralem, sed nequè etiam poenam strictè dictam, seu carentiam boni debiti; Caruisset tamen aliquà glorià accidentali indebità, videlicet speciali praeogativà Redemptoris hominum, & simul caruisset glorificatione corporis, & exaltatione nominis, ut collata ex merito; quamvis

non caruisset glorificatione corporis, & nominis, ut collata ex exigentia naturali orta ex unione hypostatica. Ità Ezpar. Maur. Haun. & alii.

Prob. Conclusio per partes: & primò, quòd habuerit Christus præceptum mortis, constat ex illo Apost. *Factus obediens usque ad mortem.* Secundò, quòd præceptum mortis non obligaverit Christum in conscientia, sub reatu culpæ, nec illum metaphysicè necessitavit ad moriendum, constat ex dictis in prima, & secunda conclusione. Tertiò, quòd transgressio talis præcepti non induceret imperfectionem ullam moralem. constat ex dicendis qu. sequenti, ubi ostendemus, Christum esse etiam incapacem essentialiter imperfectionis moralis, tum positivæ, tum negativæ. Quartò, quòd violatio talis præcepti non induceret reatum pœnæ, ut proinde non sit præceptum strictè pœnale, patet, quia si noluiisset mori, non caruisset ullo bono debito, atque adeò nullam pœnam strictè dictam incurrisset. Denique, quòd hoc præceptum nec fuerit propriè pœnale, nec fuerit merum consilium, nec mera insinuatio divinæ voluntatis (prout sæpè divina voluntas insinuat Beatis absque ulla coactione) sed fuerit mandatum instar legis pœnalis. *Prob.* Quia non erat comminans ullam pœnam, sed erat solum indicens carentiam alicujus boni indebiti in hypothese, quòd renueret mori, ergo præceptum mortis non fuit propriè pœnale. nec merum consilium, sed instar legis pœnalis, seu consilii onerosi. *Prob. antec.* Quia eâ lege latum fuit præceptum, ut si noluiisset mori Christus, careret titulo Redemptoris hominum, quod non est bonum exigibile ab unione hypostatica; sicut non exigitur, quòd Christus sit Redemptor Angelorum, ut poterat esse, ergo caruisset hoc bono indebito.

Præterea, quamvis unio hypostatica exigat glorificationem corporis, & nominis Christi, & Deus de facto illam contulerit ex duplici titulo, videlicet exigentiæ naturalis, & meriti, juxta illud Apost. *Propter quod exaltavit illum, &c.* Nihilominus si renuisset mori, glorificatio corporis, & Nominis collata fuisset solum ex titulo naturalis exigentiæ, non verò ex titulo meriti, & sic caruisset hoc alio bono indebito, seu gloriâ accidentali, videlicet, quòd glorificationem corporis haberet etiam ex merito; gloriosius enim est habere aliquid ex merito, quàm citrà meritum. Supponimus autem hîc ex dictis

in de Merito, posse Deum promittere in prae-
miam id, quod est naturaliter debitum, proinde diximus
cum Thomistis cadere sub meritum condignum con-
tritionis peccatoris etiam primum gradum gloriae, cæ-
teroqui naturaliter debitum gratiae dignificanti contri-
tione; unde potuit Deus promittere Christo in præ-
mium mortis toleratae glorificationem corporis, & no-
minis; quamvis aliunde naturaliter debitam unioni hy-
postaticae.

Neque dicas, nullam maiorem aestimabilitatem habe-
re glorificationem corporis, & nominis, ut collatam
Christo ex duplici titulo meriti, & exigentiae naturalis,
quam si collata fuisset ex solo titulo exigentiae naturalis,
ergo si noluiisset mori, non caruisset hoc bono indebito.

Negatur enim antecedens, siquidem maiorem aestimabi-
litem habet bonum, quod ne divinitus quidem negari
potest, quam bonum naturaliter conferendum, & divi-
nitus auferibile; atqui glorificatio corporis collata ex
exigentia naturali erat divinitus auferibilis, collata ve-
rò ex merito condigno, erat divinitus innegabilis, cum
meritum condignum supponat Dei promissionem inel-
uctabilem, ergo maiorem aestimabilitatem habet glori-
ficatio corporis collata Christo ex duplici titulo meriti
simul, & exigentiae naturalis, quam ex solo titulo natu-
ralis exigentiae.

Q U A E S T I O III.

*An fuerit in Christo libertas ad actus inaequa-
les Perfectionis? Ubi, An fuerit aliquando
Humana Christi voluntas divinae volunta-
ti contraria?*

I. **C**ertum est humanam Christi voluntatem fuisse li-
beram, tum quia liberè mortuus est, tum quia
non est deneganda voluntati Christi hæc perfectio na-
turae humanae; tum etiam quia libertas erat requisita ad
meritum redemptionis. Jo. 7. dicitur: *Ambulabat Iesus
in Galilaam, non enim volebat in Iudeam ambulare, quia vole-
bant illum Iudaei interficere*; quare liberè iter illud arripie-
bat. Certum praeterea est, non semper Christum eliciisse
actus optimos, & intentissimos, cum repugnet inten-
tio actus, qua nulla sit possibilis maior. Difficultas solum
est: **Utrum habuerit libertatem solum ad actus aequalis**

perfectiōnis, & intensiōnis; An verò etiam ad actus perfectiōnis, & intensiōnis inæqualis, tum intra eandem speciem, tum in speciebus diversis? v. g. an quando elicit actum charitatis intensum ut quatuor, potuerit elicere actum charitatis intensum ut duo, vel ut sex; & an vice actus charitatis poterat ponere actum alterius virtutis inferioris, v. g. temperantiæ?

Prima sententia docet, solum habuisse libertatem ad actus perfectiōnis æqualis, ita Mendoza, & Alii. Secunda docet habuisse libertatem physicam ad actus perfectiōnis inæqualis, etiam si inclinaretur, & moraliter necessitaretur ad actum optimum, quem poterat hic, & nunc elicere. Ita Lugo d. 26. sect. 10. Pallav. Esp. Haunol. Pro hac stat etiam Vasq. d. 24. n. 36. ubi expressè docet, Christum, & alios Beatos posse operari remissè, omisso actu intensiori, nec non Valentia, Salas, & ipsemet Suar. apud eundem Lugo, quamvis videatur Suar. contrariæ sententiæ favere, disp. 37. sect. 3. ubi dicit: *Non solum repugnat Christo peccatum, sed etiam ille imperfectiōnis modus, qui est dissentire à divina voluntate sibi proposita, ut Regula sua operatiōnis.* Si tamèn hæc verba ritè perpendantur, opinioni oppositæ nullatenus favent.

II. Dico equidem cum secunda sententia, Christum habuisse physicam libertatem ad actus perfectiōnis inæqualis tum intra eandem speciem, tum in speciebus diversis, quamvis habuerit necessitatem moralem strictè dictam ad actum optimum hic & nunc possibilem, spectatâ divinâ præordinatione; non secus ac Deus solum habet necessitatem moralem metaphoricè dictam ad effectum optimum ponendum citra ullam difficultatem in contrarium, ut diximus in prima disputatione qu. 2.

Prob. 1. Quia Christus habuit libertatem ad acceptandam, vel non acceptandam mortem præceptam, sed ista libertas est ad actus perfectiōnis inæqualis, perfectior enim est actus obedientiæ redemptivus, quàm actus renuens mortem, ac redemptionem humanam, ergo habuit Christus libertatem physicam ad actus perfectiōnis inæqualis. Major patet ex dictis qu. superiori, ubi ostendimus, à præcepto mortis non fuisse necessitatum ad moriendum, aliter ejus mors non fuisset meritoria, & redemptiva; propterea Chrysost. in illud Apost. *Proposito sibi gaudio sustinuit Crucem confusione contemptâ.* Hom. 28. addit: *Licebat illi nihil pati, si voluisset.* Et Aug. *Qui potuit non mori, si nollit: proculdubio quia voluit, mortuus est.*

Prob.

Prob. 2. à priori. Danda est Christo domino libertas requisita ad meritum : atqui sola libertas ad actus inæquales est sufficiens ad meritum , ergo habuit Christus hanc libertatem. *prob. min.* quia libertas ad actus æqualis perfectionis est solum libertas in genere physico, non in genere moris, non enim est exigitiva laudis, præmii, & recompensationis, atque adeò insufficiens est ad meritum , sicut enim non meretur gratiarum actionem, qui debens 10. dat hæc 10. non illa æqualis bonitatis, ità nec meretur præmium, qui debens ponere actum perfectum ut 3. ponit actum A, potius, quam B, æqualis perfectionis. Hinc communiter DD. docent, quòd habens conscientiam perplexam (v. g. putans eodem modo peccare, si audiendo missam, relinquat ægrotum, aut si relinquendo ægrotum audiat missam) quodcumque eligat, nec peccet, nec demereatur, quia non habet libertatem in genere moris, hoc est exigitivam poenæ, & reprehensionis, ergo pariter Christus, si tantum libertatem haberet ad actus æqualis perfectionis, non haberet libertatem in genere moris fundantem jus ad laudem, & præmium. Et ratio à priori est, quia ad meritum requiritur lucta aliqua, & victoria contemptiva alicujus commodi temporalis ob amorem honestatis, ut diximus in de merito, atqui, dum eligitur necessariò alter ex duobus actibus æqualis honestatis, non datur nec lucta, nec victoria, quia datur necessitas ad alterutrum vage, & electio hujus præ illo non fert ullam arduitate, ergo negata in Christo indifferentia ad actus inæqualis perfectionis non salvatur libertas requisita ad meritum.

III. Quòd diximus de Christo domino, dicendum de Beatis ex Suar. *d. 3. sect. 4.* Lugo, Vasq. loc. cit. quamvis enim necessariò Deum ament, non semper tamen amant amore intensissimo, & perfectissimo ipsis possibili, non enim videtur necesse, quòd Beatus semper velit Deo bonitatem divinam, vel gloriam extrinsecam, quam habet ex hominum conversione, neque est necesse quòd semper velit saltem intensissimè implere divinam voluntatem in iis, quæ non sunt præcepta, & circa ea, quæ præcipiuntur, potest voluntas beati liberè v. g. hunc actum reflexum exercere, Hoc ipsum, quòd Deus præcipit, facerem, etiam si non esset præceptum, & sic in hujusmodi reflexionibus se exercere, quòd ex eo etiam

constat, ut notat Suar. quia si Angelus custos nullam ex-
erceret libertatem relatè ad nostram custodiam, non
exigeret à nobis gratitudinem, quod tamen est contra
sensum fidelium.

Denique quod in Christo domino fuerit necessitas
moralis strictè dicta ad actum perfectiorem, constat ex
iis, quæ diximus, cum de necessitate morali Dei ad effe-
ctum optimum, quia scilicet hujusmodi necessitas
spectat ad perfectionem libertatis, cum inclinatio ad
optimum de se bona sit, & perfectio simpliciter sim-
plex, unde nobis ex gratia conceditur, ergo non est de-
neganda nec Deo, nec Christo, quamvis Christo compe-
tat cum physica difficultate in oppositum, ut quælibet a-
lia necessitas moralis in creatis

IV. *Objic.* 1. Si Christus esset liber ad actus perfecti-
onis inæqualis, & posset minus bonum præeligere in
conflictu melioris, sequeretur quod esset capax aut cul-
pæ, aut saltem alicujus imperfectionis moralis, sed hoc
pugnat cum infinita Christi Sanctitate, & impeccabili-
tate, ergo non est liber ad actus perfectionis inæqualis.
Prob. mi. quia imperfectio moralis prout distinguitur à
culpa nihil aliud est, quam electio objecti minus perfecti
propter se præ perfectiori.

Confirm. Christus dominus eligendo minus bo-
num esset reprehensibilis: Universim enim reprehen-
sione dignus est, qui negligit majus bonum, quod com-
modè potest amplecti.

Resp. nego sequelam: imperfectio moralis alia est ne-
gativa, seu negatio majoris perfectionis, ut cum quis
vult matrimonium, omisso cœlibatu; vel dum ponit a-
ctum intensum ut 2. potens ponere intensum ut 3.
Alia est positiva, ut cum quis omittendo aliquem a-
ctum, redditur positivè indignus speciali Dei prote-
ctione, ut cum quis transgreditur rubricas divini offi-
cii merè directivas, aut Regulas suæ Professionis non
obligantes ad culpam venialem, sicut enim dicimus v.
gr. positivè indignum Sacerdotio, qui est irregularis ex
defectu, quamvis non sit reus culpæ, aut pœnæ, con-
tra verò qui caret excellentia doctrinæ, & sanctitatis,
non dicitur positivè indignus sacerdotio, sed solum
minus dignus altero, qui habeat sufficientem doctrinam
& sanctitatem: ità in casu nostro: Quare qui v. gr.
amplectitur matrimonium præ cœlibatu, non dicitur
con-

contrahere imperfectionem moralem positivam, sed negativam, quatenus est minus dispositus ad assequendum ultimum finem per actum minus perfectum, quamvis non sit positivè indignus speciali Dei protectione, & specialibus auxiliis ad non peccandum, & ad sublimius assequendam beatitudinem, sicut est positivè indignus, qui transgreditur Regulas suæ professionis non obligantes ad culpam. Dicimus tunc, quod Christus dominus eliciendo actum minus perfectum, omisso perfectiori, neque contrahebat imperfectionem moralem positivam, neque negativam strictè dictam, hoc est minus disponentem subjectum ad suam felicitatem essentialem, siquidem Christus Dominus, utpote Filius Dei naturalis, plenissimè possidebat suam felicitatem essentialem, nempe visionem Dei in priori ad quemcumque actum liberum, ut dicemus disputatione sequenti, propterea eligendo minus bonum, habebat solum actum moralem minus perfectum citra ullam imperfectionem moralem strictè dictam, sicut Deus semper optimè, & honestissimè operatur, sive ponendo optimum, sive non optimum, quamvis positio optimi sit magis consona divinæ bonitati.

In forma ad *probationem sequela, dist. antec.* imperfectio moralis consistit in electione objecti minus perfecti, quoties ea reddit subjectum minus dispositum ad suum ultimum finem, *concedo, secus nego antecedens, & consequentiam.*

Ad Confirm. *nego antec.* Ille solum dicitur reprehensibilis, qui negligendo majus bonum, redditur minus idoneus ad suam beatitudinem, quare sicut Deus non esset reprehensione dignus, si mundum non optimum poneret, ita nec Christus, si poneret actum non optimum, quem liberè posset.

V. Dices: Si Christus non esset reprehensione dignus eligendo actum minus perfectum neque esset dignus laude, ac præmio, eligendo actum præstantiorem; unde per actum obedientiæ non meruisset Redemptionem, sicut Deus non est dignus præmio ponendo optimum, sequela est absurda, ergo & id unde sequitur.

Resp. *nego sequelam*; diversa quippe est ratio de propro, & demerito, ac de laude, & meritò. Qui ponit opus honestum, dignus est laude, quamvis per illud non

non promoveatur ad felicitatem, ut patet in Deo; dignus etiam est præmio, qui ponit opus honestum, quod sit obsequiosum præmianti, ac superiori, quia tamen Deus caret superiore, solum potest exigere laudem, non præmium ob suas operationes honestas, Christus verò, quia quia homo est inferior Deo, potest & laudem, & præmium exigere ex operationibus honestis, contra verò ex earum omissione non esset dignus reprehensione, quia non contraheret ex iis minorem dispositionem ad felicitatem.

Hinc apparet, quomodo Christus dominus liberè poterat non acceptare mortem præceptam citra ullam imperfectionem moralem strictè dictam, & citra reprehensibilitatem, quamvis enim tunc caruisset aliquo bono indebito videlicet titulo Redemptoris non caruisset tamen felicitate consona suæ naturæ, & meritis.

VI. *Obje. 2.* Christus est perfectissimè Dei amicus; ergo non solum moraliter, sed etiam physice necessitabatur ad eliciendos actus perfectiores, atque adeò solum habuit libertatem ad actus æqualis perfectionis. *prob. conseq.* quia ad perfectissimam amicitiam spectat eadem eodem modo velle, & nolle; ergo Christus debet magis velle, quæ Deus magis vult, sed Deus magis vult actum perfectiorem, etiam in ipso Christo domino, quam minus perfectum, ergo Christus dominus ad actum perfectiorem necessitatur.

Confirm. Tenetur creatura declinare actum malum, quia displicet Deo, ergo Christus summè Dei amicus, & filius naturalis, tenetur eligere actum perfectiorem, quia magis placet Deo, quàm actus minus perfectus.

Resp. 1. Deum habere infinitam complacentiam in quovis actu Christi domini ob dignitatem Personæ operantis conferentem operationibus Christi bonitatem, & valorem infinitum, quamvis inter actus Christi detur major, vel minor bonitas aut ratione objecti, aut ratione intensiōis; propterea spectatis omnibus æquè Deo placet v.gr. Christi Crucifixio, ac genuflexio, & quilibet alius actus, quamvis actus intensior, & perfectior magis placeat ratione modi, quo moraliter informatur à Verbo.

Resp. 2. Difficultatem solvendam esse in Beatis, qui licet necessitentur relatè ad objectum primum, seu ad amandum Deum Deo, libertatem tamen habent ad actus

actus perfectionis inæqualis relatè ad objecta secundaria, seu ad amandas has, vel illas creaturas in ordine ad gloriam Dei.

Resp. 3. Actum perfectiorem Christi magis Deo placere complacentia merè approbativa; non verò complacentia, aut inductiva in Deo majoris felicitatis, aut respiciente in Christo maiorem dispositionem ad felicitatem suam essentialem, & ideo æquè, Deus erat contentus quovis actu Christi; sicut ipse Deus æquè potest ponere optimum, vel non optimum, quamvis maiorem complacentiam approbativam habeat de optimo, Unde fit, Christum dominum ratione summæ amicitiae cum Deo non teneri ad actum perfectiorem. Ideo justus magis Deo placet eligendo actum perfectiorem, adeò ut non dicatur perfectè amicus, si eligat actum minùs perfectum, quia actus perfectior iusti, quamvis non addat Deo felicitatem, ipsum tamen justum magis promovet ad felicitatem suam, & sic ad laudandum Deum magis in æterna beatitudine. At Christus dominus eligendo actum magis perfectum, non magis promovetur ad felicitatem, unde non dicitur esse minùs perfectè amicus, per hoc quod eligat actum minùs perfectum.

In forma nego *conseq.* Ad *prob. dist. anteo.* ad perfectam amicitiam spectat eadem & eodem modo velle, ac nolle, relatè ad ea quæ spectant ad felicitatem amici, aut propriam, *concedo*; relatè ad alia, *nego antec. & conseq.*

Ad *Confirm.* Ideò tenentur homines peccatum deelinare, quia Deo displicet non solum displicentia merè reprobativa, sed etiam respiciente malum, quod inducit in nobis reddendo indispositos ad ultimum finem, & ad ipsum laudandum; At Christus eligendo actum minùs perfectum, non disponderetur minùs ad suam felicitatem, & ad Deum laudandum, ergo non tenetur eligere actum perfectiorem, quippe qui non placet magis Deo, nisi complacentia merè approbativa.

VII. Quæritur hic, Utrum aliquando humana Christi voluntas fuerit divinæ voluntati contraria? Certum est contra Nestorianos, Euthychian., & Ex iis ortos Monothelitas, in Christo fuisse duas voluntates, ut constat ex illo Matth. 22. *Non mea voluntas, sed tua fiat*; Cum enim in Christo fuerint duæ naturæ, fuerunt etiam duæ voluntates, solum dubitatur, an voluntas humana Christi fuerit aliquando divinæ voluntati contraria.

præ.

præsertim quando dixit Matth. 26. *Verumtamen non quod ego volo, sed quod tu?*

Communissimè docent, nunquam fuisse contrarias, sed in casu adducto solum appetitum sensitivum Christi fuisse repugnantem Calici præcepto à divina voluntate, & appetitum rationalem, seu voluntatem humanitatis habuisse tantum simplicem displicentiam Calicis præcepti, non verò actum deliberatè nolentem illum. Voluit autem Deus quòd Christi appetitus sensitivus à Calice refugeret, ut ex ea sensuum molestia haberet causam meriti, & esset nobis exemplo ad subigendum appetitum sensitivum rationi, & divinæ voluntati.

Porro actus simplicis displicentiæ de Calice bibendo fuit quidem in Christo deliberatus (quia nullus in eo fuit motus indeliberatus, & subreptitius) sed fuit inefficax, quia non respuebat mortem absolutè, sed solum conditionatè, hoc est si ita Deo placeret, & non impediretur reparatio hominum; sicuti qui vult membri abscissionem, nec mors sequatur, habet simplicem displicentiam, & inefficacem de membri abscissione, quatenus illam nollet, si periculum mortis non immineret, cum ea tamen displicentia inefficaci conjungit voluntatem absolutam, & efficacem, quod membrum abscindatur: Sic Christus Dominus cum simplici displicentia mortis conjunxit ardens illius desiderium, juxta illud Luc. 12. *Baptismo habeo baptizari, & quomodo coraro, donec perficiatur.* Quare licet potuerit physicè voluntas Christi renuere, quæ Deus præcipiebat per modum consilii onerosi, non quidem ponendo actum inobedientiæ, sed non ponendo actum obedientiæ, quia tamen moraliter ad actus perfectissimos necessitabatur, nunquam Christi voluntas fuit divinæ voluntati contraria, ut proinde dixerit Jo. 8. *Quæ placita sūt ei, facio semper.*

VIII. Dices: Displicentia mortis inefficax avertēbat voluntatem Christi à morte, quæ erat objectum complacentiæ voluntatis divinæ, cum fuerit præcepta, ergo quamvis voluntas humana Christi non respueret mortem efficaciter, & absolutè, adhuc ob illam displicentiam inefficacē erat quadantenus opposita voluntati divinæ.

Resp. Cum D. Tho. Complacentiam, & displicentiam de eodem objecto non pugnare, nisi sint secundum eandem rationem, & relatè ad idem motivum, v.gr. complacentia de medicina ut utili non pugnat cum displicen-

centia de eadem ut amara , & complacentia de morte delinquentis propter bonum publicum non opponitur displicentiæ de eadem propter malum privatum , quia tamen prævalet amor utilitatis medicinæ , & amor boni publici, idè complacentia de medicina, & de morte delinquentis est efficax , & absoluta, displicentia verò , inefficax, & conditionata. In casu nostro , Christus habuit complacentiam efficacem de sua morte ob motivum Redemptionis , & obedientiæ , & simul displicentiam inefficacem de eadem morte , inquantum sibi mala , nec hujusmodi affectus complacentiæ, & displicentiæ de eadem morte pugnabant inter se , quia non respiciebant mortem secundum eandem rationem , & ob idem motivum. Pariformiter Pater æternus habebat complacentiam de morte Christi ob illud motivum Redemptionis, quin habuerit complacentiam de eadem morte ut mala ipsi Christi Domino , & idè voluntas Christi habens complacentiam efficacem de sua morte ob unum motivum , & displicentiam inefficacem de eadem ob aliud motivum, fuit omninò conformis cum voluntate divina. Advertendum tamen, quòd licet nunquam humana Christi voluntas fuerit absolute & in rigore divinæ voluntati contraria, nihilominus & potuit citra ullum defectum moralem esse contraria voluntati divinæ, quæ dicitur Voluntas signi , & fuit de facto in speciem contraria voluntati divinæ, quæ dicitur voluntas beneplaciti , non quidem quoad volitum formale, sed quoad volitum materiale, quæ apparens contrarietas non solum fuit citra defectum moralem, sed etiam meritoria , & idcirco voluntati divinæ signi maxime conformis.

Antequam id ostendam explico terminos. Circa actus liberos voluntatis duplex in Deo datur voluntas, altera Signi, altera beneplaciti , ut notat D. Th. *qu. 23. de veritate ar. 3.* apud Esparzam *qu. 37. de Incarnatione.* Voluntas signi in Deo est illa voluntas , qua solum significat velle , aut nolle actus liberos nostros , quæ quadruplex est, Præcipiens, Prohibens, Permittens, Consilians: Voluntas verò beneplaciti est illa qua Deus efficaciter & absolute aliquid vult ; & relatè ad hanc distinguunt Theologi volitum formale, seu motivum, propter quòd Deus aliquid vult , à voluto materiali , seu objecto materiali , quòd vult secundum se. E. G.
dum

dum vult damnationem reprobatorum ad manifestationem, suæ justitiæ, volitum formale est manifestatio divinæ justitiæ, propter quam vult damnationem reprobatorum, ipsa verò damnatio est volitum materiale. His explicatis.

IX. Voluntas humana Christi Domini non potuit esse contraria voluntati divinæ, quæ dicitur voluntas signi, quatenus est Præcipiens actus bonos, Prohibens, aut Permittens actus malos, peccaret enim si noller, quæ Deus præcipit, ut vellet, quæ Deus prohibet, aut permittit, potuit tamen esse contraria Voluntati isti divinæ, quatenus est Consilians; cum enim præceptum mortis fuerit, ut diximus instar Consilii onerosi, & poterat Christus citra ullum defectum moralem nolle acceptare mortem sic præceptum, seu consultam, sicut poterat etiam ponere actus minùs perfectos præ perfectioribus, esto solum sub consilio caderent actus perfectiores, ut ostendimus in quæstione antecedente, sequitur quod physicè poterat voluntas Christi humana esse contraria voluntati signi, quatenus est voluntas Consilians, quamvis defacto nunquam fuerit contraria, ed quòd Christus moraliter necessitabatur ad actus perfectiores, & ad ea, quæ cadebant sub consilio, non secùs ac Deus potens physicè ponere non optimum, moraliter ad ponendum optimum necessitatur, prout supra explicavimus, ac propterea semper humana Christi voluntas fuit conformis Voluntati divinæ, quæ dicitur voluntas signi, non solum quatenus Præcipienti, Prohibenti, aut Permittenti, sed etiam quatenus consilianti.

Quòd attinet ad voluntatem divinam, quæ dicitur beneplaciti, certum est, quod non poterat humana Christi voluntas ab ea discrepare quoad volitum formale, seu quoad motivum, & finem, propter quem Deus aliquid efficaciter vult; peccaret siquidem Christus D. si noller hujusmodi finem, quia vellet ut divina voluntas efficax frustretur; Quare dum Deus vult efficaciter V.G. reprobatorum damnationem, quam ob delicta illi merentur, idque ad manifestationem divinæ justitiæ, si voluntas creata, aut Christi, aut nostra absolute noller, ut divina justitia manifestetur prout Deus vult efficaciter, certè peccaret, ac proinde Christus, cum sit impeccabilis, non potuit quoad volitum formale discrepare à voluntate divina beneplaciti; Quoad volitum verò mate-

riale

riale defacto in speciem discrepavit, siquidem oravit pro salute reprobatorum, ac pro illis sanguinem fudit, ut constat ex proscripta quinta propositione Jansenii; oravitque ut Calix à se transfiret, voluit tamen utrumque ineffaciter, & conditionatè, si scilicet esset placitum Patri, quod alio pacto sua justitia, & gloria manifestaretur citra damnationem reprobatorum, & citra suum calicem passionis, ac mortis; Hinc quia Pater Æternus absolute voluit hæc objecta materialia, & Christus D. videbatur ea nolle, idcirco circa hæc volita materialia videbatur voluntas Christi humana esse divinæ voluntati contraria: Quia tamen ea Christus D. noluit absolute, & efficaciter, sed solum conditionatè, & ineffaciter, & quia non sunt inter se oppositi isti duo actus (videlicet volitio absoluta, & efficax alicujus objecti, & volitio conditionata, & inefficax ejusdem objecti, ut patet in projiciente merces ob metum naufragii, qui efficaciter, & absolute vult illas projicere, & ineffaciter, ac conditionatè non vult illas projicere) idcirco solum in speciem voluntas humana Christi quoad volitum materiale fuit contraria voluntati divinæ, revera tamen nullatenus fuit illi contraria. Quinimmo in hoc ipso in quo videbatur contraria, erat summè conformis divinæ voluntati, in quantum hæc erat voluntas signi consilians Christo talem actum; qui procul dubio fuit honestissimus, ac meritorius; siquidem meritoriè oravit, ac fudit sanguinem pro salute reprobatorum, exoptando ut Deus illis conferret gratias efficaces ad resurgendum, idque ex motivo Charitatis erga proximum, meritoriè etiam oravit, ac exoptavit, ut à se transfiret Calix passionis, idque ex motivo charitatis erga seipsum, utrumque tamen subordinavit voluto formali voluntatis divinæ, seu motivo, propter quod Deus illa noluit efficaciter, unde solum illa Christus exoptavit ineffaciter, & conditionatè, prout Deus volebat ut illa Christus exoptaret, & sic humana Christi voluntas divinæ voluntati non solum non fuit contraria, sed summè conformis, juxta illud Joan. 8. *Ego, quæ placita sunt ei, facio semper.*

Q U Æ S T I O I V.

Utrum Humanitas Assumpta peccare possit in sensu diviso ab Unione Hypostatica, & visione beata?

Ostendimus in 1. quæstione Christum Dominum esse essentialiter impeccabilem tum in sensu composito, quatenus non potest componere cum unione hypostatica, & cum visione Dei peccatum, tum in sensu diviso, quatenus non potest per operationes Christi, & Verbi proprias dividere se ab unione; Quærimus nunc, An Humanitas Christi habens unionem hypostaticam peccare possit in sensu diviso ab unione, & visione, quatenus si peccaret per operationes proprias humanitatis in priori ad subsistentiam Verbi, & ad visionem beatam divideret se ab unione, & visione, sicut Justus peccare potest in sensu diviso, quatenus si peccaret, divideret se à gratia, & Amans potest peccare in sensu diviso, dividendo se ab Amore. Quod autem longè diversa sit hæc quæstio, Num Christus possit peccare in sensu diviso? ab hac alia, Num Humanitas Christi possit peccare in sensu diviso à visione beata, & ab unione hypostatica? constat ex dictis in calce quæstionis primæ. In 1. Artic. id quæremus de visione beata. In 2. de unione hypostatica.

A R T I C U L U S I.

An Humanitas assumpta prout videns Deum peccare possit peccato impeditivo, aut destructivo visionis beate?

I. Q Uod quærimus hic de humanitate assumpta vidente Deum quæri solet in de Beatitudine universim, An videns Deum peccare possit in sensu diviso à visione beata; sicut Justus peccare potest in sensu diviso à gratia? Certum est de facto, & connaturaliter videntes Deum non posse sic peccare, quia visio Dei connaturaliter datur in priori ad quemcumque actum beatorum, quare sicut non posset peccare justus, si in priori ad operationes suas liberas deberet dari gratia influens in illas, ita non potest de facto videns Deum

Deum peccare, quia in priori ad omnes actus voluntatis beati datur visio Dei dirigens ad eos actus impossibilis cum peccato; Restat itaque inquirendum, An id sit possibile in alio ordine, ac de potentia Dei absoluta, per hoc quod visio detur in posteriori ad operationes liberas, sicut datur de facto gratia habitualis?

II. Recolligo prius breviter quæ aliàs diximus (in de Beatitudine *disp. 1. qu. 4.* & in de Spe) posse scilicet in eodem intellectu esse simul in eodem instanti cognitionem Dei ænigmaticam, & visionem beatam; ita tamen ut sola cognitio ænigmatica dirigat ad aliquem actum voluntatis, v. gr. ad actum spei præceptum, illustrando ejus objectum, visio vero Dei se habeat disparatè, vel in posteriori ad talem actum spei, undè solum dirigat ad actum amoris Dei necessarium, in posteriori ad visionem. Quod hoc non repugnet, ostenditur tum negativè, tum multis exemplis: Nam primò Christus Dominus ad actus mœstitiæ in horto (quos habuit non solum in appetitu sensitivo; sed etiam in rationali; cum dixerit *Tristis est anima mea usque ad mortem*) non regulabatur à visione beata. Secundò idem Christus Dominus, ut advertit Suar., per visionem beatam videbat in Verbo suos actus liberos, & tamen ad illos eliciendos non regulabatur à tali visione, aliter non essent liberi, si prodirent à visione essentialiter vera, atque adeò cum determinatione ad unam partem. Tertiò Deus ipse habet scientiam visionis de suis decretis, ea tamen scientia non antecedit decreta, ne evertat eorum libertatem. Quàrtò Ad actus liberos nostros consequitur scientia experimentalis illorum in eodem instanti, quin tamen hæc scientia possit actus liberos antecedere, & ad illos dirigere. Quintò Multi docent, quod Angeli in primo instanti fuerint viatores, & comprehensores, quatenus in primo signo habuerunt cognitionem Dei ænigmaticam cum præcepto ad Deum amandum, atque adeò cum potentia ad peccandum, in secundo actum amoris Dei præceptum liberum, & meritum, in tertio signo gratiam, & visionem Dei dirigentem ad amorem necessarium. Sextò Eadem ratione multi docent, Christum de facto meruisse sibi gloriam essentialem, seu visionem beatam; & D. Thom. negans id

de facto contigisse, docet tamen divinitus potuisse Christum mereri sibi in primo instanti gloriam essentialem per actus non directos à visione. Denique sicut bene percipitur quod ad actum liberum contritionis præceptum peccatori succedat in eodem instanti gratia, quæ tamen si antecederet contritionem, destrueret libertatem contritionis præceptæ (ad libertatem enim spectat quod potentia libera suis comprincipiis communita possit componi cum utraque parte contradictionis, gratia autem si esset in priori ad actum contritionis, & spectaret ad potentiam libere influentem in talem actum, deberet esse compossibilis cum omissione contritionis præceptæ, atque adeo compossibilis cum peccato, quod repugnat,) ita potest intelligi, quod ad eundem actum contritionis succedat simul cum gratia visio beatifica, quæ proinde non dirigeret ad illum actum contritionis prævium, sed ad amorem Dei necessarium, qui ad visionem consequeretur.

III. Dico nunc 1. Humanitas assumpta pro ut videns Deum, & quilibet Deum videns potest divinitus peccare peccato impeditivo visionis, non secus ac justus peccare potest de facto peccato impeditivo gratiæ: atque adeo visio Dei potest in eodem instanti componi cum potentia ad peccandum. Ita communius Recentiores cum Arriag. d. 43. n. 18. Tanner. & Aliis.

Prob. In eodem instanti, quo justus ponit actum meritum v. gr. spei, habet de facto in præmium augmentum gratiæ, ergo potest etiam habere in præmium visionem beatam exigitam à gratia, arqui si ille actus spei liber, & meritorius supponatur præceptus à Deo, ut potest præcipi, tunc daretur in eodem instanti in primo signo potentia proxima ad omittendum actum spei præceptum, atque adeo potentia ad peccandum, in secundo signo ipse actus spei, & in tertio præmium, nempe augmentum gratiæ, & visio beata, ergo potest in eodem instanti dari simul visio beata, & potentia ad peccandum peccato impeditivo visionis, quatenus si poneretur peccatum, non daretur visio.

Confirm. Non minus est incompossibilis cum mortali gratia, quam visio beata, sed cum gratia stare potest in eodem instanti potentia ad peccandum peccato impeditivo gratiæ, ergo etiam cum visione. *Prob. min.* Dum

pec-

peccator ponit contritionem, si ea supponatur præcepta, tunc datur potentia ad omittendam contritionem præceptam, atque adeò ad peccandum, & simul cum contritione datur ipsa gratia, ergo cum gratia datur potentia ad peccandum peccato impeditivo gratiæ.

IV. *Objic.* I. Visio Dei necessitat ad Deum amandum, & inducit impotentiam ad peccandum, ergo non potest in eodem instanti cum visione conjungi potentia ad peccandum; Neque obstat quod potentia ad peccandum esset in priori signo. Nam quæ opponuntur, non possunt conjungi in eodem instanti, ne in diversis quidem signis naturæ, ut assensus, & dissensus, forma, & privatio, ergo nec visio, & potentia ad peccandum, in quocunque enim signo ponatur visio, pro toto illo instanti illustrat objectum, & determinat ad non peccandum.

Confirm. Via, & terminus opponuntur, ergo repugnat quod Aliquis in eodem instanti sit in via, seu habeat indifferentiam ad merendum, vel peccandum, & sit in termino habens visionem beatam, quæ importat impotentiam ad peccandum.

Resp. quòd sicut in eodem instanti in priori ad actum imperantem liberum datur potentia ad carendum actu imperante, tum imperato, in posteriori tamen ad actum imperantem non datur potentia ad carendum actu imperato, utpote necessario, & sicut Christus Dominus in priori ad cognitionem suorum actuum liberorum in Verbo habebat indifferentiam ad eos omittendos, non tamen in posteriori ad eam cognitionem, ita potest in priori ad visionem dari potentia ad peccandum peccato impeditivo visionis, non verò in posteriori ad visionem; Sic etiam quando nos ponimus actus liberos, in priori habemus indifferentiam ad cognitionem experimentalem illorum, non verò in posteriori.

In forma *disting. antec.* Visio Dei ponit impotentiam ad peccandum peccato directo à visione, *conc.*, peccato directo à cognitione ænigmatica prævia, *negò antec.*, & *conseq.* Ad id quòd additur, Dico verum esse, quod quæ opponuntur, non possunt in eodem instanti componi, ne pro diversis quidem naturæ signis, potentia tamen ad peccandum peccato directo ab una cognitione, nempe à cognitione ænigmatica, & impotentia

ad peccandum peccato directo ab alia nempe à visione beatifica, non opponuntur; Sicuti non opponuntur potentia ad A, & impotentia ad B; quod autem possit visio Dei illustrare suum objectum pro toto instanti, utpote indivisibili, relatè ad actus consequentes ipsam, non verò relatè ad actus antecedentes, jam ostendimus multis exemplis

Ad Confirm. Non repugnat, quod Aliquis sit in via ratione unius formæ, & simul sit in termino ratione alterius formæ. Sic materia ratione actionis generativæ est in via ad formam genitam, & ratione formæ genitæ est in termino; sic homo ratione actus meritorii est in via ad gratiam, & in eodem instanti est in termino ratione gratiæ, quæ coexistit cum actu meritorio: Tunc esse in via, & esse in termino opponuntur, quando esse in via fert moveri localiter, & esse in termino fert quiescere, quia ubicatio viæ, & termini sunt impossibiles saltem naturaliter.

V. *Objic. 2.* Ut possit homo proximè peccare, debet carere impedimento ad peccandum, sed visio Dei est impedimentum ad peccatum; ergo cum Dei visione non stat in eodem instanti potentia proxima ad peccandum.

Confirm. Si cum potentia proxima ad peccandum componi posset visio Dei necessitans ad amorem, posset etiam componi prædeterminatio physica necessitans ad Deum amandum; sed repugnat, quod cum prædeterminatione necessitante physicè ad Deum amandum stet potentia ad peccandum, ergo etiam cum Dei visione.

Respond. Conc. Maj. disting. min. Visio est impedimentum ad peccatum directum ab illa, *conc.*, ad peccatum directum à cognitione ænigmatica, quod si poneretur, impediret existentiam visionis, *Nego antec. & disting. cons.* non potest cum visione conjungi potentia ad peccandum peccato directo à visione, *conc.*, directo à cognitione ænigmatica, *negò conseq.* Sic Christus Dominus, dum ponebat actus liberos, videbat illos in Verbo, quia tamen hæc visio non dirigebat ad eos actus, non erat impedimentum destruens eorum libertatem.

Ad Confirm. Quod diximus de Dei visione, dicimus etiam de prædeterminatione physica ad Deum aman-

mandum : licet enim dari potest in Petro in primo signo cognitio ænigmatica dirigens ad actum spei præceptum ; in secundo signo ipse actus spei , in tertio gratia , & visio necessitans ad amorem , ita in eodem tertio signo dari potest in præmium cum gratia prædeterminationis phylica necessitans ad amorem Dei, in quo casu pro primo signo intelligeretur potentia ad omittendum actum spei præceptum , atque adeò potentia ad peccandum peccato impeditivo prædeterminationis, & in tertio signo prædeterminatio cum impotentia ad peccandum peccato consequente ad eam prædeterminationem. Sic etiam posito actu libero , quo quis se determinat ad non ambulandum , posset in posteriori habere compedes, qui cum essent evitabiles , non destruerent potentiam expeditam ad ambulandum in sensu diviso , sicut amor non destruit potentiam expeditam ad odium in sensu diviso.

Ratio horum omnium est , quia A , esse in priori signo ad B. nihil aliud est , quàm A , esse causam , vel prærequisitum ad B ; v. gr. quia Sol est causa lucis , & quia scientia media essentialiter præsupponitur ad decreta libera , & ad scientiam visionis , ideo sol dicitur esse in priori signo naturæ ad lucem , & scientia media ad decreta libera. In casu nostro , voluntas affecta cognitione ænigmatica est causa actus spei , & hic actus est causa moralis gratiæ, & visionis beatæ, quæ causat amorem Dei necessarium , & ideo in secundo signo dicitur esse actus spei , in tertio gratia, & visio , in quarto Amor necessarius.

Hinc fit primò quòd visio Dei licet necessitet ad amorem, relinquat tamen in voluntate affecta cognitione ænigmatica libertatem ad ponendum , vel non ponendum actum spei præceptum, atque adeò libertatem ad peccandum peccato impeditivo visionis. Fit secundò quòd cum visione Dei stet tam potentia ad peccandum per omissionem actus spei præceptæ, directi à cognitione ænigmatica , quàm impotentia ad peccandum per omissionem amoris necessarii directi à visione. Unde potentia ad peccandum , & impotentia est relatè ad diversa.

VI. Dico 2. Potest pariter cum Dei visione conjugipotencia ad peccandum pro instanti sequenti peccato destructivo visionis. Ità communius Recentiores

in hoc puncto ab antiquis non discussio contra Rhodes
Diss. 1. de Act. hum. qu. 3.

Probatur, & explicatur: Conferat Deus Petro visionem Dei gratis pro instanti A, sed pro instanti B, det illi cognitionem ænigmaticam, quæ dirigat ad actum spei præceptum, adeo ut possit Petrus sub illa cognitione liberè omittere actum spei, & peccare; decernat tamen Deus, quod si peccet, destruat visionem Dei præhabita, si verò ponat actum spei præceptum, habeat in præmium conservationem visionis pro instanti B; in tali casu, qui certè est possibilis, Petrus in instanti A, dicitur cum visione beata habere potentiam ad peccandum pro instanti sequenti, peccato destructivo visionis, quatenus pro instanti B, habet potentiam ad omittendum actum spei præceptum, quo omissio, destrueretur visio, ergo potest cum visione Dei conjungi potentia ad peccandum peccato destructivo visionis.

Confirm. De facto Petrus habens gratiam in instanti A; dicitur cum gratia habere potentiam ad peccandum pro instanti B. peccato destructivo gratiæ, si pro instanti B. præcipiatur illi v. gr. actus spei, quem posset liberè omittere, ergo etiam Petrus habens visionem in instanti A. dicitur cum visione habere simul potentiam ad peccandum pro instanti B., peccato destructivo visionis, si pro instanti B. præcipiatur illi v. gr. actus spei, quem posset liberè omittere, per hoc quod ad illum non dirigat visio beata, sed cognitio Dei ænigmatica.

VII. *Objic. 1.* Cum Rhodes; Visio existens in instanti A, dirigit ad omnes actus voluntatis pro instanti B; ergo videns Deum in instanti A, non potest peccare in instanti B. peccato destructivo visionis: *Conseq. seq. antec. Prob.* Quia Aliter videns Deum eodem modo esset peccabilis, ac viator habens gratiam, qui peccare potest peccato destructivo gratiæ.

Resp. dist. antec. connaturaliter conc., essentialiter, nego antec. & conseq.; Si enim potest in primo instanti dari visio, quæ non dirigat ad actum, v. gr. spei præceptum, unde potest componi cum potentia ad peccandum peccato impetitivo visionis, (quod Rhodes admittit) quare non potest pariter divinitus pro secundo instanti dari eodem modo visio, quæ non di-

dirigat ad actum spei præceptum, unde stet cum potentia ad peccandum peccato destructivo visionis : ad probationem *Nego sequelam* ; videns Deum est magis impeccabilis, quam viator : quia ille ratione visionis exigit, quod in perpetuum visio Dei sit in priori, & dirigat ad omnes actus voluntatis : contra verò viator non exigit, quod gratia sit in priori ad actus voluntatis, & ideo videns Deum solum miraculose peccare potest peccato destructivo visionis ; Viator verò etiam naturaliter peccare potest peccato destructivo gratiæ. Quod autem id exigit visio Dei, supponimus ex dictis in de Beatitudine, ubi ostendimus ad beatitudinem spectare essentialiter, quod ejus perpetuitas attingatur à Beato ; ad visionem verò Dei spectare connaturalem tantum, non essentialem indestruibilitatem ; & ideo connaturaliter per peccatum non potest destrui.

VIII. *Objic. 2.* Juxta systema Conclusionis deberet in secundo instanti componi visio Dei cum peccato, quod repugnat. Probatur sequela, quia in secundo instanti visio Dei non destruitur, nisi ad exigentiam peccati, ergo deberet in primo signo naturæ intelligi potentia ad peccandum ; in secundo signo peccatum ; in tertio destructio visionis ; atque adeò in primo signo deberet esse visio nondum destructa per peccatum, quod esset in secundo signo, unde in eodem instanti esset visio, & peccatum.

Resp. Objectionem esse pusilem, & solvendam ab Adversariis in destructione gratiæ per peccatum ; Constat enim ex physicis, quod forma vetus non coexistit cum forma nova, quamvis illa expellatur ad hujus exigentiam, sicut enim pro primo signo naturæ, quo intelligitur Sol, neque intelligitur lux, neque negatio lucis, sed præscindit intellectus ab utroque, ita pro primo signo naturæ, quo in instanti B, intelligitur potentia ad peccandum, tunc neque intelligitur peccatum, neque visio Dei, aut gratia, sed præcisio ab utroque, ita ut si pro secundo signo ponatur peccatum, tunc intelligatur pro tertio signo carentia visionis, & gratiæ, si verò pro secundo signo ponatur actus spei præceptus, tunc intelligatur pro tertio signo visio, & gratia. *Quare nego sequelam.* Ad probationem dico, visionem, & gratiam perseverare usque ad illud instans exclusivè, quo ponitur peccatum, non usque ad illud signum, quo peccatum intelligitur, & ideo nunquam peccatum coexistit cum visione, aut gratiâ.

ARTICULUS II.

Utrum Humanitas assumpta peccare etiam possit peccato impeditivo, aut destructivo unionis hypostaticæ?

IX. A Dnotavimus quæ. 1. non esse idem querere de Christo, ac de Humanitate assumpta specificativè accepta, An possit peccare? sicut non est idem querere de homine, ac de anima unita corpori, An sit mortalis? sicut enim potest homo esse mortalis, & anima unita corpori specificativè accepta esse immortalis, ita poterit Christus esse impeccabilis, & Humanitas assumpta peccabilis. Adnotavimus etiam, non posse humanitatem assumptam connaturaliter peccare in sensu diviso ab unionem, quia non potest connaturaliter operari in priori ad unionem hypostaticam, seu ad subsistentiam increatam, quâ substantialiter completur, & terminatur; sicut anima rationalis nullam operationem, ne organicâ quidem, exercere potest, antequâ sit substantialiter completa per unionem cum corpore; Supponimus tamen hic ex Physica, posse divinitus naturam operari in priori ad subsistentiam; non secus ac potest divinitus anima in priori ad unionem cum corpore; ut communius docent cum Vasc. *diff. 21. c. 3.* contra Suar. & inquirimus, An Humanitas assumpta possit divinitus in priori ad unionem hypostaticam, & subsistentiam increatam peccare peccato impeditivo, aut destructivo unionis hypostaticæ, prout diximus de Visione beata? Affirmant Mendoza, Arriag. P. Thyrs. Gonzalez *d. 30. n. 36.* & Alii Recentiores apud Plateh. *nu. 279.* contra Suar. Vasc. Lugo, Haun.

X. Censeo equidem cum prædictis DD. posse divinitus humanitatem assumptam specificativè acceptam peccare in sensu diviso, peccato tam impeditivo, quàm destructivo unionis hypostaticæ.

Prob. Applicando unioni hypostaticæ ea, quæ diximus Articulo superiore de visione beata. Si enim Deus humanitati in priori ad quamcunque subsistentiam præcipiat pro instanti A, actum spei, v, g. & in præmium velit conferre non solum gratiam, sed etiam unionem hypostaticam, & visionem beatam, & humanitas ponat actum præceptum, in eodem instanti habet in primo signo

nae

naturæ potentiam ad peccandum, in secundo actum spei, in tertio gratiam, unionem hypostaticam, & visionem, ergo potest in eodem instanti humanitas habere potentiam ad peccandum in sensu diviso, simul cum unionem hypostaticam, & Dei visione, atque adeo potest humanitas assumpta peccare in primo instanti peccato impeditivo unionis, & visionis. Quod si Deus eidem humanitati habenti unionem hypostaticam in instanti A, præcipiat pro instanti B, actum spei, & in præmium velit conferre conservationem unionis pro instanti B, in tali casu humanitas assumpta in instanti B, habet potentiam ad peccandum pro instanti B, peccato destructivo unionis.

Confirm. Multi docent apud Muniessam, Humanitatem Christi affectam gratiâ potuisse de congruo mereri unionem hypostaticam per operationes politas in priori natura ad unionem cum Verbo, & ad subsistentiam divinam, ergo bene potest intelligi, quod si huiusmodi operatio præcipiatur humanitati, in eodem instanti detur potentia ad peccandum in sensu diviso cum unionem hypostaticam.

XI. *Objic.* 1. Est essentiale naturæ rationali, quod præcedat subsistentia ad omnes ejus operationes, atqui si præcedat subsistentia Verbi ad operationes humanitatis, est impossibile, quod humanitas peccet, & per peccatum impediat unionem cum Verbo, quippe quæ jam præsupponitur in priori, ergo repugnat humanitati assumptæ potentia ad peccandum etiam in sensu diviso ab unionem.

Confirm. Non potest Agens creatum agere, quin prius sit ubicatum, & durans, ergo à fortiori, quin prius sit completum substantialiter per subsistentiam.

Resb. Nego maj. cum Vasq. Arriag. & Aliis communius, & ex Philosophicis suppono, quod sicut anima divinitus operari potest in priori ad suum complementum substantiale, ita natura in priori ad subsistentiam.

Ad Confirm. 1. Retorqueo paritatem, ut Agens creatum producat in se suam ubicationem, & durationem, non debet prius intelligi ubicatum, & durans; ergo neque humanitas, ut possit per actiones liberas obtinere subsistentiam, debet prius intelligi subsistens. Deinde disparitas est, quia repugnat Creaturam esse nusquam, aut nunquam; at non repugnat carere suo com-

complemento substantiali; unde si humanitas divinitus existat sine complemento substantiali ullius subsistentiæ, adhuc poterit operari; non secus ac calor in Eucharistia carens in hærentiâ sibi debitâ potest calefacere, & quamvis operationes connaturaliter sint suppositorum, divinitus tamen possunt esse à natura non suppositata, sicut operationes accidentium connaturaliter tribuuntur substantiæ sustentanti, divinitus tamen possunt esse ab accidentibus non sustentatis.

XII. *Obje. 2.* Ex Hæmol. Humanitas assumpta non potest peccare in sensu diviso ab unione naturaliter, ergo, neque supernaturaliter. *Prob. Conseq.* Quia miraculum non potest ordinari à Deo, ad hoc, ut ex illo promanet peccatum.

Confirm. Quia sæpè PP. docent non solum Christum esse impeccabilem, sed etiam humanam Christi voluntatem, ut habet Origen. apud Vasq. & ratio est, quia videtur derogari sanctitati summæ humanitatis assumptæ, dicere, quod sit peccabilis.

Resp. Argumentum probare nimis, probat enim, quod si divinitus beatus spoliaretur visione, neque posset peccare, quia miraculum hoc ordinaretur ad peccatum. *Directè nego Conseq.* Ad prob. nego, miraculum in casu nostro ordinari ad hoc, ut ponatur peccatum, sed ordinatur ad hoc, ut ponatur actus liber meritorius, præceptus, ad quem consequatur unio hypostatica; sicuti quando Deus confert nobis auxilium inefficax, non ordinat illud ad peccatum, sed ad actum bonum, quamvis ex culpa voluntatis sequatur malus.

Ad Confirm. Christus est essentialiter impeccabilis etiam in sensu diviso, humanitas verò assumpta specificativè accepta est etiam de factò, & connaturaliter impeccabilis, non tamen essentialiter. Nunquam autem PP. docuerunt, ut notat P. Thyrs. quod humanitas etiam de potentia absoluta sit impeccabilis in sensu diviso, cum hoc spectet ad subjectionem debitam creaturæ rationalis omnipotentissimæ Dei potestati inclinandorum quolibet eordum, ut loquitur Aug. Nec id derogat summæ Christi sanctitati, sicut non derogat, quod humanitas ante assumptionem potuerit peccare, in utroque enim casu peccatum non componeretur cum unione hypostatica, sed cum sola humanitate divisa ab unione.

XIII.

XIII. *Obje. 3.* Filiatio Dei naturalis trahit in humanitate Christi jus infrufragibile ad auxilia efficacia, ergo non potest humanitas Christi specificativè accepta peccare peccato destructivo unionis. *Prob. Antec.* Filiatio naturalis trahit jus ad amorem amicabilem Patris, & cum ferat in Christo sanctitatem summam, trahit jus ad amorem summum tum benevolum, tum beneficium, cum ex Aristotele 2. *Rhet. 4.* Amor sit activus, ergo trahit jus ineluctabile ad auxilia efficacia.

Confirm. Quia dedecet Verbum denominari peccans, ergo etiam quod denominetur potens peccare, atqui si humanitas assumpta posset peccare. Verbum denominari posset potens peccare, sicuti denominatur potens mori, quia humanitas assumpta potest mori, ergo ut supra.

Resp. Argumentum probare, quod filiatio Dei naturalis trahat in Christo jus ineluctabile ad visionem beatam, unde non possit divinitus eam privari, quod nemo dixerit; probat etiam, quod humanitas assumpta sit essentialiter inannihilabilis, eò, quod sit summè amabilis. *Directè nego antec.* filiatio Dei naturalis, sicut trahit solum exigentiam naturalem visionis beatæ, & quod in perpetuum conservetur, ita solum trahit exigentiam naturalem divinitus frustrabilem auxiliorum efficacium relatè ad humanitatem assumptam specificativè acceptam, (cum relatè ad Christum omnia quæcunque auxilia sint essentialiter efficacia ob ejus impeccabilitatem.) Ratio à priori horum omnium est, quia Humanitas in priori ad unionem, sicut est annihilabilis, ita est essentialiter peccabilis, & obdurabilis, adeoque capax auxiliorum inefficacium ob subjectionem debitam cujuslibet creaturæ relatè ad divinum Dominium.

Ad Confirm. Dico, unionem hypostaticam, & peccatum habere solum simultatem potentiae, ut habet gratia, & peccatum, contra verò unionem hypostaticam, & mortem humanitatis habere etiam potentiam simultatis, quia humanitas unita Verbo de facto mortua est, idcirco Verbum dici potest mortale, seu potens mori per conjunctionem unionis hypostaticæ cum morte humanitatis; non potest tamen dici peccabilis, seu potens peccare. In forma *Nego min.* subsumptam, sola enim humanitas denominari potest potens peccare, non Verbum, sicut sola humanitas assumpta potuit ante assumptionem

nem peccare, quin dicatur Verbum potuisse peccare.

XIV. *Objic. ult.* Non solum Christo, sed etiam humanitati assumptæ concedenda est impeccabilitas major eâ, quæ conceditur Justo, sed si posset humanitas assumpta peccare in sensu diviso ab unione, ejus impeccabilitas non esset major impeccabilitate Justo, qui solum peccare potest in sensu diviso à gratia, non verò in sensu composito, componendo gratiam, & peccatum; ergo humanitas assumpta non potest peccare in sensu diviso.

Confirm. Humanitati Christi utpote sanctificatæ à Verbo competit sanctitas infinita, quâ major excogitari non potest, sed major esset sanctitas humanitatis Christi, si excluderet potentiam ad peccandum etiam in sensu diviso, ergo hæc sanctitas, & impeccabilitas competit in omni providentia humanitati assumptæ. *Min. prob.* Quia sanctitas ex D. Dionysio est elongatio à scelere, & immunditie; atqui magis elongatur à scelere, qui non solum excludit peccatum, sed etiam potentiam ad peccatum, ut excludit Deus infinite sanctus, ergo &c.

Resp. Humanitatis assumptæ impeccabilitatem esse longè præstantiorem impeccabilitate Justo. 1. Quia persona Justo peccare potest conjungendo peccatum cum proprio supposito, & solum peccare non potest conjungendo peccatum cum gratia; At Persona Christi nec potest peccare conjungendo peccatum cum unione, nec cum supposito Christi. 2. Humanitas assumpta divinitus tamen peccare potest in sensu diviso (cùm solum divinitus Humanitas operari possit in priori ad complementum substantiale, quod habet per subsistentiam) justus verò etiam naturaliter. 3. Potest Justus conjungere cum gratia sanctificante peccatum veniale: contra verò humanitas assumpta cum unione hypostatica, & sanctitate substantiali, quâ sanctificatur, nec veniale, nec imperfectionem ullam moralem conjungere potest.

Ad Confirm. resp. 1. Per instantiam, major est sanctitas, quæ excluderet ab humanitate Christi potentiam ad peccandum ante assumptionem, vel post dimissionem, cùm sic magis elongetur à scelere; ergo hæc sanctitas tribuenda est Christo Domino, quod tamen communius non admittitur, quia peccabilitas est de essentia humanitatis, quousque non reddatur ab aliquo dono supernaturali (putà à visione beata, vel unione hypostatica) per accidens impeccabilis; & ratio à priori est, quia peccabi-

bili-

bilitas in creatura rationali consequitur ad physicam defectibilitatem, ut proinde ferè communissimè PP. & Theolog. doceant, repugnare creaturam rationalem impeccabilem non secus ac repugnat creatura indestruibilis. Directè ad argumentum *negomin.* seu potius suppositum *min.* Sanctitas enim, quæ excludit ab humanitate potentiam ad peccandum in priori ad unionem, est chymærica, non secus ac Sanctitas, quæ excludat potentiam ad peccandum in humanitate ante assumptionem: Imò si dari posset Sanctitas participata, quæ excluderet potentiam ad peccandum in sensu diviso, à fortiori deberet posse dari Sanctitas, seu unio hypostatica, quæ excludat essentialiter ab Humanitate ipsum peccasse ante assumptionem, cum pejus sit peccasse, quam posse peccare, atqui illud non excluditur essentialiter ab unione hypostatica, ergo neque hoc. Ad probationem dico, summè elongari à scelere humanitatem sanctificatam à Verbo, si elongetur, quantum potest elongari, atque adeò excludendo potentiam ad peccandum in sensu composito, & ad peccandum in sensu diviso connaturaliter, ac impossibile est, quod excludat potentiam ad peccandum in sensu diviso essentialiter ob subjectionem debitam divino dominio; Cum possit Deus cum simpliciter, cum dependenter ab operatione præcepta velle concedere, aut negare unionem, vel ejus conservationem, & ideo non debet hæc impeccabilitas tribui humanitati assumptæ. Sicut enim ad summam Dei Sanctitatem non spectat, quod non possit permittere peccatum creaturæ, nec in Deo potentia ad permittendum peccatum stat cum ulla imperfectione morali, aut physico-morali, quamvis dicat respectum ad peccatum, quod tamen non est coniungibile cum Sanctitate Divina: ita ad summam Sanctitatem Humanitatis assumptæ non spectat impotentia ad peccandum in sensu diviso, nec huiusmodi potentia fert imperfectionem ullam moralem, quamvis dicat respectum ad peccatum ob inconiungibilitatem peccati cum unione hypostatica.

Hæc in gratiam veritatis perpendimus; Ceterum in obsequium Christi Domini, Abstinentium puto ab hac Thesi exponenda quoad eam partem, quod possit humanitas Christi peccare peccato destructivo unionis, ne aliter imperitorum offendantur, sicut videntur offendi etiā a
senten-

sententia negante Christum esse impeccabilem, præcise ratione unionis; esto id à viris primæ notæ propugnetur, ut diximus quæstione primâ. Quinimo fateor, quòd si esset possibilis sanctitas excludens in humanitate assumpta hanc peccabilitatem, ea concedenda esset cuiusvis humanitati assumptæ, utpote summè sanctæ; Censeo tamen eam esse Chymæricam, quia derogat divino dominio impeccabilitas, seu inobdurabilitas, non secùs ac indestruibilitas Creaturæ, immobilitas, inconfervabilitas, immultiplicabilitas, & alia huiusmodi prædicata, quæ directè subtrahunt Creaturam à subiectione debita Deo. Et sanè chymærica est in Humanitate unio hypostatica, quæ exigat essentialiter, quòd humanitas non potuerit esse in priori tempore ad ipsam, ut proinde non potuerit hæc peccare antè assumptionem, ergo pariter chymærica est unio hypostatica, quæ essentialiter exigat, quòd Humanitas non possit in priori signo naturæ operari, & ponere actum præceptum, ut proinde careat potentiâ ad peccandum in priori ad unionem peccato impeditivo unionis. Et ratio est, quia sicut derogat divino dominio, quòd non possit poni Humanitas in priori tempore ad assumptionem; ità derogat, quòd non possit humanitas in priori signo operari, ac ponere actum præceptum, quo mereatur unionem ipsam hypostaticam de congruo; unde humanitas assumpta necessariò debet posse componi cum potentia ad peccandum peccato impeditivo unionis; Hæc enim potentia ad peccandum non est defectus moralis, nec physico-moralis, ut diximus, quamvis enim dicat respectum ad peccatum, at non proinde derogat sanctitati summæ, cum qua peccatum nullatenus evadit conjungibile.

XV. Ex dictis sequitur 1. Quòd Humanitas assumpta in priori ad unionem, & visionem Dei capax sit divinitus præcepti rigorosi comminantis odium, & pœnam æternam, cum pro tali signo sit peccabilis in sensu diviso.

Sequitur 2. Quòd impeccabilitas Christi bene cohareat cum libertate in acceptatione mortis præcepta, non solum si dicatur præceptum mortis non fuisse rigorosum, sed instar legis pœnalis; verùm etiam si supponatur fuisse divinitus impositum præceptum mortis rigorosum humanitati assumptæ in priori ad unionem. Utrum autem ea conciliari possint, si dicatur præceptum mortis fuisse rigorosum, & fuisse impositum non quidè huma-

humanitati in priori ad unionem, sed ipsi Christo? Examinabimus qu. sequenti.

Sequitur 3. Quòd videns Deum in priori ad visionem fit capax etiam præcepti rigorosi; in posteriori verò ad visionem solum possit necessitari à divino præcepto, non secùs ac necessitatur ad observantiam legis naturalis, & in hoc sensu instituitur illa quaestio in de Beatitudine, An possit videnti Deum reduplicativè quà videnti imponi præceptum de cessando ab amore? & Vasq. negat, eò, quòd non detur præceptum de re impossibili; Amicus verò, & Alii affirmant, putantes posse præcipi aliquid impossibile, quoties per præceptum, actus, qui præcipitur, moraliter immutatur, & de impossibili evadit necessarius: Sicut enim voluntas occidendi innocentem est impossibilis Beato, secundùm se, ea tamen potest præcipi à Deo, quia per præceptum evadit bona moraliter, & ex impossibili redditur necessaria, ità cessatio ab amore Dei est impossibilis videnti Deum, ea tamen cessatio præcipi potest, quæ per præceptum ostenditur esse Deo grata, ac proinde ex impossibili redditur necessaria videnti Deum; quippe qui necessariò conformat se voluntati divinæ præceptivæ, quin possit peccare.

Q U Æ S T I O V.

Quomodo concilietur Christi impeccabilitas cum libertate, & Merito in acceptance Mortis præceptæ?

I. Dissolvendus superest Gordius nodus, in quo Theologi implicantur, An scilicet, & quomodo coherere possit Christi impeccabilitas cum libertate ad non moriendum in hypothesi, quòd præceptum mortis rigorosum, & obligans in conscientia, seu necessitans instar præceptorum naturalium, impositum fuerit non quidem humanitati in priori ad assumptionem, sed ipsi Christo, seu humanitati assumptæ reduplicativè acceptæ? Jansenius voluit Christi voluntatem in tali casu habuisse solum libertatem à coactione, & illam sufficere ad meritum, sed ab Innoc. X. damnata est ut hæretica ea Jansenii propositio: *Ad merendum sufficit libertas à coactione*, & quamvis in Propositione damnata addantur ea verba: *In statu natura lapsa, & Christus non habuerit humani-*

nitatem lapsam, sed integram; Verba tamen Pontificis, ut notat Platel. n. 311. non sunt restrictiva, sed ampliati-
va, & fit sensus; *Etiā in statu naturæ lapsæ*, ut constat ex
Scopo Pontificis damnantis Jansenium, qui dicebat in
statu naturæ integræ fuisse libertatem à necessitate, eam-
que per peccatum periisse, quod fusè ostendimus in de
Actibus Humanis Disp. 6. qu. 6. Adde Scripturas, & PP.
velle Christum habuisse non solum libertatem à coacti-
one, sed etiam à necessitate, ut diximus qu. 2. & Augu-
stinus tract. 37. in Jo. dicit: *Christus quando voluit, à carne
discessit, hoc est potestatis, non necessitatis.*

Alias proinde vias inière Theologi ad nodum hunc
dissolvendum Prima est Thomistarum dicentium Chri-
sti voluntatem fuisse liberam ad mortem non acceptan-
dam in sensu diviso à præcepto, quamvis ipsa non posset
se à præcepto dividere. Secunda Scotistarum dicentium,
Præceptum esse extrinsecum voluntati Christi, non verò
intrinsecum, ut est visio beata, & ideo à præcepto quam-
vis inimpedibili, & impossibili cum omissione mor-
tis, non lædi libertatem. Tertia Suarii, Molinæ, Conink,
dicentium unionem hypostaticam non lædere indiffe-
rentiam principii proximi, & sic non lædere libertatem.
Quarta Vasq. Ruiz, Becan, dicentium, fuisse Christo im-
positum præceptum de morte, non de circumstantiis
mortis, v.g. hoc tempore, loco, ex hoc, vel illo motivo;
unde relatè ad has circumstantias fuit liber, quod vide-
tur sufficere ad meritum in acceptatione mortis. Quinta
Cardinalis de Lugo, & Hurtadi; Hic docet, Christum
meruisse acceptando mortem præceptam, quatenus libe-
rè voluit, quòd sibi præceptum mortis Imponeretur;
unde acceptando mortem, solum habuit meritum obe-
diendi in causa, quatenus libere non impedivit præcep-
tum. Lugo verò pariter docet, Christum meruisse in
causa, sed quatenus poterat liberè petere dispensatio-
nem præcepti, & non petiit.

Nos viam Thomistarum, Scotistarum, & Suarii im-
pugnabimus, ut eversivam libertatis, & meriti in actu
obedientiæ; viam verò Vasq. Hurtadi, & Lugo, quia
non salvat in proprio sensu, quomodo Christus factus
sit obediens usque ad mortem; & concludemus, con-
ciliari Christi impeccabilitatem cum libertate in præ-
senti providentia, dicendo cum Esparz. Haun. Mauro,
ex Lorca, Alberto Magno, Paludano, præceptum mor-
tis

tis Christo impositum non fuisse rigorosum, sed instar Consilii onerosi; quamvis in alia providentia potuisset etiam conciliari, dicendo cum Arriaga, Hurt. & P. Thyrsio Gonzalez, præceptum mortis fuisse impositum non Christo, sed humanitati assumptæ specificativè acceptæ, prout diximus quæstione antecedenti.

ARTICULUS I.

Rejicitur via Thomistarum, & Scotistarum,

II. Thomistæ, sicut docent Prædeterminationem physicam ad actum cohærere cum libertate, quia voluntas sub prædeterminatione ad actum potest illum omittere in sensu diviso à prædeterminatione, quamvis non possit voluntas se dividere ab illa; ità hîc docent, præceptum mortis cohærere in Christo impeccabili cum libertate ad non moriendum, quia voluntas Christi poterat nolle mori in sensu diviso à præcepto, quamvis inimpedibili.

Dico equidem cum communissima Societatis: Non posse hâc viâ conciliari libertatem ad non acceptandam mortem præceptam cum Christi impeccabilitate.

Prob. Iisdem rationibus, quibus ostendimus in de Gratia, non salvari libertatem actûs cum prædeterminatione physica ad illum. Et primò quidem ab Absurdis: Si posset dici Christus liber ad non acceptandam mortem præceptam per hoc, quòd posset illam non acceptare in sensu diviso à præcepto, à quo tamen non posset se dividere, sequeretur, quòd posset etiam dici liber ad ambulandum, qui est sub compedibus, per hoc, quòd posset ambulare in sensu diviso ab illis, quamvis non possit ab iis se dividere. Posset etiam dici liber ad Deum amandum, qui cum cognitione ænigmatica haberet etiam visionem beatam, vel gratiam Calvinisticam necessitantem ad Amorem, quia etiam in sensu diviso ab istis posset voluntas non amare. Sic fatum, seu necessitas fatalis Astrorum, à Gentilibus admissa, neque tolleretur libertatem, quia voluntas consentiens posset in sensu diviso à tali influxu Astrorum non consentire.

Respondet Gonet. *d. 21. a. 3. §. 3.* Æquè Calvinistas, & Thomistas admittere potentiam ad non moriendum in sensu diviso à præcepto; sed Calvinistæ dividunt potentiam ad non moriendum à præcepto; Thomistæ

verò considerant potentiam ad non moriendum solum abstractam, & prædictam; non separatam à præcepto; ac proinde solum Thomistæ salvant libertatem; quia per Thomistas Christus potest velle negationem mortis ut abstrahentem, non ut conjunctam cum præcepto, seu potest nolle mortem negativè, non privativè, & ideo non potest peccare. Faterur tamen Gonet. responsionem hanc esse satis difficilem, quæ percipiatur; & advertenti patet. semper posse instari à nobis instantiis adductis.

III. *Prob. 2.* à priori ex illa Maxima fusius in de Gratia à nobis discussa: *Omne antecedens actum impossibile cum omissione actûs, & inimpedibile à voluntate, est everisivum libertatis*; sed actum obedientiæ in Christo Dom. antecedit complexum unionis hypostaticæ, & præcepti, quod complexum est impossibile, cum omissione obedientiæ, & inimpedibile à Christi voluntate, cum non conferatur illud dependenter à voluntate Christi, ergo est everisivum libertatis in actu obedientiæ. *Prob. hæc maxima 1.* inductione; compedes enim prædeterminatio physica in sententia Societatis, gratia Calvinistica, fatum, quod ex Aug. non ponunt nisi fatui, ideo evertunt libertatem, quia sunt antecedens impossibile, & inimpedibile. 2. Quia voluntas sub antecedenti impossibili, & inimpedibili, neque potest omittere actum in sensu composito, seu componendo illud antecedens cum omissione actûs, neque in sensu diviso, cum non possit se dividere ab illo, utpote inimpedibili, ergo simpliciter non potest actum omittere, atque adeo non est libera. Ideo voluntas amans v.g. potest odisse in sensu diviso, quia potest impedire directè suum amorem, & sic ponere odium: idcirco pariter Antichristus sub præscientia peccati, & prædestinatus sub prædefinitione actûs boni, liberè operantur, quia possunt indirectè impedire illos actus divinos; at Christus non potest impedire præceptum mortis neque directè, quia voluntas solum proprios actus potest directè impedire, neque indirectè, eo modo, quo potest impediri præscientia peccati, & prædestinatio, seu prædefinitio consequens ad scientiam mediam; quia præceptum non imponitur dependenter ab ullo actu libero Christi, ergo præceptum tamquam impossibile, & inimpedibile, libertatem evertit. Tertiò à priori: Illud est everisivum libertatis, seu potentiæ expeditæ ad utramque partem, quod est impedimentum
rigo-

rigorosè dictum ad alteram partem , sed omne antecedens actum impossibile , & inimpedibile est impedimentum pressè dictum ad omissionem actûs ; ergo est everlivum libertatis ; atque adeò sicut prædeterminatio phylica ; ità præceptum in casu nostro libertatem everunt. *Min. prob.* Impedimentum nihil aliud est, quàm ratio sufficiens, ne aliquid ponatur insuperabilis ab Agente, ut constat tum inductione, tum ex ipsa Etymologia nominis; Impedire enim nihil aliud sonat, quàm efficere ineluctabiliter, ne aliquid sit ; tum demum à priori, quia quoties datur ratio ista ineluctabilis, neque potest poni effectus in sensu composito, ut patet, neque in sensu diviso, cum non possit potentia ab ea se dividere , ergo hujusmodi ratio ineluctabilis destruit potentiam expeditam, seu est impedimentum pressè dictum ad actum oppositum.

Neque dicas impedimentum debere se tenere ex parte actûs primi requisiti ad actum, præceptum verò non spectat ad actum primum requisitum ad acceptationem mortis, cum sine præcepto possit mors acceptari , ergo præceptum mortis non est impedimentum ad mortem non acceptandam, atque adeò non evertit libertatem.

Nam contra est, quia compedes sunt impedimentum, non quia constituunt actum primum, seu potentiam ad ambulandum, vel non ambulandum, sed quia destruunt actum primum expeditum ad ambulandum, ergo præceptum mortis est impedimentum, non quia constituit actum primum, seu potentiam ad mortem acceptandam, sed quia destruit actum primum expeditum ad mortem non acceptandam ; Hinc diximus in loco, quòd prædeterminatio phylica , quamvis non se teneret ex parte actûs primi, sed ex parte actûs secundi , ut volunt Recentiores Thomistæ, adhuc evertit libertatem , quia licet non constituat actum primum proximum ad consensum, destruit tamen actum primum proximum expeditum ad dissensum, eò, quòd sit impedimentum ad illum, non secùs ac compedes. Deinde, quamvis præceptum non constituat actum primum, seu potentiam ad acceptandam mortem, constituit tamen actum primum relatè ad acceptationem mortis, quæ sit actus obedientiæ ; Christus autem meruit per acceptationem mortis, quæ esset actus obedientiæ, juxta illud : *Factus obediens* &c. ergo præceptum mortis se tenet ex parte actûs primi relatè ad hunc actum obedientiæ.

IV. Confirm. 1. Conclusio. Quia ex dictis in de Actibus Humanis, ut potentia dicatur libera, debet posse componere cum omnibus requisitis ad agendum tam actum, quam non actum; idcirco enim voluntas non esset libera sub gratia Calvinistica, sub fatali influxu Astroforum, & sub prædeterminatione physica, in sententia Societatis, quia cum istis non posset componere omissionem actus, atqui voluntas Christi sub præcepto, quod est prærequisitum ad actum obedientiæ redemptivum, non potest componere omissionem talis actus, ergo voluntas Christi sub præcepto mortis non est libera ad mortem non acceptandam; sicut voluntas nostra non est libera sub prædeterminatione, siue hæc dicatur se tenere ex parte actus primi, siue secundi: Aliter posset etiam ex cohærentia doctrinæ dari prædeterminatio ad peccatum, quod tamen quamplures Thomistæ non admittunt, eò, quòd Deus esset author peccati, utpote volens prædeterminationem ineluctabiliter inducentem peccatum. Neq; valet dicere, quòd Deus prædeterminando ad peccatum, illud non amaret, quippe quod prohiberet. Nam Deus se haberet instar Præceptoris ducentis manum pueri ad efformandos malos characteres, quos interim prohiberet. Propterea diximus in loco, Prædeterminationem non esse de mente D. Tho. sed à Bannez inventam, ad quam expungendam Molina noster ostendit libertatem creaturæ salvari non posse citra præsidium scientiæ mediæ.

Confirm 2. Ex Regula summulistica, quam examinavimus in de Gratia ex Mauro qu. 81. de Deo, & Cattan. in metaphysica: ex necessario non sequitur nisi necessarium, ergo ex præcepto mortis, quod est necessarium Christo, & essentialiter connectitur cum actu obedientiæ, non potest sequi, nisi actus necessarius obedientiæ. Et sensus huius Regulæ est, quòd si A est antecedens necessario connexus, cum B, implicat, quòd A sit necessarium, & B, sit contingens; v gr. quia homo est necessario connexus cum animali, implicat, quòd Petrus sit homo necessario, & quòd sit animal contingenter, si enim posset non esse animal, & necessario esset homo, sequeretur, quòd homo non connecteretur necessario cum animali; atqui unio hypostatica, & præceptum trahunt necessario observantiam præcepti, seu actum obedientiæ, ergo cum complexum unionis, & præcepti sit necessarium voluntati Christi (quatenus non datur illi dependenter à
sua

sua voluntate) sequitur, quòd actus obedientiae sit pariter necessarius.

V. Ex dictis sequitur: Neque subsistere viam Scotistarum dicentium apud Arriagam, Christum fuisse liberum ad non moriendum, quia praeceptum mortis erat extrinsecum voluntati Christi; Nam tam laedit libertatem, quod est extrinsecum potentiae, quàm quod est intrinsecum, si sit antecedens intompossibile, & inimpedibile; sicuti tam compedes, quàm carcer tollunt libertatem ad egrediendum, tam visio beata, quàm Decretum Dei extrinsecum de non concurrente ad odium, evertunt libertatem ad Deum odio habendum. Præterquam quòd, quamvis praeceptum mortis sit extrinsecum voluntati Christi, cognitio tamen praecepti est intrinseca, atque addè si minus praeceptum, cognitio saltem praecepti libertatem evertit.

ARTICULUS II.

Rejicitur via Recurrentium cum Suario ad Principium proximum indifferens.

VI. **A**ppingitur Suar. d. 37. de Incar. hæc via conciliandi libertatem Christi cum impeccabilitate, per hoc, quòd Christus spectato principio proximo nempe voluntate, & auxilio indifferenti poterat omittere actum praeceptum, quamvis spectato principio remoto, seu unionem exigente semper auxilia prævisa per scientiam mediam efficacia, erat inconjungibilis cum peccato, & sic impeccabilis. Immeritò tamen hæc sententia adscribitur Suar. ut ostendit P. Thyrsus Gonzalez. Ille enim potius loquitur de unionem hypostatica, consequente scientiam mediam, & impedibili à voluntate Christi; sicut est prædefinitio consequens, non verò de unionem inimpedibili, quæ cohærere cum libertate non potest, juxta doctrinam ejusdem Suarii l. 5. de Aux. c. 54. n. 12. & c. 23. n. 8. ubi assumit hoc principium in schola Soc. familiare: *Impossibile est, me habere in mea potestate effectum, nisi habeam in mea potestate, quidquid est necessarium, ut effectus fiat.* Ex quo sequitur Christum non habere in sua potestate omissionem actus praecepti, seu peccatum, cum non habeat in sua potestate carentiam unionis, vel praecepti, quæ est necessaria, ut talis omisio ponatur.

Nonnulli tamen putant, quòd Suar. doctior factus retractaverit in lib. de Auxil. quæ docuerat in tertia parte : sed quidquid sit de mente Eximii Doctoris.

VII. Dico inhærendo doctrinæ Societatis positâ unionem hypostaticâ exigente infrufragiliter auxilia efficacia, atq; adeò impossibile cum omissione actûs præcepti, salvari non potest libertas Christi ad mortem non acceptandam per hoc, quòd principium proximum, seu voluntas Christi, & auxilium cum cognitione Dei ænigmatica de se fuerit indifferens ad mortem acceptandam, vel secus. Conclusio constat ex iis, quæ diximus in de Gratia, contra prædefinitionem antecedentem.

Prob. Breviter ex eadem maxima Articuli superioris. *Omne antecedens impossibile cum omissione actûs, & inimpedibile evertit libertatem*, seu potentiam expeditam ad utramque partem, tamquam impedimentum rigorosum : sed unio hypostatica est huiusmodi, ergo evertit libertatem in actu obedientiæ.

Resp. Adversarii, eam Maximam esse veram, si antecedens impossibile, & inimpedibile se teneat ex parte principii *proximi*, ut sunt compedes, visio beata, prædeterminatio physica, non verò ex parte principii *remoti*, ut est unio hypostatica, & prædefinitio antecedens scientiam mediam, quæ non sunt requisita ad actum.

Sed contra est, quia, ut diximus in de Gratia, si ea Maxima non esset universaliter vera in schola Societatis, non possemus eam nos uti ad impugnandam prædeterminationem Bañezianam, quia pariter Prædeterminatores possent illam distinguere, dicendo esse veram, si Antecedens illud impossibile, & inimpedibile se teneat ex parte actûs primi proximi spectantis ad causas secundas, non verò spectantis ad causam primam, & se habeat tamquam instrumentum Dei applicantis causas secundas ad operandum; seu, ut loquuntur Thomistæ, si illud antecedens determinet ad actum per modum naturæ, ut est visio beata, non verò si determinet per modum libertatis, relinquendo iudicium indifferens, ut est prædeterminatio. Quare vel ea Maxima debet esse inconcussa, vel obtunditur præcipuum telum Societatis adversus Prædeterminationem, quam dicimus obstare libertati, & hoc ideo, quia quamvis relinquat iudicium indifferens indifferentiâ negativâ, quatenus de se est compossibile cum utraque parte, non relinquit tamen indifferens indifferentiâ

tiâ positivâ, hoc est exclusivâ omnis impedimenti, ut
mox clariùs explicabitur.

Confirm. Quia sicut positâ prædeterminatione ad
consensum, neque potest poni dissensus in sensu com-
posito, neque in sensu diviso, & ideo tollitur libertas,
itâ posita unione hypostatica inimpedibili, neque posset
Christus omittere acceptationem mortis præceptæ, &
peccare in sensu composito, hoc est componendo unio-
nem, & peccatum, cum supponantur impossibilia,
neque in sensu diviso, cum non posset se dividere ab u-
nionem, quæ supponitur inimpedibilis, ergo corrumpit li-
bertas. Et ratio à priori est quia omnis necessitas ante-
cedens ex Aug. & Ansel. est everfiva libertatis; Illa
autem ex iisdem Doctoribus dicitur Necessitas antece-
dens, quæ facit rem esse, illa verò dicitur necessitas
consequens, quam facit ipsa res; v gr. visio beata dicitur
necessitas antecedens ad amorem Dei, quia efficit
quòd ponatur talis actus, contra verò præscientia pec-
cati, vel revelatio ferunt necessitatem peccati consequen-
tem, quia ipsa existentia peccati est in causa, cur præ-
cognoscatur, & possit revelari, in casu nostro sicut præ-
determinatio efficit quòd ponatur consensus creaturæ;
itâ unio hypostatica est in causa quòd ponatur in
Christo actus obedientiæ, ergo in utroque casu habetur
necessitas antecedens everfiva libertatis.

Confirm. 2. ex Lugo, quia non potest intelligi quòd
Deus offerat concursum paratum ad peccatum Christo
domino; quem videt ratione unionis impeccabilem;
Sicut intelligi non potest, quòd offerat concursum pa-
ratum ad peccatum Beato, aut dormienti, qui peccare
non possunt, atqui sine concursu simultaneo parato ad
utramque partem, non habetur principium proximum
indifferens indifferentia tum negativa, tum positiva,
pro ut requiritur ad libertatem, ergo cum unione hy-
postatica nequit Conciliari libertas ad mortem præ-
ceptam non acceptandam ratione principii proximi in-
differentis, quippe quòd indifferentiam solum negati-
vam habere potest, non positivam, seu exclusivam cu-
juscumque impedimenti. Unde fit, quòd unio hypo-
statica essentialiter conjungatur cum auxiliis efficacibus,
non quidem seligendis post scientiam mediam, sed quia
quodcumque auxilium conferatur Christo, (etiam si

cæco modo conferretur) necessario est efficax ratione suæ impeccabilitatis.

VIII. Dicunt. Adversarii, voluntatem Christi sub præcepto Mortis posse mortem non acceptare, spectato principio proximo, quamvis non possit spectato remoto, seu uniome hypostaticâ inductivâ principii proximi indifferentis, & hoc tamen sufficere ad libertatem quia ex D. Tho. 1. p. q. 18. a. 8. necessitas, vel contingentia effectus unice desumitur à causa proxima, non à voluntate divina, quæ est causa remota, applicans causas proximas ad agendum; quare sicut ignis v. gr. dicitur effectus necessarius quando causatur à sole, quod est principium proximum determinatum ad unam partem, quamvis voluntas divina, quæ est principium remotum, sit causa indifferens ad ponendum, vel non ponendum ignem, ita è converso actus dicitur liber, si principium proximum sit indifferens, quamvis remotum sit determinatum ad unam partem.

Sed contra est, quia duplex indifferentia considerari debet in principio proximo, seu in causa immediata, videlicet indifferentia negativa, quatenus de se est possibilis cum utraque parte, & indifferentia positiva, quatenus excludit quodcunque impedimentum ad alteram partem. utraque indifferentia ad libertatem requiritur, idcirco enim potentia progressiva v. gr. non dicitur libera ad ambulandum sub compedibus, nec voluntas libera ad odio habendum Deum, si præter cognitionem ænigmaticam habeat etiam visionem beatam, quia carent indifferentiâ positivâ. In casu nostro voluntas Christi non haberet indifferentiam positivam, seu exclusivam impedimenti ad mortem non acceptandam; ergo non acceptaret liberè mortem præceptam, quamvis principium proximum haberet indifferentiam negativam. Verum quidem est, quod effectus sit necessarius, quando principium proximum est determinatum, quamvis remotum sit indifferens; at non è converso; Cum enim bonum sit ex integra causa, libertas tam destruitur à principio proximo, quàm à remoto determinato ad unam partem. Quare Angelicus solùm vult, quod necessitas effectus non sit desumenda à voluntate Divina impedibili, qualis est prædefinitio consequens, desumenda tamen est non solùm à principio proximo determinato ad unam partem, sed etiam à remoto,

to, putà à voluntate Divina si sit inimpedibilis, necnon à quacunque alia causa remota impossibili, & inimpedibili, ut est unio hypostatica, quæ licet non influat in actum, est tamen impedimentum ad omissionem actus præcepti.

Dicunt 2. Non esse impedimentum relatè ad voluntatem, quod est impossibile cum omissione actus. & inimpedibile, quia impedimentum est illud, quo sublato ponitur effectus, sicut, sublatâ distantia, ignis comburit passum; At sublatâ unione hypostaticâ impossibili cum non acceptance mortis, & inimpedibili, non proinde voluntas Christi acceptat mortem, ergo unio non est impedimentum.

Sed: contra est; Quia malè assignatur ab adversariis notio impedimenti, ut patet, tum in causis necessariis, tum in liberis; in causis quidem necessariis, quia si duo sint impedimenta, & alterum tollatur, non eatenus ponitur effectus, neque in liberis, Nam sublati compedibus, non eatenus ponitur ambulatio, idè enim causa dicitur libera, quia sublati omnibus impedimentis potest non agere: propterea diximus articulo superiori, Impedimentum esse, quodcunque impossibile inimpedibile, seu quodcunque est ratio sufficiens, ne effectus ponatur, insuperabilis ab Agente: Ut autem potentia dicatur libera, & proximè expedita, carere debet quolibet hujusmodi impedimento, atque adèd debet quodvis impossibile posse impedire vel directè, ut voluntas amans potest directè impedire suum amorem, & sic ponere odium, vel indirectè, ut Antichristus potest impedire indirectè præscientiam Dei de suo peccato, & sic bene operari; vel saltem debet supponere sublatum, quod est impossibile cum suo actu, ut potens liberè videre solem debet supponere sublatam negationem solis impossibilem cum tali visione; Cùm autem Christus Dominus nullatenus possit impedire unionem hypostaticam impossibilem cum omissione actus præcepti, Christus non est liber ad obediendum.

IX. Ex dictis sequitur 1. Quòd sicut unio hypostatica destruit libertatem ad obediendum, quia est impossibilis cum actu opposito, & inimpedibilis, ità prædefinitio consensus Petri, si per impossibile daretur ante scientiam mediam, everteret pariter libertatem talis consensus, quia etiam esset impossibilis cum

dis.

dissensu, & inimpedibilis; unde Deus prædefiniendo talen consensum, signatè vellet illum liberum, exercitè verò vellet necessarium.

Sequitur 2. Quòd si Deus in posteriori ad scientiam mediam prædefiniat consensum Petri, & conferat auxilium A prævisum efficax, eo animo, ut si esset inefficax, daretur aliud efficax. seligendum ex tota collectione auxiliorum, adhuc everteretur libertas sensus prædefiniti per hanc prædefinitionem consequentem, quia pariter hujusmodi animus, seu voluntas Dei, est antecedens incompossibile cum dissensu, & inimpedibile, & hujusmodi prædefinitio consequens esset æquivalenter prædefinitio antecedens scientiam mediam, ut diximus in de Gratia.

Sequitur 3. Destruí libertatem consensús etiam à Decreto, quod vocant disjunctivum, hoc est si Deus conferat Petro auxilium A efficax eo animo, ut si non prævideretur efficax, prædeterminaret Petrum ad consensum, aut tolleret aliter libertatem, puta causando dementiam, aut mortem Petri, aut non creando Petrum. Quare licet possit Deus ex speciali benevolentia velle mortem, aut dementiam Petro, quem prævidet peccaturum, eo animo, ut si esset bene operaturus, vita, & sanitas prorogaretur, juxta illud; *Raptus est, ne malitia mutaret intellectum ejus*: Non potest tamen Deus eidem Petro, quem prævidet bene operaturum, conferre illa libertate auxilium efficax eo animo, ut si prævideretur inefficax, mortem Petro acceleraret; Ratio est, quia hic animus destruit libertatem ad peccandum, unde in tali casu Petrus haberet ad actum bonum libertatem, solum quoad exercitium, non quoad specificationem, atque adèò ad actum præceptum solum haberet libertatem quoad circumstantias, non quoad substantiam.

Sequitur 4. Quòd confirmati in gratia solum haberent libertatem ad actum bonum quoad exercitium, non quoad specificationem; si Deus eo animo conferat illi auxilia prævisa efficacia, ut si præviderentur inefficacia, illa denegaret.

Sequitur 5. Quòd si Deus decernat compellere v. gr. Petrum ad iter Romanum, in hypothesi quòd nollset liberè ire Romam, in tali casu esset formaliter liber actus internus Petri volens ambulare, quia potest nolle ambulare; actus verò externus, seu ambulatio, esset solum de-

denominativè liber, denominatione desumpta ab actu interno libero imperante; absolutè tamen non est liber, quia antecedit illa Voluntas Dei impossibilis cum negatione motus, & inimpedibilis.

A R T I C U L U S III.

Rejicitur via P. Vasquii per libertatem ad mortis circumstantias.

X. **C**onciliat Vasq. Christi impeccabilitatem cum libertate in acceptance mortis præceptæ per hoc, quod poterat Christus liberè mori hoc, vel illo tempore, aut loco, ex hoc, vel illo motivo, hoc, vel illo genere mortis, quæ circumstantiæ mortis non supponuntur præceptæ, quamvis non esset liber quoad substantiam mortis, utpote præceptam.

Dico equidem cum communiori, minùs apte conciliari hac viâ Christi impeccabilitatem cum libertate requisita ad meritum obedientiæ in acceptance mortis.

Prob. Salvari debet, quomodo Christus meruerit in acceptance mortis quoad substantiam, sed hoc non salvaretur, si solùm esset liber quoad circumstantias, ergo non sufficit quod fuerit liber quoad circumstantias mortis. *Prob. maj.* quia ex Apost. *Factus est obediens usque ad mortem*: Jo. 10. *Ego pono animam meam à me ipso*: Isa. 53. *Oblatus est, quia ipse voluit*; ubi non dicitur oblatum hoc tempore, & loco, quia ipse voluit, ergo non habuit libertatem solùm quoad circumstantias, sed etiam quoad substantiam mortis: Quare sicut damnatus ad suspendium non diceretur liber ad moriendum, si solùm esset liber ad circumstantias mortis, puta ad moriendum hoc, vel illo modo, loco, tempore, aut ex hoc, vel illo motivo, ita Christus necessitatus ratione suæ impeccabilitatis ad acceptandam mortem præceptam, non diceretur liber ad moriendum, nec meruisset in acceptance mortis quoad substantiam, si solùm esset liber ad circumstantias, seu ad mortem acceptandam ex hoc, vel illo motivo.

Confirm. Si Christus non esset liber in acceptance mortis quoad substantiam, neque esset liber quoad circumstantias, atque adeò nullatenus meruisset in acceptance mortis, *prob. sequela*, quia tam mors, quam

cir-

circumstantiæ mortis fuerunt de facto eodem modo præceptæ; *Luc. 22.* dicitur: *Filius hominis secundum quod definitum est, vadit: Joan. 14.* Sicut mandatum dedit mihi Pater, sic facio. *Matth. 23.* Verumtamen non sicut ego volo, sed sicut tu; Ubi *ly sicut* denotat modum, & circumstantias. Idem *Jo. 13.* Sciens *IESUS* quia venit hora ejus, ut transeat ex hoc mundo ad Patrem, ubi Maldonatus notat, hoc intelligendum esse de Hora à Patre præstituta, ergo circumstantiæ mortis fuerunt eodem modo præceptæ, ac ipsa mortis substantia.

XI. Dicunt Adversarii, Indifferentiam quoad circumstantias mortis reddere Christi obedientiam meritoriam etiam quoad mortis substantiam, quia fuit indifferentia ad circumstantias redundans etiam ad substantiam actus, quod explicant multis exemplis: Primò enim Martyres quamvis ex intrinseca conditione naturæ sint determinati ad moriendum, dicuntur tamen simpliciter liberè, ac meritoriè mori, quia moriuntur hìc & nunc, cum possent diutiùs vivere, aut non mortali genere mortis violentæ. Secundò obligatio disjunctiva ad unum ex pluribus actibus pro libito eligendis benè cohæret cum libertate, ac merito in electione hujus actûs, sic nos, qui necessariò vel stamus, vel sedemus, vel genuflectimus ante altare, si liberè eligimus genuflexionem, meritoriè genuflectimus, etiam quoad substantiam genuflexionis. Tertiò quilibet actus Christi Domini, quo mortem præceptam accepit ex hoc, vel illo motivo, fuit plenissimè liber, cum potuerit mortem acceptare alio actu ex alio motivo, ergo quilibet actus Christi mortem acceptantis fuit plene meritorius etiam quoad substantiam.

Neque obstat quod objicit Lugo, videlicet, quòd operanti non tribuatur laudi, & merito id, quod facit, nisi quatenùs excedit id, ad quod antecedenter erat necessitatus: unde qui v. gr. necessitatur physicè ad dandum 10. pauperi cum sola libertate ad dandum citius, vel ad dandum manu sinistrâ potiùs, quàm dexterâ, non propterea dicitur liberè, & cum merito donasse decem. Nam hoc est verùm duntaxat, quando circumstantiæ in genere moris non reddunt actum æstimabiliorem, sicut non est æstimabilior donatio per hoc, quòd fiat manu dexterâ potiùs, quàm sinistrâ, nec quòd Christus elegerit crucifigi clavis albis, vel nigris, secùs verò quan-

quando in genere moris actus est æstimabilior, sicut est anticipatè donare, aut mori, vel donare, aut mori ex motivo virtutis præstantioris: Hinc quamvis nos physice necessitemur ad ægritudinem, vel paupertatem, si tamen eas patienter sustineamus, dicimur liberè, & meritoriè sustinere, per hoc quòd liberi sumus solum ad eas sustinendas ex motivo virtutis, hæc enim circumstantia redundat in substantiam actûs.

XII. Sed contra est; Quia universim Actus qua parte est necessarius, nullatenus dici potest liber, & meritorius, sic qui necessitatur ad Deum diligendum v. gr. si solum sit liber ad diligendum ex motivo v. gr. suæ bonitatis, aut suæ misericordiæ, vel potentiæ, non dicitur liberè amare, nec potest mereri præcisè quia amat, sed solum quia ex hoc motivo amat, sic non meremur sustinendo ægritudines, ad quas necessitatur, sed solum quia liberè sustinemus patienter, & ex motivo virtutis; ergo Christus Dominus necessitatus ad moriendum ex præcepto, non posset dici liberè, & meritoriè mortem acceptare, sed solum liberè, & meritoriè acceptaret ex hoc, vel illo motivo. Ubi adverte Aliud esse, quòd actus sit liber, aliud verò quòd objectum actûs sit liberum, sic qui liberè sustinet ægritudines à Deo immixtas, ponit actum omninò liberum quoad substantiam, quamvis objectum actûs non sit liberum, sed necessarium, unde habet meritum ratione actûs omninò liberi, non ratione ægritudinis, quod si actûs, quo acceptat ægritudines, esset necessarius, non mereretur per talem actum. In casu nostro, non solum erat Christo necessaria mors, sed etiam actus, quo mortem acceptaret; quia, ut notat Pallav., talis actus fuit illi præceptus, eò quòd fuerit præcepta mors, in quantum meritoria, atque adeò in quantum liberè acceptata, ergo non meruit acceptando mortem, & obediendo, sed solum quia acceptavit ex tali motivo, aut anticipatè; unde non salvatur illud Apostoli, *Factus obediens usque ad mortem, propter quod &c.*

XIII. Hinc patet ad rationes in contrarium. Ad 1. dico, Martyres esse liberos omninò ad actum, quo mortem violentam acceptant, & ideo liberè, ac meritoriè dicuntur mori, seu mortem acceptare: contra verò Christus, posito præcepto, non esset liber quoad substantiam, ad actum obedientiæ, quo mortem

tem acceptaret, unde non posset dici liberè, ac meritoriè mori, sed solum liberè sic, vel sic mori. Adde ex Valentia t. 3. d. 8. Ad Martyris Coronam non requiri libertatem morientis, sed sufficere non repugnantiam, ut patet in Innocentibus, unde qui in somnis occideretur in odium fidei, non privaretur laureola Martyris, si decederet in gratia. Ad 2. qui genuflectit, potest nullum actum internum liberum Deo obsequiosum exercere, & ideo meretur quoad substantiam actus, si velit in Dei obsequium genuflectere. Ad 3. etiam dato quod actus, quo Christus mortem acceptavit ex tali motivo fuerit liber, & quoad speciem, & quoad individuum; At non poterat Christus abstinere à quocunque actu obedientiæ, quo mortem acceptaret, ergo ille actus non poterat dici liber, & meritorius quoad substantiam, seu quatenus mortem acceptavit; sed solum quatenus hoc, vel illo actu acceptavit. Ad id quod additur diximus, posse ægros ab omni actu libero abstinere, atque adeò dum liberè ex motivo virtutis acceptant ægritudinem cæteroqui necessariam, talis circumstantia redundat in substantiam talis actus omninò liberi; at Christus Dominus non poterat abstinere ab aliquo actu, quo mortem acceptaret, eò quòd hic actus præciperetur, ergo acceptando mortem ex tali motivo, aut anticipatè, talis actus non erat liber, & meritorius quoad substantiam acceptandi mortem: Aliter, ut notat Lumb. posset dici libera Christo Domino Incarnatio, quia fuit illi libera circumstantia Incarnationis, videlicet vel in carne passibili, vel in impassibili, juxta illud Hebr. 12. *Proposito sibi gaudio sustinuit Crucem*, & antiqui PP., præcisè per hoc quòd solum meruerint anticipationem Incarnationis, deberent dici quòd substantiam Incarnationis meruerint, quod nemo dixerit.

XIV. Concludo, quòd Christus Dominus relatè ad præcepta naturalia, v. gr. amandi Deum, non mentien-
di &c., quæ præcipiebantur non quidem sub comminatione odii, & pœnæ præcepto presse dicto obligante in conscientia, sed præcepto inducente necessitatem ad tales actus, vera sit sententia Vasquii, quòd Christus erat liber tantum quoad circumstantias talium actuum, & relatè ad has tantum poterat mereri: At relatè ad mortem nec habuit præceptum rigorosum comminans odium, nec præceptum necessitans, quia ex Scripturis
con-

constat Christum liberè mortuum esse, & meruisse per actum obedientiæ acceptando mortem quoad substantiam.

ARTICULUS IV.

Refellitur Via Cardinalis de Lugo per libertatem ad petendam Dispensationem.

XV. Sicut Hurtado docuit conciliari Christi libertatem ad subeundam mortem præceptam, quia liberum erat illi non acceptare præceptum; ita Lugo *disp.* 26. Moncaus, & plurimi Recentiores docent, Conciliari hanc libertatem per hoc, quod liberum erat Christo petere dispensationem præcepti. Via tamen Hurtadi non habet multos Asseclas, quia ex Scripturis non colligitur eam libertatem fuisse in Christo Domino, & solum id asseritur, quia videtur congruum dignitati Christi Domini, non obligari, ipso nolente ad id, ad quod poterat non obligari. Via verò Lugonis nititur in Scripturis innuentibus, potuisse Christum se eximere ab obligatione præcepti, dicitur enim Joan. 10. *Nemo tollit animam meam à me, sed ego pono eam à me ipso, & potestatem habeo ponendi eam &c.* Et Matth. 26. *An putas quia non possum rogare Patrem meum, & exhibebit mihi plusquam 12. legiones Angelorum?*

Quòd hæc via salvet meritum obedientiæ, probant, tum quia ista nō petitio dispensationis libera & meritoria, facit unum moraliter cum actu obedientiæ necessario, qui consequitur, non secus, ac actio interna facit unum moraliter cum externa, atque adeò sicut actio externa quamvis formaliter sit necessaria, dicitur tamen libera, & meritoria denominativè; ita actus obedientiæ in Christo formaliter necessarius dicitur denominativè liber, & meritorius, tum etiam quia ad actum obedientiæ necessarium determinabat per modum efficacis imperii voluntas libera non petendi dispensationem; & idèd hæc voluntas erat æquivalenter, si minus formaliter obedientia meritoria in sua causa.

XVI. Sed hæc etiam via impugnatur. Primò. Quia, ut notat Arriag. *d.* 42. n. 27. Ex Scripturis potius constat, non fuisse liberum Christo Domino petere dispensationem, aut acceptare præceptum, sed hoc fuisse

impositum à Patre absolute , Aliter non dixisset Christus Dominus ; *Si possibile est transcat a me Calix iste*, sed dixisset : Quamvis possibile sit , quod hic Calix transcat à me, & præceptum mortis tollatur , fiat tamen Voluntas tua : Quis enim sciens dandam dispensationem , si petatur, dicit , *Si possibile est* ?

Secundò impugnatur ratione , quia salvandum est, quomodo formaliter , & non denominativè, & in causa per obedientiam Christus meruerit, juxta illud *Factus obediens &c. propter quod* : verba enim Scripturæ sumenda sunt in sensu proprio, & usitato , nisi quid obster , At juxta hanc sententiam, Christus non meruisset formaliter per actum obedientiæ , utpotè necessarium , sed per hoc quod noluerit petere dispensationem , ergo : Sic qui post projectionem breviarii non recitat horas , non dicitur formaliter peccare, omittendo horas, & qui Ebrius patrat homicidium , nullatenus peccat , dum homicidium committit.

Confirm. Qui vult ingredi Religionem , & vovet ejus ingressum, non dicitur propriè velle obedire , & vovere obedientiam , sed velle id , ad quod consequitur votum obedientiæ , ergo Christus nolens dispensationem præcepti, nec dicitur velle obedire, sed velle id, ad quod consequitur obedientia.

XVII. Neque dicas 1. quod actus , quo non vult petere dispensationem , sit affectus erga honestatem , quæ reperitur in exequenda re præcepta , & sic dici possit actus obedientiæ rigorosæ. Nam contra est , quia etiam Angelus suadens homini Castitatem , habet affectum erga Castitatem , nec tamen ille affectus dicitur esse propriè virtutis Castitatis , ergo in casu nostro neque habetur affectus , qui propriè sit virtutis obedientiæ : per hoc quod non petatur dispensatio præcepti ex amore exequendi præceptum , & obediendi , sicut nec dicitur propriè exercere actum obedientiæ , qui vult ut alter obediat, quamvis talis actus sit affectus erga virtutem obedientiæ. Quare ille dumtaxat propriè obedientiæ actum exercet qui præcepto obtemperat, non qui renuit petere à præcepto dispensationem.

Neque dicas 2. Cum Nonnullis apud Arriag. n. 30. quod Christus Dominus potuisset eodem indivisibili actu nolle petere dispensationem , & velle obedire , in quo casu haberetur libertas formalis, atque adeò meritu mper ipsum actum obedientiæ.

Nam

Nam contra est ; quia si actus obedientiae in Christo Domino supponat pro priori duntaxat praeceptum, non est actus liber, sed necessarius, ergo si idem realiter sit actus, quo nollit Christus petere dispensationem, & simul vellet obedire, quamvis videatur hic actus liber, quatenus libere poterat nolle dispensationem; Re tamen vera est actus necessarius, saltem quatenus vult obedire, & non praesupponit in priori dispensationem, sed praeceptum; Sicut qui in Patria eodem actu Deum amat necessario, & creaturas amat propter Deum libere, revera dicitur ponere actum necessarium, saltem qua parte Deum amat, & sub illa formalitate, sub qua Deum attingit; neque enim dici potest huiusmodi actus simpliciter liber, cum non sit liber usquequaque.

Confirm. Demum, quia juxta hanc viam C. de Lugo, conciliari non potest meritum Christi in obediendo praeceptis naturalibus, v. g. amandi Deum &c. utpote indispensabilibus, ergo haec via non subsistit, & ob easdem rationes nec subsistit via laudata Huradi.

ARTICULUS V.

Munitur Via conciliandi in praesenti Providentia meritum obedientiae cum impeccabilitate Christi.

XVIII. EX haecenus dictis constat primo multipliciter potuisse imponi praeceptum mortis. Et 1. quidem imponendo illud Humanitati assumptae specificativè acceptae sub comminatione odii, & poenae in hypothesi transgressionis. 2. Imponendo Christo Domino praeceptum minus rigorosum, nec comminativum odii, nec strictè poenale, sed instar legis poenalis, seu Consilii onerosi, à quo Christus nec obligaretur in conscientia, nec metaphysicè necessitaretur. 3. Imponendo Christo praeceptum necessitans metaphysicè, eo pacto, quo à praeceptis naturalibus necessitatur, & sicut aliquando beatis à Deo aliquid praecipitur dirigendo eorum voluntatem ad divinam voluntatem exequendam citra libertatem ad oppositum, ut praecipit v. gr. Gabrieli, quod legatione apud B. Virginem fungeretur.

Constat 2. de facto praeceptum mortis non fuisse necessitans metaphysicè; Cum ex Script. & SS. PP.

constet, Christum liberè mortuum esse, & oblatum, quia ipse voluit; si tamen supponeremus, præceptum mortis fuisse necessitans instar præceptorum naturalium, In tali casu, vel supponitur huiusmodi præceptum esse indispensabile, ut sunt præcepta naturalia, & tunc solum habere potuisset Christus libertatem, & meritum relatè ad circumstantias mortis non præceptas juxta viam Vasquii; Vel supponitur esse dispensabile, & tunc solum habere potuisset libertatem mediatam, relatè ad substantiam mortis, & meritum obedientiæ solum in causa, per hoc quòd non petierit dispensationem, juxta viam C. Lugo.

Quare Superest inquirendum: Num præceptum mortis de facto fuerit minùs rigorosum instar consilii impositum Christo; An verò fuerit rigorosum impositum Humanitati assumptæ specificativè acceptæ? & Quomodo in utraque via concilietur cum impeccabilitate meritum obedientiæ?

XIX. Dico 1. Manifestè conciliatur Christi impeccabilitas cum merito obedientiæ, dicendo præceptum mortis fuisse instar consilii onerosi. Conclusio constat ex dictis q. 2. & 3.

Prob. Juxta hanc viam Christus non acceptando mortem, solum omitteret actum obedientiæ, non tamen esset inobediens, nec peccaret, nec contraheret ullam imperfectionem moralem, aut positivam, aut negativam strictè dictam, ut ostendimus, ergo bene conciliatur hac viâ Christi impeccabilitas cum merito obedientiæ in acceptatione mortis.

XX. Dico 2. Conciliatur etiam impeccabilitas cum merito obedientiæ, etiamsi dicatur præceptum mortis fuisse rigorosum obligans in conscientia, & comminativum odii, & poenæ: impositum tamen humanitati assumptæ specificativè acceptæ, quæ divinitus est peccabilis in sensu diviso, saltem peccato impeditivo, si minùs destructivo unionis hypostaticæ. Conclusio constat ex dictis qu. 4. cum Arri. Hurt. P. Thyrso, ex Albert. M. Palud., Lorca &c.

Prob. Quamvis Christus sit impeccabilis etiam in sensu diviso, humanitas tamen assumpta specificativè accepta divinitus est peccabilis, saltem peccato impeditivo unionis, atque adeò capax fuit præcepti rigorosi de morte acceptanda in priori ad substantiam, ut ostendimus

mus qu. 4. ergo in priori ad subsistentiam, sicut poterat peccare, non acceptando mortem præceptam, & sic impedire suam assumptionem, ita poterat liberè obedire, & mereri in acceptatione mortis, ergo benè cohæret in hac via cum Christi impeccabilitate libertas humanitatis assumptæ specificativè acceptæ, & meritum in acceptatione mortis præceptæ.

XXI. Dico ult. In præsentī providentia concilianda est impeccabilitas Christi cum libertate, ac merito obedientiæ, juxta primam viam, negando præceptum mortis fuisse rigorosum, non verò juxta secundam, dicendo præceptum fuisse rigorosum, sed impositum Humanitati in priori ad subsistentiam. Ità Esparz., Maur., Hainoldus.

Probatur; Secunda hæc via admittens præceptum rigorosum postulat; quòd Deus miraculosè velit concurrere ad operationes humanitatis assumptæ in priori ad subsistentiam, cum autem non constet de hac miraculosa oblatione concursus divini, negandum quòd in præsentī providentia præceptum mortis fuerit rigorosum. Esto in alia providentia, juxta hanc viam salvaretur libertas obedientiæ.

Confirm. Ex Regula Augustini, & Sacrorum Interpretum, Verba Scripturæ potiùs explicanda sunt in sensu minùs proprio excludente miraculum, quàm in sensu proprio involvente miraculum, quoties de miraculo non constat, ergo, potiùs dicendū, præceptum mortis non fuisse rigorosum ad miraculum declinandum, quàm admittendum sit præceptum rigorosum involvens præternaturalem Dei concursum cum humanitate assumpta, in priori ad subsistentiam increatam; Cum non constet de tali miraculo.

XXII. *Objic.* 1. contra secundam Conclusionem: Si humanitas assumpta solum supponatur peccabilis peccato impeditivo, non verò destructivo unionis, solum potuisset mereri in primo instanti, in quo posset impedire unionem per omissionem actus præcepti, non verò in sequentibus instantibus; atqui Christus non solum meruit per observantiam præceptorum in primo instanti, sed etiam in toto vitæ decursu, ergo hæc via non subsistit.

Resp. 1. Ad Conclusionem sufficere, quòd juxta secundam viam salvetur in alia providentia impeccabi-

bilitas Christi, & præceptum mortis rigorosum cum merito obedientiæ, quidquid sit, An hoc meritum potuerit solum esse pro primo instanti 2. Jam diximus qu. 4. humanitatem assumptam specificativè acceptam peccare divinitus posse etiam peccato destructivo unionis; & sic salvari posset meritum obedientiæ pro toto vitæ decursu.

Resp. 3. Etiam dato quòd humanitas solum peccare posset peccato impeditivo, non destructivo unionis, adhuc salvaretur, quod posset non solum in primo instanti, sed etiam in reliquis vitæ instantibus mereri per observantiam præceptorum, dicendo, juxta subtilissimam viam Patris Thyrsi, quòd unio hypostatica essentialiter pendeat à scientia media, & præfinitione consequente, de perpetua observantia præceptorum (non secus ac locutio Prophetæ in quantum Prophetæ, essentialiter pendet à Deo ut loquente) ac proinde, si prævideretur humanitas specificativè accepta in aliquo instanti vitæ peccatura, etiam in primo instanti caruisset unione hypostaticâ. Ex quo sequitur quòd obtentâ semel unione pro primo instanti, necessariò deinceps obtemperabit præceptis, necessitate tamen consequente non everlivâ libertatis, non necessitate antecedente, sicut positâ præfinitione consequente, vel præscientiâ, aut revelatione actûs liberi futuri, talis actus erit necessariò futurus, necessitate tantum consequente, unde non necessarius.

Quod ut planius intelligatur, fingamus, Deum decernere, se non collaturum gratiam Petro pro primo instanti, quo ponit v. gr. contritionem præceptam, nisi prævideat illum in toto vitæ decursu obtemperaturum præceptis; in tali casu Petrus solum peccare posset peccato impeditivo gratiæ, omittendo contritionem præceptam pro primo instanti, non posset tamen peccare peccato destructivo gratiæ, & tamen liberè in toto vitæ decursu obtemperabit præceptis, poteritque ea transgredi, quamvis nunquam esset transgressurus, quia si esset transgressurus, gratia non fuisset collata pro primo instanti, itâ prorsus in casu nostro, juxta viam P. Thyrsi, quam non admittimus in præsentī providentia solum ad declinandum miraculum, quod requireretur, ut posset humanitas operari in priori ad subsistentiam.

XXIII. *Objic.* 2. Etiamſi juxta ſecundam viam ſalvetur in alia providentia Chriſti impeccabilitas, & libertas humanitatis ad tranſgrediendum præceptum mortis rigorofum, non ſalvatur tamen libertas requiſita ad meritum redemptionis, quod debet eſſe valoris infiniti, ergo hæc via non ſubſiſtit. *Prob. ſequela*, quia ut actus meritorius obedientiæ ad redemptionem requiſitus ſit valoris infiniti, prodire debet à Chriſto, non ab humanitate aſſumpta ſpecificativè accepta; quia ſolum meritum Chriſti eſt infinitum, ſed hoc non haberetur, ergo juxta hanc viam non ſalvatur libertas, quæ ſalvari debet.

Reſp. nego ſequelam: ad probationem ſupponimus hîc ex dictis in de merito cum Thomiſtis omnibus, Lugo d. 6. ſect. 3. Ovied. & aliis, quod poſſit ad meritum dignificare etiam forma, quæ eſt in poſteriori ad operationem meritoriam, ſicut contritio peccatoris dignificatur ad meritum condignum vitæ æternæ à gratia, quæ infunditur in poſteriori ad talem contritionem; unde diximus, primum gradum gloriæ poſſe cadere ſub meritum condignum. Quod ſi gratia collata in poſteriori ad actum contritionis poteſt illum dignificare ad merendum de condigno vitam æternam, à fortiori unio hypſtatica collata in poſteriori ad actum obedientiæ poterit illum dignificare infinite; ratio eſt, quia actus obedientiæ poſitus ab humanitate aſſumpta tribuitur Verbo ſuppoſitanti humanitatem pro eo inſtanti, eò quod operationes ſint ſuppoſitorum, contritio verò nullatenus tribuatur gratiæ.


XXIV. *Objic.* ultimò contra tertiam concluſionem. Si ſubſiſtit in præſenti providentia prima via negans præceptum mortis fuiſſe rigorofum, non eſt ratio, cur non ſubſiſtat etiam via C. Lugo dicentis, obedientiam Chriſti fuiſſe minùs rigorofam, & in cauſa, ergo vel utraque, vel neutra via ſubſiſtit.

Reſp. Nego antecedens 1. enim juxta noſtram viam ſolum præceptum eſt minùs rigorofum; at juxta viam Lugonis, nec eſt rigorofa obedientia, nec præceptum; quod non ponitur obligans in conſcientia, & moraliter, ſed neceſſitans metaphyſicè. Secundò non conſtat ex ſcripturis quod præceptum mortis eſſet diſpenſabile, ſed potiùs oppoſitum ex iis verbis Chriſti: *Pater ſi poſſibile eſt &c.* Tertiò magis eſt conſonum dignitati

Christi filii Dei naturalis, quod præceptum mortis esset instar consilii, quam quod esset rigorosum, & dispensabile.

DISPUTATIO III.

De causa Finali, & Meritoria Incarnationis.

uærendum 1. Num causa finalis, & motivum primum, ac adæquatum Incarnationis, fuerit Redemptio generis humani; adeò ut Adamo non peccante, ac cessante eo fine, Verbum non fuisset incarnatum; An verò fuerit ipsa Christi excellentia, & communicatio divinæ bonitatis perfectissimo modo, adeò ut etiam si nemo peccasset, adhuc Verbum incarnatum fuisset? Secundò An Deus præfinierit Incarnationem in remedium peccati in priori ad peccati prævisionem? Ubi quærendum, An Deus omnia unico, ac simplicissimo actu decernat, absque ulla signorum multiplicitate? Tertiò An Christus meruerit unionem hypostaticam? & quid sibi, ac nobis meruerit? ubi An, & quomodo meruerit gratiam SS. Patribus, qui ipsum præcesserunt, ac Deiparæ? Quartò An SS. PP. & Deipara mereri potuerint saltem de congruo Incarnationem? Denique in obsequium Magnæ Matris ostendemus, non solum de congruo, sed etiam de condigno Beatam Virginem meruisse divinam maternitatem.

Q U Æ S T I O I.

Utrum Adamo non peccante, Verbum fuisset incarnatum.

I. **D**uplex quæst. hic agitur; prima An ex vi præsentis Decreti colligatur, quòd, Adamo non peccante, adhuc futura fuisset Incarnatio? Secunda An saltem ex vi alterius Decreti? Thomistæ, Vasqu., Amic. utrumque negant, putantes Christum unice venisse ad nos redimendos, atque adeò, cessante culpâ, Christum non fuisse venturum contra verò Scotistæ docent, Redemptionem non fuisse unicum, & adæquatum

In.

Incarnationis motivum, sed etiam ipsam Christi excellentiam, & exaltationem naturæ humanæ, atque adeò, Adamo non peccante, Verbum incarnandum fuisse ad habendam in Christo summam complacentiam, & ad exaltandam Naturam humanam innocentem. Suar. verò docet, motivum Incarnationis esse Manifestationem divinæ gloriæ perfectissimo modo, & quia ad hanc conducit, quòd ex suppositione peccati Christus satisfaciat pro peccatoribus, non supposito verò peccato, Christus exaltet naturam humanam innocentem; idcirco Adamo peccante, Verbum incarnatum fuit in Carne passibili ad satisfaciendum, Adamo verò non peccante, Verbum incarnatum fuisset in Carne impassibili ad exaltandam naturam humanam innocentem: sicuti enim si Rex veller suas divitias erogare perfectissimo modo, & supponatur, quòd erogentur perfectissimo modo, si pauperibus distribuantur. & pauperibus absentibus, si construantur templa, in tali casu, non existentibus pauperibus Rex erogaturus esset opes suas ad templorum constructionem: ita Deus volens suam bonitatem ostendere perfectissimo modo, quia perfectissimo modo ea ostenditur, veniendo in carne passibili ad reparandum hominem lapsum, si peccaverit. & deficiente culpâ, veniendo in carne impassibili ad exaltandam naturam innocentem. idcirco Adamo non peccante, & deficiente culpâ, adhuc Verbum incarnatum fuisset in carne impassibili ad ostendendam perfectissimo modo bonitatem suam.

II. Dico 1. Ex vi præsentis Decreti. Adamo non peccante, Verbum fuisset incarnatum, atque adeò motivum Incarnationis non fuit sola Redemptio, sed etiam, & principalius ipsa Christi excellentia, ac humanæ naturæ exaltatio. Ità Scotistæ, Suar. Martinon. & Alii contra Thomistas. Angelicus verò *qu. 1. a. 3.* sententiam nostram censet probabilem, quamvis probabiliorem putet oppositam.

Prob. cum Alensi ex Necessitate Dei ad optimum sic: Quoties ex Scripturis non constat Redemptionem fuisse unicum Incarnationis motivum, dicendum ex vi præsentis Decreti etiam Adamo non peccante, Verbum incarnandum fuisse, ad ponendum optimum, nempe unionem hypostaticam, & Christi glorificationem, & ad manifestationem suæ bonitatis perfectissimo modo, cum supponamus dari in Deo moralem necessitatem ad opti-

num ponendum; atqui ex Scripturis non solum non constat, motivum Incarnationis fuisse solam redemptionem, sed potius constat oppositum, videlicet fuisse summam communicationem divinæ bonitatis, ipsam Christi excellentiam, & exaltationem naturæ humanæ; ergo, Adamo non peccante, ex vi præsentis Decreti. Verbum fuisset incarnatum. *Maj. patet*, omnino enim imprudentissimè negatur, quòd Deus positurus esset optimum, ad quod inclinatur, atque adeò ad ponendam Incarnationem, Adamo non peccante, nisi constet ex revelatis, quòd Deus nolisset illam ponere, & quòd unice posuerit ob redemptionem. *min. prob.* Nam Jo. 5. dicitur: *Sic Deus dilexit mundum, ut Filium suum unigenitum daret*, ubi pro motivo Incarnationis assignatur dilectio erga homines, & communicatio suæ bonitatis. 1. Cor. 2. dicitur Christus prædestinatus in gloriam nostram; & c. 1. dicitur: *Factus nobis à Deo Sapientia, Justitia, & Satisfactio*, quæ duæ primæ rationes sunt independentes à peccato. Luc. 12. Christus Dominus dixit, se venisse, *ut ignem mitteret in terram* Jo. 10. *Ut vitam homines habeant, & abundantius habeant*; & cap. 17. *Ut testimonium perhibeat veritati*; quæ omnia motiva sunt independentia à peccato.

Confirm. 1. Quia Deus, si minus necessitatur ad optimum, saltem ex omnium sensu de facto fecit optimum tum formaliter, tum materialiter, ut ostendimus, cum de necessitate Dei ad optimum; ergo de facto Deus decrevit Incarnationem ponendam optimo modo possibili; atqui perfectissimus modus ponendi Incarnationem est, quòd Adamo peccante veniat Verbum in carne passibili ad præstandam condignam satisfactionem pro peccato; Adamo verò non peccante, veniat in carne impassibili ex motivo excellentiæ ipsius Christi, & ad exaltandam naturam humanam, & ultimè ad ostensionem suæ bonitatis, ut ratiocinatur Suar. ergo de facto sic fuit decreta Incarnatio, atque adeò non fuit unicum motivum præsentis decreti sola redemptio. Minor patet, nam, si Adamo non peccante, Verbum non venisset, non ostendisset bonitatem suam perfectissimo modo, quo poterat; sicuti si conderet hominem in pura natura, & non elevasset illum ad gloriam, non communicasset se nobis perfectissimo modo.

Confirm. 2. Excellentia hujus mysterii postulat, ut
factum

factum sit propter finem Excellentissimum ; sed excellentissimus finis , ad quem potest ordinari Incarnatio, non est sola Redemptio, sed est ipsa ostensio divinæ bonitatis perfectissimo modo, quod fert Verbi Adventum etiam cessante motivo Redemptionis, ergo de facto propter hunc finem excellentissimum posita fuit Incarnatio. Major patet, quia Deus ordinatissimè procedit, & consequenter effectus excellentissimos ordinat ad fines præstantissimos juxta eorum exigentiam. Minor etiam patet, quia finis præstantior ultimus exco- gitari non potest, quàm ostensio divinæ bonitatis per- fectissimo modo, & idcirco Joan. 5. dicitur : *Sic Deus dilexit mundum*, &c. ad significandum primarium In- carnationis finem fuisse ostensionem divinæ bonitatis, & dilectionem suam erga homines, quæ maximè osten- ditur per maximam sui communicationem factam in In- carnatione.

Confir. 3. ex Suar. & Martinon. Potest idem actus vo- luntatis etiam naturaliter in ordine ad eundem effectum ponendum procedere ex duplici motivo totali sufficien- ti ; v. gr. potest quis perere Romam, & ad invisendum a- micum, & ad lucrandas indulgentias, adeò ut alterutro motivo cessante, adhuc peteret Romam, propter alterum motivum ; ergo potuit Deus velle Incarnationem propter hoc duplex motivum totale, & adæquatum, videli- cet & propter remedium peccati, & propter ostensionem suæ bonitatis, & dilectionis erga homines ; ergo cum de facto utrumque motivum assignetur in Scripturis, & hic secundus finis sit excellentissimus, & maximè consonus excellentiæ mysterii, dicendum, utrumque motivum fuisse primarium, & totale, atque adeò circumscripto peccato, adhuc Deus ex vi præsentis Decreti incarnatus fuisset propter secundum motivum.

III. Dico 2. Etiam si Deus ex vi præsentis Decreti, quod ex Scripturis innotescit, non fuisset incarnatus præciso peccato, adhuc dicendum, quòd incarnatus fuisset ex vi alterius Decreti, quod in ea hypothesi haberetur. Con- clusio est contra Suar. d. 5. sect. 5. descendit tamen ex mo- rali necessitate Dei ad optimum, quam propugnativimus disp. 1. qu. 2.

Prob. Quamvis Deus de facto decrevisset assumere car- nem præcisè ob remediū peccati, nec habuisset aliud mo- tivum parziale, aut totale præter Redemptionem, adhuc
tamen

tamen præsumendum, quòd, cessante eo unico fine, decreturus fuisset Incarnationem ob alium finem præstantissimum, vid. ad ostensionem suæ bonitatis, & dilectionis, & ob ipsam Christi excellentiam, in qua si bene complaceret; ergo, Adamo non peccante, saltem ex vi alterius Decreti, Verbum incarnatum fuisset. *Antecedens prob.* Quia præsumendum est de Deo moraliter ad optimum necessitato, quòd ponat optimum, & quòd ponat optimo modo, videlicet ob finem optimum, atqui in hypothesis, quòd Adam non peccasset, finis optimus Incarnationis optimæ esset ostensio divinæ bonitatis, & dilectionis, ac Christi excellentia, ergo præsumendum est, quòd, Adamo non peccante, Deus incarnatus fuisset vi alterius Decreti ob hunc alium finem excellentissimum consonum excellentiæ mysterii.

Confirm. Quia Theologi communiter cum D. Thoma docent, Incarnationem fuisse Deo convenientem, per hoc præcisè, quòd per illam maximè Divina bonitas nobis comunicetur, sed hoc motivum, cessante peccato, adhuc perseverat; ergo adhuc præciso peccato conveniens fuit Deo Incarnatio, atque adeò præsumendum est, quòd etiam in ea hypothesis incarnatus fuisset saltem ex vi alterius Decreti. Adde, quòd omnes aliæ convenientiæ Incarnationis à D. Th. assignatæ sunt independentes à peccato, videlicet ad roborandam fidem, spem, charitatem; ad Instructionem, ad exemplum, ad humilitatem, &c.

Confirm. Demum efficaciter, quia Christus est finis omnium creaturarum, ergo fuit intentus, & decretus principaliter propter se ipsum ante omnem Creaturam, atque adeò ante Adamum, ejusque peccatum, adeò ut omnia propter ipsum sint condita, & peccatum propter ejus gloriam permissum sit, ergo præciso peccato, adhuc Christus condi debuit, saltem ex vi alterius decreti, propter ejus gloriam, utpote principaliter intentam. Consequentia sequitur, antecedens probatur ex Apost. Coloss. 1. ubi dicitur Christus *Primogenitus omnis Creaturæ, quoniam in ipso condita sunt universa in Cælis, & in terra, omnia per ipsum, & in ipso creata sunt, & ipse est ante omnes, & omnia in ipso constant.* Quæ verba, ut notant Hieron. Aug. Chrysost. Naz. & Concilia Ephelinum, & Sardicense, intelligenda sunt de Christo ut homine non ut Deo. Nam ut loquitur utrumque Concilium, Christus in quantum Deus

Deus non est Primogenitus, sed Unigenitus; ergo Christus ut homo dicit prioritatem ante omnem Creaturam, atqui non aliam, nisi in genere causæ finalis, ergo Christus est finis omnium Creaturarum. *Prob. hæc minor:* Non enim habet prioritatem in genere causæ efficientis, cum Christus non potuerit causare Creaturas ante se conditas; neque in genere causæ formalis, aut materialis, ut patet, neque habuit prioritatem secundum durationem, cum conditus fuerit post plurimas Creaturas, ergo prioritatem ad omnem Creaturam habet in genere causæ finalis.

Neque dicas cum Vasq. Christum habere relatè ad omnes Creaturas solum Primitatem excellentiæ; non verò in genere causæ finalis. Nam, ut omnes Scripturales docent: *Tò in ipso condita sunt uniuersa*, importat genus causalitatis, ergo cum non importet causalitatem in genere causæ efficientis, formalis, & materialis, importat causalitatem in genere causæ finalis, & non meram primitatem excellentiæ, quæ stat finè ulla causalitate. Antecedens constat ex consueto modo loquendi Scripturarum; sic *Osee 5.* dicitur: *Israel, & Ephrem corruent in iniquitate sua*; id est propter iniquitatem suam; & infra: *In gregibus suis, & in armentis vadent ad quarendum Dominum*, id est per sacrificia gregum, & armentorum. Et *cap. 12.* *Servivit Israel in uxorem*, hoc est propter uxorem. *Gen. 19.* in Hebræo habetur; *Non delebo in decem uniuersam urbem*, quod vulgata vertit, *propter decem*. Denique Sacrorum Bibliorum Oedipodes verba Apostoli ad Coloss. 1. *Omnia in ipso creata sunt*, interpretantur propter ipsum, hoc est propter Christum; & illud *Ephes. 1.* *Elegit nos in ipso ante Mundi constitutionem, ut essemus Sancti*, interpretantur, propter ipsum, tamquam propter finem,

IV. *Objic. 1.* contra primam Conclusionem. Passim in Scripturis dicitur motivum Incarnationis fuisse Redemptionem; ergo ex vi præsentis Decreti, Adamo non peccante, Christus non venisset. *Antec prob.* ad Gal. 4. dicitur: *Christus venit in Mundum peccatores salvos facere*. Luc. 19. *Misit Deus Filium suum factum sub lege, ut eos, qui sub lege erant, redimeret*. Item: *Venit Filius hominis quarere, & saluum facere, quod perierat*. Et in Symbolo Fidei: *Propter nostram salutem descendit de cælis*.

Confirm. Quia sæpè SS. PP. disertis verbis docent, Christum non fuisse venturum, præciso peccato: Aug.

tr. 49. in Jo. *Si peccatores Deus non amaret, de Cælo ad terram non descenderet* : & in c. 1. Matth. *Si homo non peccasset, Virgo non peperisset* ; idem docent Athan. Ser. 3. contra Arium. Naz. &c. quibus accedit Hymn. Ecclesiæ ad B. Virginem. *Peccatores non abhorres ; sine quibus nunquam fores tanto dignæ filio*. Et illud Ecclesiæ : *O necessarium Ada peccatum, quod Christi morte deletum est!*

Resp. Quamvis Redemptio fuerit motivum & sufficiens, & adæquatum Incarnationis, non per hoc fuit præcisum, & unicum, vel primarium, cum etiam in Scripturis assignentur alia motiva de se magis proportionata ad Incarnationem inducendam, ut ostendimus. Verum quidem est, quod sæpius à Scripturis, & PP. adducatur pro motivo Incarnationis Redemptio, hoc tamen ideo fit, tum quia Incarnatio in carne passibili unice propter peccatum, atque aded propter Redemptionem fuit posita (præciso enim peccato Christus venisset in Mundum gloriosus, & impassibilis.) Tum etiam, ut gravitatem peccati nobis inculcent, & majorem gratitudinem excitent, cum majus beneficium sit, Christum venisse ut Redemptorem simul, & glorificatorem, quam ut pure glorificatorem.

Ad Confirm. Sæpissimè etiam SS. PP. apud Suar. d. 5. sect. 5. docent, quod etiam præciso peccato Verbum fuisset incarnandum : *Ad delicias charitatis cum hominibus habendas* : ut loquitur Rupert. itèmq. Aug. & alii. Adde, D. Anselmum l. 1. *Cur Deus homo*, cap. 18. probare, homines futuros fuisse Beatos, etiam si Angeli non peccassent, quia alioqui prædestinatio hominum penderet à peccato Angelorum, quod est absonum ; atqui magis absonum est, quod existentia, & gloria Christi Domini pendeat à peccato Adami ; ergo à fortiori ex D. Anselmo Christus futurus fuisset in Cælo gloriosus, etiam non peccante Adamo. Quare authoritates adductæ explicandæ sunt, quod Verbum, præciso peccato, non fuisset incarnatum in carne passibili, quia deesset motivum exhibendi condignam satisfactionem.

Neque replicas, falsam esse propositionem hanc : *Petrus non venit ex Hispania, per hoc, quod non venerit v.g. Rhedâ, cum potuisset venire Navi, ergo falsæ essent propositiones SS. PP. quod Verbum non fuisset Incarnatum, per hoc, quod non fuisset Incarnatum in carne passibili, aliter posset dici, quod, Adamo peccante, Christus*

stus de facto non venerit, intelligendo, quòd non venerit in carne impassibili. Nam contra est, quia quamvis homo absolute dictus secundum se præscindat à passibili, & impassibili; at in communi acceptione sumitur pro homine passibili, & præsertim dum sermo est de Christo Domino, qui in Veteri Testamento semper præfiguratus est, & promissus passibilis, & mortalis, & in novo Testamento dicitur, semetipsum exinanisse. Hinc non potest dici, quòd, Adamo peccante, Christus de facto non venerit, eò, quòd non venerit impassibilis: Ratio est, quia in communi acceptione homo non sumitur pro homine impassibili, & ideo propositio est falsa; Contra verò, quia in communi acceptione præsertim in Scripturis loquentibus de Christo, homo sumitur pro homine passibili, & mortali, ideo vera est hæc propositio, quòd, Adamo non peccante, Christus non venisset, videlicet in carne passibili, sed in impassibili, & indutus immortalitate.

V. *Objic. 2.* Ex vi præsentis Decreti Christus venit in carne passibili propter peccatum, ergo, sublato peccato, Christus non venisset passibilis, ergo non haberetur præsens Decretum, quòd respicit Christum ut passibilem, ergo, Adamo non peccante, ad summum Verbum incarnatum fuisset vi alterius Decreti respicientis Christum impassibilem, non vi præsentis respicientis passibilem.

Confirm. Vel Incarnatio de facto decreta fuit in carne passibili, vel in impassibili, vel demum præscindendo ab utraque circumstantia, ita tamen, ut si Adam peccasset sub auxilio A. incarnatio fuisset in carne passibili, secus in impassibili; sed nihil horum dici potest; ergo. *Prob. min.* Si enim dicatur, quòd de facto decreta fuit absolute in carne passibili, ergo, sublato peccato, non daretur hoc Decretum, quia tunc non venisset in carne passibili, atque adeò Verbum non fuisset incarnatum vi præsentis, sed vi alterius Decreti. Secundum dici non potest, ut patet; Neque potest dici tertium, quia istæ præcisiones dedecent actus divinos tam in intellectu, quam in voluntate, quippe quæ indicant imperfectionem in potentia, præsertim quia Decretum præscindens à carne passibili, vel impassibili requireret secundum Decretum, quod determinaret has circumstantias, unde in Deo deberet dari pluralitas Decretorum.

Resp.

Resp. Incarnationem de facto decretam fuisse in carne passibili, sed intendendo principaliter, juxta ratiocinationem Suarii, ostensionem Divinæ bonitatis perfectissimo modo, in quo Decreto virtualiter continetur Decretum de Incarnatione in carne impassibili, si Adam non peccasset, quia tunc hoc pacto ostenderetur Divina bonitas perfectissimo modo, unde ex vi præsentis Decreti, ut virtualiter continentis aliud, Adamo non peccante, Verbum Incarnatum fuisset in carne impassibili. Decretum enim præsens est hujusmodi: Volo ostendere bonitatem, & dilectionem meam erga Mundum perfectissimo modo; & quia conferendo auxilium A. Adæ, video sequi peccatum, ideo absolute decerno Incarnationem in carne passibili, si tamen peccatum non viderem, incarnarer in carne impassibili; Sicut Rex volens distribuere divitias suas perfectissimo modo, quia videt pauperes, decernit eas dare pauperibus, eo tamen animo, ut si deessent pauperes, eas distribueret in templorum ædificationem; Quare *negò secundam Consequentiam*. Idem enim est Decretum, quod absolute respicit nunc Christum ut passibilem, & quod conditionatè respicit Christum ut impassibilem, si Adam non peccasset; licet idem est Decretum Divinum, quod respicit absolute damnationem Judæ, & conditionatè respicit ejus salvationem, si sub auxilio A collato noluisse peccare.

Ad Confirm. Dico, optimè stare unicitatem Decreti Divini, quin Decretum præsens præscindat à carne passibili, sed simul decernat virtualiter, & conditionatè Incarnationem in carne impassibili, si Adam non peccasset, modo explicato.

Instabis: Deus absolute voluit permittere peccatum Adæ, ut magis Divina bonitas ostendatur; ergo gratis dicitur in eo Decreto virtualiter, & conditionatè contineri Decretum de Incarnatione in carne impassibili, Adamo non peccante; sicuti gratis dicitur, quod in Decreto absoluto de creando Petro, virtualiter contineatur Decretum hoc conditionatum, si non creassem Petrum, creassem Paulum.

Resp. Quamvis Deus possit corda hominum obdurare, atque adeò peccatum permittere, non potest tamen conferre auxilium inefficax, ut inefficax, citra amorem peccati, ut diximus in de Gratia. Quare dum post scientiam mediam decrevit permittere peccatum Adæ; conferendo

ferendo auxilium prævisum inefficax, debuit eo animo conferre auxilium A, ut etiam illud esset collaturus animo libentiori, si esset prævisum efficax; Hinc pariter eo animo decrevit Incarnationem in carne passibili, posito peccato Adæ, ut præciso peccato non esset illam decreturus in carne passibili, quia tamen debuit perfectissimo modo Incarnationem decernere, & sic ad finem præstantissimum ordinare, idcirco decrevit illam primario ad ostensionem Divinæ bonitatis perfectissimo modo, ita ut in Decreto præsentis de Incarnatione in carne passibili virtualiter includeretur Decretum conditionatum de Incarnatione in carne impassibili: contra verò in Decreto de creando Petro non debet virtualiter includi Decretum conditionatum de condendo Paulo, si non conderetur Petrus; cum ea disparatè se habeant.

VI. *Obje. 3.* Si Verbum Incarnatum fuisset ex vi præsentis Decreti præciso peccato, quia primarius finis Incarnationis est ostensio Divinæ bonitatis, & excellentia Christi, sequeretur, quòd etiam orbe non condito. Verbum Incarnatum fuisset, quia etiam persisteret hic primarius finis Incarnationis, sequela non admittitur, ergo.

Confirm. Quia si primarius finis Incarnationis esset ostensio Divinæ bonitatis perfectissimo modo, sequeretur, quòd etiam, Adamo non peccante, Christus venisset in carne passibili, non quidem ad reparandum genus humanum, sed ad offerendum Deo sacrificium crucentum Crucis perfectissimum, quod neque admittitur.

Resp. Nego sequelam: Finis enim primarius Incarnationis est ostensio bonitatis Divinæ, & excellentia Christi perfectissimo modo posita; atqui, orbe non condito, non fuisset positus Christus perfectissimo modo, videlicet cum debito famulatu, qui ab Angelis, & hominibus præstatur; ergo, orbe non condito, Verbum non fuisset incarnatum. Neque dicas, quòd sicut Christus de facto venit perfectissimo modo, quamvis in carne passibili, ita orbe non condito venisset perfectissimo modo, quamvis sine congruo famulatu, Nam contra est, quia omnes PP. conveniunt, Deum actu fecisse optimum, atque adeò perfectissimo modo venisse Christum in carne passibili, ordinando passionem ad exhibendam Deo condignam satisfactionem, ut sic Divina bonitas simul, &

Justitia ostenderetur, quod tamen, orbe non condito, non haberetur; unde dispar ratio.

Ad Confirm. conc. Quòd, Adamo non peccante, Christus non solum venisset, sed etiam offerendus fuisset in Sacrificium, ne deesset Deo hic perfectissimus cultus Laudeticus, & Eucharisticus; sed tunc Sacrificium Christi impassibilis non fuisset cruentum, nec fuisset memoriale passionis, sed incruentum, ut est nunc in Eucharistia, & ideo non fuisset opus, quòd Christus veniret in carne passibili.

VII. Quærit hic Angelicus: Utrùm Incarnatio principalius decreta fuerit ad delendum originale, an Actualia peccata? Et utrùm Verbum incarnatum fuisset, etiamsi solum fuisset peccatum originale, vel si fuissent sola actualia, aut si pauci, vel unus tantum homo peccasset?

Censeo equidem 1. Verbum de facto incarnatum esse ad redimendum nos tam ab originali, quàm ab actualibus peccatis, ut definit Concil. Toletan. VI. c. 1, Ex illo 1. Jo. 1. *Sanguis ejus emundat nos ab omni peccato*: Nihilominus principalius incarnatum fuit ad delendum originale, quàm actualia. Ità communiter cum D. Th. Ratio est, quia quamvis secluso originali, adhuc potuissent Posteriores Adæ peccare, originale tamen est radix virtute continens omnia actualia, utpote quod relinquit inordinatum hominem, & suis affectibus subjectum cum carnis fomite, qui propriè radix est omnium peccatorum, præterquam quòd originale de se privat nos auxiliis gratiæ necessariis ad vitanda mortalia, ergo Deus ad ostendendam suam bonitatem perfectissimo modo, debuit principalius intendere deletionem originalis, utpote gravioris in radice, quàm actualium; sicuti omnes docent, principalius venisse Christum ad delenda mortalia, utpote graviora, quàm venialia.

Neque dicas, peccatum actuale esse gravius originali, eò, quòd habeat magis rationē voluntarii. Nam quamvis in hac ratione intensivè sit gravius, originale tamen est gravius extensivè, utpote quod inficit totam speciem naturæ humanæ, unde se habent ut excedens, & excessum; simpliciter tamen, & absolutè originale est gravius, eò, quòd totam naturam inficiat: sicuti quamvis Cælum sit perfectius homine in incorruptibilitate, & homo excedat cælum in rationalitate, homo tamen est simpliciter cælo perfectior, quia excedit in prædicato præstantiori.

Cen-

Censeo 2. Si præter originale nulla fuissent peccata actualia, adhuc Verbum incarnatum fuisset; necnon si, non posito originali, fuissent sola actualia. Ratio est, quia in utroque casu perfilteret finis primarius Incarnationis, nempe ostensio Divinae bonitatis perfectissimo modo; communicando nobis merita Christi, quibus possimus condignè satisfacere in omni rigore Justitiæ.

Censeo 3. Etiam si unus, aut pauci tantum homines peccassent, probabiliter Verbum incarnatum fuisset, etiam in carne passibili. Ità communius contra Suar. Ratio est, quia etiam in hoc casu perfilteret idem finis primarius Incarnationis; unum enim mortale, utpote gravitatis infinitæ, sufficit, ut requiratur infinita Christi satisfactio ad ostendendam Dei dilectionem, & Justitiam, dicitur autem Rom. 3. *Quem proposuit Deus propitiationem per fidem ad ostensionem justitiæ suæ.*

Confirm. ex illo ad Gal. 2. *Qui dilexit me, & tradidit semetipsum propter me*; quibus verbis indicat Apostolus, Christum venisse ut Redemptorem in carne passibili, & pro singulis peccatoribus. Idemque insinuat Eccl. 29. ubi habetur: *Gratiam fidejussoris tui ne obliviscaris, dedit enim pro te animam suam.* Quod etiam constat ex eo, quod narrat D. Dionys. in epist. ad Demophil. dicens: Christum apparuisse Carpo, qui nimio zelo mortem duorum scelerum cupiebat, & illi dixisse: *Carpe, iterum paratus sum pro peccatoribus mori*; & Chrysost. apud Platel. n. 102. dicit: *Unius dumtaxat anima tanta est jactura, ut ob eam Filius Dei fieret homo.*

Neque dicas cum Suario: Si unus, vel pauci peccarent, posset in remedium adhiberi aliquis actus amoris Dei elicitus à Christo Domino, citra atrocissimam mortem, eò, quod non videatur decere, ut ob unum, vel paucos homines, tot cruciatus sustineat Christus. Nam contra est, quia etiam unicus actus Christi Domini satis esset in satisfactionem pro omnibus culpis, & tamen ad ostensionem suæ charitatis, & justitiæ voluit undâ lavare nostra crimina, quæ poterat guttâ sanguinis abstergere, ut loquitur D. Bernardus; ergo etiam si unus tantum homo peccasset, Christus mortuus fuisset ad ostensionem suæ justitiæ, & dilectionis; peccati enim gravitas solum extensivè major est in omnibus hominibus, quàm in uno, & à Deo non

magis distat unus homo, quàm omnes ; ut enim dicitur
 II. 40. *Omnes gentes quasi stilla situla, & tamquam momentum
 statera reputata sunt.*

Q U Æ S T I O II.

*Utrum Deus prædefinierit Incarnationem in
 remedium peccati in priori ad scientiam Vi-
 sionis de peccato absolutè futuro?*

Celeberrima, & subtilissima hæc quæstio coincidit
 cum illa alia in de Pœnitentia, ubi quæritur : An
 possit prædefiniri actus bonus essentialiter præsuppo-
 nens peccatum (putà contritio) ante scientiam visionis
 de peccato absolutè futuro? & his affinis est alia quæstio
 in de Prædestinatione : Utrum Deus possit prædestinare
 ad gloriam ut coronam, aut positivè reprobare aliquem
 damnando illum ad gehennam in priori ad prævisio-
 nem meriti, aut demeriti absolutè futuri? Explicabi-
 mus primò statum quæstionis : deinde ostendemus,
 Deum omnia decernere unico, ac simplicissimo Decreto
 citra signorum multipliciter, unde descendet harum
 omnium, & plurimarum aliarum quæstionum Reso-
 lutio.

A R T I C U L U S I.

Explicatur status Quæstionis.

I. PRæmitto 1. Ex Tract. De Voluntate Dei varias esse
DD. sententias circa constitutionem Decretorum
 liberorum : Inter Celebriores prima est Nominalium
 putantium Decreta importare modum quendam indi-
 stinctum à Deo, & contingentem, & sic invicem inter se
 decreta distingui. Secunda Aliorum cum Vasq. docen-
 tium Decreta distingui realiter tum à Deo, tum inter se
 solum ratione connotatorum, v, gr. Decretum intenti-
 vum finis distingui realiter à Decreto electivo medio-
 rum, non ratione ipsius actus divini cum Deo identifi-
 cati, sed ratione illius complementi Extrinseci, quod
 constituit denominationem actus divini liberi libertate
 actus secundi. Tertia, quæ mihi magis arrisit, est Suarii,
 Perez, & Aliorum apud Cattan. in *Metaph. disp. 14. sect. 5.*
 docentium Decreta virtualiter tantum distingui tum ab
 essentia, & voluntate divinâ, tum inter se, non secus ac
 Perso-

Personalitates divinx distinguuntur ab essentia, ut proinde unum decretum, puta electivum mediorum sit posterius altero, puta intentivo finis, non posteritate causalitatis, vel productivitatis, sed originis. Ubi distinguunt prioritatem à quo, & in quo. Dicitur Decretum habere prioritatem à quo, si originetur ab altero, ut decretum de danda gloria ut corona, dicitur prius prioritatem à quo, relatè ad Decretum de Conferendis meritis: dicitur verò habere prioritatem in quo, quoties possit esse sinè altero decreto, quod tamen nequit esse sinè illo priori, v. gr. Decretum de morte Christi Domini habet prioritatem in quo, relatè ad Decretum de Circumstantia mortis, quia potest illud esse sinè hoc secundo, non tamen hoc sinè illo primo; sicut anima potest esse sinè homine, non tamen homo sinè anima.

Præmitto 2. Actus intellectus divini constitui pariformiter ad actus voluntatis, quare scientia simplicis intelligentiæ attingens objecta necessaria, identificatur cum amore Dei necessariò, non secùs ac intellectus divinus identificatur cum voluntate. Scientia verò mediæ attingens futura libera conditionata, vel est modus indistinctus à Deo, & contingens, juxta viam Nominalium, vel completur à comotato extrinseco, nempe à futuritione conditionatâ actus liberi, juxta viam Vasquii; vel constituitur per virtualitatem identificatam cum Deo contingentem, juxta viam Suarii: Scientia verò visionis attingens contingentia absoluta, si est de objecto non libero, puta de existentia Petri, identificatur cum Decreto libero de Petri existentia, ut proinde sicuti Deus ideo est volitivus, quia est intellectivus, & homo ideo est risibilis, quia rationalis, per meram distinctionem rationis extrinsecam citra distinctionem ex parte objecti inter hæc prædicata, ita verum est, quòd Deus ideo cognoscat per scientiam visionis existentiam Petri, quia liberè decernit de illa, citra distinctionem objectivam inter scientiam visionis, & Decretum liberum de tali objecto: Quòd si scientia visionis sit de actibus liberis creatis, ea in sententia Societatis contra Thomistas constitui non potest per Decretum collativum auxilii, & concursus indifferentis, cum non possit in causa omnino indifferenti cognosci effectus determinatus, sed constitui debet per complexum hujus decreti, & scientiæ mediæ de actu sub tali auxilio indifferenti, quo com-

plexo posito impossibile est, quin actus liber sit absolute futurus.

Præmitto 3. Communissimè in actibus divini intellectus à DD. admitti plura signa, quatenus alter actus est posterior altero ex parte objecti. In primo enim signo intelligitur in Deo scientia simplicis intelligentiæ omnimodè identificata cum intellectu, & essentia divina; In secundo scientia media constituta, vel per modum indistinctum à Deo contingentem, vel per complementum extrinsecum, nempe per futuritionem conditionatam actuum liberorum, vel per quandam virtualitatem contingentem realiter cum Deo identificatam, juxta varias sententias laudatas: In tertio signo scientia visionis similiter constituta. Idcirco autem scientia simplicis intelligentiæ dicitur esse in primo signo, & scientia media in secundo, & scientia visionis in tertio, quia scientia media essentialiter præsupponit scientiam simplicis intelligentiæ, & scientia visionis scientiam mediam; Cum non possit Deus liberè quidquam decernere, nisi post consultationem scientiæ mediæ, unde etiam scientia visionis de objecto non libero, putà de existentia Petri, quæ omnino cum Decretis liberis identificatur, essentialiter supponit mediam.

II. Difficultas nunc est: Utrùm etiam in Decretis liberis admittenda sint necessariò huiusmodi signa importantia distinctionem ex parte objecti in ipso actu libero Dei, ità ut v. gr. in priori signo sit intentio finis, putà Prædestinatio ad gloriam, vel Incarnatio ut redemptiva, & in posteriori signo electio mediorum, putà collatio meritorum, vel permissio peccati: An verò possit Deus in eodem signo intendere finem, & eligere media, sicut in omnium sententia, in eodem signo vult Solèm, & lucem, quin volitio solis præsupponatur ad volitionem lucis, quamvis sol præsupponatur ad lucem?

Communiùs DD. admittunt in Decretis divinis pluralitatem signorum importantium ex parte objecti prioritatem, & posteritatem, non secùs ac in actibus divini intellectus admittuntur plura signa, ità ut in primo signo sit scientia simplicis intelligentiæ omnino necessaria; in secundo scientia media, aliquàlter necessaria, & aliquàlter contingens, in tertio scientia visionis omnimodò contingens. At Recentiores cum Molin. Gran. &

Aliis

Aliis apud Maur. qu. 67. de Deo, volunt unicum, & simplicissimum esse decretum Divinum; omnia omnino in eodem signo decernens, (ad eum modum, quo unica, & simplicissima est scientia visionis in Deo, cuius in eodem signo Deus omnia contingentia cognoscit) adeo ut prioritas, & posterioritas in Decretis divinis non sit ex parte objecti, sed logica, & per distinctionem rationis ratiocinata extrinsecam, eo modo, quo Rationale est in priori ad risibile, & intellectivum in Deo est in priori ad volitivum, circa signorum multipliciter: Idque explicant, vel quia idem Decretum æquivaleret pluribus, quæ si distinguerentur, alterum esset altero posterius, ut Decretum intentivum finis, & electivum mediorum; vel quia objecta ejusdem Decreti habent prioritatem, & posterioritatem, ut quando decernit Solem, & lucem. Hinc docent, Deum in eodem signo unico simplicissimo Decreto voluisse permissionem peccati; & Incarnationem in ejus remedium, quin Decretum prædefinitivum Incarnationis habuerit ex parte objecti ullam distinctionem, aut prioritatem ad Decretum permissivum peccati, cum possit optime salvari per solam distinctionem rationis ratiocinatae causalis ista, ideo Deus prædefinit Incarnationem ut redemptivam, quia permittit, ac prævidet peccatum; ideo eligit media, quia intendit finem; sicut per solam distinctionem rationis salatur, quod ideo Deus sit volitivus, quia est intellectivus, ideo homo sit risibilis, quia rationalis. Quare in voluntate divina admittitur solum, quod in priori signo sit amor necessarius, & in posteriori Decretum liberum utpote contingens; (sicut in priori signo est scientia necessaria, seu simplicis intelligentiæ in intellectu divino, & in posteriori scientia contingens, seu media, & visionis;) in ipso tamen Decreto nulla admittitur signorum pluralitas ex parte objecti; sicut nulla pluralitas ex parte objecti admittitur, aut in sola scientia simplicis intelligentiæ, quâ Deus omnia objecta necessaria attingit, aut in sola scientia visionis, quâ Deus attingit omnia contingentia.

III. Qui tamen in divinis Decretis signorum pluralitatem admittunt, variant in iis assignandis in negotio Redemptionis. Cajet. 3. p. q. 1. a. 3. distinguit tria instantia, seu signa rationis, ita ut in primo Deus decreverit

orbem condere, ac in eo viderit per scientiam visionis ordinem Naturæ, ac defectus Physicos, & morales; in secundo decreverit ordinem Gratiæ; in tertio unionem hypostaticam in remedium peccati. Scotus verò in 3. d. 29. distinguit quinque signa; in primo Deus intellexit se ipsum, in secundo decrevit ponere mundum, in tertio prædestinavit quosdam ad Gloriam, prius prædestinando Christum ut venturum in carne abstrahendo à passibili, & impassibili, ac deinde prædestinando electos in Christo, in quarto prævidit electos casuros in Adamo, in quinto decrevit remedium per passionem Christi, & sic decrevit Christum in carne passibili. Suar. d. 5. de Incarn. Aliter disponit hæc signa accommodando illa scientiæ mediæ, sicut etiam Vasq. 3. p. d. 11. c. 6. apud Maur. loc. cit.

Denique circa præsentem quæstionem, Num prædefiniri possit Incarnatio ut redemptiva in priori signo ad permissionem peccati, seu ad scientiam visionis de peccato absolute futuro, ita ut ex affectu erga Christum ut Redemptorem oriatur, ac descendat in secundo signo permissio peccati? Affermant Arriag. d. 30. de Deo sect. 4. Amic. de prædest. n. 172. Gran. Arrub. Lumb. de Inc. n. 610. & n. 1912. Negant tamen Suar. l. 3. de Prædest. c. 8. Vasq. d. 93. P. Thyrs. 10. 2. d. 18. Aldrer. Nos, rejectâ signorum hæc multiplicitate, stabiliemus in posteriori ad scientiam mediam, non expectatâ scientiâ visionis de peccato absolute futuro, Deum in eodem signo permisisse peccatum, & prædefinisse Incarnationem in remedium peccati. atque aded posse Deum in priori ad scientiam visionis de peccato absolute futuro prædefinire actum bonum essentialiter præsupponentem malum, putâ actum contritionis, quod acriter controvertitur in de Pœnitentia.

ARTICULUS II.

An Deus unico, & simplicissimo decreto omnia decernat, præsertim Incarnationem, ut redemptivam, & peccati permissionem.

IV. **D**ico 1. Deus non potest quidquam decernere in priori ad scientiam mediam, & specialiter repugnat, quòd ante scientiam mediam de peccato conditionate futuro prædefiniat Incarnationem in remedium peccati absolute futuri. Ita communiter.

Prob.

Prob. prima pars, si Deus aliquid decerneret in priori ad scientiam mediam, minus perfecte cognosceret objecta, non enim cognosceret futura conditionata statim ac posset (nempe in priori ad decreta) minus etiam sapienter, & cæco modo decerneret decernendo, inconsulta scientia media; ergo non potest ante scientiam mediam quidquam prædefinire, præsertim quia omne liberum fundatur in necessario, & illud præsupponit, ergo decreta libera præsupponunt scientiam mediam, utpote Deo aliquatenus necessariam.

Prob. etiam 2. pars: Quia si Deus in priori ad scientiam mediam prædefiniret Incarnationem in remedium peccati; teneretur deinde conferre auxilium inefficax quâ inefficax, ut ponatur peccatum, ne frustretur sine intento, & sic teneretur amare peccatum; præterquamquod huiusmodi peccatum non esset liberum, quia præiret ad illud prædefinitio Incarnationis ut redemptivæ impossibilis cum omissione peccati, & in impedibilis à voluntate creata: ostendimus autem in quæstione ultima disputationis antecedentis, quod omne antecedens, omnino antecedens actum, impossibile cum altera parte contradictionis, seu cum actûs omissione, & inimpedibile à voluntate, sit eversum libertatis.

V. Dico 2. Deum omnia contingentia in eodem signo decrevisse in posteriori ad scientiam mediam, atque aded eodem simplicissimo decreto simul permisit peccatum, & prædefinivit Incarnationem in remedium peccati, ac totum negotium Redemptionis decrevit. Ità D. Th. 1. p. q. 19. a. 5. dicens *Vult Deus hoc esse propter hoc, sed non propter hoc vult hoc*; quasi dicat, Datur v. gr. lux, quia datur sol, non verò datur volitio lucis, quia datur volitio solis, non enim debet volitio lucis volitionem solis præire, licet sol præeat lucem; Ità etiam Maur. q. 63. de Deo, Esp. q. 3. Gran. Mol. Ruiz d. 22. de Vol. sect. 3. & fusè Aranda l. 3. d. 1.

Prob. Nisi positive ostendatur necessitas figurorum inducentium distinctionem, & compositionem ex parte objecti in divinis decretis, standum pro unicitate, ac simplicitate Decreti, utpote de se perfectiori, sed nulla datur huiusmodi necessitas, ut constabit solutione argumentorum, ergo Deus unico simplicissimo Decreto omnia decernit; non secus, ac omnia contingentia eodem actu scientiæ visionis cognoscit.

Confirm. multiplicitas actuum, seu signorum in eodem actu non potest aliunde haberi, nisi vel ex limitatione potentiae insufficientis ad attingendum omnia simul, vel ex diversa habitudine motivi formalis ad materiale (ut proinde in diverso signo sit scientia divina necessaria, & contingens, nec non Amor necessarius, & liber) Atqui potentia quælibet divina est illimitata, & relatè ad omnia contingentia Deus habet uniformem habitudinem, videlicet continentis in se tanquam in causa & in ultimo fine omnem eorum veritatem, & amabilitatem, ergo citra multiplicitem actuum, vel signorum omnia contingentia simul Deus decernit, & cognoscit, sicut eodem simplicissimo actu attingit omnia necessaria.

VI. Ex quibus sequitur 1. simul & in eodem signo esse Prædefinitionem Incarnationis in remedium peccati, & peccati permissionem immediatè post scientiam mediam, non expectatâ prius scientiâ visionis de peccato absolute futuro: vult enim Deus ad peccatum permissum consequi Incarnationem reparativam; quin Decretum præfinitivum Incarnationis reparativæ consequatur ad Decretum permissivum peccati, similiter in eodem signo Deus prædefinit contritionem v. gr. D. Petri, & permittit ejus peccatum, quamvis peccatum ex parte objecti præcedat contritionem, sicut in eodem signo Deus decernit, & cognoscit durationem hodiernam, & crastinam, quamvis hodierna præcedat crastinam; sic pariter in eodem signo prædefinit martyrium, & permittit peccatum Tyrannorum, quamvis peccatum antecedit martyrium.

Sequitur 2. Deum in eodem signo prædestinare ad gloriam ut coronam, & velle conferre auxilia efficacia, quibus ponantur merita, vult enim simul ex parte actus merita causare gloriam moraliter, & ipsam gloriam, sicut simul vult solem causare lucem, quamvis enim verum sit, quod Decretum collativum auxilii efficacis sit actus liberalitatis divinæ, & Decretum collativum gloriæ ut coronæ sit actus justitiæ, at idem indivisibilis actus simul gerit utrumque munus, sicut idem actus potest esse misericordiæ, & justitiæ etiam in creatis, si procedat ex motivo utriusque virtutis, cum sola distinctione rationis ratiocinata per æquivalentiam pluribus actibus diversis.

Sequitur 3. Prædestinationem , & Reprobationem positivam (qua scilicet decernitur pœna Reprobis) neque esse ante, neque post prævisa merita , aut demerita , sed in eodem signo, videri merita, & decerni gloriam, videri demerita, & decerni pœnam; ita tamen ut hujusmodi actus simplicissimus æquivalet pluribus , qui in creatis ita se habent, ut unus causet alterum, sicuti in Deo intellectio , & amor necessarius suimet est idem actus indivisibilis æquivalens duobus, qui in creatis, ubi distinguuntur realiter, ita se habent, ut intellectio causet amorem, non è contra , propterea sicuti per solam distinctionem rationis ratiocinata verum est, quod ideo Deus amat seipsum, quia seipsum cognoscit , & non è converso , quin tamen ex parte objecti cognitio suimet præeat amorem ; ita verum est, quod ideo decernit pœnam, quia videt peccatum actu existens, quin decretum pœnæ consequatur ex parte objecti ad prævisionem , aut permissionem peccati. Quare in eo tantum sensu admitti potest doctrina communior, quod Deus decernat gloriam post merita prævisa (juxta illud Apostoli, *Quos præscivit prædestinavit* , ubi addit Ambros. *Non enim ante prædestinavit , quam præsciret, sed quorum merita præscivit , eorum præmia prædestinavit*) nec non Doctrina communissima , quod Deus decernat pœnam æternam post prævisionem demeritorum , quatenus æquivalenter prævisio meritorum , aut demeritorum præcedit Decretum gloriæ, aut pœnæ, non verò formaliter, idem enim actus divinus, qui simul est prævisio demeritorum, & decretum pœnæ, æquivalet duobus, qui in creatis ita distinguuntur, ut prævisio culpæ antecedit , & dirigat ad decernendam pœnam ; sicut in Deo solum æquivalenter actus intellectus præcedit actum voluntatis.

Sequitur 4. Quod cum sola distinctione rationis ratiocinata bene salventur istæ causales : ideo Deus decernit gloriam, quia confert auxilium efficax, & meritum, non è contra ; & similiter , ideo prædestinavit Incarnationem ut reparativam , quia permittit peccatum , & non è contra : Ad eum modum quo ideo Deus est volitivus, quia est intellectivus , & ideo homo est risibilis, quia rationalis, & non è contra : propterea nullatenus ex parte objecti distinguuntur. Decretum intentivum finis, & decretum electivum mediorum , ac executivum tum mediorum , tum finis ; quia sicut perfectissimè

Justitia ostenderetur, quod tamen, orbe non condito, non haberetur, unde dispar ratio.

Ad Confirm. *conc.* Quòd, Adamo non peccante, Christus non solum venisset, sed etiam offerendus fuisset in Sacrificium, ne deesset Deo hic perfectissimus cultus Laudeticus, & Eucharisticus; sed tunc Sacrificium Christi impassibilis non fuisset cruentum, nec fuisset memoriale passionis, sed incruentum, ut est nunc in Eucharistia, & ideo non fuisset opus, quòd Christus veniret in carne passibili.

VII. Quærit hic Angelicus: Utrùm Incarnatio principalius decreta fuerit ad delendum originale, an Actualia peccata? Et utrùm Verbum incarnatum fuisset, etiamsi solum fuisset peccatum originale, vel si fuissent sola actualia, aut si pauci, vel unus tantum homo peccasset?

Censeo equidem 1. Verbum de facto incarnatum esse ad redimendum nos tam ab originali, quàm ab actualibus peccatis, ut definit Concil. Toletan. VI. c. 1, Ex illo 1. Jo. 1. *Sanguis ejus emundat nos ab omni peccato*: Nihilominus principalius incarnatum fuit ad delendum originale, quàm actualia. Ità communiter cum D. Th. Ratio est, quia quamvis secluso originali, adhuc potuissent Posteriores Adæ peccare, originale tamen est radix virtute continens omnia actualia, utpote quod relinquit inordinatum hominem, & suis affectibus subiectum cum carnis fomite, qui propriè radix est omnium peccatorum, præterquam quòd originale de se privat nos auxiliis gratiæ necessariis ad vitanda mortalia, ergo Deus ad ostendendam suam bonitatem perfectissimo modo, debuit principalius intendere deletionem originalis; utpote gravioris in radice, quàm actualium; sicuti omnes docent, principalius venisse Christum ad delenda mortalia, utpote graviora, quàm venialia.

Neque dicas, peccatum actuale esse gravius originali, eò, quòd habeat magis rationē voluntarii. Nam quamvis in hac ratione intensivè sit gravius, originale tamen est gravius extensivè, utpote quod inficit totam speciem naturæ humanæ, unde se habent ut excedens, & excessum; simpliciter tamen, & absolutè originale est gravius, eò, quòd totam naturam inficiat: sicuti quamvis Cælum sit perfectius homine in incorruptibilitate, & homo excedat cælum in rationalitate, homo tamen est simpliciter cælo perfectior, quia excedit in prædicato præstantiori.

Cen-

Censeo 2. Si præter originale nulla fuissent peccata actualia, adhuc Verbum incarnatum fuisset; necnon si, non posito originali, fuissent sola actualia. Ratio est, quia in utroque casu persisteret finis primarius Incarnationis, nempe ostensio Divinæ bonitatis perfectissimo modo; communicando nobis merita Christi, quibus possimus condignè satisfacere in omni rigore Justitiæ.

Censeo 3. Etiam si unus, aut pauci tantum homines peccassent, probabiliter Verbum incarnatum fuisset, etiam in carne passibili. Ità communius contra Suar. Ratio est, quia etiam in hoc casu persisteret idem finis primarius Incarnationis; unum enim mortale, utpote gravitatis infinitæ, sufficit, ut requiratur infinita Christi satisfactio ad ostendendam Dei dilectionem, & Justitiam, dicitur autem Rom. 3. *Quem proposuit Deus propitiationem per fidem ad ostensionem justitiæ suæ.*

Confirm. ex illo ad Gal. 2. *Qui dilexit me, & tradidit semetipsum propter me*; quibus verbis indicat Apostolus, Christum venisse ut Redemptorem in carne passibili, & pro singulis peccatoribus. Idemque insinuat Eccl. 29. ubi habetur: *Gratiam fidejussoris tui ne obliviscaris, dedit enim pro te animam suam.* Quod etiam constat ex eo, quod narrat D. Dionys. in epist. ad Demophil. dicens. Christum apparuisse Carpo, qui nimio zelo mortem duorum scelerum cupiebat, & illi dixisse: *Carpe, iterum paratus sum pro peccatoribus mori*; & Chrysost. apud Platel. n. 102. dicit: *Unius dumtaxat anima tanta est jactura, ut ob eam Filius Dei fieret homo.*

Neque dicas cum Suario: Si unus, vel pauci peccarent, posset in remedium adhiberi aliquis actus amoris Dei elicitus à Christo Domino, citra atrocissimam mortem, eò, quod non videatur decere, ut ob unum, vel paucos homines, tot cruciatus sustineat Christus. Nam contra est, quia etiam unicus actus Christi Domini satis esset in satisfactionem pro omnibus culpis, & tamen ad ostensionem suæ charitatis, & justitiæ voluit undâ lavare nostra crimina, quæ poterat guttâ sanguinis abstergere, ut loquitur D. Bernardus; ergo etiam si unus tantum homo peccasset, Christus mortuus fuisset ad ostensionem suæ justitiæ, & dilectionis; peccati enim gravitas solum extensivè major est in omnibus hominibus, quàm in uno, & à Deo non

magis distat unus homo, quàm omnes ; ut enim dicitur
 If. 40. *Omnes gentes quasi stilla situla, & tamquam momentum
 statera reputata sunt.*

Q U Æ S T I O II.

*Utrum Deus prædefinierit Incarnationem in
 remedium peccati in priori ad scientiam Vi-
 sionis de peccato absolutè futuro ?*

Celeberrima, & subtilissima hæc quæstio coincidit
 cum illa alia in de Pœnitentia, ubi quæritur : An
 possit prædefiniri actus bonus essentialiter præsuppo-
 nens peccatum (putà contritio) ante scientiam visionis
 de peccato absolutè futuro ? & his affinis est alia quæstio
 in de Prædestinatione : Utrum Deus possit prædestinare
 ad gloriam ut coronam, aut positivè reprobare aliquem
 damnando illum ad gehennam in priori ad prævisio-
 nem meriti, aut demeriti absolutè futuri ? Explicabi-
 mus primò statum quæstionis : deinde ostendemus,
 Deum omnia decernere unico, ac simplicissimo Decreto
 citra signorum multiplicitem, unde descendet harum
 omnium, & plurimarum aliarum quæstionum Reso-
 lutio.

A R T I C U L U S I.

Explicatur status Quæstionis.

I. PRÆMITTO 1. Ex Tract. De Voluntate Dei varias esse
 DD. sententias circa constitutionem Decretorum
 liberorum : Inter Celebriores prima est Nominalium
 putantium Decreta importare modum quendam indi-
 stinctum à Deo, & contingentem, & sic invicem inter se
 decreta distingui. Secunda Aliorum cum Vasq. docen-
 tium Decreta distingui realiter tum à Deo, tum inter se
 solum ratione connotatorum, v, gr. Decretum intenti-
 vum finis distingui realiter à Decreto electivo medio-
 rum, non ratione ipsius actus divini cum Deo identifi-
 cati, sed ratione illius complementi Extrinseci, quod
 constituit denominationem actus divini liberi libertate
 actus secundi. Tertia, quæ mihi magis arrisit, est Suarii,
 Perez, & Aliorum apud Cattan. in *Metaph. disp. 14. sect. 5.*
 docentium Decreta virtualiter tantum distingui tum ab
 essentia, & voluntate divinâ, tum inter se, non secus ac
 Perso-

Personalitates divinæ distinguuntur ab essentia, ut proinde unum decretum, putà electivum mediorum sit posterius altero, putà intentivo finis, non posteritate causalitatis, vel productivitatis, sed originis. Ubi distinguunt prioritatem à quo, & in quo. Dicitur Decretum habere prioritatem à quo, si originetur ab altero, ut decretum de danda gloria ut corona, dicitur prius prioritatem à quo, relatè ad Decretum de Conferendis meritis: dicitur verò habere prioritatem in quo, quoties possit esse sinè altero decreto, quod tamen nequit esse sinè illo priori, v. gr. Decretum de morte Christi Domini habet prioritatem in quo, relatè ad Decretum de Circumstantia mortis, quia potest illud esse sinè hoc secundo, non tamen hoc sinè illo primo; sicut anima potest esse sinè homine, non tamen homo sinè anima.

Præmitto 2. Actus intellectûs divini constitui pariformiter ad actus voluntatis, quare scientia simplicis intelligentiæ attingens objecta necessaria, identificatur cum amore Dei necessariò, non secùs ac intellectus divinus identificatur cum voluntate. Scientia verò mediæ attingens futura libera conditionata, vel est modus indistinctus à Deo, & contingens, juxta viam Nominalium, vel completur à connotato extrinseco, nempe à futuritione conditionatâ actûs liberi, juxta viam Vasquii; vel constituitur per virtualitatem identificatam cum Deo contingentem, juxta viam Suarii: Scientia verò visionis attingens contingentia absoluta, si est de objecto non libero, putà de existentia Petri, identificatur cum Decreto libero de Petri existentia, ut proinde sicuti Deus ideo est volitivus, quia est intellectivus, & homo ideo est risibilis, quia rationalis, per meram distinctionem rationis extrinsecam citra distinctionem ex parte objecti inter hæc prædicata, ità verum est, quòd Deus ideo cognoscat per scientiam visionis existentiam Petri, quia liberè decernit de illa, citra distinctionem objectivam inter scientiam visionis, & Decretum liberum de tali objecto: Quòd si scientia visionis sit de actibus liberis creatis, ea in sententia Societatis contra Thomistas constitui non potest per Decretum collativum auxilii, & concursus indifferentis, cum non possit in causa omninò indifferenti cognosci effectus determinatus, sed constitui debet per complexum hujus decreti, & scientiæ mediæ de actu sub tali auxilio indifferenti, quo com-

plexo posito impossibile est, quin actus liber sit absolute futurus.

Præmitto 3. Communissime in actibus divini intellectus à DD. admitti plura signa, quatenus alter actus est posterior altero ex parte objecti. In primo enim signo intelligitur in Deo scientia simplicis intelligentiæ omnimodè identificata cum intellectu, & essentia divina; In secundo scientia media constituta, vel per modum indistinctum à Deo contingentem, vel per complementum extrinsecum, nempe per futuritionem conditionatam actuum liberorum, vel per quandam virtualitatem contingentem realiter cum Deo identificatam, juxta varias sententias laudatas: In tertio signo scientia visionis similiter constituta. Idcirco autem scientia simplicis intelligentiæ dicitur esse in primo signo, & scientia media in secundo, & scientia visionis in tertio, quia scientia media essentialiter præsupponit scientiam simplicis intelligentiæ, & scientia visionis scientiam mediam; Cum non possit Deus liberè quidquam decernere, nisi post consultationem scientiæ mediæ, unde etiam scientia visionis de objecto non libero, putà de existentia Petri, quæ omnino cum Decretis liberis identificatur, essentialiter supponit mediam.

II. Difficultas nunc est: Utrùm etiam in Decretis liberis admittenda sint necessariò huiusmodi signa importantia distinctionem ex parte objecti in ipso actu libero Dei, ità ut v. gr. in priori signo sit intentio finis, putà Prædestinatio ad gloriam, vel Incarnatio ut redemptiva, & in posteriori signo electio mediorum, putà collatio meritorum, vel permissio peccati: An verò possit Deus in eodem signo intendere finem, & eligere media, sicut in omnium sententia, in eodem signo vult Solèm, & lucem, quin volitio solis præsupponatur ad volitionem lucis, quamvis sol præsupponatur ad lucem?

Communiùs DD. admittunt in Decretis divinis pluralitatem signorum importantium ex parte objecti prioritatem, & posteritatem, non secùs ac in actibus divini intellectus admittuntur plura signa, ità ut in primo signo sit scientia simplicis intelligentiæ omnino necessaria; in secundo scientia media, aliquàlter necessaria, & aliquàlter contingens, in tertio scientia visionis omnimodò contingens. At Recentiores cum Molin. Gran. &

Aliis

Aliis apud Maur. qu. 67. de Deo, volunt unicum, & simplicissimum esse decretum Divinum; omnia omnino in eodem signo decernens, (ad eum modum, quo unica, & simplicissima est scientia visionis in Deo, cuius in eodem signo Deus omnia contingentia cognoscit) adeo ut prioritas, & posterioritas in Decretis divinis non sit ex parte objecti, sed logica, & per distinctionem rationis ratiocinata extrinsecam, eo modo, quo Rationale est in priori ad risibile, & intellectivum in Deo est in priori ad volitivum, citra signorum multipliciter: Idque explicant, vel quia idem Decretum æquivalet pluribus, quasi distinguarentur, alterum esset altero posterius, ut Decretum intentivum finis, & electivum mediorum; vel quia objecta ejusdem Decreti habent prioritatem, & posterioritatem, ut quando decernit Solem, & lucem. Hinc docent, Deum in eodem signo unico simplicissimo Decreto voluisse permissionem peccati, & Incarnationem in ejus remedium, quin Decretum prædefinitivum Incarnationis habuerit ex parte objecti ullam distinctionem, aut prioritatem ad Decretum permissivum peccati, cum possit optimè salvari per solam distinctionem rationis ratiocinatae causalis ista, ideo Deus prædefinit Incarnationem ut redemptivam, quia permittit, ac prævidet peccatum; ideo eligit media, quia intendit finem; sicuti per solam distinctionem rationis salvatur, quod ideo Deus sit volitivus, quia est intellectivus, ideo homo sit risibilis, quia rationalis. Quare in voluntate divina admittitur solum, quod in priori signo sit amor necessarius, & in posteriori Decretum liberum utpote contingens; (sicut in priori signo est scientia necessaria, seu simplicis intelligentiæ in intellectu divino, & in posteriori scientia contingens, seu media, & visionis;) in ipso tamen Decreto nulla admittitur signorum pluralitas ex parte objecti; sicut nulla pluralitas ex parte objecti admittitur, aut in sola scientia simplicis intelligentiæ, quâ Deus omnia objecta necessaria attingit, aut in sola scientia visionis, quâ Deus attingit omnia contingentia.

III. Qui tamen in divinis Decretis signorum pluralitatem admittunt, variant in iis assignandis in negotio Redemptionis. Cajet. 3. p. q. 1. a. 3. distinguit tria instantia, seu signa rationis, ita ut in primo Deus decreverit

orbem condere, ac in eo viderit per scientiam visionis ordinem Naturæ, ac defectus Physicos, & morales; in secundo decreverit ordinem Gratiæ; in tertio unionem hypostaticam in remedium peccati. Scotus verò in 3. d. 29. distinguit quinque signa; in primo Deus intellexit se ipsum, in secundo decrevit ponere mundum, in tertio prædestinavit quosdam ad Gloriam, prius prædestinando Christum ut venturum in carne abstrahendo à passibili, & impassibili, ac deinde prædestinando electos in Christo, in quarto prævidit electos casuros in Adamo, in quinto decrevit remedium per passionem Christi, & sic decrevit Christum in carne passibili. Suar. d. 5. de Incarn. Aliter disponit hæc signa accommodando illa scientiæ mediæ, sicut etiam Vasq. 3. p. d. 11. c. 6. apud Maur. loc. cit.

Denique circa præsentem quæstionem, Num prædefiniri possit Incarnatio ut redemptiva in priori signo ad permissionem peccati, seu ad scientiam visionis de peccato absolutè futuro, ita ut ex affectu erga Christum ut Redemptorem oriatur, ac descendat in secundo signo permissio peccati? Affermant Arriag. d. 30. de Deo sect. 4. Amic. de prædest. n. 172. Gran. Arrub. Lumb. de Inc. n. 610. & n. 1912. Negant tamen Suar. l. 3. de Prædest. c. 8. Vasq. d. 93. P. Thyrs. 10. 2. d. 18. Aldrer. Nos, rejectâ signorum hæc multiplicitate, stabiliemus in posteriori ad scientiam mediam, non expectatâ scientiâ visionis de peccato absolutè futuro, Deum in eodem signo permisisse peccatum, & prædefinisse Incarnationem in remedium peccati. atque aded posse Deum in priori ad scientiam visionis de peccato absolutè futuro prædefinire actum bonum essentialiter præsupponentem malum, putà actum contritionis, quod acriter controvertitur in de Pœnitentia.

ARTICULUS II.

An Deus unico, & simplicissimo decreto omnia decernat, præsertim Incarnationem, ut redemptivam, & peccati permissionem.

IV. **D**ico 1. Deus non potest quidquam decernere in priori ad scientiam mediam, & specialiter repugnat, quòd ante scientiam mediam de peccato conditionatè futuro prædefiniat Incarnationem in remedium peccati absolutè futuri. Ita communiter.

Prob.

Prob. prima pars, si Deus aliquid decerneret in priori ad scientiam mediam, minus perfecte cognosceret objecta, non enim cognosceret futura conditionata statim ac posset (nempe in priori ad decreta) minus etiam sapienter, & cæco modo decerneret decernendo, inconsulta scientia media; ergo non potest ante scientiam mediam quidquam prædefinire, præsertim quia omne liberum fundatur in necessario, & illud præsupponit, ergo decreta libera præsupponunt scientiam mediam, utpote Deo aliquatenus necessariam.

Prob. etiam 2. pars: Quia si Deus in priori ad scientiam mediam prædefiniret Incarnationem in remedium peccati; teneretur deinde conferre auxilium inefficax quæ inefficax, ut ponatur peccatum, ne frustretur sine intento, & sic teneretur amare peccatum; præterquam quod huiusmodi peccatum non esset liberum, quia præiret ad illud prædefinitio Incarnationis ut redemptivæ impossibilis cum omissione peccati, & in impedibilis à voluntate creata: ostendimus autem in quæstione ultima disputationis antecedentis, quod omne antecedens, omninò antecedens actum, impossibile cum altera parte contradictionis, seu cum actus omissione, & inimpedibile à voluntate, sit everfivum libertatis.

V. Dico 2. Deum omnia contingentia in eodem signo decrevisse in posteriori ad scientiam mediam, atque adeò eodem simplicissimo decreto simul permisit peccatum, & prædefiniuit Incarnationem in remedium peccati, ac totum negotium Redemptionis decrevit. Ità D. Th. 1. p. q. 19. a. 5. dicens *Vult Deus hoc esse propter hoc, sed non propter hoc vult hoc*; quasi dicat, Datur v. gr. lux, quia datur sol, non verò datur volitio lucis, quia datur volitio solis, non enim debet volitio lucis volitionem solis præire, licet sol præeat lucem; Ità etiam Maur. q. 63. de Deo, Esp. q. 3. Gran. Mol. Ruiz d. 22. de Vol. sect. 3. & fusè Aranda l. 3. d. 1.

Prob. Nisi positivè ostendatur necessitas signorum inducentium distinctionem, & compositionem ex parte objecti in divinis decretis, standum pro unicitate, ac simplicitate Decreti, utpote de se perfectiori, sed nulla datur huiusmodi necessitas, ut constabit solutione argumentorum, ergo Deus unico simplicissimo Decreto omnia decernit; non secus, ac omnia contingentia eodem actu scientiæ visionis cognoscit.

Confirm. multiplicitas actuum, seu signorum in eodem actu non potest aliunde haberi, nisi vel ex limitatione potentiae insufficientis ad attingendum omnia simul, vel ex diversa habitudine motivi formalis ad materiale (ut proinde in diverso signo sit scientia divina necessaria, & contingens, nec non Amor necessarius, & liber) Atqui potentia quælibet divina est illimitata, & relatè ad omnia contingentia Deus habet uniformem habitudinem, videlicet continentis in se tanquam in causa & in ultimo fine omnem eorum veritatem, & amabilitatem, ergo citra multiplicitem actuum, vel signorum omnia contingentia simul Deus decernit, & cognoscit, sicut eodem simplicissimo actu attingit omnia necessaria.

VI. Ex quibus sequitur 1. simul & in eodem signo esse Prædefinitionem Incarnationis in remedium peccati, & peccati permissionem immediatè post scientiam mediam, non expectatâ prius scientiâ visionis de peccato absolutè futuro: vult enim Deus ad peccatum permissum consequi Incarnationem reparativam; quin Decretum præfinitivum Incarnationis reparativæ consequatur ad Decretum permissivum peccati, similiter in eodem signo Deus prædefinit contritionem v. gr. D. Petri, & permittit ejus peccatum, quamvis peccatum ex parte objecti præcedat contritionem, sicut in eodem signo Deus decernit, & cognoscit durationem hodiernam, & crastinam, quamvis hodierna præcedat crastinam; sic pariter in eodem signo prædefinit martyrium, & permittit peccatum Tyrannorum, quamvis peccatum antecedit martyrium.

Sequitur 2. Deum in eodem signo prædestinare ad gloriam ut coronam, & velle conferre auxilia efficacia, quibus ponantur merita, vult enim simul ex parte actûs merita causare gloriam moraliter, & ipsam gloriam, sicut simul vult solem causare lucem, quamvis enim verum sit, quodd Decretum collativum auxilii efficaciis sit actus liberalitatis divinæ, & Decretum collativum gloriæ ut coronæ sit actus iustitiæ, at idem indivisibilis actus simul gerit utrumque munus, sicut idem actus potest esse misericordiæ, & iustitiæ etiam in creatis, si procedat ex motivo utriusque virtutis, cum sola distinctione rationis ratiocinatæ per æquivalentiam pluribus actibus diversis.

Sc-

Sequitur 3. Prædestinationem , & Reprobationem positivam (qua scilicet decernitur pœna Reprobis) neque esse ante, neque post prævisa merita , aut demerita, sed in eodem signo, videri merita, & decerni gloriam, videri demerita, & decerni pœnam; ita tamen ut hujusmodi actus simplicissimus æquivalet pluribus ; qui in creatis ita se habent, ut unus causet alterum, sicuti in Deo intellectio , & amor necessarius suimet est idem actus indivisibilis æquivalens duobus, qui in creatis, ubi distinguuntur realiter, ita se habent, ut intellectio causet amorem, non è contra , propterea sicuti per solam distinctionem rationis ratiocinata verum est, quòd ideò Deus amat seipsum, quia seipsum cognoscit , & non è converso , quin tamen ex parte objecti cognitio suimet præcat amorem ; ita verum est, quòd ideò decernit pœnam, quia videt peccatum actu existens, quin decretum pœnæ consequatur ex parte objecti ad prævisionem , aut permissionem peccati. Quare in eo tantum sensu admitti potest doctrina communior, quòd Deus decernat gloriam post merita prævisa (juxta illud Apostoli, *Quos præscivit prædestinavit* , ubi addit Ambros. *Non enim ante prædestinavit , quam præsciret, sed quorum merita præscivit , eorum premia prædestinavit*) nec non Doctrina communissima , quòd Deus decernat pœnam æternam post prævisionem demeritorum , quatenus æquivalenter prævisio meritorum , aut demeritorum præcedit Decretum gloriæ, aut pœnæ, non verò formaliter, idem enim actus divinus, qui simul est prævisio demeritorum, & decretum pœnæ, æquivaleret duobus, qui in creatis ita distinguuntur, ut prævisio culpæ antecedit , & dirigat ad decernendam pœnam ; sicut in Deo solum æquivalenter actus intellectus præcedit actum voluntatis.

Sequitur 4. Quòd cum sola distinctione rationis ratiocinata bene salventur istæ causales : ideò Deus decernit gloriam, quia confert auxilium efficax, & meritum, non è contra ; & similiter , ideò prædestinavit Incarnationem ut reparativam , quia permittit peccatum , & non è contra : Ad eum modum quo ideò Deus est volitivus, quia est intellectivus , & ideò homo est risibilis, quia rationalis, & non è contra : propterea nullatenus ex parte objecti distinguuntur. Decretum intentivum finis, & decretum electivum mediorum ; ac executivum tum mediorum , tum finis ; quia sicut perfectissime

eodem actu Deus cognoscit finem, & media, ita eodem actu intendit finem, eligit media, & finem, ac media vult exequi.

Sequitur 5. Deum nunquam dirigi ad quidquam discernendum à Scientia ulla visionis, cum enim Decretum Dei sit unicum, & indivisibile, non præsupponit aliud ante se, atque aded non præsupponit scientiam visionis, quæ in Decreto libero fundatur, Hinc ad præfiniendam Incarnationem, ut redemptivam, vel ad decernendam poenam æternam, non potest dirigi à scientia visionis de peccato absolute futuro, quæ consequitur ad peccati permissionem, quia Decretum permissivum peccati non antecedit Decretum prænitivum Incarnationis, vel poenæ æternæ.

VII. Sequitur 6. Facile in nostra sententia explicari, quomodo Beatissima Virgo ex meritis Christi non solum non contraxerit peccatum originale, consistens (ut dicemus in de Poenitentia) in reatu odii divini, & poenæ damni, sed etiam caruerit debito proximo contrahendi originale; ed quod voluntas Virginis non fuerit moraliter inclusa in voluntate Adæ, Salazar c. 24. ap. Lugo d. 7. s. 3. inhærendo doctrinæ D. Tho. quod, Adamo non peccante, Verbum non fuisset incarnatum, hoc explicat admittendo plura signa in negotio redemptionis, videlicet quod 1. Deus decreverit homines condere, & constituere Adamum caput physicum, & morale reliquorum, cum quo pactum iniret de transfundenda gratia ad posteros: Secundò quod viderit lapsum Adæ; Tertio quod præviderit Christum redemptorem; Quarto quod illi providerit in matrem non unam ex iis scæminis prævisis in primo signo futuris, sed aliam sanctissimam, & undique immaculatam, quæ cum cæteris pactum non intraverat, quia solum initum fuerat pactum pro Posteris, qui pro illo signo videbantur futuri, non pro omnibus possibilibus: unde infert B. Virginem non habuisse debitum proximum contrahendi originale, cum non fuerit inclusa in pacto cum Adamo, sed solum habuisse debitum remotum, quatenus erat una ex descendantibus ab Adamo, quod autem ex meritis Christi fuerit sic præservata, & redempta, explicat Salazar dicendo, quod post Christum constitutum Redemptorem, destinata fuerit ex meritis Christi talis mater. Hanc viam fusè impugnat Lugo loc. cit. tum quia videtur im-

imperceptibile, quod Deus pro primo signo Beatam Virginem non præviderit ut futuram, tum etiam quia inverisimile est, quod sola B. Virgo condita sit ex meritis Christi, cum potius dicendum sit, omnia propter Christum condita esse, utpote *Primogenitum omnis creaturæ*.

Nos negatis his, aliisque signis in divino Decreto, utpote invehentibus præcisiones ex parte objecti, distinctionem, compositionem, aliasque imperfectiones, dicimus cum Munieffa hic, quod Deus post scientiam mediam de omnibus actibus liberis conditionatè futuris, ac præsertim de lapsu Adæ, unico indivisibili Decreto simul decreverit ponere Christum, ejusque intuitu mundum, omnesque homines futuros, & simul iniisse pactum cum Adamo; simul etiam ob futurum lapsum Adæ decrevisse Christum redemptorem, ejusque matrem, quam excluserat à pacto, eo quod intuitu meritorum Christi contulerit illi sapientiam, & gratiam penè immensam, adeò ut non debuerit in voluntate Adæ includi, illumque habere ut Tutorem; quæ omnia eodem actu præstari possunt, citra signorum multiplici-
tatem.

VIII. Sequitur 7. Admitti posse, quod permissio peccati sæpè sit effectus Prædestinationis, quod licet negent Vasq. Becan. & Alii, Admittunt tamen Suar. l. 3. de Præd. c. 8. Amic. Granad. ex D. Tho. qui 1. 2. q. 79. n. 4. hæc habet: *Deus permisit Aliquos cadere in peccatum, ut peccatum suum agnoscere humilientur, & convertantur*; quod etiam docent communiter PP. unde ad illud Apostoli: *diligentibus Deum omnia cooperantur in bonum*; addit Glossa etiam peccata, & ad Timoth. 1. dicitur: *Tradidit eos satana, ut discant non blasphemare*. In eo autem sensu admitti potest, quod permissio peccati sit effectus prædestinationis, non quasi verò Decretum prædestinativum formaliter causet permissionem peccati, sed solum æquivalenter, quatenus in Deo datur unus indivisibilis actus æquivalens pluribus, qui si darentur in creatis, voluntas dandi præmium causaret permissionem culpæ, ad quam consequatur humilitas, conversio, & meritum: Propterea Deus vult permissionem peccati propter prædestinationem, & medium propter finem non subjective, sed objective, quatenus eodem actu vult unum objectum causare alterum, adeò ut prioritas, & posterioritas sit
se

solum in objectis, non in ipso decreto, seu actu divino, nisi per æquivalentiam, quatenus æquivalet pluribus actibus, qui si distinguerentur realiter, alter esset altero prior.

Similiter in hoc sensu potest Deus in pœnam unius peccati velle permissionem alterius, quatenus Deus eodem indivisibili actu æquivalente duobus, vult simul permissionem peccati prioris, & posterioris, ita tamen, ut si duo illi actus distinguerentur, permissio peccati prioris causaret permissionem posterioris, non contra.

In hoc eodem sensu potest esse verum, saltem in Alia Providentia, quod prædestinatio ad Gloriam sit æquivalenter in priori ad prævisionem meritorum: quatenus dari potest actus Dei indivisibilis æquivalens duobus, qui si distinguerentur, Prædestinatio ad gloriam causaret collationem meritorum, quamvis autem plurimi DD. doceant, de facto Prædestinationem ad gloriam esse in hoc sensu ante prævisa merita; Nullus tamen è Catholicis, ut notat Platel. 1. p. n. 208. docuit, quod pariter Reprobatio positiva de facto sit ante prævisa demerita, ne æquivalenter quidem; videtur enim repugnare, quod Deus eodem indivisibili actu decernat pœnam æternam, & permittat peccatum, ita ut si distinguerentur, Decretum pœnæ causaret permissionem peccati, quia sic Deus directe, & primario intenderet pœnam, & in ordine ad pœnam vellet permissionem peccati, quod videtur dissonum Divinæ benignitati, de qua dicitur: *Nolo mortem peccatoris* &c. unde communiter rejicitur Arriaga, qui q. 39. de Deo. n. 8. putat, in Alia providentia probabiliter id non repugnare.

IX. Utrum autem possit similiter Prædefinitio Incarnationis ut redemptivæ esse æquivalenter in priori ad permissionem peccati Adæ, sicut potest electio ad gloriam esse æquivalenter in priori ad merita prævisa? Affirmant probabiliter Recentiores cum Lumb. n. 661. & Quiros de Prædestinatione d. 22. Ratio est, quia in hoc casu directe, & primario intenderetur à Deo Gloria Redemptoris, & Adamo non conferretur auxilium inefficax, quia inefficax, sed conferretur eo animo, ut si prævideretur efficax, illud ipsum daretur, sed tunc non præfiniretur Incarnatio ut redemptiva. Idcirco autem si Præfinitio Incarnationis ut Redemptivæ esset in

In priori ad scientiam mediam, traheret in Deo amorem peccati, i quia positâ eâ præfinitione conferendum esset Adamo auxilium inefficax, quâ inefficax ut ponatur peccatū per Incarnationem reparandum: At si præfinitio Incarnationis ut Redemptivæ consequatur ad scientiam mediam de peccato Adæ sub auxilio A, non traheret in Deo amorem peccati, quia quamvis ea præfinitio æquivalenter causaret permissionem peccati, seu collationem auxilii inefficacis, auxilium tamen inefficax non conferretur ut inefficax, sed eo animo, ut si prævisum fuisset efficax, illud ipsum fuisset dandum, sed non fuisset præfinita Incarnatio ut Redemptiva, unde non traheret amorem peccati.

A R T I C U L U S III.

Diluuntur Objecta.

X. **O** *Bjic.* 1. ex Scot. in 3. d. 29. Qui vult aliquid ordinatè, prius vult finem, deinde media; Sed Deus vult omnia ordinatissimè, ergo prius vult finem, putâ Prædestinationem ad gloriam, deinde vult media, nempe auxilia efficacia, ergo danda est pluralitas Decretorum.

Confirm. 1. Intentio finis præire debet electionem mediorum; cum debeat movere ad talem electionem, ergo ut prius.

Confirm. 2. Decretum volens remedium peccati per Incarnationem essentialiter supponit peccatum existens, atque adeò permissionem peccati, cum non sit capax remedii peccati conditionatè futurum, sicut non est capax meriti, aut demeriti, nisi actus bonus, aut malus absolutè existens: Qua de causa etiam Decretum de danda gloria ut corona essentialiter supponit merita existentia, atque adeò præsupponit aliud Decretum de conferendis auxiliis efficacibus, quibus merita ponantur, ergo negari non potest pluralitas Decretorum, seu signorum ex parte objecti.

Resp. dist. maj. Si sit Agens intellectivum limitatum, *conc.*, si illimitatum, & comprehensivum, non indigens consultatione, *neg. maj. & consequ.* Agens limitatum intendens v. gr. victoriam, debet consultare de mediis, & successivè ab uno eventu dirigi ad alia media capeßenda; At Deus omnia comprehendens
per

per scientiam simplicis intelligentiæ, & per mediam potest eodem actu intendere finem, & eligere media, cum sola prioritate objecti ad objectum, non actus ad actum. Auxilia efficacia, & merita præire debent ad gloriam, quam moraliter causant; sicut duratio hodierna præire debet crastinam, quin debeat unum Decretum præire alterum, cum sufficiat idem indivisibile Decretum æquivalens pluribus, quæ si distinguerentur, unum alteri præiret, sicut intellectio, & volitio Divina est idem indivisibilis actus æquivalens duobus, qui si distinguerentur, intellectio præiret volitioni, non è converso.

Ad 1. *Confirm. dist.* similiter *antec.* in Agente intellectivo limitato, concedo, in illimitato, quod non debet moveri ab intentione finis ad consultandum de mediis, *nego antec. & consequ.*

Ad 2. Deus volens remedium peccati per Incarnationem, non debet præsupponere existentiam absolutam peccati, antequam remedium prædefiniat, sed solum debet velle, quod remedium consequatur ad peccati existentiam, unde potest eodem Decreto, & in eodem signo permittere peccatum, & velle remedium, ad eum modum, quo simul vult durationem hodiernam, & crastinam, quæ non sunt simul, sicut enim Deus cognoscit, ita pariter vult, videlicet successiva simul, dependentia independentem, æternaliter temporalia, propterea simul vult auxilia efficacia, merita, & gloriam ut coronam; ita ut idem actus Divinus quatenus conferens auxilia efficacia sit actus liberalitatis, & quatenus conferens gloriam ut coronam, sit actus iustitiæ, sicut homo qua animal sentit, qua rationalis discurret, citra distinctionem objectivam inter animal, & rationale. Idemque dicas de Decreto simplicissimo, quo simul vult permissionem peccati, & pœnam, quamvis enim non sit punibile peccatum conditionatè futurum, nihilominus post scientiam mediam de peccato conditionatè futuro potest Deus velle permissionem peccati, ratione cuius peccatum erit absolutè futurum, & simul velle quod pœna consequatur ad existentiam peccati absolutè futuri, ut mox clariùs explicabimus.

XI. *Obje.* 2. Esto Deus possit unico Decreto velle causam physicam, & effectum, non tamen causam moralem, ejusque effectum, nempe meritum, & præmium, per-

permissionem peccati, & pœnam, ergo unicitas Decreti non subsistit. *Prob. antec.* meritum est causa moralis præmi intentionaliter, per hoc quod moveat præmiantem ad conferendum præmium, atqui non potest movere præmiantem ad collationem præmii, nisi solum meritum existens in statu absoluto, non verò in statu conditionato, ut patet; Aliter quilibet puniri posset ob culpas conditionatè futuras, ergo antequam decernatur præmium, præsupponi debet meritum existens in statu absoluto, atque adeò ad Decretum præmii præire debet Decretum de conferendis auxiliis efficacibus, à quibus meritum causatur.

Confirm. Deus idè decernit pœnam, quia prævidet peccatum existens, atque adeò permissum, ergo Decretum permissivum peccati antecedit Decretum collativum pœnæ.

Resp. Cum Mauro q. 76. de Deo n. 11. Meritum causare intentionaliter præmium, non quia Deus rigorosè movetur ab ullo objecto creato, nec per hoc, quòd debeat prius decerni meritum, & deinde præmium, sed per hoc, quòd debeat prius existere meritum exigitivum præmii, ac deinde præmium; unde ante Decretum præmii solum præire debet scientia media, quòd si conferatur auxilium efficax, & decernatur præmium, meritum erit in statu absoluto, antequam existat præmium, sicut ut possit decerni duratio crastina, non debet prius cognosci per scientiam visionis duratio hodierna, sed sufficit, quòd per scientiam simplicis intelligentiæ præcognoscatur, quòd si decernatur utriusque durationis existentia, duratio hodierna antecedit crastinam. In forma *neg. antec. ad prob. disting. maj.* meritum causat intentionaliter præmium movendo præmiantem ad collationem præmii post existentiam absolutam meriti, si *ly post* importet posterioritatem objectivam præmii ad meritum, concedo; si formalem actus ad actum, *nego maj.* & *conf.* sufficit quòd meritum in statu absoluto præcedat præmiuni, & quòd vi meriti præmium conferatur, quin debeat præcognosci meritum existens in statu absoluto, antequam præmium decernatur.

Ad Confirm. *dist.* cum eodem Mauro *antec.* idè decernit pœnam, quia prævidet peccatum existens in signo antecedenti, nego, quia videt peccatum absolute existens in eodem signo, ad eum modum quo idè

Deus est volitivus, quia intellectivus, cum sola prioritate objectiva, seu connotatorum, *conc. antec. nego conseq.*

XII. *Objic. 3.* Si idem esset actus prædefiniens Incarnationem in remedium peccati, & simul permissivus peccati, sequeretur quod Deus amaret peccatum: *Prob. sequela*, quia qui vult finem efficaciter, vult etiam media, & omnia prærequilita ad talem finem, atqui ad ponendam Incarnationem, ut curativam vulneris, efficaciter à Deo intentam, essentialiter prærequiritur vulnus, seu peccatum, ergo Deus amaret peccatum, quod tamen non sequeretur, si Deus prius prævideat peccatum absolute existens ex culpa Adæ, & deinde decernat Incarnationem redemptivam.

Resp. Medium in rigore esse illud, quod habet virtutem causandi, vel disponendi ad finem, non verò quod utcumque prærequiritur; hinc ægritudo v. gr. non est rigorose medium ad curationem, sed dicitur prærequiritum tamquam materia destruenda, sicut etiam beneficium est prærequiritum, non medium ad actum ingratitude, & eodem modo peccatum non est medium, sed prærequiritum ad Incarnationem ut redemptivam. Hoc posito, qui amat efficaciter finem, debet quidem velle media, non tamen prærequilita ad talem finem, si ea possint poni, & videantur ponenda ab alio, sic qui videt vulnus ab alio ponendum, potest efficaciter velle curationem, quin teneatur velle ipsum vulnus; eodem modo Deus prævidens per scientiam mediam peccatum ponendum à creatura, si conferat animo sincero auxilium inefficax, potest eodem actu velle auxilium inefficax, & permissionem peccati, & simul intendere Incarnationem ut redemptivam, citra amorem peccati. In forma *nego antec. ad prob. dist. maj.* vult prærequilita ad finem, si ea sint ponenda ab ipso intendente finem, *conc.* si ea possint ab alio poni, & prævideantur ponenda, *nego maj. & distincta min. nego conseq.* Sic qui vult ædificare propè fluvium, non est necesse, quod velit aquam ad ædificium necessariam adducere, sed sufficit quod videat ibi aquam non defuturam.

XXII. *Objic. 4.* Si Deus eodem Decreto prædefiniret Christum Redemptorem, seu remedium peccati, & simul peccatum permetteret, non posset odisse peccatum, quamvis peccatum non sit medium, sed prærequiritum

tum ad redemptionem, ergo &c. *Prob. sequela*; si Deus odisset, seu nollet peccatum. sequeretur quod simul vellet finem, nempe remedium peccati, & simul nollet requisitum ad talem finem, nempe peccatum, quod repugnat.

Confirm. Deus volens efficaciter Incarnationem ut redemptivam, non potest simul serio velle, quod impedit talem finem, sed carentia peccati utpotè prærequiriti impedit talem finem, ergo non posset serio velle carentiam peccati, atque adeò non posset peccatum odisse.

Confirm. 2. apud Lumb loc. cit. Volitio efficax finis est nolitio efficax tum finis contrarii, tum mediæ inducentium finem oppositum v.gr. volitio efficax vitæ Petri est nolitio efficax tum mortis, tum vulneris inducentis mortem, ergo volitio efficax Incarnationis Redemptivæ est nolitio efficax tum carentiæ Redemptionis, tum carentiæ peccati, quæ negationem Redemptionis induceret, atqui nolitio efficax carentiæ peccati est amor peccati, ergo unicitas Decreti traheret amorem peccati.

Resp. Argumentum solvendum etiam ab Adversariis ponentibus in eodem instanti pluralitatem Decretorum, ut patet consideranti. In forma, *nego sequelam*: ad *prob. dist. maj.* simul vellet finem, seu remedium peccati efficaciter, & nollet requisitum, seu peccatum ineffaciter, *concedo*; utrumque vellet, & nollet efficaciter, *nego maj. & conseq.* Non pugnat amor efficax alicujus objecti, & displicentia inefficax, & conditionata ejusdem objecti, ex diversis motivis: sic projiciens efficaciter merces ad vitandum naufragium, habet etiam displicentiam inefficacem, & conditionatam de tali projectione ex amore illarum, sic Deus in eodem instanti vult efficaciter damnationem Judæ post peccatum, & ineffaciter ejus salvationem, ergo etiam potest in casu nostro Deus eodem actu æquivalente pluribus efficaciter velle redemptionem supponentem peccatum, & ineffaciter velle carentiam peccati. Universim enim Deus conferendo auxilium inefficax, vult carentiam peccati, solum efficaciter, quantum est ex parte sua, cum det omnem sufficientiam ad bonam operationem, quam suadet, vel præcipit, quamvis nolit impedire peccatum efficaciter, ut posset.

Ad primam confirm. diſp. pariter maj. Non poteſt ſimul ſerio velle efficaciſſime carentiam peccati, quæ impedit redemptionem, conc. inefficaciſſime, nego maj. & conſequentiam.

Ad ſecundam verum eſt, quod volitio efficaciſſima finis ſi nolitio efficaciſſima tum finis contrarii, tum mediocum inducentium finem oppoſitum; at poteſt eſſe nolitio ſolum inefficaciſſima prærequiſitorum ad finem oppoſitum; In caſu noſtro volitio efficaciſſima Redemptionis eſt ſolum nolitio inefficaciſſima carentiæ peccati, ſeu innocentie prærequiſitæ ad negationem redemptionis, hoc eſt ad finem oppoſitum, ſufficit enim quod Deus inefficaciſſime nolit carentiam peccati, quæ eſt impedimentum ad redemptionem intentam. Sic quando Deus efficaciſſime prædefinit Martyrium ſupponens peccatum Tyranni ſufficit quod inefficaciſſime velit innocentiam Tyranni, quæ eſt impedimentum ad martyrium.

XIV. Objic. 5. Si Deus poſſet eodem actu poſt ſcientiam mediam præſumere Redemptionem, & ſimul conferre auxilium inefficaciſſimum, amando inefficaciſſime carentiam peccati impeditivam Redemptionis intentæ, poſſet etiam in priori ad ſcientiam mediam præſumere Redemptionem, & deinde conferre auxilium inefficaciſſimum citra amorem peccati, intendendo etiam inefficaciſſime carentiam peccati impeditivam redemptionis præintentæ, ſequela non admittitur, ergo: probatur ſequela, quia ſicut Deus intendit poſt ſcientiam mediam redemptionem ex ſuppoſitione, quod auxilium A ſit inefficaciſſimum, & ideo non confert illud quia inefficaciſſimum amando inefficaciſſime, & peccatum; ita poſſet intendere Redemptionem in priori ad ſcientiam mediam ex ſuppoſitione quod aliquod auxilium vage ſit inefficaciſſimum, & ſic poſſet deinde animo ſincero conferre auxilium inefficaciſſimum, citra amorem inefficaciæ, & peccati.

Confirm. 1. Quia in utroque caſu Deus confert auxilium inefficaciſſimum ut utile Redemptioni intentæ, & eſt utile, quia inefficaciſſimum, ergo vel in utroque caſu confert auxilium inefficaciſſimum, ut inefficaciſſimum, amando peccatum, vel in neutro.

Confirm. 2. Reprobatio poſitiva neque in priori ad ſcientiam mediam cauſare poteſt formaliter, neque in poſteriori ad ſcientiam mediam cauſare poteſt æquivalenter collationem auxilii inefficaciſſimi, ſeu permiſſionem pec-

peccati, ergo neque præfinitio Redemptionis, atque adeò nequit Deus post scientiam mediam eodem actu præfinire Redemptionem, & permittere peccatum.

Resp. Nego sequelam: Disparitas est, quia si post scientiam mediam Deus præfinit Redemptionem, potest simul conferre auxilium A prævisum inefficax, animo sincero, ut ponatur bona operatio, quia potest eo animo illud conferre, ut si poneretur bona operatio, illud ipsum daret, sed non præfiniret Redemptionem, unde confert auxilium A inefficax, sed non qua inefficax, & citra amorem peccati: contra verò, si in priori ad scientiam mediam præfiniret Deus efficaciter redemptionem, teneretur eligere auxilium inefficax, ne impediat redemptionem præintenta, & ideo auxilium inefficax conferretur ut inefficax.

Ad primam Confirm. *Nego antecedens*: Si Redemptio præfinitur post scientiam mediam, tunc auxilium inefficax utile redemptioni ordinatur quidem ad redemptionem, sed non confertur ut utile illi, seu qua inefficax; Eo enim animo confertur, ut si esset efficax, & non esset utile redemptioni intentæ, adhuc illud conferretur, sed non intenderetur Redemptio: quòd tamen non posset accidere, si in priori ad scientiam mediam præfiniretur Redemptio.

Ad secundam Sicut Reprobatio positiva, & permissio peccati post scientiam mediam sunt idem indivisibilis actus æquivalens duobus, qui si distinguerentur, permissio peccati præiret reprobationem, non è contra, ità sufficit nobis, quod præfinitio redemptionis, & permissio peccati sint idem actus æquivalens duobus, qui si distinguerentur, permissio peccati præcederet, non verò decretum Redemptionis. Diximus tamen *Art. antecedente*, probabiliter à Recentioribus sustineri, quod possit dari actus divinus æquivalens duobus, qui si distinguerentur, præfinitio Redemptionis præiret, tamquam principaliter, & finaliter intenta ipsam permissionem peccati, sicut in multorum sententia potest prædestinatio ad gloriam æquivalenter præire ad prævisionem meritorum; quin tamen possit reprobatio præire permissionem peccati; quia alienum est à divina benignitate principaliter, & directè intendere poenam, & in ordine ad illam permittere culpam.

XV. *Object. Ult.* Si Deus unico Decreto præfiniret

M 3

cau-

causam, & effectum, sequeretur quod posset voluntas creata impedire existentiam suæ causæ, atque adeo seipsam, unde esset prior, & posterior se ipsa. *Probaturs sequela*, voluntas potest impedire suum actum liberum, ergo posset impedire Decretum prædefinitivum talis actus; sed huiusmodi Decretum identificaretur cum Decreto causante existentiam ipsius voluntatis, ergo voluntas potens impedire Decretum præfinitivum sui actus posset impedire causam suam, atque adeo seipsam.

Confirm. 1. Quia si idem esset Decretum collativum concursus indifferentis voluntati creatæ, & simul præfinitivum actus, sequeretur quod quando in scientia media ex parte hypothetis videtur Decretum collativum concursus indifferentis, videretur etiam Decretum prædefinitivum actus liberi, quod essentialiter connectitur cum tali actu; atqui si ex parte hypothetis datur aliquid essentialiter connexum cum actu, tunc huiusmodi objectum non pertinet ad scientiam mediam, sed ad scientiam simplicis intelligentiæ, ergo unitas Decreti destruit scientiam mediam.

Confirm. 2. Si Deus eodem actu præfiniret Incarnationem, & permetteret peccatum Adæ, vellet chimeram; nempe quod bona operatio conjungatur cum peccato Adæ. *Probaturs sequela*; Deum velle dare Adæ auxilium sufficiens animo sincero, est velle, quod bona operatio Adæ conjungatur cum tali auxilio tamquam cum sua causa immediata, & cum suo Decreto collativo talis auxilii, tamquam cum causa mediata bonæ operationis; Atqui si idem Decretum esset simul volitivum Redemptionis, essentialiter coexisteret cum peccato prærequisito ad Redemptionem volitam, ergo Deus volens, quod bona operatio Adæ coexistat cum suo decreto coexistente cum peccato, vellet etiam quod bona operatio, & peccatum Adæ coexistant inter se.

Resp. Voluntatem creatam posse impedire Decretum Dei simplicissimum, quia prædefinitivum actus boni, non quia causativum ipsius voluntatis, quatenus si voluntas non poneret actum bonum, tunc daretur aliud Decretum, quod simul esset permissivum actus mali, & causativum voluntatis; sicuti si idem sit actus v. gr. scientiæ, & opinionis, voluntas potest impedire hunc actum indivisibilem, prout est opinionis, non

pro-

prout est scientiæ, quatenus si nollit voluntas, quod intellectus opinetur, daretur alius actus, qui solum esset scientiæ, non opinionis.

Ad primam Confirm. In scientia media ex parte hypothesis venit Decretum quâ collativum Auxilii indifferentis, non quâ prædefinitivum consensûs; quod tamen decretum est tantum objective in mente divina, non subjective in divina voluntate, ad eum modum, quo per ipsos Thomistas (ut notat Henao n. 57. 36) ut Deus habeat scientiam consensûs conditionatè futuri in Decreto, quod ipsi admittunt, absoluto ex parte actûs, conditionato ex parte objecti, debet ex parte hypothesis venire vocatio præscindens à vocatione prædeterminante ad consensum, vel à prædeterminante ad dissensum.

Ad secundam, Argumentum solvendum ab Adversariis etiam positâ multiplicitate Decretorum. Directè nego sequelam Deum conferendo Adæ auxilium sufficiens, velle quod bona operatio Adæ coexistat cum suo Decreto quâ collativo auxilii sufficientis, non quâ præinitivo Redemptionis, quæ reduplicativè important solum distinctionem rationis ratiocinatæ; sicuti cum dicitur homo quia rationalis discurrit, non quia animal. Deinde sicuti qui desiderat bonum absens, non desiderat, quod bonum coexistat cum actû desiderii essentialiter præsupponentis absentiam boni concupiti, sed vult quod bonum coexistat sibi, adeo ut possit de illo gaudere, non desiderare; Ità Deus conferendo Adæ auxilium sufficiens, non vult bonam operationem Adæ conjungi cum suo Decreto præinitivo Redemptionis, & coexistente cum peccato, sed vult conjungi secummet, adeo ut non possit Redemptionem præstinare.

XVI. Ex quibus omnibus sequitur, probabile esse, quod possit Decretum Redemptionis habere prioritatem etiam formalem, pedum æquivalentem relatè ad permissionem peccati in hypothesis, quod daretur in Deo pluralitas Decretorum. Ratio est; quia ex Amore Redemptionis finaliter intentæ debet quidem oriri amor permissionis peccati, quæ est medium ad talem finem; non tamen amor peccati, quod est merum prærequisitum; propterea Deus efficaciter intendens Redemptionem in priori ad permissionem peccati, deberet conferre auxilium inefficax, solum ut utile ad

ponendam bonam operationem, non verò ut utile ad Redemptionem ratione suæ inefficiæ, intendens enim finem non tenetur amare prærequisitum, aut ejus utilitatem in ordine ad finem, sed sufficit quod prævideat illud esse utile, & quod ab alio ponendum sit.

Et ratio à priori est, quia quamvis pro illo priori quo intelligitur Decretum Incarnationis in remedium peccati, nondum existat pro illo signo permissio peccati, atque adeò non existat pro illo signo peccatum reparandum in statu absoluto, non proinde sequitur, quòd decretum præfinitivum Incarnationis redemptivæ debeat esse causalis translatio peccati de statu conditionato ad absolutum (quatenus scilicet debeat trahere Decretum collativum auxilii inefficacis qua inefficacis; quòd certè ferret in Deo amorem peccati) etenim Decretum prædefinitivum Incarnationis redemptivæ solum debet trahere permissionem peccati transferendi de statu conditionato ad absolutum ex culpa voluntatis creatæ, quòd non fert in Deo amorem peccati: Et ratio est, quia ex hoc, quòd Deus in posteriori ad scientiam mediam de auxilio A inefficaci præfinit Incarnationem in remedium peccati, sequitur solum quod debeat dari peccatum reparandum pro statu absoluto, atque adeò solum sequitur quod debeat conferre auxilium illud A prævisum inefficax per scientiam mediam, sub quo voluntas prævisa est peccatura, & translatura peccatum ad statum absolutum, non tamen sequitur quod auxilium illud A debeat dari qua inefficax, seu ex animo quod cum peccato conjungatur; cum benè possit illud auxilium dari ex intentione seria, quod sequatur operatio bona; atque adeò quod si cum illo conjungeretur operatio bona, & esset efficax, illud ipsum Deus esset daturus, sed non esset prædefiniturus pro tali hypothese Incarnationem redemptivam. Idcirco enim dicimus, quòd Incarnatio redemptiva prærequirat scientiam mediam de auxilio A, ne Deus cæco modo præfinit, & decernat, nam si auxilium A per scientiam mediam prævideretur efficax, non posset tunc præfinire Incarnationem redemptivam peccati conjungendi cum auxilio pro statu absoluto, secus verò si auxilium A per scientiam mediam prævideatur inefficax. Potest itaque citra amorem peccati præfinire Deus Incarnationem Redemptivam in

po

posteriori ad scientiam mediam de peccato sub auxilio A , & in priori ad scientiam visionis de eodem peccato absolute futuro sub eodem auxilio A.

Confirm. Potest Deus permittere peccatum, prout de facto illud permittit , dando auxilium A prævisum per scientiam mediam inefficax, & non quâ inefficax, sed daturus illud idem libentius, si prævisum fuisset efficax, eò, quòd conferat illud intendendo bonam operationem , (esto intendat illam inefficaciter , seu potius efficaciter , quantum est ex parte sua , ità tamen, ut non impediat, prout posset , quòd illud reddatur inefficax vizio voluntatis) ergo etiam, potest Deus præfinire Incarnationem redemptivam in priori ad scientiam visionis de peccato sub auxilio A præviso per scientiam mediam inefficaci.

Prob. Conseq. Quia ex vi talis præfinitionis Deus solum temetur permittere peccatum sub auxilio A (prout de facto illud potest permittere) conferendo auxilium A prævisum inefficax per scientiam mediam daturus illud idem, si esset prævisum efficax , sed non præfiniendo Incarnationem redemptivam talis peccati ; ergo sicut de facto citra amorem peccati Deus potest permittere peccatum sub auxilio A præviso per scientiam mediam inefficaci , ità poterit præfiniendo in priori Incarnationem redemptivam obligari ad ponendam eodem pacto ejusdem peccati permissionem.

XVII. Dices. Si præfinitio Incarnationis redemptivæ sit in priori ad permissionem peccati , & trahat peccati permissionem, eo ipso debet vi talis præfinitionis traduci causaliter peccatum de statu conditionato ad absolutum, atque adeò peccatum, quanvis ponendum esset à Creatura, adhuc tribueretur Deo, ut proinde non posset Deus conferre auxilium A prævisum inefficax, nisi quâ inefficax, non daturus illud, si prævisum fuisset efficax, ergo repugnat hoc systema. *Prob. antec.* Tunc deberet vi talis præfinitionis traduci causaliter peccatum de statu conditionato ad absolutum, quando nisi ità traducere-tur, non posset haberi talis præfinitio, sed nisi sic traducatur, talis præfinitio haberi non posset , ergo vi talis præfinitionis causaliter traduceretur peccatum de statu conditionato ad absolutum: *Probat. min.* Quia impossibile est, quòd reparetur peccatum pro statu conditionato, seu peccatum solum conditionatè existens (siquidem peccatum pro tali statu, sicut non potest à Deo pu-

niri, ita neque est capax remedii) ergo ut possit præfinitur Incarnatio reparativa, debet in eo signo intelligi peccatum futurum pro statu absoluto (cùm correlativa sint simul naturâ, & cognitione ex Philosopho *cap. 3. de Prædicamentis*) atqui in eo signo non intelligitur traductum de statu conditionato ad absolutum ex culpa voluntatis creatæ, eò, quòd in tali signo nondum intelligitur decretum permistivum peccati ponendi à Creatura, ergo debet intelligi traductum ad statum absolutum saltem causaliter ab ipsa præfinitione Incarnationis, atque adeò peccatum tribueretur Deo intendenti Incarnationem reparativam.

Resp. In eo sensu Philosophum loco laudato velle, quòd correlativa sint simul, non solum cognitione, sed etiam naturâ, quatenus forma denominans unum correlativum, debet simul denominare alterum. E. gr. quamvis causa sit in priori signo naturæ ad effectum, & scibile sit in priori natura ad cognitionem, quam causat, nihilominus eadem forma, nempe eadem actio, quæ denominat Solem v. gr. esse causam lucis, denominat lucem esse effectum solis, & eadem forma, quæ scibile denominat potens cognosci, denominat possibilem cognitionem talis scibilis. Quinimo possunt duo correlativa in hoc sensu esse simul naturâ, & cognitione, quin tamen sint simul tempore, ut prius, & posterius; quamvis enim eadem forma, quâ A denominatur prius, denominet simul B, quòd sit posterius; B tamen est in posteriori tempore ad A, & sic à fortiori potest unum correlativum esse in posteriori signo naturæ ad alterum, quamvis in sensu explicato utrumque sit simul naturâ, & cognitione. Ad rem nostram. In eo signo, quo intelligitur Prædefinitio Incarnationis reparativæ, debet simul intelligi peccatum reparandum pro statu absoluto, & quamvis in eo signo debeat intelligi, non debet tamen pro eo signo intelligi existens, aut futurum pro statu absoluto, sed sufficit, quòd intelligatur absolutè futurum pro signo posteriori, pro quando intelligitur permistio peccati, seu collatio auxilii A, cum quo voluntas creata conjunget peccatum traducendo illud ad statum absolutum. Sicut enim in eo signo, in quo Sol intelligitur esse causa lucis, debeat intelligi lux, sed non debeat lux intelligi pro illo priori signo, cùm effectus debeat intelligi pro signo posteriori; ita in casu nostro, in

in illo signo ; quo intelligitur Decretum præfinitivum Incarnationis redemptivæ, debet intelligi peccatum reparandum fore pro statu absoluto : at non debet intelligi futurum pro statu absoluto tale peccatum nisi pro signo posteriori ad talem præfinitionem. Sic etiam in eo signo, in quo intelligitur dies A esse prior die B, intelligitur dies B, sed quamvis in eo signo intelligatur, non tamen intelligitur existens dies B pro illo eodem signo, immo nec pro illo eodem tempore, quo existit dies A : Quare sicut in eo signo, quo intelligitur existens prius in quantum prius, in eodem signo intelligitur existens posterius in quantum posterius, sed non intelligitur existens pro eodem signo, sed aut pro diverso signo naturæ, ut lux relatè ad solem, aut pro diverso tempore, ut dies crastina relatè ad hodiernam ; ità in eo signo, quo intelligitur præfinitio Incarnationis reparativæ, intelligitur existens peccatum futurum in statu absoluto reparandum ; non tamen intelligitur existens talis futuritio absoluta peccati reparandi pro illo eodem priori signo, sed pro signo posteriori, quo intelligitur permissio peccati, & voluntas creata traducens peccatum ad statum absolutum ; Cum supponatur, quòd illud decretum præfinitivum sit in priori, & in posteriori sit Decretum permissivum peccati. Quod luculentius patet in ipsa Præfinitione Incarnationis, seu in Decreto volente v.gr. existentiam in tempore ; in eo quippe signo, quo intelligitur existere ab æterno tale Decretum, intelligitur etiam Mundus existens pro eo signo ab æterno, sed existens in tempore, eò, quòd Decretum illud dicat relationem ad Mundum in tempore tanquam illius causa.

In forma ad argumentum *Nego antecedens*. Ad probationem *nego minorem*. Ad cuius probationem *concesso antecedente distinguo consequens*, debet in eo primo signo intelligi peccatum absolutè futurum, per hoc, quòd etiam absoluta futuritio peccati debeat etiam pro illo primo signo intelligi, *nego*, per hoc, quòd debeat intelligi pro secundo signo, pro quando intelligitur permissio peccati, *concedo consequentiam* ; & distinctà similiter minori subsumptà, *nego ultimam consequentiam*.

QUÆ-

QUÆSTIO III.

De Merito Christi relatè ad unionem hypostaticam, & alia bona sibi, & nobis collata.

COMMUNISSIMÈ Theologi, & PP. docent cum Aug. de Præd. SS. c. 13. Incarnationem de facto fuisse opus summiæ liberalitatis, & misericordiæ, ac nullis præcedentibus meritis condignis humanitatem Christi eventam esse ad unionem hypostaticam: Dubitatur tamen
 1. An Christi Humanitas mereri sibi potuerit unionem hypostaticam per operationes naturâ priores, aut posteriores ad illam? 2. An Christus per operationes suas tempore posteriores mereri potuerit Incarnationem; & quomodo Gratiam meruerint SS. PP. qui tempore illum præcesserunt? 3. Quid sibi, & nobis Christus meruerit?

ARTICULUS I.

An Christi Humanitas mereri potuerit unionem per operationes naturâ priores, seu posteriores ad illam?

I. CERTUM est, Humanitatem non meruisse de facto unionem hypostaticam per operationes tempore præcedentes ad illam, cum à Conciliis Ephesino, & Toletano definitum sit, Humanitatem Christi nunquam fuisse ante unionem hypostaticam. Præterea connaturaliter mereri non potuit unionem per operationes naturâ priores ad unionem, quia connaturaliter operari non poterat in priori ad subsistentiam, cum actiones sint suppositorum. Hinc verba illa Script. *Dilexisti iustitiam, &c. propterea unxit te Deus oleo latitiæ.* Non significant causam meritoriam, sed finalem, si intelligantur de oleo unionis hypostaticæ, quo fuit humanitas delibuta; adeo ut sensus sit, uncta es, ut diligeres iustitiam; vel ex Aug. significant, causam efficientem, & sensus est, quia inuncta es, dilexisti &c. vel ea verba intelligenda sunt de gloria corporis, quàm Christus meruit diligendo iustitiam. Idemque dicas de illis verbis Apoc. *Dignus est agnus, qui occisus est, accipere virtutem, & divinitatem.* Queritur itaque solùm: An potuerit divinitus humanitas unionem mereri per operationes naturæ ordine priores, seu posteriores ad illam?

II. Dico

II. Dico 1. Potuit divinitus Humanitas assumpta mereri unionem cum Verbo tum de congruo, tum etiam de condigno per operationes non solum tempore, sed etiam naturâ priores ad illam. Ità communius cum Bec. Perez, Arr. contra Gonet. d. 7. a. 2. Suar. Vasq.

Prob. Potuit divinitus humanitas in priori ad unionem cum Verbo terminari subsistentiâ Patris, aut Spiritus Sancti, & sic operari operationes infinitè meritorias, ergo potuit de condigno mereri unionem cum Verbo pro eodem instanti conferendam in præmium operationis naturâ prioris. Præterea si supponatur ex Philosophia posse divinitus humanitatem terminari simul subsistentiâ propriâ, & alienâ; ut docet Arriag. poterat humanitas ut habens propriam subsistentiam, & gratiam habitualement operari, & sic de congruo mereri unionem cum Verbo. Denique quamvis non possit connaturaliter operari humanitas in priori ad quamcunque subsistentiam, potest tamen divinitus, ut hic supponitur; atqui si humanitas denudata quâvis subsistentiâ, prædita tamen gratiâ sanctificante intensissimâ operetur, mereri potest de congruo unionem hypostaticam; prout de facto Deipara meruit Incarnationem de congruo, ut dicemus quæstione ultimâ hujus disputationis, ergo ut supra. Et sanè, si potest connaturaliter ipsa subsistentia propria emanare à natura, quæ in priori caret aliâ subsistentiâ, quidni possit divinitus antecederet ad quamcunque subsistentiam operari, ut possunt Accidentia Eucharistica citra inhærentiam agere?

Neque obstat, quòd hoc Axioma, Actiones sunt suppositorum, fuerit usurpatum in Synodo Florentina à Joanne Theologo, nemine ex Latinis, aut Græcis reclamante, Nam primò usurpatum fuit in sensu explicato, id est connaturaliter; Deinde non omnia, quæ in Conciliis assumuntur à disputantibus, censerentur debent approbata, cum possit Conclusio esse de fide, & ratio aliqua, quâ videtur conclusio probari, esse falsa.

III. Dico 2. Potest divinitus Humanitas mereri de congruo unionem hypostaticam etiam per operationes præceptas naturâ priores ad illam. Ità Arriag. Mendoza. contra Suar. Vasq. Lugo apud Platel. n. 280. Conclusio descendit ex dictis Disp. antec. qu. 4. ar. 2.

Prob. Tum quia potest Humanitas mereri unionem per operationes naturâ priores non præceptas, ergo à
for-

fortiori per operationes præceptas, utpote præstantiores : tum etiam , quia potest humanitas mereri unionem per operationes præceptas positas in instanti antecedente ; ergo etiam per operationes præceptas positas in signo antecedente , adeò ut in primo signo fuerit potentia ad omittendum actum præceptum , atque adeò potentia ad peccandum, in secundo actus præceptus, in tertio unio collata in præmium. Antecedens admittitur ab omnibus , quamvis enim nonnulli cum Aranda negent assumi posse humanitatem, quæ peccavit, nemo tamen negat assumi posse humanitatem, quæ posuit operationes præceptas , atque adeò, quæ potuit peccare : consequentia sequitur , quia sicut non derogat infinitæ Sanctitati humanitatis potentia ad peccandum pro instanti antecedente ad unionem, ita nec potentia ad peccandum pro signo antecedenti. Ratio in utroque casu est , quia si ea potentia in actum reduceretur , non esset Christus, qui peccaret, sed humanitas in sensu diviso ab unione. Et sanè Sanctitas, & amabilitas infinita communicata humanitati per unionem sicut non reddit illam pro priori inannihilabilem, ita nec impeccabilem, cum non possit unio, quæ consequitur , evertere prædicatum annihilabilitatis, & peccabilitatis, quod antecederet præsupponitur : quatenus solum Sanctitas Dei imparticipata excludit à subjecto quamcunque potentiam ad peccandum, non verò Sanctitas Divina participata, quippe quæ per potentiam hanc potius pericitur, quam imperficiatur, cum per illam reddatur composibilis cum operationibus antecederet præceptis humanitati, cum quibus non posset componi, si excluderet potentiam quamcunque ad peccandum.

Dices : Humanitas per unionem redditur summè, & infinitè sancta, & à scelere elongata, ergo debet excludere omnem illam potentiam ad peccandum, quam potest excludere, sed potest excludere potentiam ad peccandum pro signo antecedenti, si scilicet conferatur unio vel in priori ad quamcunque operationem, vel solum in posteriori ad operationes non præceptas, ergo debet etiam potentiam excludere. Unde sic debet unio conferri, ut non possit cadere sub meritum operationum præceptorum.

Resp. Argumentum probare : quòd neque possit conferri unio humanitati in præmium operationis præceptæ

ptæ positæ in instanti antecedenti, quia hanc etiam potentiam ad peccandum potest excludere: quare *negō consequentiam*; Etenim si non posset conferri unio in præmium operationis præceptæ, derogaretur tum Divino dominio, tum etiam ipsi Sanctitati humanitatis, quæ componi non posset cum operationibus præceptis præstantioribus, ut fusè ostendimus loco laudato.

IV. Dico 3. Non potuit Christus mereri de condigno pro primo instanti unionem per operationes naturæ ordine posteriores ad illam. Ità communius cum Angelico, Vasq. Lugo contra Suar. *d. 10. sect. 4.* Perez, Martinon.

Prob. Tum à posteriori, quia aliter de facto illam meruisset, eò, quòd gloriosius sit illam habere ex proprio merito, quàm gratis, quod tamen non admittitur; tum à priori, quia Principium meriti non potest cadere sub meritum, sed unio hypostatica in Christo Domino est principium meriti condigni relatè ad tantum præmium, ergo non potest illud cadere sub meritum operationum consequentium unionem, à qua dignificentur, & hauriant in linea meriti valorem infinitum. Major, in qua est tota difficultas, probatur, tum autoritate Conciliorum, & PP. docentium contra Pelagium, primam gratiam non cadere sub meritum, eò, quòd prima gratia omne meritum antecedit, tanquam ejus principium. Tum autoritate Theologorum ferè omnium cum D. Thom. *1. 2. qu. 114. a. 5.* supponentium essatum illud, velut axioma inconcussum: Tum demum ratione, quia non potest idem simul esse causa, & effectus respectu ejusdem, & secundum eandem rationem, ergo principium meriti, quod est causa meriti, non potest simul esse effectus, seu præmium ejusdem meriti, atque adeò unio hypostatica, quæ est causa meriti infiniti in Christo, non potest simul esse effectus, seu præmium ejusdem meriti; Aliter eadem unio secundum eandem existentiam realem esset prior, & posterior se ipsâ.

Obje. 1. Contrà hanc tertiam Conclusionem. Potest Finis esse causa, effectusque sui medii, v. gr. sanitas amata causat ambulationem, & ab ea recausatur, ergo potest etiam meritum esse causa, & effectus sui principii, atque adeò potest unio hypostatica dignificare meritum Christi Domini, & simul conferri in præmium.

Prob. conseq. Quia sicut finis causat intentionaliter

amoy

amorem medii, & medium causat realiter finem, & ideo secundum diversam rationem idem est causa, & effectus, ita meritum causat intentionaliter præmium; & à præmio dignificatur realiter.

Resp. nego consequ. Quamvis enim causa finalis, & causa meritoria conveniant in hoc, quod causent effectum intentionaliter, seu prout sunt in mente objectivè, discrepant tamen in modo causandi, quia finis causat, ut sit, meritum causat, quia est; propterea finis non causat media secundum suum esse reale, sed secundum esse objectivum; v. gr. sanitas non existens, sed cognita, causat ambulationem, à qua recausatur secundum existentiam realem; at meritum causat, quia est, seu quia apprehenditur futurum secundum existentiam realem in aliqua differentia temporis, & sic movet præmiantem ad conferendum præmium, unde si præmium causaret id, quod constituit meritum in ratione meriti, (ut in casu nostro est unio hypostatica,) jam causaret se ipsum secundum idem esse reale, quod repugnat. Quod autem causa meritoria non causet per modum causæ finalis, videlicet ut sit, sed per modum causæ efficientis, videlicet quia est, constat non ex conceptu suo tantum, sed etiam ex Trid. *Sess. 6. c. 7.* ubi causam meritoriam nostræ justificationis recenset inter causas efficientes dicendo: Causam principalem esse Deum, meritoriam, Christum, instrumentalem, Sacramentum Baptismi; Causa autem efficiens non operatur, ut existat, sed quia existit: propterea influit in effectum (sive physicè, si causet physicè, sive moraliter, si moraliter) secundum existentiam realem suam pro illa differentia temporis, quâ existit, unde non potest meritum existens realiter movere ad conferendum in præmium id, per quod ipsum meritum constituitur, & à quo causatur, citra mutuam causalitatem inter meritum, & præmium, secundum eandem existentiam realem, quod repugnat.

VI. *Objic. 2.* cum Suario *loc. cit.* Conink. *disp. 8. dub. 7.* Unio potest dupliciter considerari, & quatenus est in intentione, seu prædestinatione Dei, & quatenus est in executione; dici potest, quod, quatenus est in intentione, sit causa meriti, quatenus verò in executione, sit effectus, seu præmium talis meriti, & sic declinatur contradictio; Sicuti æterna gloria, quatenus est in intentione Divina, est principium meriti, & quatenus est in executione, est præ-

præmium, seu effectus meriti, citra contradictionem, ergo potest principium meriti cadere sub meritum, non quidem secundum eandem rationem, sed secundum diversam.

Resp. Si hæc distinctio, & doctrina subsisteret, rueret Doctrina Conciliorum, & PP. dicentium primam gratiam non cadere sub meritum, quia posset etiam à Pelagianis dici, quod prima gratia non sit causa meriti, prout est in intentione Divina, & sit præmium, seu effectus meriti, prout est in executione, quod nemo dixerit, ut notat Becan. hic 94. 6. ex Vasq. d. 21. Quare sicut prima gratia, etiam quatenus est in executione, est principium meriti; & ideo non potest cadere sub meritum, ita unio hypostatica

Adde, quod præmium, cum sit ordinatum ad remunerationem, debet esse aliquid realiter distinctum à merito, & reddere merentem ditiores; atqui si daretur in præmium meritorum Christi ipsa unio, seu executio Incarnationis, quæ est meriti infiniti constitutiva, præmium non superadderetur merito, ergo non potest in præmium meritorum Christi conferri Incarnationis executio.

Ad id, quod additur, Gloria æterna, quatenus est in intentione Divina, seu prædestinatio ad gloriam, potest esse principium nostrorum meritorum solum in genere causæ finalis, quatenus ex intentione dandi nobis gloriam, Deus confert auxilia efficacia, & merita, à quibus recausatur gloria in executione in genere causæ moralis efficientis, eo modo, quo intentio sanitatis causat ambulationem, à qua sanitas recausatur in diverso genere causæ: At in casu nostro unio hypostatica non est principium meriti infiniti in genere causæ finalis, sed in genere causæ formalis secundum existentiam suam realem, unde non potest à merito Christi secundum eandem existentiam realem recausari.

VII. *Objic.* 3. cum Martinon. & Perez: Saltem potest unio decerni per duo Decreta totalia ob duo motiva diversa, ita ut primum Decretum ponat unionem ob excellentiam Incarnationis, vi cuius decreti unio sit principium meritorum Christi: Secundum decretum ponat unionem ob merita Christi, unde eadem unio haberet rationem præmii ut substans huic secundo decreto, sub quo non esset principium meriti; ergo saltem

in hoc casu potest principium meriti cadere sub merito.

Resp. nego antecedens: Tum quia neque in tali casu haberetur præmium distinctum realiter à merito, reddens merentem locupletiores; tum etiam, quia hinc sequeretur, quòd omnia merita Iusti possent compensari per se ipsa prout secundo decreto volita, quòd nemo dixerit.

VIII. *Obijc. ult. ex Suar.* Si Rex det arma militi in præmium facinoris per illa patrandi, principium meriti cadit sub merito, citra inconveniens; ergo potest etiam unio hypostatica esse principium meriti, & cadere sub merito.

Resp. Hoc etiam argumentum probare, quòd possit homo mereri primam gratiam; quare *nego antecedens*: etiam si Rex per revelationem prævideat egregia militis facinora patranda per ea arma, *nego* quòd possit illa conferre in præmium eorum facinorum, cum non possit præmium in ratione præmii conferri ante existentiam meriti, ut mox dicemus; potest solum illa conferre in donum, & tanquam medium propter facinus ut finem obtinendum, vel tanquam mercem ob pretium solvendum; & idem dicas de unione relatè ad humanitatem.

ARTICULUS II.

An Christus meruerit sibi unionem per operationes tempore posteriores? Et quomodo Gratias Sanctis Patribus meruerit?

IX. **Q**uæstio hæc tangit celebrem difficultatem: An possit præmium conferri ante meriti existentiam, & quomodo verum sit, quòd Gratia SS. PP. collata sit intuitu meritorum Christi? prout communissimè docent PP. & Scholastici, & constat ex Scripturis; dicitur enim Act. 4. *Non est in alio aliquo salus, præterquam in Christo Domino*: atque adeò ex meritis Christi salus, seu gratia justificans collata fuit antiquis PP. Et 1. Cor. 5. dicitur: *Sicut in Adam omnes moriuntur, ita & in Christo omnes vivificabuntur*. Imò etiam SS. Angelis gratiam collatam fuisse intuitu meritorum Christi videtur probabilius; decuit enim omne bonum etiam naturale propter merita Christi infinita conferri. Verum quidem est, quòd Christus non sit mortuus pro Angelis, nec illos redemerit: dicitur enim 2. Cor. 5. *Christus pro omnibus mortuus est, ergo omnes*

omnes mortui sunt; Si autem pro Angelis mortuus esset, deberet etiam inferri, quod etiam SS. Angeli mortui sint, ut notat D. Thom. *quæst.* 46. Quare cum SS. Angeli non sint mortui, Christus non est mortuus pro illis: Cum hoc tamen bene statum, quod Christus gratias SS. Angelis collatas promeruerit; quid enim obstat, quod non fuisset mortuus Christus, si homines non peccassent, & tamen nunc suâ morte non solum hominibus, sed etiam SS. Angelis bona collata meruerit? Et sanè hoc fuit convenientissimum, cum Christus sit caput non solum hominum, sed etiam Angelorum: dicitur enim ad Coloss. 1. *Qui est caput omnis principatus, & potestatis.* Et clarius infra: *Ipse est caput omnis Ecclesia primogenitus ex mortuis, pacificans per sanguinem Crucis, sive qua in terris, sive qua in caelis sunt*, id est homines, & Angelos, ut interpretantur Doctores communiter cum D. Thom. Pervestigandum tamen, quomodo potuerit Angelis, & PP. antiquis mereri gratias,posito, quod illum præcesserint? Nonnulli putant, posse præmium conferri ante existentiam meriti; Alii admittunt hoc accidere posse solum, quando meritum est infiniti valoris; Alii aliter, ut mox explicabimus.

X. Dico equidem cum communiori: Repugnat præmium in ratione præmii conferri ante meriti existentiam, atque adeò non potuit Christus mereri sibi unionem hypostaticam per operationes tempore posteriores ad illam. Ità Esparf. *quæst.* 41. Martinon. Lumb. n. 2065. contra Corink. d. 8. & Alios putantes, posse quidem conferri præmium ante existentiam meriti, ita ut exerceatur iustitia quoad substantiam, & liberalitas quoad modum, nempe quoad anticipationem, non posse tamen conferri pœnam ante existentiam delicti, quia non potest ea liberalitas exerceri relatè ad pœnam, ut potest relatè ad præmium, quia quilibet habet jus, ne puniatur ante delictum: non verò ne præmietur ante meritum.

Prob. Tum autoritate Aug. qui c. 25 de Mor. Eccl. hæc habet: *Premium non potest precedere meritum, & prius homini dari, quam dignus sit*; tum à posteriori, quia de facto Christus inveniisset sibi unionem per merita suæ Passionis, si potuisset illam mereri, quia gloriosius habuisset illam ex merito, & aliquatenus ex se, quàm gratis.

Prob. deinde à priori: Quamvis meritum non causet præmium physicè, sed moraliter, videl. exigendo quod

à præmiantē conferatur ; nihilominus non potest meritum, antequam existat, exigere præmium, cum nihil possit quidquam exigere, antequam existat, quamvis præcognoscatur futurum : ex. gr. materia disposita ad formam ignis non potest exigere, quod ab Agente producat formam ignis, antequam ipsa existat, propterea si Deus causet formam ignis, antequam creet materiam dispositam, non dicitur formam ignis ponere ut exigitam, ergo si Deus præmium conferat, antequam meritum existat, non dicitur illud ponere ut exigendum, atque adeo ut præmium, sed ut donum liberaliter collatum.

Neque obstat, quod meritum causet, & exigit præmium, prout est in mente præmiantis, & in quantum cognitum. Nam sicut bonum in quantum cognitum amatur, & ignis in quantum approximatus comburit, ita ut reduplicetur mera conditio, non ratio formalis, ita in casu nostro, sic etiam materia disposita ad formam ignis in quantum cognita à Deo sub talibus dispositionibus exigit, ut Deus ponat formam ignis, ea tamen cognitio divina est mera conditio, non vis exigitiva formæ ignis, & ideo non sufficit, quod cognitio hujus exigentiæ fuerit ab æterno, ut possit poni forma ut exigita, antequam existat materia.

Confirm. Si meritum futurum potest exercere nunc causalitatem erga præmium, exigendo illud per hoc præcisè, quod nunc sit in mente præmiantis, non esset ratio, cur meritum conditionatum, & purè possibile non posset pariter eandem causalitatem exercere, & exigere præmium ; sequela non admittitur, quia meritum conditionatum, & purè possibile, cum habeant existentiam merè logicam, non possunt physicè præmium exigere, ergo idem dicendum de merito futuro.

Confirm. 2. Quia præmium condignum dicit rationem debiti, utpote quod positâ promissione ex justitia debetur ; atqui præmians, qui nihil accepit, non potest quidquam debere, ergo non potest conferre præmium in ratione præmii ex justitia debiti, ante meriti existentiam. Adde præmium naturâ suâ esse stimulum, & escam ad præstandum obsequium ; quod si præmium obtentum sit, cessat excitare, & stimulare, unde non habet rationem præmii, aut coronæ relatè ad victoriam jam obrentam, quare sicut in physicis, nisi præcedat lassitudo, non potest dari quies, ut virium reſectiva, ita
in

in moralibus, nisi præcedat meritum, & victoria, non potest dari præmium, ut compensativum obsequii præstiti, sicuti nec potest dari responsio quâ talis, nisi præcedat interrogatio.

XI. Objic. 1. Dari potest pretium debitum, antequam merx sit exigita, ergo poterit etiam dari præmium exigitur, antequam meritum sit positum, atque adeò potuit Christus unionem mereri per operationes tempore posteriores.

Resp. Nego consequentiam, differt enim præmium à pretio in hoc, quòd præmium dari non possit, nisi homo per operationem honestam sit eo dignus; actio autem honesta solum probabiliter futura, & in spe, non reddit hominem præmio dignum, nec exigit præmium; contra verò pretium dari non potest propter bonum solum in spe, & probabiliter futurum, ut patet in jactu retis, qui potest esse materia contractus, & permutationis, quamvis solum in spe, & probabiliter contineat pisces. Et ratio à priori est, quia est pretio æstimabile, quodcumque est utile in ordine ad usus humanos, & ad commercium; cum autem utile sit etiam bonum probabiliter futurum, ideo hoc etiam est pretio æstimabile, unde dari potest pretium, antequam merx ponatur, dummodo sit probabiliter futura, quia tamen non est præmio dignus, nisi qui jam posuit actionem honestam, ideo non potest dari præmium ante existentiam meriti.

Adde, quòd solvens anticipatò pretium, quamvis non recipiat tunc mercem, acquirit tamen jus ad illam, quod tanti valet, quanti merx ipsa; at conferens præmium (nisi confundatur cum pretio) non acquirit jus ad meritum, & ideo emens solvendo pretium anticipato non facit jacturam pretii, quam faceret præmians, si daret præmium anticipatò.

XII. Objic. 2. Gratia collata antiq. PP. ex omnium PP. & Scholasticorum consensu collata fuit intuitu meritorum Christi; cum Christus pro omnibus mortuus sit, omnesque redemerit, nec sit in aliquo alio salus, quam in Christo Domino; ergo admittendum, quòd possit præmium conferri ante meriti existentiam, saltem si meritum sit infiniti valoris, atque adeò potuit Christus unionem sibi mereri.

Resp. Multos multa ad hoc solvendum. Prima via est non-

nonnullorum cum Platel. *n.* 152. docentium ex Ripalda, quod Christus ut prævisus in Decreto præscindente ab hac, vel illa duratione potuit mereri gratias progenitoribus suis, & sibi etiam unionis accelerationem. Sed hujusmodi præcisiones non esse admittendas in actibus divinis, diximus quæstione antecedenti.

Secunda via est Espar. *qu.* 41. docentis cum aliis, præmiū non posse dari antecedenter ad meritum finitum, sed posse antecedenter ad meritum infinitum Christi Domini; & disparitas est, quia meritum Christi dignificatur à forma, quæ fuit ab æterno ante quodcumq; præmiū creatum; & quamvis ea forma dignificans meritum non sit ad æquatē ipsum meritum, nec se sola exigit præmiū, atest pars nobilior meriti infiniti Christi, & idcirco actus meritorius Christi Domini ab hac forma æterna in tempore dignificatus exigere potest præmiū pro quavis differentia temporis, quia sic præmiū semper consequitur tempore ad meritum secundum partem ejus formalem, & digniorem. Sed hæc etiam via facile impugnatur cum Lumb. *n.* 2077. quia quamvis forma dignificans meritum fuerit ab æterno; at meritum reverà non est ab æterno; ergo cum sit in intelligibile, quod præmiū antecedit meritum, & effectus suam causam efficientem, est etiam in intelligibile, quod præmiū dari possit antecedenter ad meritum Christi infinitum, quamvis forma dignificans fuerit ab æterno; non enim tenet illatio ab inclusio ad includentem; putà, datur ab æterno forma dignificans meritum, ergo datur ab æterno meritum; sicut non tenet hæc illatio, Anima est immortalis, ergo & homo.

Tertia via expeditior est Haunol. *n.* 356. Avendanno, Arandæ, & aliorum distinguendum duplex genus meriti, Alterum Remunerandum, quod scilicet movet ad dandum præmiū post ipsum: Solutivum alterum, seu Compensativum, quod scilicet datur, seu ponitur post præmiū ad compensandum illud, habetque rationem pretii pro merce antecedenter collata; & hujusmodi fuit meritum Christi relatè ad gratias collatas antiquis PP. à Patre Æterno intuitu talis meriti.

In forma ad argumentum *disp. antec.* Gratix collatæ antiquis PP. fuerunt intuitu meritorum Christi habentium rationem meriti solutivi, & compensativi, seu tamquam pretii pro merce jam collatâ, *concedo*, rationem meriti

meriti remunerandi, de quo est præsens quæstio, *Nego antec. & consequentiam.*

XIII. Quamvis hæc tertia via sit expedita, subtilior tamen est via Lumb. 2081. qui nixus revelationibus S. Mariæ Magdalenzæ de Pazzis, & Venerabilis Mariæ de Agrada, docet, quod posito contractu ab æterno inter Patrem Æternum, & Verbum tanquam legitimum suæ Humanitatis Procuratorem, & caput morale, de ponenda morte, & meritis à Christo Domino, Pater Æternus obligavit se ad conferendas gratias Antiquis PP. propter ea merita, tanquam mercem ob pretium solvendum, in quo casu merita Christi habuerunt rationem meriti, seu obsequii exigentis recompensationem, & simul rationem pretii ob mercem antecedenter collatam, & gratiæ antiquis PP. collatæ habuerunt rationem præmii simul, & mercis ob pretium solvendum.

Neque dicas: Non posse inter Patrem Æternum, & Verbum intercedere contractum, cum non detur distinctio voluntatum requisita ad contrahendum; Nam sicuti quando Tutor nomine proprio contrahit secummet tanquam cum Tutore pupilli, sufficit distinctio voluntatum inter Tutorem, & Pupillum; ita quando Deus contrahit nomine proprio cum Verbo tanquam cum Tutore Humanitatis, satis erat distinctio voluntatum inter Deum, & humanitatem, qui sunt contrahentes principales,

Præterquam quod ad contractum inter Patrem Æternum, & Verbum sufficit distinctio Personarum, quarum altera possit velle aliquid speciale, quod non dicatur velle formaliter, sed solum identice alia persona; solum relate ad effectus ad extra una est Trium Personarum volitio, cum una sit potentia in ordine ad effectus ad extra; Non tamen est una Trium volitio ad intra; Nam Pater generat, & consequenter vult generare Filium; quin tamen Filius generet, aut velit generare se ipsum, sed solum velit generari à Patre. Sic Pater mittit in terras Filium, & utraque Persona Spiritum Sanctum; quin Filius, aut Spiritus Sanctus mittant se ipsos; ergo eodem modo Pater Æternus potest velle contrahere cum Filio, non tamen secummet. Sic Pater vocat Beatam Virginem filiam, non Matrem, aut Sponsam, Filius verò Matrem &c. Sic Pater dicit: *Hic est Filius meus dilectus*, quod tamen non dicit

Verbum, quæ omnia supponunt diversos actus notionales in Divinis, cum summa concordia voluntatis relatæ ad objecta volita. Quare poterit eodem modo Pater dicere: Si filius meus, nempe Christus ponat merita, dabo gratiam ejus Progenitoribus; & Verbum nomine Humanitatis poterit dicere: Ponam merita, quo posito contractu, gratiæ Progenitoribus Christi dantur ante merita, & simul dantur ob merita, cum dentur post contractum de meritis ponendis.

ARTICULUS III.

Quid Christus Dominus sibi, & Nobis meruerit?

XIV. Dico 1. Probabiliter Christus meruit sibi continuationem unionis hypostaticæ per operationes meritorias in primo instanti suæ vitæ positas; non secus ac per merita suæ passionis, & mortis, meruit sibi glorificationem corporis, & nominis exaltationem, juxta illud Apostoli: *Factus obediens &c. propter quod &c.* Ità Martinon. & Alii.

Prob. Meruit sibi Christus glorificationem Corporis, seu gloriam accidentalem, quamvis naturaliter exigitam, ergo etiam meruit sibi continuationem, & perpetuitatem unionis hypostaticæ, quamvis etiam naturaliter exigitam. *Prob. Conseq.* Quia quod possidetur ex duplici titulo, (videlicet exigentiæ naturalis, & meriti) gloriosius possidetur, ut diximus in de Merito, ostendentes primum gradum gloriæ posse cadere sub meritum condignum, ergo non est negandum Christo Domino, quod ex hoc duplici titulo possideat continuationem unionis, sicut possidet corporis glorificationem.

XV. Dico 2. Christus Dominus non meruit de facto sibi gloriam essentialem, seu visionem beatificam, nec scientiam, aut gratiam accidentalem per operationes meritorias in primo instanti suæ vitæ positas, quamvis potuisset divinitus hæc omnia promereri. Ità communis Theologi cum D. Th. q. 13. a. 3. contra Albert. Aristodorus & Alios, quorum sententiam Suarius putat probabilem.

Prob. Quæ connaturaliter debentur naturæ, conferuntur statim ab Authore naturæ ante quamcunque liberam operationem ejusdem naturæ, sed gloria essentialis, scientia, & gratia accidentalis debentur connaturaliter

liter Humanitati assumptæ, ergo statim illi collata sunt in priori ad quamcunque ejus operationem, quamvis potuerit Deus miraculosè differre hujusmodi bona exigita, sicut distulit conferre Christo gloriam corporis naturaliter exigitam, & in eo casu potuisset Christus illa omnia mereri, sicut de facto meruit gloriam corporis *maj. prob.* quia nisi constet quòd Deus miraculosè voluerit differre collationem boni naturaliter, exigiti à Christo Domino, dicendum quod statim contulerit, ne ille careret perfectionibus debitis: Ex Scripturis autem solum constat, quòd Deus miraculosè voluerit differre gloriam corporis, naturaliter à Christo exigitam, ut sic posset pro nobis pari; non tamen id constat de gloria essentiali, de scientia, & gratia, ergo non est dicendum quod voluerit pro ullo aut instanti temporis, aut signo naturæ horum bonorum collationem differre.

XVI. Dico 3. Christus Dominus meruit sufficienter nobis omnium peccatorum remissionem.

Constat id ex Scripturis 1. Joan. 2. dicitur: *Ipse est propitiatio pro peccatis nostris, non pro nostris autem tantum, sed etiam pro totius mundi.* Dixi, quòd hanc remissionem meruerit sufficienter, quia non omnibus meruit illam absolute, sed conditionatè, nisi scilicet per nos staret, obtulit enim sua merita infiniti valoris, quæ movere possent Patrem ad remittenda omnibus peccata, & ad liberandos omnes à diaboli potestate, si nos ad id cooperaremur, & quia non omnes auxiliis gratiæ cooperantur; ideo non meruit omnibus efficaciter, sed solum sufficienter peccatorum remissionem.

Hinc fit 1. Christum meruisse de facto omnibus sufficienter etiam justificationem, seu gratiam habitualement, cum non debeat in præsentì providentia peccatum, nisi per gratiam; meruisse etiam omnibus sufficienter gloriam æternam, quippe quæ ad gratiam præsentis ordinis consequitur.

Fit 2. Neminem in præsentì providentia salvum esse independentem à meritis Christi, proinde dicitur Act. 4. *Neque enim est aliud nomen, sub cælo datum, in quo oporteat nos salvos fieri.*

Fit 3. Omnia dona gratiæ, quæ justificationem sive per se, sive per accidens consequuntur, conferri intuitu meritorum Christi, quin imò ipsa etiam dispositio ad gratiam, & applicatio meritorum Christi, ex meritis

eiusdem Christi nobis confertur, ut communissime DD. docent contra Nonnullos, quorum sententiam taxat Suarius. Ratio est quia Christus Dominus Jo. 15. dixit: *Sicut palmes non potest ferre fructum à semetipso, nisi manserit in vite; sic & vos &c.* quia *sine me nihil potestis facere*: ubi addit Aug.: *Non dixit, quia sine me parum potestis facere, sed nihil potestis facere, sive ergo parum, sive multum, sine illo fieri non potest, sine quo nihil fieri potest.* Quare ex meritis Christi conferuntur nobis auxilia excitantia, & adjuvantia, remissio culparum, meritum augmenti gratiæ, & gloriæ; satisfactio pro culpis venialibus, & pro mortalibus remissis; finalis perseverantia, & omnia alia dona, quæ justificationem consequuntur, & ratio horum omnium est, quia hoc spectat ad perfectam Redemptionem.

XVII. *Obiect. 1.* Illud Jo. 6. *Nemo potest venire ad me, nisi Pater, qui misit me, traxerit eum*, ergo vocatio ad Christum est gratuita, & non ex meritis ipsius Christi.

Resp. nego consequ. Pater enim neminem trahit, nisi propter Christi merita, voluit enim omnia media salutis nostræ à morte, & meritis Christi pendere, juxta illud Rom. 8. *Qui propter Filio suo non pepercit, sed pro nobis omnibus tradidit illum, quomodo non etiam cum illo omnia nobis donavit?*

Obiect. 2. Infideles non sunt membra Christi, ergo non influit Christus gratias in infideles, atque adeò vocatio ad Christum non est ex meritis Christi.

Resp. Quòd sicut calor naturalis non solum agit in membra corporis ea conservando, sed etiam in cibum, & potum ea transmutando, ut fiant partes corporis, ita Christus influit etiam in infideles, non quia sunt ejus membra, sed ut fiant. Damnata proinde est ab Alex. VIII. Propositio V. negans Infideles habere influxum à Christo Domino.

XVIII. Dubitatur hìc, Quomodo Christi merita nobis applicentur? Ad quod dicendum, applicari, quoties aliquod gratiæ donum, sive in Sacramento, sive extra confertur nobis ex ejus meritis, quare cum omnia nostra merita procedant ex auxiliis gratiæ, intuitu meritorum Christi collatis, sequitur, quod omnia nostra merita pendeant, tamquam à causa, à meritis Christi: quin imò multi docent, quod merita nostra specialem valorem merendi hauriant ex hoc, quod conferantur nobis

auxilia gratiæ ex Christi meritis, quem valorem non haberent, si Deus liberaliter independenter à Christi meritis eadem auxilia efficacia nobis conferret, quod videtur colligi ex illo Jo 10. *Ego veni, ut vitam habeant, & abundantius habeant.* Sed de hoc fusiùs, Deo dante, in de Sacramentis *disp. 3. qu. ult.*

Q U Æ S T I O V.

An SS. PP. de Congruo meruerint Incarnationem, & B. Virgo etiam de condigno Maternitatem.

I. **C**ertum est, Non posse puram Creaturam condignè mereri unionem hypostaticam, ut docent communissimè, propter distantiam infinitam inter meritum puræ creaturæ, & tale præmium, quod est æstimabilitatis infinitæ, cum per illam non habeatur solum divinæ naturæ participatio, sicut habetur per gratiam, sed ipsa etiam Divinitatis plenitudo habitans in homine; propterea quovis meritum puræ Creaturæ improporcionatum est tanto præmio, quod est supremi ordinis, & divini.

Dubitatur itaque solum, An possit cadere sub meritum congruum? & An de facto Antiqui PP. & Beatissima Virgo meruerint de congruo non solum accelerationem, sed etiam substantiam Incarnationis?

II. Dicendum de facto Beatam Virginem, & SS. PP. Incarnationem de congruo meruisse non solum quoad circumstantiam accelerationis, sed etiam quoad substantiam. Ità D. Th. hinc *qu. 2. a. 11.* ubi hæc habet: *Ex congruo tamen meruerunt SS. PP. Incarnationem desiderando, & petendo.* Ità etiam Alii cum Platel. n. 134. contra quamplures putantes id repugnare, eò quod principium meriti caderet sub meritum.

Prob. & 1. quidem quod possit Incarnatio quoad substantiam cadere sub meritum congruum Justorum, quia in eodem ordine supernaturalitatis sunt merita Justorum, & unio hypostatica, quamvis in gradu distantissimo, ergo quamvis ob hanc distantiam infinitam merita justorum non possint de condigno mereri unionem hypostaticam, poterunt tamen de congruo. Verum

rūm quidem est, quod non quilibet Justus de congruo mereatur Incarnationem, quia, ut habet Angelicus loc. cit. bonum alicujus puri hominis non potest esse causa boni totius naturæ, unde nequit de congruo mereri Incarnationem totius naturæ reformativam; potuerunt tamen omnes SS. PP. illam mereri; imò sola Beatissima Virgo, utpote prædita gratiâ penè immensâ, adeo ut ejus meritum superaret meritum totius humanæ, atque Angelicæ Reipublicæ.

Dices; Plus separatur meritum Justī ab unionē hypostatica, quam meritum naturale à gratia, sed meritum ordinis naturalis non potest de congruo mereri gratiam supernaturalem; ergo neque meritum justī unionem.

Resp. dist. maj. plus distat meritum justī ab unionē entitativè, *conc.* in ratione ordinis, habitudinis, & proportionis, *neg. maj.* & *conseq.* Sic plus distat entitativè Deus ab intellectu creato, quam Angelus ab oculo, & tamen intellectus potest divinitus Deum videre, non tamen oculus Angelum.

Ratio autem, cur detur proportio inter meritum justī, & unionem; non verò inter meritum naturale, & gratiam, ex Suar. est, quia Natura non potest suis actibus evidenter attingere ordinem supernaturalem, nec credere, aut sperare gratiam, fide, & spe supernaturali; contra verò Justus potest viribus supernaturalibus evidenter cognoscere, credere, & sperare unionem hypostaticam, & Christum; ergo hæc magis proportionantur, cum possit gratia nos alligare Christo per actus suos, & efficere ejus membra. Præterea, ut notat Lugo, ordo naturalis, & supernaturalis respiciunt diversum finem ultimum; ille enim tendit ad beatitudinem naturalem, iste ad supernaturalem; contra verò meritum justī, & unio hypostatica ad eundem finem ultimum supernaturalem collineant, & ideo hæc magis proportionantur.

III. *Prob.* deinde quod de facto SS. PP. de congruo meruerint substantiam Incarnationis, quia, ut notat D. Tho. loc. cit. Orarunt, & desiderarunt Christi adventum, ut passim legitur in Scripturis. Neque aptè quidam opponunt, SS. PP. non potuisse à Deo Incarnationem petere, eò quod crederent illam omnino futuram. Nam potest aliquid esse futurum sub ea conditione, quod pre-

preces præcedant, sic Ninive subversionem evasit à Jo-
na prædictam, quia preces præcesserunt: Præterea Chri-
stus Dominus sæpè oravit, & petiit, quod sciebat omni-
nò futurum, putà Lazari resurrectionem, &c.

Confirm. Quia non solum precibus SS. PP., sed et-
iam aliis sanctis operibus ad tantum beneficium se dis-
posuerunt; bona autem dispositio supernaturalis, ut
notat Suar. *disp. 10. sect. 6.* est meritum congruum relatò
ad effectum obtinendum, quoties est in persona iusta,
ergo PP. antiqui de congruo meruerunt Incarnationem.
Quòd si potuerunt substantiam Incarnationis mereri, à
fortiori etiam circumstantias, nempe accelerationem;
Constat enim Daniel 9. quòd illius Prophetæ precibus
factum sit, ne Incarnatio ultra 70. illas hebdomadas dif-
ferretur, non quasi verò Deus Decretum mutaverit,
sed quia, ut advertit Suar. loc. cit. Deus in sua præfina-
tione disposuit, quòd hoc mysterium non differretur,
positis præviis precibus Sanctorum.

Quomodo autem merita SS. PP. potuerint de con-
gruo habere in præmium Christi adventum, & simul ex
meritis Christi habere gratiam, & merita supernatura-
lia citra mutuam causalitatem? Diximus *qu. antecedente*,
ostendentes merita Christi relatò ad gratias antiquis
PP. collatas habuisse rationem meriti non remuneran-
di, sed solutivi instar pretii ob mercedem antecederet
collatam.

IV. Progredimur nunc ad inquirendum, An sicut B.
Virgo meruit de congruo Incarnationem, ità meruerit
etiam de condigno suam maternitatem? quòd illam sal-
tem de congruo meruerit, certum est apud Theologos,
ut notant Suar. *d. 10. sect. 8.* & Vasq. *dis. 23.* Ad illam e-
nim defacto precibus, ac SS. operibus se disposuit præ-
reliquis, adeò ut potuerit ab Angelo audire: *Benedicta
tu in mulieribus*: Aug. dicit: *Concipere meruit, & parere*:
Gregor. *ut ad Conceptionem Verbi pertingeret, meritum
verticem usque ad solium divinitatis evexit*: Hieron. *propo-
ne tibi Mariam, qua tanta extitit puritatis, ut mater Domini
esse mereretur*: & Bernard. Sen. dicit, Beatam Virginem
eo actu, quo consensit Angelo nuncianti, plùs meruisse,
quàm omnes Angelos, & homines omnibus suis acti-
bus, & idcirco tunc plenè se disposuisse ad materna-
tem, adeò utposito Divino decreto de sumenda Carne

ex

ex muliere, ex nulla alia potuerit Deus ita congruenter illam sumere, quam ex Beata Virgine.

Difficultas tamen est, An huiusmodi meritum fuerit condignum? Ad condignitatem enim duo requiruntur, ut diximus in de Merito, & quod detur proportio inter meritum, & præmium, velut inter semen, & fructum maximè consentaneum munificentiae præmiantis, & simul quod detur in præmiantem promissio talis præmii sub conditione onerosa, idcirco de utroque hoc requisito dubitatur, An de facto intercesserit, adeò ut ex Justitia deinde præmium conferendum esset? Affirmant Gabr., in 3. d. 4. Almain., Abul., Mart. Perez., Bernal. Gabrera apud Vegam palæstra 28. n. 1695. Communius verò negant cum Thomistis, dicente Angelico in 3. d. 4. q. 3. *presupposita Incarnatione, meruit B. Virgo, ut per eam fieret, non merito de condigno, sed de congruo*, Cui inhaerens Suar. d. 10. sect. 7. docet, spectata proportione inter meritum, & præmium, potuisse de condigno maternitatem mereri, de facto tamen non meruisse ex defectu promissionis, seu ordinationis divinæ ad tale præmium illi conferendum.

V. Dico equidem 2. Beatam Virginem potuisse maternitatem de condigno mereri, si ea à Deo sub conditione onerosa promitteretur. Ità Suar. & Alii. contra Rhodès.

Prob. Tum ex SS. PP. passim fatentibus, condignè Beatam Virginem se disposuisse ad maternitatem, ut dicemus conclusione sequenti; Tum ratione, quia si spectetur cumulus penè immensus gratiae, & donorum supernaturalium, jam inde à primo instanti conceptionis Virgini datus, simul cum aliis privilegiis, putà perpetuae innocentiae, carentiae fomitis &c. necnon augmentum gratiae, & virtutum per proprios actus in decursu vitae acquisitum, praesertim per illum ultimum consensum Angelo nuncianti præstitum, negari non potest, quod detur & apta dispositio ad maternitatem, & proportio geometrica inter ejus merita, & tale præmium; quòd licet non sit bonum inferius filiatione Dei adoptiva (ut nonnulli putant, minùs aptè interpretantes illud Augustini, *Melius est concipere Deum mente, quam ventre*) sed sit donum excellentissimum, quod vel formaliter sanctificat, ut vult Rip. vel saltem radicaliter; Nihilominus spectata Dei infinita munificentia non videtur adeò præ-

præstare, ut non possit cadere sub meritum condignum puræ creaturæ affectæ gratiâ sanctificante in gradu intensissimo, eûm maternitas non reponatur in ordine divino, ut unio hypostatica, sed solum dicat respectum ad talen unionem, ergo potuit B. Virgo maternitatem condignè mereri, si promitteretur.

VI. Dices: Maternitas est infinitæ dignitatis, non secus ac unio hypostatica, ergo quamvis promitteretur in præmium, non per hoc cadere posset sub meritum condignum operationis Iusti; sicut gratia promissa contritioni peccatoris non cadit sub meritum condignum talis actûs; antecedens fusissimè conatur ostendere Rhodes de Incar. & Rip. præsertim primò quia, ea dignitas est infinita, qua major nequit in eo genere intelligi, & huiusmodi est maternitas, dicente Bernardo, *Ipsa est, qua maiorem facere non potest Deus, & ex Anselmo Excedit omnem altitudinem, qua post Deum dici, aut cogitari potest*, unde ipsa dixit: *Fecit mihi magna qui potens est & sanctum Nomen ejus*; quasi dixerit, mensuram suæ dignitatis esse divinam omnipotentiam, & sanctitatem. Secundò quia trahit jus jurisdictionis erga Christum, qui proinde, ut dicitur in Evangelio, *Erat subditus illi*, unde Bernardinus Senensis dixit *Imperio Virginis omnia famulantur, & Deus*. Nos etiam dicimus, *Monstra te esse matrem*, quasi dicamus materna authoritate supplica Filium. Tertiò quia est Regina, & Domina creaturarum omnium; Maria enim Syriace interpretatur Domina, unde idem Bernardinus Senensis habet: *Tot Creaturae servantur Beata Virgini, quot servantur Trinitati*. Quartò quia à Deo ipso honoranda est, cum ipse præceperit Parentum honorationem, unde Bernardus, *Quis non credat, Dei filium honorare Matrem?*

Resp. His rationibus non evinci maternitatem esse dignitatis infinitæ; aliter B. Virgo posset pro mortali satisfacere, & de condigno mereri Incarnationem; quòd est contra sensum SS. PP. Idèò unio hypostatica, licet physicè finita, est moraliter dignitatis infinitæ, quia est ratio qua humanitati ipsa dignitas, & sanctitas verbi immediatè communicatur; unde constituit Deum hominem; At per maternitatem solum communicatur vis productiva unionis hypostaticæ, & participatur divina Paternitas, unde solum est dignitatis quodammodo infinitæ. In forma nego antecedens.

Ad

Ad primam probationem, quamvis Deus non possit facere Filium adoptivum digniorem filio adoptivo Dei, non per hoc justus est infinitæ dignitatis, ergo nec maternitas, sicut enim justum non dignificat Deus in recto, sed in obliquo, nec justo immediate communicatur Deus, sed participatio divinæ naturæ; ita B. Virgini solum communicatur participatio divinæ Paternitatis, ut explicabimus, *diss. sequenti*: Ad Secundam jus jurisdictionis erga Christum non solum non erat facultas præcipiendi aliquid filio in ordine ad assequendam felicitatem essentialem, sed præterea erat dominio ipsius Filii subiectum, non secus ac Jus proprietatis, quod habet creatura promissaria erga Deum, est subiectum dominio essentiali Dei. Quare sicut hujusmodi jus non reddebat B. Virginem superioris dignitatis, ita nec æqualis, & infinitæ dignitatis cum filio. Ad tertiam Beata Virgo titulo maternitatis est Regina, & Domina, ut Christus est omnium Princeps; unde dicitur: *pro Patribus tuis nati sunt tibi filii* (idest ut Iræneus pro Adamo, & Eva, Christus & Maria) *constitues eos Principes &c.* Principatum tamen hunc habet Filius à se tamquam Dei Filius, & Deus homo, mater verò cum dependentia debita erga Filium, sicut creatura promissaria potest habere erga Deum jus justitiæ, sed cum dependentia debita. Ad quartam sicut Justus citra infinitatem habet jus ut à Deo ametur, ita mater habet jus ut à Deo honoretur, utrumque tamen jus Deo subordinatur, & ideo non dignificat infinitè.

VII. Dico ultimò, sicut non deest proportio inter meritum B. Virginis, & Maternitatem, ita nec defuit de facto secunda conditio ad meritum condignum requisita, nempe promissio talis præmii sub conditione onerosa, videlicet si firmâ fide Angelo nuncianti credidisset, & consensum præstitisset, ut fieret Dei mater, atque adeò defacto condignè meruit maternitatem. Ità DD. cit. apud Bernal. contra quamplur. ap. Arri. d. 18.

Prob. ex verbis Angeli, Ne timeas Maria, invenisti gratiam apud Deum, ecce concipies &c ubi subintelligitur, dummodo fidem, & consensum præbeas; voluit quidem B. Virgo ante consensum de Virginitate reddi secura, dicens: *Quomodo fiet istud, quoniam virum non cognosco? &c.* statim autem ac audivit, quòd Spiritus S. supervenirèt, credidit, consensit, & dixit: *Ecce Ancilla Domini*, ergo non

non defuit promissio ad condignitatem meriti requisita. Quod etiam explicant verba Elizabeth dicentis : *Beata, quæ credidisti, perficientur in te, quæ dicta sunt tibi à Domino.* Propterea D. Bonav. in 3. d. 4. dixit, *postquam confersit, & Spiritus S. in copiositate gratiæ in eam descendit, non solum congruitatem, sed etiam condignitatem habuit.*

Confirm. 1. Quia Ecclesiæ sæpè condignitatem hanc meriti commemorat, dicendo ; *Ut dignum Filii tui habitaculum effici mereretur, Quem meruisti portare &c.* Verba autem Ecclesiæ, ut verba Scripturæ, & Conciliorum sumenda sunt in sensu proprio, si nihil obstat, atque aded verba hæc intelligenda sunt de condignitate meriti strictè dicta, cum nihil obstat.

Confirm. 2. Quia communiter DD. docent, tribuendum esse B. Virgini quidquid possumus, quin unquam tribuatur nimium, nisi ubi ratio, vel autoritas adversatur, atqui in casu nihil obstat, quo minus dicamus promissam illi esse maternitatem, si consentiret legationi Angeli Paranimphi, & sic meruisse de condigno maternitatem, ergo ita dicendum de facto.

VIII. *Objic.* 1. Si B. Virgo meruisset condignè maternitatem, de condigno etiam meruisset Incarnationem, consequens est falsum, ergo & *antec. prob. sequela*, quia non poterat ipsa esse mater Dei, nisi Christus incarnaretur, essetque suus Filius.

Resp. Cum D. Tho. q. 2. a. 11. ad 2. Posse cadere sub meritum aliquod bonum, quamvis non possit sub meritum cadere id, quod requiritur ad tale bonum sicut potest sub meritum cadere gloria, non tamen prædestinatio ad gloriam prærequisita, quare potest sub meritum condignum cadere maternitas, quamvis non possit Incarnatio ad maternitatem requisita; ratio est, quia possumus mereri aliquid sub hypothesi, quod ponatur id, quod non meremur, unde B. Virgo potuit mereri maternitatem sub hypothesi, quod Deus vellet incarnari. Sic ut notat Suar. si Princeps decrevit venire in aliquam civitatem, potest civis aliquis impetrare, & mereri, ut potius in suam, quam in alterius domum divertatur, quamvis non potuerit mereri ejus adventum in urbem.

IX. *Objic.* 2. Merita B. Virginis habebant in præmium condignum augmentum gratiæ, & gloriæ, ergo non potuit illis correspondere in præmium maternitas; Aliter ut obtineret maternitatem, caruisset augmento gratiæ

actibus meritoriis debito, & sic in perpetuum caruisset augmento gloriæ, quo non caruisset, si non fuisset Deipara.

Resp. 1. Etiam dato quod maternitas non justificet formaliter, sed solum radicaliter, adhuc vi maternitatis in præmium collatæ posset lucrari ingens gratiæ augmentum, & sic non caruisset gloriâ ullâ in cœlo ex eo, quod vice gratiæ obtinuisset in præmium maternitatem: sic qui in præmium non habet 100. aureos, sed habet facultatem lucrandi mille, non diceretur amittere 100. aureos exigitos.

Resp. 2. Quod præmium condignum utpote dicentis proportionem geometricam, non arithmeticam cum merito, non consistit in indivisibili, ut diximus in de merito: undè sicut pro merito intenso ut unum promittitur defacto in præmium condignum, v.gr. augmentum gratiæ ut unum, ita poterat promitti augmentum gratiæ ut duo ergo potuit B. Virgini ob consensum præstitum promitti tum augmentum gratiæ consonum, tum maternitas, & sic utrumque dari in præmium condignum; sicuti subeunti martyrium præter augmentum gratiæ confertur in præmium Laureola Martyrii, ut notat D. Th. in 4. d. 49. q. 3.

DISPUTATIO IV.

De Unione Hypostatica, & ejus Extremis.

Explicatâ possibilitate, & necessitate Incarnationis, ejusque motivo, & causâ meritoriâ, aggredimur enucleare ejusdem quidditatem, quæ præsertim in unione hypostatica consistit. Plurima inquiri possent cum Angelico de unione tum spectata secundum se, tum relatè ad Personam assumentem, & ad naturam assumptam; Nos celebriora inquiremus, & 1. quidem Utrum unio ad solam Personalitatem Verbi, an etiam ad Deitatem immediatè terminetur? 2. Num Formaliter Sanctificet humanitatem ut quod? 3. An instrumentaliter, & physicè debuerit à Beata Virgine produci, ut ea propriè diceretur Deiparens? 4. Utrum Una Persona possit plures naturas assumere, & vicissim una natura assumi à Pluribus personalitatibus? Denique, An etiam natura Angelica, aut irrationalis possit assumi?

QUÆ

Q U Æ S T I O I.

Utrum Unio immediatè terminetur ad solam Verbi Personalitatem, an etiam ad Naturam?

I. **C**ommunius docent cum Scot., Suar. *d.* 12. Vasq., Gonet. *d.* 8. Ad solam personalitatem terminari: Nominales verò, & alii apud Lumb. *n.* 796. cum Aranda putant terminum adæquatum unionis esse integrum suppositum Verbi, atque aded tam Personalitatem, quam Deitatem, non quidem sub ea ratione, sub qua Deitas est communis tribus, sed secundum rationem contractam ad Personalitatem Verbi, seu quatenus modificata est, & inclusa in Relativo, ut loquitur Suar. ex D. Thom. *q.* 3. *a.* 2. De fide enim est ex Concilio Toletano, quòd Filius susceperit humanitatem in id, quod est proprium Filii, non in id, quod est commune Trinitati; unde Deitas prout est communis Trinitati de facto non est terminus unionis. Ad quòd explicandum sæpè DD. utuntur paritate virtutis generativæ (quæ, ut docet Fides, residet in solo Patre) importantis Deitatem ut contractam, & ut modificatam à Paternitate; quamvis enim dubitetur à Theologis, Utrum virtus generativa, seu Principium quo sit formaliter, & in recto sola Paternitas, ità ut Deitas veniat de connotato, seu requisito; an è contra sit sola Deitas in recto, & Paternitas veniat de connotato; An utrumque veniat in recto? Certum tamen est, quòd virtus generativa importet essentialiter, si minùs de formali, saltem de connotato naturam Divinam, non ut communem tribus, sed ut modificatam à Paternitate, & pro ut est propria Patris; cum non possit dici, nec quòd Filius, nec quòd Spiritus, nec quòd ipsa Deitas generet, sed solus Pater. Sic in casu nostro, Unio terminari potest in id, quod est proprium Filii, ità ut terminetur etiam ad Deitatem, sed prout contractam ad Filium, non prout communem tribus. Distinguit hìc D. Thom. Principium à termino assumptionis: *Principium*, inquit, *est ipsa natura Divina secundum se ipsam, quia ejus virtute assumptio facta est; terminus verò assumptionis non est natura secundum se ipsam, sed ratione*

Persona, in qua consideratur, & ideo primario quidem, & propriissime persona dicitur assumere, secundario autem potest dici, quod etiam natura Divina assumpserit humanitatem ad sui personam, & secundum hunc modum dicitur natura Divina incarnata: Unde Damasc. habet: Dicimus naturam Dei incarnatam esse: secundum beatos Athanasium, & Cyrillum. Hacten. D Thom.

II. Quoniam DD. hac in re implexè loquuntur, ut planius id explicetur, supponimus ex prima parte inter Naturam, & Personalitates intercedere distinctionem virtualem ex parte objecti, quin sufficiat illa distinctio eminentialis non pura, seu mixta identitate reali, quæ intercedit inter Personas, & est propria hujus Mysterii, adeò ut à Catholicis negari non possit: Ex illis enim verbis Christi Domini: *Ego, & Pater Unum sumus*, constat inter Patrem, & Filium dari distinctionem realem non puram, seu distinctionem personalem mixtam identitati essentiali. Præter hanc realem distinctionem non puram docent Recentiores cum Thomistis apud Maur. q. 98. de Deo contra Nominales intercedere ex parte objecti inter essentiam, & personalitates distinctionem non quidem realem, sed virtualem, ut propugnavimus in de Deo Diss. 4. qu. 1. tum quia verificant hæc prædicata contradictoria primo intentionalia, quod essentia sit una, non triplex, personalitas verò triplex, non una, ergo distinguitur ex parte objecti essentia à personalitatibus, sicut distingueretur natura ab hæcceitatibus ex parte objecti, si una esset in omnibus individuis natura, & multiplex hæcceitas, aliter distinctio numerica esset etiam distinctio formalis, seu essentia identificata cum hæcceitate, & identitas essentia esset etiam numerica; Tum etiam quia ad virtutem generativam Patris, seu ad Principium quo requiritur sive de formali, sive de connotato Deitas, non verò filiatio, ergo distinguitur ex parte objecti Deitas à Filiatione: & in casu nostro terminus unionis hypostaticæ, vel est sola filiatio, & non Deitas: ergo Filiatio, & Deitas distinguuntur, vel terminus unionis est Filiatio simul & Deitas, non verò Paternitas, ergo Deitas distinguitur à Paternitate, quidquid in contrarium dicant Adversarii, qui ad difficultates has enodandas in labyrintho verborum distinctionem ex parte objecti occultant potius, quàm excludant.

III Supponendum etiam hic cum Suar. *d. 11. se. 7. 5.* Gonet. *d. 5. de Deo.* Lumb. *n. 864.* contra quamplures apud Maur. *qu. ult. de Deo*, Præter tres subsistentias relativas incommunicabiles alteri ut supposito, dari etiam in Deo subsistentiam absolutam identificatam cum Deitate, & communicabilem Tribus personalitatibus, ut fusè ostendemus quæstione sequenti; Cum enim Deitas in priori ad Personalitates considerata sit cumulus omnium perfectionum, includit etiam perfectionem subsistentiæ consistentem in hoc, quod Deitas sit completa in ratione subsistentiæ, quin possit ab alio dependere in existendo. Hæc autem subsistentia absoluta ex D. Thom. *3. p. q. 3. a. 3.* potest immediatè, & adæquatè assumere humanitatem, in quo casu haberetur homo Deus, qui non esset formaliter Persona, aut suppositum, (cùm hæc verba, ut notat Suar. loc. cit. important incommunicabilitatem) sed esset formaliter subsistens, eo quod uniretur tantum subsistentiæ absolutæ, quæ de se est communicabilis Tribus Personalitatibus.

IV. Hinc fit 1. Dari in Deo tres tantum Personas, seu Hypostascs, & tria Supposita, dari tamen quatuor subsistentias, nempe Tres relativas, & unam absolutam. Fit 2. Posse assumi adæquatè Humanitatem tantum à singulis Personalitatibus seorsim, quam à Deitate, & simul posse assumi inadæquatè à Deitate, & inadæquatè ab aliqua ex Personalitatibus; hoc est à Deitate ut contracta, non ut communi. Si Deitas in priori ad Personalitates adæquatè Humanitatem assumat, habetur formaliter homo Deus, non tamen formaliter Persona aut Patris, aut Filii, aut Spiritus Sancti, sed ad summum radicaliter, ut notant Bernal. & Lumb.: Si verò humanitas assumatur vel adæquatè ab aliqua Personalitate, v. gr. Patris, vel inadæquatè ab aliqua Personalitate, putà Patris, & inadæquatè à Deitate, tunc habetur formaliter homo Deus, qui est Formaliter Pater, sicut de facto Christus est formaliter Filius Dei, & licet in Christo specialiter etiam sint aliæ Personæ, videlicet per circumfessionem, & physicam concomitantiam, ut notat Lumb. *n. 816.* solus tamen Filius dicitur Incarnatus, quia unio ad solam Personalitatem Filii immediatè terminatur. His præmissis.

V. Dico 1. Non datur defacto in Christo Domino duplex unio hypostatica adæquata, altera terminata ad Deitatem, altera ad Personalitatem Verbi. Ità communiter contra Dur., & Capr. apud Maurum. Probat, tum quia unica sufficit; tum etiam quia si duplex daretur unio, duplex daretur actio productiva unionis inter humanitatem, & Verbum, & consequenter duplex daretur Incarnatio; sequela est contra mentem Ecclesiæ, ergo, probatur sequela, quia Incarnatio idem sonat, ac actio productiva unionis hypostaticæ, ergo si duplex daretur unio, duplex pariter daretur actio productiva harum unionum, & sic duplex Incarnatio.

VI. Dico 2. De facto unio hypostatica immediate terminatur ad totum Verbum, seu ad Deitatem simul, & Personalitatem Verbi, tamquam ad terminum adæquatum: & quidem æquè primò ad utrumque, non verò primariò ad Personalitatem, & secundariò ad Deitatem, ut contendit Capr. cum Thomistis, aut è contra, ut fortè contendit Durand. Ità Okam, Gabr. & alii cit.

Prob. 1. ex verbis illis Jo. 1. *Verbum caro factum est*, &c. ergo unio ad totum Verbum terminatur immediate æquè primò; cum non sit major ratio, cur primariò respiciat Deitatem, quam Personalitatem; vel è contra; Sicuti quia Verbum unitum est naturæ humanæ, unio terminatur æquè primò ad animam, & corpus; Cum non sit major ratio, cur primariò terminetur ad animam, & secundariò ad corpus, aut è converso.

Neque dicas 1. Quod Verbum ratione solius Personalitatis sit incarnatum, Nam hoc apertè contradicit authoritati Cyrilli l. de recta in Jesum Christum Fide, ubi dicit, quod totum Verbum toti naturæ humanæ sit unitum, ergo sicut non rectè dicitur, quod Verbum sit unitum naturæ humanæ ratione solius animæ, ità nec quòd humanitas sit unita Verbo ratione solius Personalitatis. Et ratio à priori est, quia propositiones dogmaticæ debent in sensu proprio, & sine ulla limitatione intelligi, si nihil obstat.

Neque dicas 2. Rusticum Diaconum in Disp. contra Acephalos apertè asserere, quòd Incarnatio non sit communis, sed propria subsistentiæ Verbi. Nam ut notat Vasq. d. 125. & Suar. de Trin. l. 3. c. 4. Nomen subsistentiæ apud Patres, & Concilia non sumitur pro for-

forma veluti abstracta, qua Verbum ultimò constituitur, pro ut sumitur à Scholasticis, sed sumitur pro tota Persona, & ideò rectè dicitur Incarnatio esse propria substantiæ, hoc est Personæ Verbi constitutæ per naturam simul, & Personalitatem.

Prob. 2. Autoritate SS. Patrum. Dicentium passim Naturam Dei esse incarnatam, ut notat D. Th. 9.41.2.5. ubi hæc habet: *Damasceus dicit, Dicimus naturam Dei incarnatam esse secundum beatos Athanasium, & Cyrillum.* Præterea Palacius in 3 d.1. notat, quod in Decretis Synodal. sub Martino Papa dicatur. *Qui dixerit, quod natura Dei non sit incarnata, anathema sit.* Aug. de Fide ad Petr. c.2. dicit, *Humanitatem sibi uniam summa divinitas gerit*: idemque docent alii PP. apud Vasq. d. 14. c.4

Neque dicas, Naturam Dei dici incarnatam mediatè, hoc est mediâ Personalitate Verbi. Nam sic etiam posset dici incarnatus Pater, quippè qui etiam mediatè est unitus humanitati. Neque obstat, quod magis remotè se habeat Pater ad Verbum, à quo distinguitur realiter, quàm Natura divina, quæ realiter identificatur cum Personalitate Verbi, & ideò ex unione humanitatis cum sola Personalitate Verbi potest dici natura Dei incarnata, non Pater. Nam sicut Verbum identificatur cum natura, ita natura cum Patre, ergo, si natura posset dici incarnata, quia identificatur cum Verbo, etiam Pater posset dici incarnatus, quia identificatur cum natura. Sic posito v. gr. ligno tripalmari, quod uniatur parieti, si secundus palmus dici potest unitus parieti, eò quod uniatur illi mediatè, etiam tertius palmus dici poterit unitus parieti, quia pariter unitur mediatè.

Confirm. Quia si unio hypostatica non terminaretur ad naturam Verbi, quamvis posset aliquo modo dici, Verbum esse Incarnatum, non possemus tamen cum Athan., Cyrillo, Damasc. laudatis à S. Tho. dicere, quod natura Dei sit incarnata, ergo. *prob. sequela,* quia quod convenit formaliter uni parti, quamvis possit dici de toto denominativè, & in concreto, at non potest ullatenus dici de alia comparte in abstracto, v. gr. quia intelligere formaliter convenit homini ratione animæ, quamvis possit homo dici denominativè intelligens, at nullatenus potest dici materia intelligens: ergo, si Verbum ratione solius Personalitatis unire ur-

humanitati, quamvis posset dici denominativè Verbum est Incarnatum, sumptâ denominatione ab una parte, non posset tamen ullatenùs dici, Natura divina est Incarnata.

VI. *Prob. demum concl. ratione, & 1. negativè* : Possibilis est unio terminata ad naturam simul, & Personalitatem, ergo talis est unio de facto, quia sic meliùs salvatur, quòd Verbum caro factum sit, & quod natura Dei sit incarnata, juxta locutiones SS. PP. positivè, supponendo hic ex dicendis *Diss. sequenti*, Christum Dominum esse Personam compositam, cum Damascenus l. 3. c. 4. dicat : *In Domino nostro JESU Christo duas quidem naturas, & unam duntaxat Personam ex utraque natura compositam agnoscimus*, & VI. Synod. Act. 4. *Confitemur Christum ex duabus naturis compositum*. Nunc sic arguo. Unio, & compositio hypostatica ad illud debet formaliter terminari, quod per se requiritur ad constituendum unitum, seu compositum hypostaticè, atqui ad hujusmodi compositum per se requiritur etiam natura divina, ergo unio hypostatica immediatè terminatur etiam ad naturam divinam, minor pater, quomodo enim dari posset Persona composita ex utraque natura divina, & humana, nisi utraque natura per se faceret ad tale compositum? major constat inductione in aliis unionibus, & compositis : Nam unio substantialis v. gr. ad id formaliter terminatur, quod per se requiritur ad constituendum compositum substantiale, nempe ad materiam, & formam; sic unio accidentalis immediatè terminatur ad subjectum, & formam accidentalem, quæ per se requiruntur ad compositum accidentale; sic unio continuativa, & similes. Et ratio à priori est, quia compositum constituitur ab extremis, & unione terminata formaliter ad extrema; ergo illa extrema, quæ constituunt compositum, debent immediatè terminare unionem, atque adedò natura Divina, & humana, quæ constituunt Christum personam compositam ex utraque natura, debent immediatè terminare unionem hypostaticam.

Neque dicas, ad Christum constituendum requiri naturam Divinam non per se, & ratione sui, sed ratione identitatis cum Personalitate Verbi, & ideo unionem ad solam Personalitatem terminari. Nam contra est, quia si natura Divina non requireretur per se, &

ra-

ratione sui, ut virtus terminandi ad Christum constituendum compositum ex duabus naturis, sequeretur primo, quod, si per impossibile tolleretur à Christo natura Divina per locum intrinsecum, non destrueretur Christus, seu persona composita ex duabus naturis, quod ex terminis repugnat. Sequeretur secundo, quod etiam Paternitas requiratur in Christo ratione identitatis cum natura Divina, atque adeò sicut Christus dicitur compositus ex natura humana, & Divina, quamvis unio ad naturam Divinam non terminetur, ita posset dici compositus etiam ex personalitate Patris, quamvis unio ad Paternitatem non terminetur, atque adeò sicut Christus dicitur Deus, quamvis unio mediata ad Deitatem terminetur, ita posset dici Pater Dei, quamvis unio mediata terminetur ad Paternitatem, quod tamen nemo dixerit

VII. *Objic.* 1. Si unio hypostatica terminatur etiam ad naturam Divinam, humanitas faceret unum per se cum Verbo etiam in ratione naturæ, unde daretur in Christo tertia quædam natura, juxta hæresim Euthychianam.

Confir. 1. Quia uniri humanitatem cum personalitate Verbi est uniri in ratione Personæ; ergo uniri cum natura Divina, est uniri in ratione naturæ, & sic facere unum per se in ratione actûs, & potentix.

Confirm. 2. Quia duplex daretur in Christo Persona, altera per unionem ad Personalitatem Verbi; altera per unionem, quatenus terminatam ad naturam Divinam, quæ reddit humanitatem subsistentem, atque adeò personam; cum Persona nihil aliud sit, quam natura rationalis subsistens.

Resp. Huic, & similibus argumentis satisfaciendum ab omnibus, qui negant distinctionem virtualem inter naturam Divinam, & personalitates, quos tamen nemo dixerit errare cum Eutychnis. Quare *nego sequelam.* Illud enim dicitur facere unum per se in ratione naturæ, seu in ratione actûs, & potentix, quod unitur substantialiter cum altero ad complendam naturam, seu principium operationum, ad quas utrumque illud extremum suo modo concurrat, ita ut alterum sine altero operationes communes exercere non possit, sicut materia unitur formæ substantiali: contra verò illud facit unum per se in ratione substantiæ, seu Personæ, hoc est in ratione

termini , & terminabilis , quòd licèt sit secundùm se principium completum operationum , unitur tamen alteri , ut substantialiter compleatur , & terminetur , cùm non possit sinè tali complemento naturaliter existere , sicut nequit accidens naturaliter existere sinè inhærentia : hoc pacto quælibet natura substantialis unitur cum propria subsistentia , & humanitas Christi cum Personalitate Verbi , quæ humanitatem complet , sustentat , ac perficit . quin ab illa perficiatur ; ut proinde operationes humanitatis dicantur esse Verbi habentis humanitatem tamquam suam , sicut actiones omnes dicuntur esse suppositorum , seu naturæ in se subsistentis , & incommunicabilis alteri . Hinc patet , quomodo humanitas Christi , etiamsi immediatè uniatur naturæ Divinæ , non proinde faciat unum per se cum illa in ratione naturæ , aut cum confusione naturarum , juxta hæresim Eutychianam , sed solum in ratione substantiæ : Ratio est , quia humanitas est completa in ratione naturæ , seu principii operativi , unde à Verbo solum completur in ratione substantiæ , & quidem multò perfectius , quàm perficeretur à propria subsistentia , ita tamen ut à subsistentia absoluta Verbi humanitas solum compleatur in ratione substantiæ , sed communicabiliter , à Personalitate verò Verbi compleatur in ratione Personæ , sed incommunicabiliter .

Ad 1. Confirm. *Nego consequentiam* . Humanitatem uniri cum natura Divina non fert , uniri cum illa in ratione naturæ , seu in ratione actûs , & potentiæ . Univerſim enim ut duo uniantur in ratione naturæ , & tamquam actûs , & potentia requiritur , ut aliqua operatio communis procedat activè ab uno , & passivè ab altero , ita ut indigeat hujus sustentatione , sicut in homine anima , & corpus faciunt unum per se in ratione naturæ , quia sensationes sunt operationes communes utrique , ita ut procedant activè ab anima , & indigeant sustentari à corpore , cùm autem nulla detur operatio communis naturæ Divinæ , & humanæ in Christo , ne ipsa quidem operatio theandrica , quæ procedat activè à solo Deo , & indigeat sustentari ab humanitate , ideo natura Divina , & humana non possunt facere unum per se in ratione naturæ ; sicut nequit Diabolus facere unum per se in ratione naturæ cum energumeno (quidquid sit , utrum possit facere unum per se in ratione Personæ , de quo infra)

quia

quia nulla operatio Diaboli indiget energumeno, à quo sustentetur ; & quamvis divinitus posset aut motus localis, aut alia operatio Diaboli ab energumeno sustentari; quia tamen hujusmodi operatio de se non indiget sustentatione energumeni, ideo Diabolus non potest cum illo facere unum per se in ratione naturæ.

Ad 2. *nego sequelam* : Sicut enim subsistentia absoluta in Deo non est quarta Persona distincta à Tribus, ita humanitas Christi unita simul subsistentiæ absolutæ, & Personalitati Verbi, non est dupliciter personata. Et ratio est, quia Persona ex Boëtio est, *Rationalis natura substantia incommunicabilis* ; humanitas autem Christi prout terminata à subsistentia Dei absoluta adhuc est communicabilis, sicut de facto ipsa subsistentia Dei absoluta communicatur ; & identificatur cum personalitatibus Divinis, ergo non datur in Christo duplex Persona, licet detur duplex subsistentia, videlicet naturæ Divinæ, & Verbi. Quinimò nec dicitur dupliciter completa substantialiter Christi humanitas, quia unio hypostatica terminatur indivisibiliter ad utramque illam subsistentiam, adeò ut non possit naturaliter existere, prout completur de facto ab alterutra ex his substantiis seorsim, quia seorsim sumptæ solùm exhibent influxum sustentativum inadæquatum, & complexim sumptæ adæquatum.

VIII. *Objic. 2.* Si unio hypostatica immediatè terminaretur etiam ad naturam Divinam, sequeretur, quòd tota Trinitas de facto esset incarnata, quod est hæreticum. *Probatur sequela*, quia universim prædicatum, quod competit naturæ Divinæ, competit Tribus.

Confirm. Quia si posset esse terminus assumptionis natura Divina, ut modificata à Personalitate Verbi tantùm, pariter posset esse principium productivum unionis natura Divina, ut modificata ab una tantùm Personalitate, quod nemo dixerit.

Resp. Argumentum solvendum ab Adversariis ; Nam licet unio ad solam Verbi personalitatem terminaretur, debet esse verum, quòd natura sit incarnata, juxta locutiones laudatas Patrum ; ergo etiam tota Trinitas posset dici incarnata : sicuti si natura Divina posset dici generans, tota Trinitas posset etiam dici generans.

Directè *nego sequelam* ; sicut enim solus Pater generat, quamvis virtus generativa importet etiã naturã Divinã
five

sive de formali, sive de connotato, ita solum Verbum terminat unionem. & dicitur incarnatum, quamvis etiam Deitas sit virtus terminandi unionem, & illam terminet immediatè. Ad probationem *dist. maj.* Prædicatum, quod convenit naturæ Divinæ secundum se sumptæ, convenit Tribus, *concedo*; Naturæ ut modificatæ ab aliqua Personalitate, *nego*; virtus enim generativa, quia convenit naturæ ut modificatæ à Personalitate Patris; convenit soli Patri; & generatio Passiva, seu acceptio naturæ à Patre, quia convenit Deitati ut modificatæ à Filiatione, convenit soli Filio.

Ad Confirm. *Nego sequelam*: disparitas est, quia actiones sunt suppositorum, ita ut suppositalitas non sit virtus activa, sed mera conditio requisita ad agendum; quandoquidem nihil potest extra se operari, quin sit antecedenter ad intra completum per suum ultimum complementum substantiale, quod est substantia; & ideo cum eadem sit virtus productiva, seu omnipotentia in Tribus, operatio ad extra semper convenit Tribus: contra verò Personalitas non est conditio, sed ratio formalis terminandi; ita ut humanitatem terminare possit vel sola Personalitas, vel sola Deitas, vel utrumque; & ideo potest Deitas ut modificata à Personalitate Verbi terminare humanitatem, quin tota Trinitas dicatur incarnata. Adde, disparitatem dandam esse ab ipsis Adversariis: Nam quâ ratione ipsi admittunt posse solam personalitatem Verbi terminare unionem, non verò posse quidquam producere; eadem ratione potest Deitas terminare unionem, quin illam terminent tres Personæ: Non potest verò Deitas operari, quin tres Personæ operentur, & ratio est, quia operari, & diffundere se ad extra spectat unice ad naturam continentem omnem omnino perfectionem, sub conditione, quod sit completa per substantias relativas, quin ullatenus conveniat operari solis personalitatibus Divinis, quæ vel non sunt Perfectiones, vel sunt perfectiones simplices, non simpliciter simplices: At terminare unionem, seu sustentare humanitatem, sicut potest competere Personalitatibus independentem à natura, ita potest naturæ seorsim à personalitatibus, & utrisque simul, quia sustentare non est perfectionem diffundere, sed unire se alteri supplendo munus substantiæ creatæ.

IX. *Obje. 3.* Si Deitas secundum substantiam absolutam

tam adæquatè terminaret unionem, tota Trinitas diceretur incarnata, ergo etiam si Deitas terminet unionem inadæquatè simul cum Personalitate Verbi, cum in utroque casu Deitas communis Tribus terminet unionem. *Antec. prob.* Quia de facto tota Trinitas dicitur producens saltem denominativè, quamvis productio immediatè sit à sola natura; ergo tota Trinitas dicenda est incarnata saltem denominativè, si sola natura adæquatè unionem terminaret.

Resp. 1. Nego antec. Si sola Deitas terminaret unionem, nulla Persona diceretur incarnata, nec talis unio diceretur hypostatica, seu personalis, sumptâ Personâ pro substantia naturæ rationalis incommunicabili, iuxta definitionem Boëtii ab omnibus admissam; quare in tali casu humanitas solùm esset completa in ratione substantiæ, non in ratione Personæ, & Deus esset incarnatus formaliter, non verò ulla ex Personis. *Ad prob. nego conseq.* Disparitas est, quia productio non potest aliter personalitatibus competere, quàm denominativè, & idcirco dum dicitur tota Trinitas producens, unicus sensus est, quòd productio sit à natura subsistente in Tribus: contra verò terminare unionem potest competere Personalitatibus immediatè, & formaliter, & ideo si diceretur, quòd tota Trinitas sit incarnata, sensus proprius esset, quòd omnes Tres Personæ immediatè unionem terminent, & sine formaliter incarnatæ, quod esset falsum.

Resp. 2. Transmisso antecedente, quòd scilicet tota Trinitas dici posset incarnata denominativè, si unio adæquatè ad Deitatem terminaretur, *nego conseq.* Disparitas est, quia in eo casu sensus esset, quòd eodem modo competat incarnatio Tribus, quod esset verum: At in casu nostro non est verum, quòd eodem modo competat Tribus; ergo ne denominativè quidem potest dici tota Trinitas incarnata: quare sicuti quia anima videt prout est in oculo, non prout in manu, idèd solùm dici potest, quòd oculus videat, non manus: ità quia Deitas incarnatur prout in Verbo, non prout in Patre, ideo solum Verbum dici potest incarnatum. Et ratio à priori est, quia quoties denominatio requirit plura indivisibiliter, non potest ea reperiri, nisi ubi sunt ea plura: sic si quis videat, essentiam Divinam prout in Verbo cognitione præcisiivâ ab aliis Personis, solum Verbum denominari potest formaliter visum, non tota Trinitas.

X. Obij.

X. *Objic. 4.* Celeberrimam Authoritatem Concil. Toletani VI. & XI. dicentis: *Solus Filius suscepit humanitatem in singularitate Persona, non in unitate nature; in id, quod est proprium Filii, non in id, quod est commune Trinitati: Ubi distinguunt Personalitatem à Natura, & proprium Filii à communi in ratione assumendi. Neque obstat, quòd hujusmodi Concilia non fuerint Oecumenica, sed Nationalia. Nam ex hoc non sequitur, ea non habere apud Theologos, & totam Ecclesiam gravissimam Authoritatem, cui apertè refragari non liceat.*

Confirm. 1. Quia VI. Synod. Act. 6. ait: *Solum Verbum esse incarnatum, quia Pater, & Spiritus, Sanctus nihil in Incarnatione habent commune, præter benignissimam voluntatem; in sententia autem nostra haberent etiam communem naturam, quæ pariter est incarnata, ergo*

Confirm. 2. Quia verba Conciliorum interpretanda sunt in sensu proprio, nisi obstat ratio valida, vel autoritas, in casu autem nostro nec ratio, nec autoritas cogit ad dicendum, quòd unio ad Deitatem simul, & personalitatem Verbi terminetur, cum pro hac sententia solus Gabr. citetur, teste Hurt. apud Haunol. & communissimè Theologi oppositum sentiant; ergo

Resp. 1. Conciliis Toletanis opponi à nobis tum acta Synodalia sub Martino Papa, ubi anathematizatur, qui dixerit naturam Dei non esse incarnatam; Tum Tridentinum { *Seff. 13. c. 3.* ubi dicitur in Eucharistia existere per concomitantiam Divinitas, propter admirabilem ejus cum corpore, & anima hypostaticam unionem.

Resp. 2. Concilia Toletana loqui adversus errorem Acephalorum dicentium, in Incarnatione ità naturam Divinam, & humanam esse unitas, ut ex iis resuleret Tertia quædam natura communis toti Trinitati, non verò una Persona composita ex duabus naturis, ut docent Catholici. Propterea definitur, quòd Filius non suscepit humanitatem in id, quod est commune Trinitati, sumendo *Tò commune* reduplicativè, seu prout est commune Trinitati, ità ut tota Trinitas sit incarnata; non verò sumendo *Tò commune* specificativè, seu quod est commune, nempe in Deitate communi quidem Tribus, non tamen ut communi, sed prout appropriata Verbo; aliter non esset verum, quòd natura Dei sit incarnata, prout Patres laudati fatentur. Hanc explicationem olim tradidit Mag. in 3. d. 5. dicendo, solum Filium assum-

sumplisse humanitatem in id, quod est proprium Filii, non in id, quod est commune Trinitati, sic oportet intelligi, id est propriè in hypostasi Filii, non in tribus communiter Personis Divina natura humanam sibi univit, quem sensum ex verbis Damasceni confirmat, aliter enim Divina natura non posset dici incarnata.

Ad 1. Confirm. VI. Synodus dicens: Patrem, & Spiritum Sanctum in Incarnatione nihil habere commune, præter benignissimam voluntatem, intelligenda est, quod nihil habeant commune, unde possint dici incarnati, quia Deitas, quæ est communis, non unitur humanitati ut communis, sed ut appropriata Filio, quid autem est magis proprium Filii, quàm Persona Filii, quæ naturam simul, & personalitatem indivisibiliter includit? Quare præter benignissimam voluntatem Pater, & Spiritus Sanctus in Incarnatione Filii nihil habent commune, unde dicantur Incarnati, non verò unde dicantur idem Deus, cuius natura dici possit incarnata.

Ad 2. Quare Adversarii non sumunt in sensu proprio verba laudata Tridentini dicentis, Divinitatem esse unitam humanitati, dum dicit, Divinitatem existere in Eucharistia per concomitantiam propter ejus unionem hypostaticam cum corpore, & anima Christi? Quod si ipsi Concilium interpretantur, cur non liceat nobis etiam interpretari? utrâ autem aptior sit interpretatio? Alii dijudicent. Mirum tamen, quod dicatur sententia nostra destitutâ Authoritate, quando pro ea stant Gabr. Okam, Soto, Victor. multi Recentiores apud Haunol., & quotquot negant distinctionem virtualem inter naturam, & Personalitates Divinas. Ipse enim Suar. nobis favet *disp. 1. 2. sect. 2.* dicens, unionem factam esse in absoluto, quatenus includitur in Relativo; ac demum ipse D. Thom. qui qu. 3. ar. 2. hæc habet; *Terminus Assumptionis non est natura secundum seipsam, sed ratione Persona, in qua consideratur; & ideo primò quidem, & propriissimè Persona dicitur assumere.* Ecce quomodo ex Angelico, non sola Personalitas, sed Persona constituta ex Personalitate, & natura humanitatem assumpsit.

XI. Instabis: In Persona Filii importante naturam ut contractam ad Verbum & datur natura, quæ est communis Tribus, & datur Personalitas, quæ est propria Filii; sed ex Conciliis laudatis Filius suscepit humanitatem

in

in id, quod est proprium, non in id, quod est commune, ergo sola Personalitas terminat unionem.

Resp. Naturam seorsim sumptam à Personalitate esse communem Trinitati, esse verò propriam Filii ut sumptam indivisibiliter cum Filiatione, sicut denominatio videntis habetur per id, quod est proprium oculi, quia habetur per animam, & organum visivum sumpta indivisibiliter, sic etiam virtus generativa est propria Patris, & generatio passiva est propria Filii, quia important Deitatem ut contractam ab his Personalitatibus, non ut communem Trinitati.

XII Neque dicant Adversarii paritatem hanc non esse ad rem, quia scilicet vis generativa, sicut etiam generatio activa, & passiva, sunt prædicata notionalia, quæ non possunt competere Tribus; contra verò virtus terminandi humanitatem, & unio non est quid notionale, cum possit competere Tribus, ergo unio deberet de facto competere Tribus, si competeret Naturæ; sicut productio ad extra necessario competit Trinitati, quia non est quid notionale.

Nam contra est, quia vis paritatis in eo consistit, quod sicut potest competere naturæ Divinæ aliquod prædicatum, nempe esse virtutem generativam, quin tale prædicatum competat Tribus, eò, quod competat Deitati ut contractæ per Paternitatem, ita possit competere naturæ Divinæ prædicatum *Incarnati*, quin tale prædicatum competat Tribus; quia potest competere Deitati ut contractæ per Personalitatem Verbi. Ex hoc autem, quod generare sit actus notionalis, non verò terminare unionem, seu incarnari, solum sequitur, quod virtus generativa necessario competat soli Patri, esse verò Incarnatum non competat necessario soli Filio, sed possit etiam aliis competere. Productio ad extra ideò necessario competit Tribus, quia ratio formalis producendi non est Personalitas, sed omnipotentia, quæ est eadem in omnibus; unde unus est omnipotens: contra verò ratio formalis terminandi non est una in omnibus; unde tres sunt Personæ terminantes naturam Divinam. & ideo potest terminatio humanitatis competere uni tantum Personæ,

quamvis possit etiam competere Tribus,
immo etiam soli naturæ
Divinæ.

QUE-

Q U Æ S T I O II.

Utrum detur in Natura Divina subsistentia absoluta, quæ possit unionem hypostaticam terminare?

I. Sicut Deitas ex ratione sui est existens existentia absolutâ communicatâ tribus personalitatibus existentibus existentia relativa; ita multi docent cum D. Thoma, Scoto, Suar. Nominalibus contra Bonaventuram, Vasq. & alios, ut diximus quæstione superiore, Deitatem esse per se, & ratione sui subsistentem subsistentiâ absolutâ communicatâ tribus personalitatibus, seu subsistentiis respectivis, repugnat enim in Deo prædicatum absolutum, quod Tribus non communicetur per identitatem realem. Notandum tamen, controversiam de re esse inter Theologos: Num in Divina natura abstracta per intellectum à personalitatibus intelligatur esse perfectio aliqua positiva, ratione cujus Deitas sit in se ipsa per se existens, & completa in linea substantiæ absolutæ, licet communicabiliter: Esse verò litem de voce: Num, si daretur isthæc perfectio, dicenda esset subsistentia absoluta. Qui enim dicunt, quod subsistere importet incommunicabilitatem, procul dubio negant in Deo subsistentiam absolutam: qui verò dicunt, quod subsistere importet completam perfectiorem essendi excludentem dependentiam ab alio tum ut subjecto, tum ut assumente, seu ut supposito, admittunt in Deo præcisè Personalitatibus subsistentiam absolutam, si ea perfectio competat naturæ Divinæ, licet communicabiliter. His explicatis, omittâ quæstione de vocabulo.

II. Dico cum laudatis Auctoribus, Divinæ naturæ præcisè Personalitatibus competere perfectiorem essendi, non secus ac eidem præcisè Personalitatibus competit existere ratione sui, ut proinde admitti debeat in Deo subsistentia absoluta præter tres relativas, vi cujus Deitas possit unionem hypostaticam terminare, & incarnari, quamvis de facto non sit incarnata Deitas seorsim à personalitatibus, & ut communis Tribus, sed Verbum caro factum sit, ut explicavimus quæstione antecedente.

Prob. Divina Natura præcisè Personalitatibus est in
Pars VI. P linea

linea entis substantialis summè perfecta, ergo illis præcisè continet in se perfectionem tum existendi, tum perfectitatis, utpote facientem ad substantiam in esse completo substantiæ. *Antec. patet*, tum quia Deitas est cumulus omnis perfectionis simpliciter simplicis, tum etiam, quia ex perfectione Deitatis habet quælibet Divina Persona, ut sit eas summè perfectum in linea entis; Relationes enim, seu Personalitates vel nullam dicunt perfectionem, vel dicunt solum infinitam in proprio genere Paternitatis, Filiationis, & Spirationis passivæ: quare ut quælibet Divina Persona dici possit infinita simpliciter in linea entis substantialis, debet Deitas in seipsa esse summè perfecta, atque adeò completa in ratione substantiæ.

Prob. itaque consequ. Et primò, quia modus perfectitatis, & in se subsistendi est perfectio simpliciter simplex nullam includens imperfectionem ex proprio conceptu, ergo includi debet in conceptu Divinitatis, utpote cumuli omnis perfectionis simpliciter simplicis. Secundò, quia aliter de natura Divina summè perfecta prædicari non posset, quòd sit Deus per modum concreti, ac per se subsistentis, sed solum, quòd sit Deitas in abstracto; nam de natura abstracta non includente modum perfectitatis non prædicatur concretum, ideòque non rectè dicitur, Humanitas est homo, & per hoc, quòd Verbum assumpserit Humanitatem, non potest dici, quòd assumpserit Hominem. Tertiò, quia ut advertit Lumbier *dist. 3. de Attributis, n. 207.* Deus ut Deus est communis tribus Personis, & ut actus purissimus, & perfectissimus, atqui ut sic est concretum, & subsistens, ergo Deus secundum rationem absolutam communem tribus dicit subsistentiam, & perfectissimam perfectitatem. Quartò denique, quia in tantum negari posset subsistentia absoluta in Deitate, licet infinitè perfecta in linea entis substantialis, in quantum esset impossibilis cum communicabilitate Deitatis, quæ debet tribus Personis communicari, sed hoc est falsum, ut patebit in decursu; ergo negari non potest in Deitate subsistentia absoluta, tanquam perfectio simpliciter simplex, quæ scilicet melior est ipsa, quam non ipsa, seu aliud cum ipsa impossibile.

Confirm. Perfectio subsistentiæ essentialis in Deitate sufficienter habetur per ipsummet positivum naturæ Divinæ, prout ratione sui essentialiter independens ab alio

alio ut sustentante, atqui verè in Deitate præcisè Personalitatibus est huiusmodi positivum essentialiter independens ab alio ut sustentante; ergo &c. *Minor supponitur; Major probatur*, quia positiva exclusio imperfectionis, quam dicit inaleitas, est propria perfectio perfectitatis; sed positivè excludere dependentiam à sustentante (quod certè competit naturæ Divinæ præcisè Personalitatibus) est positivè excludere imperfectionem, quam dicit inaleitas; ergo positivè excludere dependentiam à sustentante est propria perfectio perfectitatis, quæ habetur in Deitate, atque adeò in Deitate habetur perfectio subsistentiæ essentialis, & absolutæ.

III Hinc fit primò, quòd in natura creata eadem subsistentia, seu perfectio perfectitatis formalis duplex munus præstet eidem naturæ; alterum est, quòd illam compleat, ac terminet in linea substantiæ, excludendo dependentiam ab alio sive ut subjecto inhaesionis, sive ut supposito, seu termino sustentante: alterum est, quòd eandem naturam creatam reddat alteri incommunicabilem ut supposito: contra verò in natura Divina duplex hoc munus à duplici subsistentia præstatur; Per subsistentiam enim absolutam communem Tribus Deitas est completissima in linea substantiæ excludens formaliter capacitatem ad dependendum ab alio tanquam à subjecto sustentante: & hæc perfectio non multiplicatur, tum quia in Divinis prædicata absoluta non possunt multiplicari, tum etiam quia talis perfectitas est infinitæ perfectionis, sicut est Divina existentia, quæ proinde una est, & immultiplicabilis. Per subsistentiam verò relativam eadem Deitas ita terminatur, ut fiat incommunicabilis alteri tanquam supposito, & hæc triplex est pro numero Personarum. Ratio autem cur in natura creata una tantum sit subsistentia, non verò in natura Divina, est, quia in natura creata tum perfectio independentiæ, tum incommunicabilitas, quæ non dicit ullam relationem, rectè tribui potest eidem formæ; At perfectio perfectitatis seu independentiæ à sustentante, sicut quælibet alia perfectio absoluta non potest tribui personalitatibus relativis, quippe quæ ratione sui vel perfectiones non sunt, vel saltem supponunt necessariò totam perfectionem Deitatis in existendo perfectissimo modo; ac proinde datur subsistentia absoluta, & essentialis.

let significare personam, seu personalitatem concedo, juxta latiore significationem, videlicet sumpta pro substantia excludente dependentiam sive à subjecto, sive à termino, seu supposito, *Nego minorem, & consequentiam.* Sicut enim nomen substantiæ dupliciter sumitur in Divinis; aliquando enim sumitur pro supposito, & in hoc sensu admittentur in Deo tres Substantiæ, prout sunt tria supposita; aliquando sumitur pro natura substantiati, & in hoc sensu una duntaxat in Deo admittitur substantia; ita dupliciter sumitur in Divinis nomen Hypostasis, aliquando sumitur pro perfectitate incommunicabili alteri supposito, & in hoc sensu tres tantum dantur in Deo hypostases, seu substantiæ relativæ, aliquando etiam sumitur pro substantia, seu natura excludente omnem dependentiam sive à subjecto sustentante, sive à termino, seu supposito assumente, & in hoc sensu una tantum datur in Deo hypostasis, seu substantia naturæ absoluta.

Ad Confirm. *Nego utramque sequelam.* Ad probationem primæ *nego majorem;* ex Boëtio enim definitur Persona, quod sit Naturæ intellectualis substantia incommunicabilis incommunicabilitate tum formæ subjecto, tum termini termino, idque vel cum distinctione naturæ, ut in creatis, vel sine distinctione, ut in Divinis; in hac autem communi acceptione Persona in Deo est solum triplex. Ad secundam nonnulli transmittunt sequelam, sed verius neganda, quia ratio Personæ consistit in indivisibili, ut ratio numeri, unde non potest dici, quod substantia absoluta sit semi-persona, sicut non potest dici, quod brutum sit semi-homo, per hoc, quod competat illi unum ex prædicatis hominis, videlicet ratio animalis. Ubi autem D. Tho dicit, quod abstractis personalitatibus Divinitas esset Persona, sensus est de abstractione reali, & non rationis; tunc enim verè Deitas esset hoc subsistens, & una duntaxat Persona absoluta.

V. *Objic. 2.* Divina natura de se petit existere in tribus Personis, ergo abstracta à Personalitatibus non habet substantiam absolutam. *Prob. conseq.* Quia subsistere per se, seu habere substantiam absolutam, & exigere esse in alio, seu in tribus personis videntur pugnare.

Resp. Dist antec. Petit esse in tribus personis, à quibus in sua existentia dependeat, *nego;* in tribus personis

purè terminantibus non verò sustentantibus naturam, concedo antec. & nego conseq. Unde patet ad probationem. Ubi notandum, quòd Deitas exigit in personalitatibus subsistere solùm, quia est essentialiter fœcunda, non quia iis indiget ad existendum : Et quamvis admitti possit, quòd personalitates compleant naturam Divinam, non tamen complemento fundato in indigentia ejusdem ad existendum, cùm hoc non cohæreat cum summa Divinitatis perfectione, sed fundato in essentiali fœcunditate inducente necessariò Trinitatem personarum : Ad eum modum, quo in valde probabili sententia Omnipotentia necessariò connectitur cum possibilitate Creaturarum in hypothese, quòd Creaturarum possibilitas ab omnipotentia distinguatur ; & tamen quamvis sine tali possibilitate existere non possit, non proinde dependet ullatenus à creaturis ; cùm ea connexio non fundetur in indigentia, sed in pariformi essentiali fœcunditate Omnipotentiae, quatenus debet posse ad extra liberè se diffundere ; non secus ac Pater necessariò producit ad intra terminum sibi consubstantialem, tam per intellectum, quàm per voluntatem notionalem, generando Filium, & cum Filio spirando Spiritum Sanctum.

VI. *Objic. ult.* Si posset subsistentia absoluta Deitatis assumere naturam humanam, sequeretur primò, dari posse à parte rei humanitatem subsistentem, & non ultimò terminatam per subsistentiam incommunicabilem, quod videtur absurdum ; *Sequela patet*, quia hujusmodi humanitas sic subsistens subsisteret per subsistentiam naturæ Divinæ de se communicabilem tribus, atque adeò humanitas esset subsistens, & non ultimò terminata per subsistentiam incommunicabilem.

Secundò sequeretur, quòd daretur à parte rei aliquis homo individuus, qui non esset Persona ; cùm enim subsistentia absoluta Deitatis non sit personalitas, complendo humanitatem non potest constituere Personam.

Tertiò, humanitas cum tali subsistentia absoluta haberet, & non haberet propriam subsistentiam creatam ; non haberet quidem, quia eâ non indigeret, posito, quòd sit ultimò completa ; haberet verò, quia subsistentia absoluta, cùm non sit personalitas, non impediret, quominus ab humanitate profluat propria ejus personalitas creata.

Quartò

Quartò denique sequeretur, quòd humanitas haberet subsistentiam aliquam, cujus est simpliciter incapax. Probatur, quia humanitas non est simpliciter capax, nisi subsistentiæ personalis, tota enim dependentia humanitatis est, in subsistendo personaliter, & incommunicabiliter, subsistentia autem absoluta non est personalis, ergo.

Resp. ad singula. Prima sequela transmitti potest, sicut enim non est inconveniens, quòd detur divinitus humanitas denudata qualibet subsistentiâ (non secus ac dari potest divinitus materia spoliata omni formâ substantiali) in quo casu humanitas neque esset positivè communicabilis, neque positivè incommunicabilis alteri, ut supposito, sed solum exigeret compleri per subsistentiam propriam, ratione cujus redderetur alteri incommunicabilis: ita potest dari humanitas subsistens subsistentia absolutâ deitatis, ita ut ab illa substantialiter compleatur in ratione independentis ab alio ut subjecto quamvis non esset alteri ut supposito incommunicabilis quandoquidem posset simul suppositari suppositualitate relativâ trium Personarum. Responderi etiam potest negando sequelam, si Adversarius velit illam esse absurdam. Etenim hoc ipso quòd subsistentia absoluta Deitatis non sit personalitas, terminando aliquatenus, & complendo humanitatē, non impediret in illa propriam personalitatem creatam, à qua ulterius, & ultimatè compleretur substantialiter, ac redderetur persona & alteri incommunicabilis. Sicut enim de facto Persona Verbi tam per subsistentiam absolutam Deitatis communem, quam per subsistentiam relativam propriam constituitur formaliter in esse per se & incommunicabilis alteri ut subjecto, & solum per subsistentiam relativam propriam constituitur formaliter in esse in se, & incommunicabilis alteri ut supposito, ita hæc humanitas subsistens per subsistentiam absolutam Deitatis, & per propriam personalitatem, per utramque constitueretur formaliter in esse per se, & solum per propriam personalitatem creatam constitueretur formaliter in esse in se personaliter, & incommunicabiliter alteri ut supposito. Tertiò responderi potest, quòd in tali humanitate præter unionem terminatam ad subsistentiam absolutam Deitatis, à qua formaliter constituitur in esse per se independens ab alio ut sustentante, daretur etiam altera unio terminata ad subsistentiam re-

lativam alicujus personæ Divinæ, ratione cujus redderetur incommunicabilis alteri ut supposito; sicut natura Divina non ultimò terminata per subsistentiam absolutam, ultimò deinde terminatur per subsistentias relativas non quidem quoad effectum essendi per se, sed quoad effectum essendi in se, & incommunicabiliter.

Ad secundam dico similiter, non repugnare, quòd à parte rei detur natura humana singularis absque ulla subsistentia, quæ proinde non esset formaliter, sed tantum radicaliter persona. Quòd si hoc repugnet, humanitas, quæ ultimò compleretur in esse per se, & independentè à subiecto per subsistentiam absolutam, ulterius deinde compleretur in esse in se, & incommunicabiliter alteri ut supposito, sive per personalitatem propriam, sive per subsistentiam relativam alicujus personæ Divinæ.

Ad tertiam dico, quòd haberet propriam personalitatem, si non terminaretur etiam aliqua subsistentia relativa Trinitatis, ut reddatur ultimò completa in ratione essendi in se incommunicabiliter alteri ut supposito.

Ad quartam *nego sequelam*. Ad probationem *negomajorem*; obedientialiter enim natura creata est capax unionis ad subsistentiam absolutam, quâ reddatur in esse per se completa, & incommunicabilis alteri ut subiecto; non secus ac est capax unionis ad subsistentiam relativam Trinitatis, quâ reponitur in esse personali, seu in se, & redditur incommunicabilis alteri ut supposito.

QUÆSTIO III.

Utrum Unio Hypostatica sanctificet Humanitatem non solum ut quo, sed etiam ut quod?

I. Supponimus hìc ex Philosophia modos esse distinctos à re, quam congruenter modificant, atque adedò sic datur inter corpus, & animam unio substantialis distincta ab extremis in homine, ità cohærenter dari debeat in Christo unio hypostatica, quæ sit modus substantialis distinctus ab humanitate, & subsistentia Verbi.

Supponimus etiam, unionem hypostaticam differre ab Assumptione, & Incarnatione. Differt enim ab Assumptione, quia unio importat tantum modum necessentem extrema;

ma; Assumptio verò non solum importat unionem, sed etiam connotat personam ut assumptam, (seu producentem simul, ac terminantem unionem) ac naturam ut assumptam, seu subiectantem unionem. Differt etiam unio ab Incarnatione, quia hæc importat actionem productivam unionis, quæ dicitur unio, & propterea Verbum nunc est unitum, & incarnatum, non tamen dicitur nunc incarnari, quia non habetur nunc productio unionis. Denique differt etiam Assumptio ab Incarnatione, quia Assumptio connotat in recto naturam, Incarnatio verò Personam: propterea natura humana dicitur assumpta, non incarnata, Verbum verò dicitur incarnatum, non assumptum.

Supponimus denique, unionem hypostaticam esse maximam tum in ratione unionis, tum in ratione doni, ut docet Angelicus: est maxima in ratione unionis, quia constituit unum substantialiter completum, quod nullam patitur divisionem in ea ratione, in qua est unum: etenim unum in ratione specifica potest pati divisionem numericam, unum in ratione individuali, potest pati divisionem Personalem, ut in Trinitate; At unum in ratione Personæ, est unum substantialiter completum (quod non competit uni in ratione naturæ) nullam habens divisionem, neque numericam, neque Personalem, & ideo unio hypostatica in ratione unionis est maxima. Est etiam maxima in ratione Doni, cum per illam homo fiat Filius Dei naturalis, quod à nullo alio possibili dono præstari potest; ideo Apost. Hebr. 1. loquens de Christo domino dixit; *Tanto melior Angelis effectus, quanto differentius præ illis nomen hereditavit*; Cui enim Angelorum dixit Deus: *Filius meus es tu*? id est proprius, & naturalis. His suppositis

Certum est, unionem sanctificare humanitatem ut quo, quatenus est id, quo humanitati communicatur sanctitas increata, à qua denominatur sancta infinitè, ut dicemus *disput. sequenti*. Certum etiam est, quod unio sanctificet humanitatem radicaliter, cum radice, seu exigat sanctitatem accidentalem, à qua etiam formaliter sanctificatur. Dubitatur nunc, An ipsa etiam unio sanctificet humanitatem formaliter, & ut quod, ita ut denominetur sancta formaliter tum à sanctitate increata Verbi, tum à sanctitate accidentali Gratiae, tum etiam à sanctitate substantiali unionis?

II. Ut quæstio decidatur, recolendum ex dictis in de Gratia, sanctitatem formalem esse munditiam à peccato juxta definitionem D. Dionys. 12. div. de Nom. dicentis: *Sanctitas est omni scelere libera, perfectaque, & penitus incoquinata munditia*, debet tamen sanctitas esse mundities à peccato ratione sui, non ratione alterius, cum quo connectitur, & ideo unio gratiæ cum anima non est formalis sanctitas, quamvis sit impossibilis cum peccato, quia hanc impossibilitatem non habet ratione sui, sed ratione gratiæ, cum qua connectitur. Præterea sanctitas debet reddere subjectum dispositum ad opera supernaturalia exercenda, & ad acquirendam Beatitudinem; sicut enim sanitas Corporis, quæ est elongatio ab ægritudine, debet etiam reddere corpus dispositum ad exercenda munia salubria, ita sanitas animæ, seu sanctitas, quæ à D. Petro dicitur esse Participatio Divinæ naturæ: cum enim duo prædicata sint peculiariora naturæ Divinæ, videlicet habere impossibilitatem tum peccato, (nulli enim creaturæ competit ratione sui essentialis impeccabilitas, ex communi PP. sensu) ut ostendimus in de Angelis *disp. 5. qu. 2.* & posse viribus propriis Deum videre (quod nulli creaturæ competit, cum repugnet substantia supernaturalis, cui sit debita visio Dei) ideo Gratia, quatenus est participatio naturæ Divinæ, hæc duo prædicata specialiter competit, & habere impossibilitatem cum peccato saltem exigitivè, & radicaliter; & simul suis habitibus infusis, & actibus supernaturalibus disponere subjectum rationale ad Deum videndum, ut proinde Gratia dicatur semen gloriæ, & natura supernaturalis, seu prima Radix omnis supernaturalitatis. Hinc fit, quod Homo per gratiam reddatur Dei Filius, non quidem naturalis, cum non participet in suo esse reali naturam Divinam; sed adoptivus, participando naturam Divinam similitudinariè, quatenus per gratiam convenit cum natura Divina in iis duobus peculiaribus ejus prædicatis, videlicet in hoc, quod sit immunis à culpa, & quod exigat Deum videre. Ex hoc verò, quod homo per gratiam sit Dei Filius, rectè infert Apostolus, quod sit hæres, seu habens jus ad bona Patris, hoc est ad Deum videndum, & possidendum: sequitur etiam, quod sit Dei amicus, cum Filius teneatur amare, & exigat redamari à Patre, in quo mutuo jure ad amorem consistit forma amicitiae.

III. Diximus etiam in de Gratia, quod si gratia consideretur secundum se, quatenus est participatio divinæ naturæ, seu natura supernaturalis, solum exigit connaturaliter Dei visionem, & amorem Dei amicabilem; unde cum Deus possit frustrare exigentias naturales, dari potest divinitus gratia, quæ componatur cum peccato, non secus ac calor, & frigus ut 8. possunt divinitus coherere. Gratia verò præsentis ordinis non solum exigit hos effectus connaturaliter, sed etiam essentialiter ratione sui constituit Iustum cum jure ineluctabili ad amorem Dei, & hæreditatem, atque adeò immunem à peccato: quod ostendimus ex Tridentino dicente, unicam esse causam formalem nostræ justificationis, videlicet justitiam inhærentem, qua reddimur amici Dei, Filii, & Hæredes: Non esset autem unica causa formalis nostræ justificationis gratia præsentis ordinis, si tantum connaturaliter exigeret eos effectus, quia effectus gratiæ haberentur tum ab ipsa gratia nobis inhærente, connaturaliter exigente promissionem divinam de dando nobis suo amore, & hæreditate, tum ab ipsa divina promissione: quare in tantum de facto unica est causa formalis, quia gratia inhærens est ipsa Dei externa promissio essentialiter pendens à promissione interna de dando nobis suo amore, & hæreditate, non secus ac Revelatio externa essentialiter pendet ab interna locutione divina. Quod videtur innuisse D. Petrus dicens, *Magna Deus, & pretiosa nobis promissa donavit, ut per hac efficiamini divina consortes natura*; significans gratiam esse ipsam divinam promissionem externam essentialiter pendentem ab interna, propterea sicut eadem prædicata tribuuntur actui externo, & interno, ita idem jus ad amorem amicabilem, & hæreditatem, quod tribuitur nobis à Deo per suam promissionem internam, tribuitur etiam per promissionem externam, seu per gratiam præsentis ordinis, quæ proinde est essentialiter impossibilis cum peccato. His in memoriam revocatis.

IV. Dico cohærenter primò unionem hypostaticam non esse de se formam Sanctificantem ut *quod*, sed sanctificare humanitate solum ut *quo*; quatenus trahit sanctitatem increatam, à qua infinite sanctificatur, propterea possibilis est unio hypostatica, quæ non sanctificet formaliter ut *quod*. Ità communius cum Gonet. d. 11. Haun. & Aliis.

Prob.

Prob. Ad hoc, ut unio ratione sui sanctificaret humanitatem ut quod, deberet seclusa qualibet aliâ formâ, causare in Christo domino effectus sanctitatis, seu gratiæ, reddendo illum justum, Dei amicum, Filium, & hæredem, sed hoc non convenit unioni hypostaticæ secundum se, ergo unio hypostatica secundum se non sanctificat ut quod. *prob. minor.* Ideò gratia secundum se, quatenus est participatio divinæ naturæ, & radix omnis supernaturalitatis, non est forma sanctificans, quia ut diximus in loco cum Manistrio, Gratia est entitas creata, quæ solum potest connaturaliter exigere, quòd Deus det nobis suum amorem, & hæreditatem, quin de se sit jus ineluctabile ad amorem Dei, & hæreditatem, per quod constituitur homo amicus Dei, & hæres; atqui etiam unio hypostatica est entitas creata, ergo solum potest exigere naturaliter, non verò essentialiter, obligare Deum ad dandum suum Amorem, & hæreditatem, atque adeò unio hypostatica si non pendeat essentialiter à promissione Dei interna, non est forma sanctificans. Verum quidem est, quod qualibet unio hypostatica sit impossibilis cum peccato; hoc tamen non sufficit, ut sit forma sanctificans, nisi simul ratione sui reddat subiectum Dei amicum: sic etiam unio gratiæ habitualis cum anima est impossibilis cum peccato: quia tamen non ratione sui, sed ratione gratiæ, quam unit animæ, reddit hominem Dei amicum; ideò unio gratiæ habitualis præsentis ordinis cum anima non est forma sanctificans, seu non sanctificat ut quod, & sanctitate ultimatâ, sed ut quo, & sanctitate viali, quæ scilicet se habet ut via ad sanctitatem ultimatam, & principalem. Idem dicas de unione hypostatica, qua unitur humanitati sanctitas increata. Verbi.

V. Obje. Unio hypostatica est participatio divinæ naturæ perfectiori modo, quam gratia præsentis ordinis: sed gratia præsentis ordinis non solum exigitivè sed etiam formaliter reddit Justum; Dei amicum &c. ergo à fortiori unio hypostatica major patet, quia unio hypostatica est participatio divinæ naturæ in suo esse reali, cum realiter divinitas communicetur humanitati, gratia verò est participatio divina naturæ tantum similitudinariè; ergo unio est perfectior participatio.

Confir.

Confirm. primò quia unio hypostatica virtualiter continet omnia dona , atque adeò est donum præstantius, quàm sit gratia præsentis ordinis, ergo &c.

Confirm. Secundò. Per unionem humanitas sanctificatur infinitè, & Christus etiam quatenus homo , fit Filius Dei proprius , & naturalis ; sed Filius adoptivus essentialiter à Deo amatur ; ergo à fortiori Christus quatenus homo , utpote Filius naturalis, ergo vi unionis hypostaticæ habetur perfectiori modo , quidquid habetur per gratiam , atque adeò si gratia præsentis ordinis formaliter justificat, ut *quod*, à fortiori unio.

Resp. Quòd sicut dicitur participatio formæ ignis tam unio substantialis formæ ignis cum materia, quàm calor, quamvis diversimodè ignem participant ; ità tam dicitur participatio divinæ naturæ unio hypostatica, quàm Gratia, diversimodè tamen utraque naturam divinam participat : unio enim est participatio divinæ naturæ transitive, & in suo esse reali ; Gratia verò participat intransitive, & similitudinariè : perfectior proinde participatio est unio hypostatica. Hinc tamen non sequitur, quòd quæcunque prædicata competunt gratiæ præsentis ordinis, competant etiam unioni hypostaticæ secundum se ; sicuti licet sit perfectior participatio formæ ignis unio substantialis cum forma ignis, quàm calor, non propterea sequitur, quòd si calor calefacit , etiam unio substantialis formæ ignis cum materia debeat calefacere ; sic etiam homo est perfectior muscà , nec proinde competit homini vis productiva formæ substantialis, (nimirum animæ rationalis) quæ competit muscæ. In forma concessa maiore , atque minore , nego consequentiam : gratia præsentis ordinis formaliter justificat, non quia est participatio divinæ naturæ quomodocūque, sed quia est etiam promissio Dei externa de dando nobis suo amore, & hæreditate ; unio autem hypostatica non habet hoc de se, ergo quamvis sit perfectior participatio divinæ naturæ, quam gratia præsentis ordinis , non per hoc est forma justificans ut quod. Hinc ad primam Confirm. concesso antecedente, nego consequentiam.

Ad secundam. Humanitas Christi infinitè sanctificatur tanquam à ratione quæ, unice per sanctitatem increatam verbi ipsi communicatam, non verò per unionem hypostaticam , quæ est solùm conditio requisita , ut

infinita sanctitas verbi communicetur humanitati, sicut unio animæ cum corpore non est forma vivificans, sed conditio requisita, ut anima vivificet Corpus, sic etiam unio cum gratia accidentali non sanctificat ut quod, sed est conditio requisita, ut homo per gratiam sanctificetur. Hinc Christus dominus non fit Filius Dei naturalis formaliter per unionem, sed per substantiam Verbi, quæ posita unione communicatur humanitati. Propterea infinite amatur Christus ratione sanctitatis increatæ, non verò ratione unionis, quæ talis: quare *negotium ultimam consequentiam*.

VI. Dico secundò, unio hypostatica præsentis ordinis est forma iustificans, & sanctificat humanitatem Christi formaliter ut *quod*. Ità Suar. & Alii. contra Vasq. Lugo d. 26.

Prob. primò Authoritate PP præsertim D. Bern. hom. 4. super *Missus est*, dicentis expressè, humanitatem Christi fuisse sanctificatam ipsa unione, & assumptione.

Prob. Secundò ratione: Ideò (ut diximus in loco) Gratia præsentis ordinis est forma sanctificans ut quod, & ratione sui est impossibilis cum peccato reddens hominem Dei amicum, filium, & hæredem; quia essentialiter pendet à divina promissione, atque adeò est ipsa Dei promissio externa de dando nobis suo amore, & hæreditate: atqui etiam unio hypostatica præsentis ordinis connaturalius est consimilis externa Dei promissio de dando humanitati Christi suo amore, & hæreditate, ergo pariter unio hypostatica præsentis ordinis iustificat Christi humanitatem formaliter ut *quod*. *prob. minor*: Ideò gratia præsentis ordinis dicitur esse externa Dei promissio, quia cum gratia secundum se exigit divinam illam promissionem, connaturalius est, quod de facto gratia præsentis ordinis habeat utrumque munus, videlicet exigendi divinam illam promissionem, & simul conferendi Jus ad amorem per dependentiam essentialem ab ea promissione, atqui etiam unio hypostatica, cum sit radix gratiæ exigendo illam in humanitate, exigit pariter divinam promissionem de dando suo amore humanitati, ergo pariter connaturalius est, quòd unio præsentis ordinis utrumque illud munus habeat, tamquam externa Dei promissio. *major patet*, quia perfectiori modo, atque adeò connaturalius per unam formam intrinsecam animæ præstatur utrumque illud munus, videlicet

cet exigendi divinam promissionem & conferendi jus ad amorem, & ideo Tridentinum docet, causam formalem nostræ justificationis esse unicam, non duplicem.

Confirm. Quia communissimè DD docent, præter sanctitatem increatam dari in Christo Domino etiam sanctitatem accidentalem, ut humanitas fiat sancta omni modo possibili, sicut præter scientiam beatam datur infusa, & naturalis, ut fiat sapiens omni modo possibili, atqui est etiam possibilis hic alius modus, quo fiat sancta Christi humanitas, nempe per unionem hypostaticam, quæ essentialiter pendeat ab ea promissione divina, quam exigit tanquam radix gratiæ, ergo de facto etiam per unionem formaliter sanctificatur.

VII. Juxta hanc viam ratiocinandi, idem dicendum de maternitate B. Virginis; quod scilicet secundum se, quatenus est participatio virtutis generativæ Patris æterni, cum sit entitas creata, solum naturaliter exigit divinam promissionem de dando B. Virgini suo Amore amabili, & hæreditate: maternitas verò præsentis ordinis probabilius, & connaturalius sit forma justificans, pro ut fuse ostendit Rip. d. 77. Ratio est, quia cum Maternitas secundum se sit radix gratiæ, atque adeo promissionis divinæ multò magis, quàm Filiatio Dei adoptiva, connaturalius est, quod sicut gratia præsentis ordinis essentialiter pendet ab ea divina promissione, quam exigit, & formaliter justificat, ita pariter maternitas præsentis ordinis. Nomine autem Maternitatis divinæ, ut dicemus *quæst. sequenti* cum Lumb. n. 756. venit qualitas quædam supernaturalis participativa virtutis generativæ Patris æterni, & elevativa virtutis maternæ naturalis in ordine ad producendam unionem, non secus ac lumen gloriæ elevat virtutem intellectivam naturalem in ordine ad producendam visionem beatam, ea tamen qualitas superna collata fuit Beatæ Virgini in die Annunciationis permanentem, non ut semper per illam generaret, sed ut per illam semper formaliter justificaretur, quia sic videtur magis consonum dignitati matris.

VIII. *Object.* primò. Nulla forma creata, ut diximus, obligare potest Deum, & illum metaphysicè necessitate ad amandam creaturam, aut ad dandam creaturæ visionem beatam; sed gratia, Unio hypostatica, & maternitas præsentis ordinis sunt formæ creatæ,
ergo

ergo non possunt tribuere creaturæ jus ineluctabile, quo Deus obligetur, & cogatur ad dandum suum amorem, & hæreditatem.

Confirm. Si unio hypostatica præsentis ordinis justificaret formaliter, quia unio de se est radix gratiæ exigens divinam promissionem de dando suo amore, & conaturalius unio præsentis ordinis est huiusmodi externa Dei promissio, sequeretur, quod etiam actio productiva unionis hypostaticæ formaliter justificaret humanitatem, quia pariter huiusmodi actio est radix mediata gratiæ; præsertim quia si virtus generativa unionis formaliter justificat Beatam Virginem, etiam ipsa actio generativa, & productiva unionis formaliter justificabit subjectum suum.

Resp. distinguo antecedens : Nulla forma creata potest Deum obligare ratione sui, *concedo*; ratione promissionis divinæ, quàm essentialiter præsupponit, & cuius est externa manifestatio, *nego antecedens*, & *consequentiam*: sic nulla creatura potest cogere Deum ad creandum v.g. Antichristum, si tamen detur Revelatio externa de Antichristo futuro, huiusmodi Revelatio tamquam manifestatio Decreti divini infert in Deo necessitatem ad creandum Antichristum.

Ad Confirmationem. Quæstio est in physicis, utrum actio subiectetur in Agente, an in passio? Si dicas in Agente, jam actio productiva unionis hypostaticæ deberet subiectari in B. Virgine; & concedi potest, quod sicut maternitas, seu virtus generativa unionis hypostaticæ formaliter justificavit Beatam Virginem permanentem (eò quod munia matris, quæ sunt alere, educare, diligere prolem, de se ferant statum permanentem) ita actio generativa talis unionis formaliter justificârit Beatam Virginem transeunter. Sin velis, quod actio subiectetur in passio, potest etiam transmitti, quod actio productiva unionis hypostaticæ subiectata in humanitate Christi illam transeunter justificârit; vel potest hoc negari, quia quamvis actio subiectetur in passio, non per hoc est perfectio passi, sed agentis.

IX. *Objec. 2.* In tantum unio hypostatica, maternitas, & gratia præsentis ordinis justificant formaliter, quia pendunt essentialiter à divina promissione de dando suo amore, & hæreditate, atque adeò sunt quædam externa Dei promissio conferens formaliter jus ad amorem, & hære-

hæreditatem, ergo si qualitas aliqua naturalis, putà calor, pendeat ab huiusmodi divina promissione, etiam talis calor justificaret formaliter, tamquam externa Dei promissio, quod nemo dixerit.

Resp. disting. antecedens, quia essentialiter pendent ab ea divina promissione, quam exigunt naturâ suâ, concedo; quam non exigunt, *nego antecedens*, & *consequentiam*; Calor pendens essentialiter ab ea divina promissione non ratione sui, & quidditative, sed ratione illius promissionis, quam præsupponeret, hoc est connexivè, esset impossibilis cum peccato, & exigeret habitus infusos, &c. Contra verò unio hypostatica, maternitas, & gratia ratione sui exigunt eam divinam promissionem, & sunt radix omnis supernaturalitatis, & ideo ratione sui formaliter justificant, si ab ea promissione pendeant essentialiter, tamquam externa Dei promissio: sic actus fidei supernaturalis, quo Petrus credit se habere gratiam, & se nunquam peccaturum, est impossibilis cum peccato, non tamen formaliter justificat, quia de se non est specialis participatio naturæ divinæ, sicut est gratia sanctificans: unde dicitur justificare solum connexivè, non quidditative.

Q U Æ S T I O IV.

Utrum B. Virgo physicè in unionem Hypostaticam influxerit, & quomodo?

I. **C**ertum est: Nullam creaturam posse esse causam principalem unionis hypostaticæ, tum quia extrema inter se infinitè disjuncta nemo potest conjungere, præter omnipotentem Deum; tum etiam quia huiusmodi conjunctio est in vertice supernaturalitatis, atque adeò etiam si possibilis esset substantiâ creata supernaturalis, non per hoc ea posset unionem hanc principaliter causare, quia deberet vi talis causalitatis subsistentia verbi substitui subsistentiæ creatæ. Difficultas solum est inter Theologos de Causa instrumentali, Num scilicet possit Creatura esse instrumentum sive obedientiale, sive etiam connaturale ad unionem producendam? & num de facto B. Virgo fuerit, habueritve huiusmodi instrumentum?

II. Dico primò. Non repugnat, Creaturam esse instrumentum Dei saltem obedientiale in ordine ad produ-

ctionem unionis hypostaticæ. Ità Communius cum Suar. Becc. Gonet. contra Vasq. d. 15. c. 1. Med. Alvar.

Prob. Tum negativè solutione difficultatum ; Tum etiam quia, quamvis repugnet , quòd Creatura sit instrumentum ad Creandum , ut putant Thomistæ cum Gran. & Aliis , eò quòd actio debeat supponere subiectum , ex quo terminus extrahatur ; At non repugnat, quòd Creatura sit instrumentum ad physicè producendam unionem hypostaticam, quia hæc sufficienter extraheretur ab humanitate, quæ in priori natura supponeretur ; Eo modo quo formæ cælorum in eodem instanti, in quo fuerunt concreatæ cum materia cœlesti, in communiori sententia fuerunt educæ ab ipsa materia.

Dicens : Agens instrumentale debet aliquo modo sibi subijcere terminum , quem producit , nulla autem Creatura potest sibi subijcere verbum , quod per productionem unionis attingitur , ergo nulla Creatura potest esse instrumentum ne obedientiale quidem , relatè ad unionem hypostaticam.

Resp. Creaturam causando instrumentaliter unionem debere sibi subijcere solam unionem , non verò verbum ; quòd in casu nostro non debet produci, sed solùm communicari humanitati ; Sicuti homo producens unionem cum anima spiritali, non debet posse producere animam spiritualem, sed solùm unionem cum anima, quia anima spiritalis solùm debet communicari materiæ. Quare concessis præmissis, *nego consequentiam*. Neque hinc sequitur, quòd possit etiam Creatura principaliter causare unionem hypostaticam ; Nam ad causandum principaliter, deberet Creatura præcontinere perfectionem unionis ; quòd repugnat , cum unio sit in apice supernaturalitatis, ad causandam verò instrumentaliter unionem, sufficit, quòd perfectio unionis præcontinueatur in Deo causa principali , sicuti ut aqua in baptismo causet gratiam, tamquam instrumentum obedientiale Dei, sufficit , quòd perfectio gratiæ præcontinueatur in Deo, qui est causa principalis.

III. Dico secundò. B. Virgo fuit à Deo elevata tamquam instrumentum physicum saltem *obedientiale* ad unionem hypostaticam producendam. Ità Bernal. d. 12. Lumb. quod probabile judicant Suar. Becan. & alii contra Amic. d. 13. Gonet.

Prob. primò Authoritate PP. dicentium cum Ambr.

Efi-

Esichio, B. Virginem fuisse *instrumentum* Incarnationis, & adumbratam fuisse in illa muliere, quæ miscuit tria sata farinæ, idest tres substantias, Corpus, animam, & divinitatem. Neque dici potest, quòd solùm dispositivè ea miscuerit, administrando materiam: Nam si non repugnat, quòd formaliter, & propriè ea miscuerit attingendo unionem hypostaticam, sic debent PP. intelligi, cum hoc cedat in magnam Virginis gloriam. Propterea Alb. Mag. verba illa: *Virtus Altissimi obumbrabit tibi*, explicat de umbra, seu imagine, & participatione virtutis generativæ Patris data Virgini, quæ juxta SAVEDRAM de Sacra Deip. *disp. 7.* semper in Virgine permansit, ut dicemus *Concl. sequenti.*

Prob. secundò ratione: B. Virgo est propriè mater Dei, sed non esset propriè Deiparens, nisi physicè influxisset in unionem hypostaticam, ergo physicè influxit, tamquam instrumentum, saltem obedièntiale. *probat minor:* si solùm influxisset in unionem humanam inter animam, & corpus Christi Domini, solùm influxisset in hominem, qui præcisè ex vi influxus esset indifferens ad hominem purum, & ad hominem Deum, ergo B. Virgo non esset propriè, & determinatè Mater hominis Dei, nisi ad unionem etiam hypostaticam influxisset.

Confirm. Si mater hominis puri solùm administraret materiam, & non influeret physicè in unionem inter animam, & corpus, hujusmodi purus homo non esset propriè Filius, & non esset ab illa matre, sed solùm esset in illa, ergo pariter si B. Virgo posuit humanitatem ut materiam, non verò influxerit in unionem hypostaticam humanitatis cum Verbo, homo Deus non esset propriè Filius Virginis, nec esset factus à B. Virgine, sed in B. Virgine.

IV. Dices primò: sufficit, quòd B. Virgo posuerit unionem inter animam, & corpus deificata, seu unita divinitati, ut dicatur propriè mater Dei: Sicut enim mater Regis non debet influere in Regiam dignitatem, ita nec mater hominis Dei in unionem hypostaticam.

Respond. Nego antecedens: si B. Virgo non influxisset physicè in unionem, non fuisset propriè, & ex vi processionalis mater Dei, sed ex contingenti Deificatione partium jam præsupposita. Ad paritatem primò

potest retorqueri : Nam Regina propriè est mater hominis, qui est Rex, non verò Regis formaliter, cum nullo latens influat in Regiam dignitatem, ergo B. Virgo, si non influeret in unionem, solum esset mater hominis, qui est Deus, non verò formaliter, & propriè hominis Dei. Deinde transmissio, quod Regina dici possit mater Regis, non per hoc B. Virgo dici posset propriè cum tanta sua gloria mater Dei. Disparitas est, quia Dignitas Regia, cum sit forma moralis, non potest attingi influxu physico, & ideo sufficit, quod Berta sit Mater Titii habentis Regiam dignitatem, ut dicatur mater Regis eo stricto modo, quo potest esse: At unio hypostatica potest influxu physico attingi; ergo si Virgo illam non attingeret, non esset Mater Dei in eo stricto sensu; in quo potest intelligi, sed solum esset mater habentis divinitatem, quod dici non potest.

Dices secundò : Berta est propriè mater hominis, quamvis non influat in unionem animæ rationalis, & materiæ cum subsistentia creata, ergo B. Virgo est etiam propriè mater Dei, quamvis non influat in unionem hypostaticam humanitatis cum subsistentia Verbi.

Resp. nego consequentiam. Disparitas est, quia Berta eo ipso, quod influit in unionem humanam, influit in terminum habentem jus ad subsistentiam Creatam, & ideo est propriè mater hominis : At B. Virgo, nisi influeret in unionem hypostaticam, non influeret in humanitatem habentem jus ab subsistentiam Verbi; ergo non esset propriè, & formaliter, sed per accidens, & materialiter Mater Dei; sicut si sol producat ignem, & Deus igni producto uniat frigus, Sol per se & propriè solum esset causa ignis, & per accidens, ac materialiter esset causa frigidi.

Dices ultimò. Ex Scripturis habetur, quod Incarnatio sit opus solius Dei; Dicitur enim Psalm. 71. *Qui facis mirabilia* (i. Incarnationem) *solus*; ergo sine coinfluxu B. Virginis facta est. Præsertim quia Philosophus, & D. Th. negant influxum activum matris in Prolem.

Respond. Solum Deum esse causam principalem Incarnationis, B. Virginem verò esse instrumentalem, sicuti solus Deus potest peccata remittere, juxta illud Marci 2. *Quis potest peccata remittere, nisi solus Deus?* &

tamen Sacerdos est etiam causa instrumentalis : solus Artifex facit artefactum , & tamen utitur instrumento. Præterquam quòd antonomastice Incarnatio dici potest opus Dei specialissimè excogitantis artificium tam summum. Denique quamvis Aristoteles negarit concursum activum matribus, Medici tamen, & communior sententia illum admittit.

V. Dico tertio. Non repugnat qualitas supernaturalis , quæ sit instrumentum connaturale , quo elevetur virtus materna ad producendam unionem hypostaticam, instar luminis gloriæ, quod est instrumentum connaturale , quo elevatur potentia intellectiva ad ponendam visionem Beatam, & probabiliter huiusmodi qualitas (quæ dicitur Dei maternitas) fuit in B Virgine permanentem, non ut per eam semper generaret, sed ut per eam semper formaliter sanctificetur. Ità Suar. d. 10. contra Rip. d. 41.

Prob. prima pars , quòd huiusmodi qualitas non repugnet. Instrumentum connaturale relatè ad effectum supernaturalem non est illud , quòd ab aliqua natura, seu substantia exigitur, sicut v. gr. calor exigitur ab igne , (aliter non esset instrumentum supernaturale, sed naturale) sed illud dicitur instrumentum supernaturale intrinsecè , quod ex sua specifica ratione ponit effectum supernaturalem similem effectui naturali , quem poneret eadem causa , si non esset instructa tali instrumento, atqui dari potest qualitas supernaturalis, vi cuius potentia generativa materna ponat hominem supernaturalem, videlicet Hominem Deum, similem homini naturali, quem poneret eadem potentia generativa, si non esset instructa tali qualitate , ergo dari potest qualitas supernaturalis , quæ sit instrumentum connaturale ad ponendum hominem Deum , seu ad ponendam unionem hypostaticam. Minor constat solutione argumentorum : major constat inductione : lumen gloriæ v. g. dicitur instrumentum connaturale ad ponendam visionem beatam, quamvis à nulla natura, seu causa principali exigatur; per hoc præcisè, quòd ex sua ratione specifica ponat intellectionem Dei supernaturalem similem intellectioni naturali, quam poneret intellectus sine lumine gloriæ ; sic habitus infusi, putà charitatis, spei &c. dicuntur similiter instrumentum connaturale relatè ad actus supernaturales, quos cum voluntate producunt.

Secunda pars Conclusionis, quòd scilicet huiusmodi qualitas supernaturalis, in quo consistit Dei Maternitas, fuerit in B. Virgine, probatur, quia connaturalius producuntur effectus etiam supernaturales per virtutem intrinsecam; & idèò admittimus lumen gloriæ, & habitus infusos potentiæ intrinsecos. Præterea quòd huiusmodi qualitas in B. Virgine fuerit permanenter instar luminis gloriæ, probatur, quia maternitas fert de se statum permanentem, non enim munera matris sunt solum generare, sed etiam alere, procurare bona, ac diligere prolem. Denique quòd per eam qualitatem formaliter B. Virgo sanctificetur, constat ex dictis *quæst. antecedenti*.

VI. *Objic.* primò. Instrumentum connaturale intrinsecè supernaturale, hoc est relatè ad effectus supernaturales, illud est, propter quod potentiæ ut elevatæ debetur effectus supernaturalis (ut est lumen gloriæ, propter quod visio Beata debetur potentiæ intellectivæ præditæ tali lumine) sed unio hypostatica nulli virtuti physicæ, quamvis elevatæ deberi potest, ergo repugnat instrumentum connaturale relatè ad unionem hypostaticam efficiendam. *probat minor*, quia si deberetur potentiæ creatæ, ut elevatæ unio hypostatica, deberetur illi Persona divina subsistens in natura assumpta, quod repugnat.

Confirm. Quia unio hypostatica ratione suæ excellentiæ est suprà quancunque exigentiam moralem creatam, adèò ut nulli actui meritorio puræ creaturæ, quamvis supernaturali, debeat de condigno in præmium, ergo à fortiori superat exigentiam physicam Creaturæ, quamvis elevatæ, quandoquidem exigentia moralis ferri potest ad præmium majus ipso merito, quod exigentia physica non potest.

Respond. Effectum instrumenti intrinsecè supernaturalis non deberi potentiæ ut elevatæ, tamquam causæ principali, sed Deo, cuius est instrumentum illud, & idcirco quæ Deus operatur mediis suis instrumentis, ipsi Deo tribuuntur, v. gr. Deo tribuitur absolvere, & remittere peccata; quamvis absolutio conferatur per Sacerdotem: Deus dicitur loqui, quamvis loquatur per Angelos, aut Prophetas: sic etiam visio beata, quamvis connaturaliter sequatur, posito lumine gloriæ, Deo tamen debetur tamquam causæ principali talis effectus: &
idem

idem dicendum de unionem hypostatica, quæ quamvis connaturaliter sequatur, posito hoc instrumento connaturali, & reliquis requisitis, debetur tamen Spiritui Sancto, qui est illius causa principalis. Quare ad argumentum *distinguo major.*, propter quod debetur effectus potentiae ut elevatae, tamquam causae principali, *nego*, tamquam instrumentali, *concedo major.* & *distincta minori. nego consequentiam.*

Ad Confirm. Recurrite ad eam Responsio: unio hypostatica superat omnem exigentiam moralem purae Creaturae, & à fortiori physicam principalem, non verò instrumentalem.

VII. *Obje.* secundò, si daretur instrumentum connaturale ad unionem producendam, illud esset dispositio ad talem unionem, sed hoc repugnat, ergo. *Major constat*, quia omne connaturale instrumentum est dispositio subjecti ad effectum: sic calor, qui est instrumentum connaturale ignis, est dispositio passi ad productionem ignis: sic lumen gloriae disponit intellectum ad visionem beatam, & habitus infusi ad actus supernaturales. Probatur itaque minor, quia universim dispositio ad aliquam formam debet esse in eodem ordine cum forma, ad quam disponit, & propterea non potest actus naturalis disponere ad gratiam, sed instrumentum connaturale ad unionem hypostaticam, quod esset dispositio ad illam, non esset in eodem ordine cum unionem; Nam illud instrumentum esset in ordine creato, unio verò utpotè ferens Verbum subsistens in natura assumpta, esset in eodem ordine, in quo est Verbum, atque adeò in ordine divino, & increato, ergo.

Confirm. Quia omnis dispositio debet coaptare subjectum ad formam, ad quam disponit, sed nihil dari potest, ex parte humanitatis, quod illam coapter ad unionem cum Verbo, ergo repugnat dispositio, atque adeò instrumentum connaturale ad unionem.

Respond. *Nego minor.* Ad probationem *nego etiam minor.* Sicut enim instrumentum connaturale ad unionem esset in ordine creato supernaturali; ita etiam unio, quæ passivè est quid creatum terminatum ad increatum; non secus ac visio Dei est in ordine creato, quamvis terminetur ad objectum increatum. Verum quidem est, quòd unio hypostatica sit in gradu altiori supernaturalitatis creatæ, quam sit illud instrumen-

tum, & quodvis aliud ens intrinsecè supernaturale ; At hoc non obstat , quo minùs dari possit dispositio ad unionem : sic ignis, utpote substantia , est in gradu altiori, quàm sit calor, qui est accidens, & tamen benè potest calor esse & dispositio , & instrumentum connaturale ad ignem.

Ad Confir. Sufficit, quòd instrumentum connaturale disponat ipsum Agens, etiam si non recipiatur in subiecto talis effectus : Sic si daretur instrumentum connaturale in aqua ad producendam gratiã, vel in Christo domino ad patranda miracula ; sufficit , quòd hujusmodi instrumentum disponat ipsum Agens, ergo in casu nostro istud instrumentum connaturale ad unionem, nempe Maternitas , sufficit, quòd disponat B. Virginem ad productionem unionis in humanitate. Quare *negatur universaliter majorem* : Satis est, si coaptet Agens, & ratione Agentis coaptati coaptetur extrinsecè subiectum ; propterea D. Tho. 1. p. 9. 23. a. 2. & q. 1. de Virt. art. 1. duplicem dispositionis speciem agnoscit : Alteram ex parte patientis, ut patiat ; Alteram ex parte agentis, ut agat. Adde, quòd etiam in casu nostro istud instrumentum connaturale posset se tenere ex parte passi , hoc est ex parte humanitatis, quatenus eo posito in B. Virgine, materia exhibenda ad concipiendum Christum evalit idonea ad unionem hypostaticam recipiendam.

Q U Æ S T I O V.

An plures Personæ possint eandem naturam assumere, & una Persona Plures Naturas?

I. **D**ico primò. Possunt plures Personæ Divinæ simul eandem Naturam assumere. Ità communius cum D. Tho. qu. 3. ar. 6. contra Scot. Albertum, & Alios apud Suar. d. 13.

Prob. Tum negativè, tum à pari : Potest enim eadem natura divina simul terminari, ac personari Tribus Personalitatibus ; ergo etiam poterit eadem humanitas v.g. simul assumi à Tribus divinis Personalitatibus, quæ non se excludunt à communione ejusdem naturæ : quare sicut per potentiam obedientialem potest eadem humanitas à singulis divinis personalitatibus assumi scorsim, ità & simul.

II. *Obje.* primò cum Scotistis : Non potest idem esse

effectus simul pendere à pluribus causis totalibus, ergo nec eadem natura creata poterit simul à pluribus Personalitatibus sustentari, ac terminari: utrobique enim eadem superfluitas essentialis, & eadem contradictio sequeretur: quod scilicet à singulis penderet, & non penderet.

Resp. Omissio antecedente, nego consequentiam. Disparitas est, quia vel supponimus humanitatem assumptam dependere à subsistentia divina, tamquam à priori, seu influxu quodam materiali, eo modo, quo forma materialis pendet à materia tamquam à priori; vel supponimus dependere à substantia Divina tamquam à posteriori; sicut dependet tamquam à posteriori corpus à sua ubicatione, ignis à calore, & quælibet substantia à suis proprietatibus, sine quibus naturaliter esse non potest; quæ in re variant DD. in Philosophia. Si supponimus primum, sicut potest divinitus eadem forma substantialis materialis uniri duplici materiae, ita ut inadæquatè pendeat à singulis illam sustentantibus, ita poterit eadem humanitas uniri Tribus divinis Personalitatibus, & inadæquatè à singulis pendere, ac sustentari; non secus ac potest idem effectus pendere à duplici causa effectivè, quæ inadæquatum influxum effectivum exhibeant, unde non haberetur multiplex dependentia totalis in actu secundo. Si verò supponamus secundum, sicut potest idem corpus v. gr. divinitus habere duas ubicationes totales per replicationem, eò, quod duplex ista causa formalis causaret duplicem effectum formalem, ita potest eadem humanitas triplici subsistentiâ divinâ totali terminari, quia pariter haberetur multiplex effectus formalis à multiplici ista forma logica, quæ perficit humanitatem, quin ab illa perficiatur.

III. *Objic.* Secundò ex Scoto: Natura divina ideo potest à Tribus Personalitatibus terminari, quia est infinita, & idcirco fecunda ad intra; sed natura creata non est infinita; ergo non potest à pluribus Personalitatibus assumi.

Confirm. Si eadem natura assumeretur à Tribus Personalitatibus, neque haberetur unus homo, quia tria essent supposita, neque tres homines, quia una esset humanitas; sicut non dantur tres Dii in tribus Personis, quia una est Divinitas; ergo repugnat, &c.

Resp. Naturam divinam ratione infinitatis, & fecunda-

dicatis non solum posse, sed etiam debere à Tribus Personalitatibus terminari, & cum illis realiter identificari. Naturam verò creatam non debere, sed posse divinitus à Tribus Personalitatibus assumi, quin possit cum illis identificari. In forma *negomajorem*: Ratione enim infinitatis necessario à tribus terminatur, natura verò creata non necessario.

Ad confirmationem humanitas assumpta à Tribus esset unus homo, sicut unus est Deus in Tribus, ut communiter docent cum D. Thom. a. 6. contra Nominal. apud Becan. Ratio est, quia ad multiplicatam concretis substantialis multiplicari debet forma substantialis, sic si una anima esset in tribus corporibus, haberetur unus homo, quamvis enim daretur triplex compositum materiale inadæquatè distinctum, ratione trium corporum, unumquodque tamen compositum esset idem homo ob unitatem animæ.

IV. *Objic. ult.* Non potest humanitas terminari simul subsistentiâ propriâ, & Divinâ, ergo à fortiori neque poterit simul terminari pluribus subsistentiis Divinis; quandoquidem magis perficitur humanitas à Personalitate Divina, quàm à subsistentia propria, & consequenter si subsistentia propria excludit consortium subsistentiæ Divinæ, à fortiori una Personalitas Divina excludit consortium alterius. *Antec. prob.* Quia aliter de facto in Christo daretur cum subsistentia Verbi etiam subsistentia propria, ut omnibus modis perficiatur; sicut datur in Christo præter Sanctitatem increatam Verbi etiam Sanctitas accidentalis, ut omnibus modis sanctificetur.

Resp. 1. *Nego antec.* Supponi etiam potest ex Philosophia cum Arriag & aliis, quòd sicut potest divinitus idem Corpus replicari, & simul esse hic, & alibi, ita possit divinitus eadem humanitas simul esse in se, seu juris sui per subsistentiam propriam, & esse in alio, seu juris alieni, per subsistentiam alienam, putà Verbi; nec proinde sequitur, quòd de facto Christus deberet habere præter subsistentiam Verbi etiam propriam creatam; Nam hæc est naturaliter superflua, cum abundè præstetur à subsistentia Verbi in Christo, quidquid præstaretur per propriam; quare sicut est naturaliter superflua, v. gr. duplex unio hypostatica in Christo, ita esset superflua duplex subsistentia, altera increata, altera creata, quod est autem naturaliter superfluum, non est admittendum

in Christo Domino. Contra verò multiplex Sanctitas , & scientia in Christo non dicitur naturaliter superflua , sed exigita ab unione hypostatica , quia perfectius est omnibus modis sanctificari , & scire , quam uno tantum , & ideo multiplex Sanctitas , & scientia est Christo concedenda, ut dicemus disp. sequenti.

Resp. 2. Transmisso antec. nego consequ. Disparitas est, quia potest supponi , quòd subsistentia propria, & aliena repugnent, ut assensus, & dissensus, curvitas, & rectitudo ; & sicut esse per se, & inhærere alteri : non ostenditur tamen ab Adversariis, quòd repugnet, eandem naturam compleri simul à pluribus Personalitatibus alienis : sicut enim natura Divina est simul in Tribus , & ex abundantia perfectionis necessariò completur à Tribus Personalitatibus , ita potest eadem natura creata ex indigentia propria compleri simul pluribus Personalitatibus Divinis.

V. Dico 2. Potest vicissim eadem Persona Divina plures simul naturas assumere, Ità communiter cum Angelico *qu. 3. art. 7.*

Prob. Tum negativè , neque enim hoc repugnat ex parte Divinæ personæ, quippe quæ vim habet infinitam terminandi æquivalentem infinitis Personalitatibus creatis ; neque ex parte naturarum , cum singulæ sint assumptibiles, nec appareat, unde habeant impossibilitatem ad assumi : Tum à pari , quia potest eadem Personalitas Verbi terminare naturam Divinam simul, & humanam ; ergo poterit etiam simul duas naturas humanas terminare.

VI. *Obje. 1.* Vis generativa Patris Æterni, licèt sit infinita, nequit tamen nisi unicum Filium ad intra generare, ergo vis terminandi in subsistentia Divina, quamvis sit infinita, non potest tamen nisi unam tantum naturam terminare.

Resp. Hinc probari, quòd subsistentia Verbi non possit terminare simul naturam Divinam , & humanam in Christo, quare *nego consequ.* Disparitas est, quia vis generativa adæquatur omninò unico Filio ad intra , vis tamen terminandi æquatur ad intra, terminando naturam Divinam , at ad extra non adæquatur terminando unam naturam creatam: Sicut vis cognoscendi, & amandi in Deo , licèt adæquetur ad intra, cognoscendo, & aman-

amando se ipsum, at non adæquatur ad extra per quemcunque terminum creatum.

VII. *Objic. 2.* Non potest explicari: Num unus, an duplex haberetur homo, si eadem Persona Divina duas simul humanitates Petri, & Pauli assumeret, ergo non potest illas assumere.

Resp. D. Thom. in 3. d. 1. qu. 2. a. 5. cum Scot. & aliis apud Bec. docere, quod in ea hypothese duo haberentur homines, quia ad multipliciter concreti substantialis videtur sufficere multiplicitas formæ. Unde sicut unus datur Deus in Tribus Personis, & unus daretur homo, si eadem humanitas à Tribus Personis assumeretur; ita vice versâ duo darentur homines, si eadem Persona duas humanitates assumeret. Oppositum tamen docuit idem Angel. 3. p. q. 3. a. 7. veluti palinodiam canens, dicendo, unum esse hominem, si una Persona duas humanitates assumeret; quia quamvis ad unitatem concreti substantialis sufficiat unitas formæ, ad multipliciter concreti substantialis non sufficit formæ multiplicitas, sed requiritur etiam multiplicitas suppositorum habentium plures formas, seu naturas. Quod ex eo probatur: Tum quia Christus non dicitur plures substantiæ, quamvis habeat duas naturas substantiales, eò, quod in Christo unicum est suppositum; Tum etiam, quia si Verbum habens duas humanitates esset duplex homo, quorum alter vocetur Petrus, alter Paulus, non posset dici, quod Petrus sit Paulus; atqui si eadem est Personalitas utriusque, dici deberet, quod Petrus sit Paulus; (sicut in Christo verum est, quod Deus sit homo; ob unitatem Personæ;) ergo si una Persona duas humanitates assumeret, unus haberetur homo, non duplex.

Equidem censeo in hac questione, quæ, ut notant DD. est solum de voce, non esse immorandum; facilius tamen, & coherentius sustineri potest, quod, sicut habetur duplex homo, quando in eadem materia habetur duplex anima rationalis, ita pariter habeatur duplex homo, quando eadem Persona Divina duas humanitates assumit; sicut è converso unus est homo, si eadem humanitas à pluribus assumatur, & si eadem anima rationalis pluribus materiis totalibus divinitus uniatur. Neque obstat primò, quod Christus continens duas naturas substantiales, non dicatur duplex substantia; Nam nomine substantiæ antonomastice venit suppositum; unde

unde cum in Christo unum sit suppositum, ideo in Christo una est substantia, quæ simul est Deus & homo. Neque obstat secundò, quòd si idem suppositum haberet duas humanitates Petri, & Pauli, tunc Petrus posset negari de Paulo, & dici, Petrus non est Paulus, quod videtur absurdum, cum in Christo Deus sit homo: Nam contra est, quia sicut in Christo idem est Deus, & homo, quatenus idem suppositum habet Deitatem, & humanitatem, quin tamen Deus ut Deus reduplicando Deitatem sit homo ut homo; ita in casu nostro idem esset Petrus, & Paulus ratione Personæ, & solum ratione naturæ posset negari Petrus de Paulo. Quare universim concreta substantialia multiplicantur solum ratione formæ, sicut è contra concreta accidentalia solum ratione subjecti, ut propterea triplex sit album, v. gr. si eadem albedo sit in triplici subjecto, & unum sit album, si triplex albedo sit in eodem subjecto.

QUÆSTIO VI.

Num possit à Deo assumi Natura irrationalis, & Forma accidentalis?

I. **C**ertum est, non solum naturam Humanam, sed etiam Angelicam posse à Deo assumi, quod colligitur ex illo Hebr. 2. *Nusquam Angelos apprehendit, sed semen Abrahæ apprehendit.* Quæ locutio esset inepta, si non posset Deus apprehendere, seu assumere naturam Angelicam. Ubi notandum, quòd si naturam Angelicam post peccatum assumeret, ea non foret amplius diabolica, seu cum reatu odii, & pœnæ, sed Angelica, & iusta; quia, ut suprà dixi, natura assumpta per unionem hypostaticam redditur infinite sancta, & essentialiter impossibilis cum quavis etiam levisima culpa. Dubitatur nunc: An possit etiam assumi natura irrationalis, & sola materia, aut sola forma materialis, necnon forma accidentalis? & Num proprium Divinæ Personæ sit assumere?

II. Dico 1. Potest à Deo assumi etiam natura irrationalis. Ità D. Thom. Scot. & alii apud Bec.

Prob. Tum quia in triduo mortis Corpus Christi fuit hypostaticè unitum Divinitati; Tum etiam, quia quælibet natura substantialis est capax subsistentiæ, ergo terminari potest à subsistentia Divina habente virtutem terminandi infinitam.

III.

III. *Objic. 1.* Indecens est, quòd Deus naturam lapidis, vel leonis assumat & fiat lapis, vel Leo, ergo nisi natura irrationalis ordinetur ad rationalem, ut cadaver ad hominem, non potest assumi.

Resp. Sicut non est indecens, quòd dicatur Deus mortuus, crucifixus, flagellatus, adeò ut posset metaphoricè dici Psalm. 21. *Vermis, & non homo, opprobrium hominum, & abjectio plebis*; nec fuit indecens, quòd in triduo mortis Deus diceretur Cadaver per idiomatum communicationem; ità neque, quòd dicatur Lapis, aut Leo, ut disertè Tertul. lib. de Carne Christi contra Marcionem putantem, indignum Deo esse, quòd ex muliere natus sit, dicens apud Merat. d. 9. *Si de lupa Deus prodire voluisset, & fera, aut pecoris corpore indutus predicare Regnum Calorum, ei videretur indecens, qui res Divinas ponderat sensu suo, non advertens, quòd stulta mundi elegit Deus, ut confundat fortia.* Ratio itaque est, quia potest hæc omnia Deus ad altissimos fines ordinare, putà ad ostensionem exinanitionis suæ Majestatis, ad confusionem superbix nostræ, &c.

IV. *Objic. 2.* Nequit competere lapidi visio beata, amicitia cum Deo, ergo à fortiori repugnat illi unio hypostatica; *Probatur consequentia*, tum quia cui repugnat minus, à fortiori repugnat majus, tum etiam quia ad unionem hypostaticam deberet consequi visio beata, & amicitia cum Deo, ac filiatio Dei naturalis, qui videtur primarius effectus unionis.

Resp. *Nego consequentiam*: Potest alicui competere majus, quin competat minus, quòd sit in diverso ordine, sicut homini competit vis generandi hominem, non verò muscam, quæ est minus. Deinde unio hypostatica solum exigit visionem beatam, amicitiam, filiationem in subjecto capaci: unde in Triduo mortis hæc non exigebat in cadavere Christi. Quare primarius effectus unionis est reddere naturam subsistentem, & completam, ità ut possit naturaliter existere independenter ab alio sustentante, quòd haberetur in casu nostro, etiam si lapis non redderetur filius Dei naturalis, nec amicus ob incapacitatem harum denominationum.

V. *Objic. 3.* Si lapis assumeretur, deberet sanctificari infinite à Sanctitate increata, quòd repugnat. Præterea deberet etiam personari, quòd etiam repugnat, cum Persona sit natura rationalis subsistens.

Resp.

Resp. Nego utramque sequelam. Sicut Sanctitas increata non dignificat operationes Christi Domini necessarias, puta somnum &c. sed illas tantum, quæ sunt capaces meriti; nec sanctificavit cadaver Christi, nisi sanctitate tantum extrinsecâ propriâ rerum inanimatarum, quæ per contactum ad rem sanctam sanctificantur. Ità non deberet alio pacto sanctificare lapidem sibi hypostaticè unicum: qui nec deberet dici personatus ob incapacitatem talis denominationis, sed solum suppositatus, sicut gratia in Christo Domino non denominat illum Filium adoptivum ob incapacitatem talis denominationis, cum non sit Persona extranea.

VI. Dico 2. Potest assumi à Deo tam sola materia, quam sola forma etiam materiales. Hæc conclusio descendit ex antecedente, & nonnulli putant, corpus Christi Domini in Triduo mortis absque ullâ formâ cadavericâ mansisse unitum Verbo; ne dicatur, quod illam Verbum assumpserit, ac deinde dimiserit contra illud Axioma communiter à PP. & Theologis usurpatum: *Quod Deus semel assumpsit, nunquam dimisit.* Quamvis hoc intelligendum sit solum de partibus essentialibus, & pertinentibus ad integritatem corporis, cum certum sit, unionem inter animam, & corpus dimissam fuisse à Verbo in Christi morte: & probabilius etiam sit ex Suar. *d. 15. sect. 6.* quod particulæ aliquæ sanguinis, quæ in spinis, Cruce, lanceâ, lintheaminibus remanserunt, fuerint dimissæ, hoc ipso, quod non pertinebant ad integritatem corporis, atque adeo illum duntaxat sanguinem in passione effusum remansisse unitum cum Verbo, quod ad eandem integritatem pertinebat.

Quod autem sanguis, quamvis non sit animatus, fuerit divinitati hypostaticè unitus, est adeo certum, ut opposita sententia, teste Suar. non vacet errore; aliter in Calice, ubi vi Verborum venit solum sanguis Christi, non veniret per concomitantiam Divinitas. Neque dici potest, quod veniat mediata Divinitas, eo quod sanguis sit inclusus in corpore unito Divinitati. Nam saltem quando sanguis Christi fuit effusus, non veniret Divinitas in consecratione Calicis, quod nemo dixerit; cum Christus absque ulla restrictione ad tempus vitæ dixerit Joan. 6. *Caro mea verè est cibus, & sanguis meus verè est potus &c.*

VII. Ex quibus sequitur, quod, sicut assumptus fuit à Ver-

Verbo sanguis, quia pertinet ad integritatem corporis, ita assumpti etiam fuerint alii tres humores, nempe flava. & Atra bilis, ac phlegma; nec non spiritus vitales, & animales, imò etiam ungues, & capilli, quia deserviunt perfectioni, & ornatui corporis, & non sunt merè partes excrementitiæ, (ut est sudor, lachrymæ, & alia huiusmodi) quæ procul dubio non fuerunt à Verbo assumpta.

Dices, si Deus posset assumere solam materiam, posset per communicationem idiomatum dici, quòd Deus sit pars essentialis hominis, & bruti, sicut est materia, quod videtur absolum.

Resp. Quòd ob reverentiam abstinendum sit ab aliquibus locutionibus, cæteroqui verissimis, v. g. quòd Deus ratione immensitatis sit sub pedibus nostris, & in locis foetidissimis; pariter in casu nostro abstinendum est ab iis locutionibus, quòd Deus per communicationem idiomatum dici possit materia prima, lapis, leo: quamvis autem possit sic dici materia prima, non potest tamen dici, quòd sit pars hominis: quia communicatio idiomatum est solum inter prædicata absoluta, non respectiva; unde nequit dici, quòd Verbum sit Caput, aut manus, per hoc, quòd uniatur manui, vel capiti Christi Domini.

VIII. Dico 3. Etiam forma accidentalis separata à subiecto, putà albedo, potest hypostaticè uniri Deo: Dixi, separata à subiecto. Nam, quòd accidentia unita humanitati Christi fuerint mediata assumpta à Verbo, non dubitatur. Conclusio est Almain. Marfil. apud Suar. contra quamplures.

Prob. Formam accidentalem separatam assumi, non repugnat ex parte Personæ divinæ, ut patet, quia cum possit Deus assumere formam substantialem, à fortiori poterit accidentalem. Neque ex parte accidentis, quia sicut in Eucharistia potest accidens habere modum existendi per se, perinde ac si subsisteret, ita Deus per suam subsistentiam poterit eum modum supplere, & reddere accidens subsistens, hoc est non indigens inhærentiâ ad existendum, eò, quòd sustentatio, quæ haberetur à subiecto, suppleatur à subsistentia divina, quæ potest sustentare, ac perficere quin perficiatur; ut proinde influxus sustentativus, qui habetur à subsistentia divina, similis sit influxui sustentativo, qui habetur à materia relatè ad formam

formam materialem, depuratus tamen ab imperfectione, etenim dum Deus sustentat formam, non perficitur ab illa, sicut perficitur materia, quia Deus est purus terminus, materia verò est subiectum.

IX. Objic. 1. Si Deus uniret sibi hypostaticè albedinem, non solum deberet dici habens albedinem, sed etiam albus, sicuti dum sustentat humanitatem dicitur homo, sed hoc repugnat, ergo non potest albedinem, nec aliud accidens sibi unire hypostaticè.

Confirm. Ex unione hypostatica fit unum per se, atqui cum forma accidentali non potest fieri unum per se, ergo forma accidentalis non potest uniri Deo hypostaticè.

Resp. nego antecedens: Nomine enim albi, venit albedo unita subiecto materiali perfectibili ab illa, quod non haberetur in casu, unde Deus assumendo albedinem diceretur solum habens albedinem, non albus; assumendo verò humanitatem, dicitur homo, quia nomine hominis venit principium completum operationum humanarum.

Ad Confirm. dist. maj. Ex unione hypostatica fit unum per se, quando extrema sunt substantialia, & apta conflare unum per se, *concedo*, secùs, *nego maj. & consequentiam.* Propterea unio hypostatica terminata ad formam accidentalem, non esset substantialis, sed accidentalis.

X. Objic. 2. Illa tantum possunt subsistere, ac terminari subsistentiâ alienâ, quæ possunt propriâ, huiusmodi non est accidens, ergo non potest accidens subsistere subsistentiâ Divinâ.

Resp. Hallucinari adversarios putantes, quòd natura subsistens subsistentiâ alienâ possit dici absolutè subsistens, cum reverà non subsistat, nec sit sui juris, sed alterius, non in se, sed in alio. Quare humanitas Christi in Verbo non subsistit, sicut accidens non subsistit in subiecto, cum hoc tamen discrimine, quòd accidenti connaturale sit inhærere, & non subsistere, humanitati verò non sit connaturale sustentari à Verbo, & non subsistere, cum naturaliter exigit esse sui ipsius, & subsistere per subsistentiam propriam: propterea si accidens miraculosè assumeretur, miraculum non consisteret in eo, quòd accidens non subsisteret, sicut quando assumitur humanitas, sed in eo, quòd accidens

non existeret in subiecto, cui connaturaliter inhæret, & quod intrinsecè perficit. In forma, *nego maj.*

XI. Inquirendum superest, Num soli Personæ Divinæ competat assumere, An possit etiam Persona Creata sibi alienam naturam hypostaticè unire? v g. An possit Angelus humanitatem assumere, ità ut ex Angeli incarnatione fiat Angelus homo? Negant communius id posse fieri etiam divinitùs apud Suar. d. 13. sect. 4. cum D. Tho. q. 3. a. 1. ubi dicit: *Proprium esse Divinæ Personæ propter ejus infinitatem, ut fiat concursus naturarum secundum substantiam.* Affirmant tamen probabiliter Scot. Nomin. cum Bec. c. 4. q. 5. Arri. & Aliis; quia nulla apparet repugnantia, quòd humanitas uniatur substantiæ Angelicæ per unionem distinctam, & ab ea substantialiter compleatur, tanquam à puro termino, qui perficiat humanitatem, & non perficiatur ab illa, non ex defectu perfectibilitatis, sed quia hujusmodi unio esset illi extrinseca, non secùs cognitio, quæ est unio intentionalis, quia purè terminatur ad objectum, non perficit illud, nisi extrinsecè; & sicuti in sententia admittente in composito substantiali duas uniones, unam ex parte materiæ, alteram ex parte formæ, & duas uniones inter partes quantitatis, unio, quæ subiectatur in uno extremo, & terminatur ad aliud, non perficit intrinsecè extremum, ad quod purè terminatur, quamvis illud recipiat effectus formales unionis intrinsecæ, exigendo præsentialitatem extremorum &c. eò, quòd hujusmodi uniones mediæ inter intrinsecam; & extrinsecam participant aliquem effectum formalem unionis intrinsecæ, & aliquem unionis extrinsecæ, ut explicavimus in prima disp. qu. 1.

Confirm. quia ut notat Bec. *loc. cit.* multi PP. docuerunt, de factò Joannem Baptistam, Malachiam, Aghæum, & Melchisedech fuisse Angelos incarnatos, ut videre est apud D. Hieron. Multi etiam apud Bellar. l. 3. de Pontif. c. 12. docent, Antichristum fore Dæmonem incarnatum.

XII. Dices 1. Si substantia Angeli posset divinitùs personare unam humanitatem, posset non tot, quin plures; ergo esset infinitæ perfectionis.

Resp. Sicut albedo potest divinitùs albificare non tot, quin plura subiecta, per novam, & novam unionem, sine infinitate perfectionis; & sicut intellectus potest cognoscere non tot, quin plura objecta, per
novas

novas, & novas cognitiones, seu uniones intentionales; & sicut eadem anima potest divinitus informare non tot, quin plura corpora, ita in casu nostro; Et ratio est, quia sicuti quando anima unitur pluribus corporibus, crescit in compositis perfectio non ratione animæ, quæ non multiplicatur, sed ratione novæ unionis; ita quando subsistentia Angeli supponit naturam humanam, non crescit perfectio ratione novæ suppositivitatatis, sed solum ratione novæ unionis cum eadem Personalitate.

XIII. Dices 2. Personalitas, seu subsistentia est modus, atque adeo ultima actualitas actu præstans quidquid præstare potest; ergo subsistentia Angeli, quæ non complet naturam humanam substantialiter, ne divinitus quidem, potest illam complere, & personare; sicut unio inter animam, & corpus Petri, non potest divinitus unire animam, & corpus Pauli; aliter non esset modus, sed res; ut albedo v. g. quæ potest divinitus duplex subiectum dealbare.

Resp. Multos cum Hurt. & Arri. putare, quod subsistentia sit res, non modus. Sed transmissio, quod sit modus, atque adeo ultima actualitas, sufficit, quod actu præstet, quidquid præstare potest relatè ad subiectum suum, etiamsi possit divinitus in subiecto extraneo alium effectum formalem præstare per novum modum superadditum; v. gr. ubicatio formæ substantialis essentialiter ubicat hic formam substantialem; cum hoc tamen stat, quod possit etiam divinitus hic ubicare materiam, vel accidentia per hoc, quod in materia, seu in accidentibus detur novus modus superadditus, qui non sit ubicatio, sed sit unio cum ubicatione formæ substantialis: pariter non repugnat, quod unio inter animam, & corpus Petri divinitus uniat animam, & corpus Pauli posito alio modo, qui non sit unio inter corpus, & animam Pauli, sed sit unio subiectata in anima, & corpore Pauli, ac terminata ad unionem Petri; Idemque dicas de Figura accidentali; ergo hoc etiam dici poterit de subsistentia Angeli, quæ per modum substantialem distinctum, qui non sit subsistentia, poterit divinitus personare humanitatem.

Quod autem modus non sit ultima actualitas in eo sensu, quod non possit divinitus alium effectum præstare

ab eo, quod natura sua essentialiter præstat, interveniente alio modo superaddito, constat tum in sententia admittente possibilem replicationem ubicationis; apud Semery *disp.* 7. *Phys. qu.* 5. *ar.* 2. tum in sententia admittente apud Arriag. *disp.* 1. *metaph. sect.* 1. *n.* 14. modos esse divinitus separabiles à re, quam modificant; in ea quippe sententia modus est solum ultima actualitas in actu primo, si non existat ejus subjectum, & est essentialiter ultima actualitas in actu secundo, existente suo subjecto. Utrum autem ea sententia subsistat? examinent Philosophi. Illud omnibus inconcussum est, quod nisi positivè ostendatur, quod ex modorum separatione à suo subjecto sequatur contradictio, standum semper pro separabilitate in favorem omnipotentiae; Nulla autem videtur sequi contradictio, si unio hypostatica v. g. vel unio inter materiam, & formam existant, non existente altero ex extremis, v. gr. non existente humanitate, vel forma substantiali, aut materia; sicut enim communius concedunt, posse cognitionem v. gr. esse vel extra subjectum, vel in lapide, ita ut denominet lapidem habentem cognitionem, non cognoscentem; ita videtur dari posse unio hypostatica humanitatis, humanitate non existente, in quo casu solum daretur denominatio uniti in actu primo, & exigitive, non verò in actu secundo, & formaliter ex defectu subjecti exigiti à tali unione.

XIV. Neque obstat 1. Quòd si modus, putà unio hypostatica, esset separabilis, daretur processus in infinitum in modis, quia scilicet unio deberet uniri per aliam unionem, & hæc per aliam. Nam in hac sententia impossibile est, existere modum, & subjectum, quin detur denominatio modificati, seu uniti; unde declinatur processus.

Neque obstat 2. Quòd non differret modus à re, si tam modus separari posset à re, quam modificat, quam res à suo modo. Nam in eo differret res à modo; v. gr. materia, & forma ab unione, quia res, seu materia, & forma ita possunt existere non existente unione, ut tamen habeant indifferentiam ad uniri hanc potius, quam illam unionem; contra verò unio potest existere sine extremis, quin tamen hæc unio sit indifferens ad unienda hæc, vel illa extrema, cum essentialiter sit addicta iis extremis, & ideo major est indifferentia rei, quam modi, etiam si possint invicem separari. Hæc tamen obiter dicta sunt

sint pro sententia admittente Modorum separabilitatem à re modificata, de qua fusè diximus in Philosophicis.

QUÆSTIO VII.

Quid de facto assumpserit Verbum in Christi Humanitate?

I. IN natura humana dantur partes essentielles, nimirum anima, & corpus; Integrales, ut quatuor humores, sanguis, phlegma, flava, & atra bilis; Ornantes, ut capilli, ungues, dentes; & Excrementitiæ, ut sudor, lachrymæ, saliva, & similes. Non dubitatur, quòd Verbum partes essentielles assumpserit, nec dubitatur, quòd non assumpserit excrementitias; controversia solùm est de integralibus, ac de ornantibus, & præsertim de sanguine, quamvis eadem sit deinde ratio de reliquis humoribus: Durandus, & Gabriel apud Amicum *disp. 15. sect. 7.* negârunt, sanguinem fuisse immediatè assumptum à Verbo, eò, quòd non sit actû, sed solùm potentiâ pars corporis humani. Cajet *3. p. qu. 54. a. 2.* & Sylvest. docent, assumptum fuisse sanguinem vitalem, seu perfectum, non verò alimentalem, seu nutritivalem nondum concoctum. Rich. Abul. & alii, sanguinem immediatè fuisse assumptum à Verbo, sed post separationem à corpore fuisse dimissum. Communiter tamen docent cum D. Thom. Suar. Vasq. Lugo *disp. 14.* fuisse totum sanguinem assumptum, & nunquam dimissum à Verbo, esto multæ partes sanguinis conversæ sint in alias partes corporis, videlicet in carnem, ossa, nervos &c. multæ aliæ fuerint continuâ exhalatione à Christi Corpore secretæ, & in alias substantias conversæ, ac proinde à Verbo dimissæ, utpote nunquam reassumendæ. Sanguinis verò maculas, quæ in clavis Christi, aut alibi videntur, communius censent, non esse hypostaticè unitas Verbo, quia non stant sub propria forma Sanguinis, sicut nec præputium retinet veram formam carnis, ut proinde vi consecrationis ea non sint in Eucharistia, propterea docent, totum quidem sanguinem, ac totam carnem semel assumptam nunquam esse dimissam, sumendo ly totum moraliter, non physicè, quatenus retinuit Christus semper, quod ad integritatem Corporis serviebat.

II. Dico itaque primò: Verbum immediatè sanguinem assumpsit ad suam hypostasim, nec solùm vitalem, sed etiam nutritivalem.

Prima pars est certa, ità ut opposita sententia Durandi notetur ut hæretica, & erronea à Capreolo, ab aliis ut remeraria. Sed præscindendo ab his censuris, Patres, & Concilia, Verbum assumpsisse carnem, ac sanguinem; passim asserunt; carnem autem assumpsit immediatè, ergo & sanguinem. Secunda pars ex eo constat, quia uterque sanguis est pars naturæ humanæ, (quamvis ex Angelico diversum sit munus sanguinis vitalis à munere nutritivalem) ergo utrumque sanguinem assumpsit; Ex eo autem, quòd corpora gloriosa alimento non indigeant, solùm sequitur, quòd sanguis, quà nutritivus, non resurgat ad gloriam, non verò, quòd non resurgat in tanta copia, quanta necessaria est ad humana corpora nutrienda.

Confirm. Quia Scripturæ, Concilia, & Patres, dum docent, Verbum carnem, & sanguinem assumpsisse, non distinguunt inter sanguinem vitalem, & nutritivalem; ergo utrumque eodem modo immediatè assumpsit, posito, quòd uterque spectet ad humani corporis integritatem: ut docet D. Thom. 3. p. q. 54. ar. 2. ad 3. & Aristoteles l. 2. de partibus cap. 2. & 8. ubi sanguinem inter partes animalis recenset; nec in alio sensu Philosophus loco laudato cap. 3. & 10. negat sanguinem esse partem corporis, nisi quia non est pars animata; unde Galenus lib. 2. de Elementis, appellat sanguinem quasi partem, quia scilicet cùm non sit animatus, non dicitur absolute pars, spectat tamen ad animalis integritatem, non secus ac aliæ partes animatæ, cùm non sit purum nutrimentum partium.

Neque dicas, chylum in venis mesaraicis attractum, antequam recipiatur in hepate, habere similitudinem sanguinis, sed nondum habere formam sanguinis substantialem, & idcirco esse purum nutrimentum, non partem animalis actu, sed solùm in potentia, atque adeò hunc sanguinem, quem Thomistæ vocant nutritivalem, non esse à Verbo assumptum; frustra enim assumeretur, cùm statim esset dimittendus, eò, quòd mox esset corrumpendus, & in sanguinem vitalem transmutandus. Nam concedimus Adversariis, chylum, & quodcumque habet rationem puri alimenti, non esse assumptum

ptum à Verbo ; & solum contendimus, esse assumptum sanguinem tam vitalem, seu perfectè concoctum, quàm nutritivalem, seu nondum perfectè concoctum, dummodo habeat formam sanguinis substantialè, & non sit purum alimentum, sed pertineat ad integritatem naturæ humanæ ; quicquid sit, an sit huiusmodi , antequam perveniat ad hepar, seu ad cor chylus in venis mesaraicis attractus, quod spectat ad Philosophos, & Medicos discutere ; sicut ad eosdem spectat examinare , num sanguis sit animatus, quòd communissimè negant , cum nullam vitæ operationem exerceat, ne vegetativam quidem, nec crescat per intussumptionem alimenti, sed per juxtapositionem partium, quæ generantur , sicut crescit aqua in vase. Dicitur quidem Levit 17. *Anima carnis in sanguine est* ; Sed ex Augustino sensus est , quòd anima, seu vita animalium à sanguine pendeat, quatenus ab eo vivens accipit & alimentum, ut nutriatur, & juvamen ut sentiat, eoque sublato, nec nutriri amplius possit , nec sentire. Aristoteles etiam 3. de Historia animal. dixit, sanguinem esse animatum, quia apud Antiquos, ut notat Suar. lib. 2. de Anima cap. 5. Calor naturalis anima vocabatur. Ceterum ad nostram Conclusionem sufficit , quòd sanguis spectet ad integritatem corporis humani, etiam si animatus non sit, ut debeat dici assumptus à Verbo immediatè. Quòd autem ad hanc integritatem spectet, ex eo etiam evincitur, quia ex communi Sanctorum Patrum, ac Theologorum suffragio sanguis futurus est in corporibus hominum resurgentium, & non aliam ob causam, nisi ad integrandum corpus humanum. Hinc Tridentinum Sess. 13. cap. 3. supponit, sanguinem esse partem Christum integrantem, dum dicit : *Corpus Christi esse sub specie vini, & sanguinem sub specie panis, & animam sub utraque vi naturalis illius connexionis, & concomitantia, quâ partes Christi Domini, qui jam ex mortuis resurrexit, non amplius moriturus, inter se copulantur.*

III. Dico 2. Tres alii humores, videlicet phlegma, flava, & atra bilis, seu pituita, colera, & melancholia fuerunt pariter à Verbo immediatè assumpti , non secus ac sanguis. Ratio est eadem , quia pariter spectant ad humanæ naturæ integritatem , & per se requiruntur ad convenientem statum corporis , magnūque habent usum ad operationes animalis ; unde pariter reperien-

tur in corporibus Beatorum redivivis, immo sæpè nomine sanguinis veniunt omnes quatuor humores, quia tres isti cum sanguine commiscantur, & unam totalem massam conſtant, quæ à principaliore humore ſumit denominationem sanguinis.

Propterea eandem pariter rationem communiter docent, quòd Verbum immediatè etiam aſſumpſerit ſpiritus vitales, & animales, quia pariter ad integritatem ſpectant corporis animati, & in corporibus glorioſis reſurgent; requiruntur enim ad operationes vitales, & ſi illis corpus eſt valde debile, ac penè exanime; ſunt enim flos ſanguinis puriſſimi, ac maximè defæcati.

Dentes ſimiliter fuerunt Verbo perſonaliter uniti, cùm non ſolùm ad integritatem corporis pertineant, ſed etiam juxta communem Philoſophorum inſormantur animâ rationali. Ungues pariter, & capilli unione hypſtaticâ uniuntur Verbo, ut communius docent contra Vaſquez, cùm ad integritatem etiam corporis pertineant: & probabilius eſt eos animari, non ſecus ac oſſa, ſive aimentur animâ rationali in homine ſecundùm eſſe vegetativum, ut videtur docere D. Thom. in 4. diſt. 44. qu. 1. ar. 2. qu. 2. ad 3. ſive animâ ſpeciali vegetativâ; deſerviunt enim non ſolùm ad ornatum, ſed etiam ad conſervationem reliquarum partium corporis videlicet capitis, manuum, ac pedum, ſicut folia ad conſervationem fructuum, quæ proinde in arboribus vivunt, & ab inſinſeco nutriuntur. Hinc in Euchariſtia Corpus Chriſti continetur etiam cum capillis, & unguibus, ut ipſe Vaſquez admittit, non ſecus ac cum ſanguine, & aliis humoribus, non verò cum chylo, quem Chriſtus in ſtomacho habuit tempore cœnæ, quando panem, & vinum tranſubſtantiavit, quia chylus non eſt pars corporis, ſed unicè ad nutrimentum deſervit.

IV. *Objic.* 1. Si Verbum aſſumpſiſſet ſanguinem, poſſet denominari ſanguis; ſicuti quia naturam humanam aſſumpſit, denominatur homo; ſed Verbum nequit dici, quòd ſit ſanguis, ergo ſanguinem non aſſumpſit, & eadem eſt ratio de aliis humoribus.

Reſp. cum Suar. loc. cit. quòd Verbum non poſſit denominari ſanguis ob illam eandem rationem, ob quam in triduo mortis nō poterat denominari anima, aut corpus, quamvis animæ, & corpori eſſet unitum, quia ſcil.

istæ

istæ sunt partes ordinatæ ad hominis naturam complendam, cum autem Verbum naturam hominis completam per se assumpserit, non verò ejus partes, nisi in ordine ad illam, idcirco solùm potest denominari homo, non verò sanguis, sicut neque dens, aut nervus, aut cartilago.

V. *Objic.* 2. Sanguis non pertinet ad integritatem corporis humani, sicut nec reliqui humores, ergo non fuerunt à Verbo immediate assumpti. *Probatur antecedens* primò, quia non habet rationem partis integrantis, quod non est pars actu, sed solùm in potentia, aliter etiam chylus spectaret ad integritatem corporis, & fuisset à Verbo assumptus; sed sanguis est solùm in potentia pars corporis humani, cum deserviat nutritioni carnis, & aliarum partium solidarum, ergo. Secundò quia homo non nutritur ex suis sinit partibus, nutritur autem ex sanguine, ergo sanguis non est pars hominis. Tertiò sanguis cum sit fluxibilis, non continuatur cum partibus corporis, sicut nec aqua cum terra, ergo non est ejus pars. Quartò si sanguis esset pars corporis, in consecratione panis ex vi verborum veniret etiam sanguis, quod est contra Tridentinum dicens, sanguinem venire per concomitantiam

Resp. Nego antec. Ad primam probationem. In corpore humano, ut notat Angelicus in 4. dist. 44. q. 1. ar. 2. aliæ sunt partes, quæ non sunt ulteriùs transmutabiles in alias, ut caro, ossa, nervi, aliæ sunt partes, quæ sunt ulteriùs transmutabiles, ut sanguis, & reliqui humores, qui proinde & sunt actu partes, quatenùs integrant corpus humanum, & sunt potentia partes, quatenùs possunt in alias partes transmutari; Chylus tamen nullatenus est actu pars. Ad secundam, non est absurdum, quod homo nutriatur ex illis partibus, quæ sunt transmutabiles in alias, ut propterea habeant rationem partis simul, & alimenti. Ad tertiam, sanguis cum habeat quasdam partes crassiores, quas Medici appellant fibras, quæ continuantur venis, sicut venæ etiam carni continuantur, hinc sanguis mediatè continuatur cum reliquis corporis partibus. Ad quartam, ex vi verborum in consecratione panis venit corpus Christi cum omnibus suis partibus solidis, non verò fluidis; sicut est sanguis, & reliqui humores, & ratio est, quia verba illa significant corpus Christi per modum cibi, cui solùm aptæ sunt

partes solidæ, non verò fluidæ, quæ proinde vi verborum veniunt in consecratione Calicis, quibus Sanguis Christi significatur per modum potûs.

VI. *Objic.* 3. Juxta commune Theologorum effatum ex Damasceno desumptum. *Quod Filius Dei semel assumptus, nunquam dimisit*, atqui sanguinem in passione effusum, si minùs totum, saltem secundùm aliquas ejus partes dimisit; ergo illum non assumpsit. *Minor probatur*, quia multum sanguinis in passione fusi reliquit Christus ad consolationem fidelium, ut habetur in Bulla Pii II. apud Sylvestrum in Rosa aurea tr. 3. q. 31. Sic in Sacra Syndone Taurinensi habentur reliquæ sanguinis fusi, ut declaravit Julius II. necnon in vultu Sancto Romano, seu in linteo Veronicæ, ut multi docent apud Bzovium anno 216. Nicephorus etiam l. 1. cap. 30. refert, sanguinem, & aquam ex Christi latere effusam in vasculo quodam exceptam fuisse, & conservatam à B. Virgine, & S. Joanne Idemque dicas de sanguine, qui Mantuæ servatur, approbato à Leone II. ut refert Platina in vita hujus Pontificis, & Baron. anno 804. & de aliis multis. Neque dici potest cum Valentia hic disp. 1. qu. 5. has sanguinis particulas adhuc esse Verbo hypostaticè unitas, cum id communiter à Theologis negetur, tum quia istæ particule sanguinis non amplius dicunt ordinem ad Christi humanitatem, quippè quæ sine illis suam habet integritatem, tum etiam quia aliter dici etiam deberet, quod præputium Christi Domini sit pariter Verbo unitum, imò etiam omnes partes materiæ, quæ aliquando in Christo fuerunt unitæ Verbo, ac postea resolutæ sunt in lacrymas, in sudorem, & per continuam actionem, & repassionem caloris naturalis, necnon capilli, qui aliquando è Christi capite deciderunt: Unde fieret, aliquam naturam esse hypostaticè unitam Verbo, quæ nec esset in Cœlis, nec in Eucharistia, quod non est admitendum.

Respond. Effatum illud intelligendum esse de partibus Humanitatis assumptæ, quæ necessariæ sunt ad integritatem corporis Christi resurgentis, non verò de aliis non necessariis, ut apertè ex eodem Damasceno colligitur, propterea sanguis in passione effusus, qui fuit necessarius ad corpus Christi resurgentis integrandum, nunquam fuit à Verbo dimissum, secus verò non ne-

necessarius, sicut etiam præputium, capilli, & aliæ partes materiæ, quæ deinde in lachrymas, & sudorem fuerunt resolutæ. Particulæ autem sanguinis, quas ad consolationem fidelium Christus in terris reliquit, vel est sanguis miraculosus, non verò sanguis ille, qui fuit in passione fusus, ut habet D. Tho. *qu. 54. a. 2.* de sanguine ex aliquibus imaginibus transfixis fuso, vel sunt solum maculæ sanguinis, ut in Sacra Syndone, & in Sudario Veronicæ, quin retineant amplius formam substantialem sanguinis, sicut nec præputium formam carnis, ut docet Amicus *disp. 15. sect. 7.* & alii, vel est verus sanguis, dimissus tamen à Verbo, quia ad integritatem Christi non pertinebat, ut est sanguis collectus à B. Magdalena sub Cruce Domini, & conservatus in vitrea ampulla apud S. Maximinum, ubi Magdalena poenitentiam egit, quia toto tempore, quo legitur Passio Domini die Parasceves ebullire cernitur, ut plures testes oculati in regio Conventu S. Maximini commorati retulerunt apud Gonetum *disp. 9. ar. 6.* Hinc totus Sanguis moraliter loquendo reassumptus fuit in Christi resurrectione, non verò totus physice, cum non fuerit reassumptus, qui ad integritatem corporis non pertinebat, ex Bulla enim laudata Pii II. apud eundem Amicum veritati fidei non repugnat affirmare, quod aliquam partem sanguinis in passione fusi Christus reliquerit in terris ad fidelium consolationem, ac devotionem.

VII Utrum autem in triduo mortis sanguis à corpore Christi separatus fuerit Verbo hypostaticè unitus, an verò dimissus? lis fuit celeberrima inter Fratres Prædicatores, & Minores, ut refert Spondanus Anno 1461. cum enim B. Jacobus de Marchia Ordinis Minorum asseruisset in quodam Sermone, quod fuerit dimissus, acriter sententiam hanc Fratres Prædicatores insectati fuerunt, tamquam rationi, ac fidei dissentaneam. Pius II. in Bulla de hoc edita statuit, nulli licere sententiam B. Jacobi de Marchia tanquam hæreticam proscribere. Communissimè tamen illam rejiciunt, ea quippè, ut loquitur Suarez, neque pia est, neque secura. Et ratio est, quia sicut Corpus, & anima Christi quamvis inter se separata in triduo mortis adhuc erant Verbo unita, ita sanguis, quamvis tunc esset à corpore separatus, eò quòd non solum corpus, & ani-

anima, sed etiam sanguis ad integritatem Humanitatis Christi pertinebat; propterea si quis ex Apostolis in eodiduo vinum consecrasset, sanguis, qui sub speciebus vini esset, eodem modo fuisset unitum Verbo, ac nunc, siquidem tunc etiam vera fuissent Verba Christi D. Jo. 6. *Qui bibit meum Sanguinem, in me manet.* Quod tamen dicimus de Sanguine in passione effuso, non est dicendum de Sanguine effuso in circumcisione, ut notat Gonet loco laudato, hic enim post separationem à Corpore fuit à Verbo dimissus, eò quòd ad integritatem Corporis Christi non pertinebat: & eadem est ratio de præputio, quod remansit in terris, ut notat Innoc. III. *lib. 4. de Mysteriis Missæ.* Hinc quod dicitur in Extravag. *Unigenitus* Clementis VI. vid. unam sanguinis guttam pro nobis in Cruce effusam fuisse sufficiens pretium nostræ Redemptionis propter Unionem ad Verbum, intelligendum est de quacunque sanguinis gutta pro statu Unionis ad Verbum, non verò de sanguine non requisito ad Humanitatis integritatem pro statu separationis.

DISPUTATIO V.

De Terminò unionis hypostaticæ, seu de ipso Christo Domino.

Erminus unionis est Christus, quo nomine significatur Verbum subsistens tum in divinitate ungente humanitatem, tum in humanitate uncta; propterea idem sonat *Christus*, ac unctus: Nomen verò JESUS, vel Deus, licet supponant pro Persona Verbi, non significant tamen utramque naturam, sed nomen *Deus* significat naturam divinam, cui etiam Persona Verbi identificatur, & Nomen *Jesus* significat naturam humanam, cui Persona Verbi misericorditer est unita, & ideo ad tantæ dignationis, ac misericordiæ memoriam, sacrosanctum Jesu nomen veneramur, quippe quod hebraicè Salvatorem sonat. In hac postrema Disputatione Christi Domini constitutionem, ac idiomata inquiramus, & quia duæ sunt in eo Naturæ in unitate Personæ, ideo examinandum primò, An Christus

ut sit Persona composita trahens idiomatum communicationem? Secundò quotuplex sit in eo sanctitas? Tertiò quotuplex Scientia? Ad extremum inquiremus de ejus Sacerdotio, oratione, Adoratione, & Aliis, pro ut dabitur.

Q U Æ S T I O I.

An Christi Persona sit Composita, & quomodo trahat Idiomatum communicationem?

I. DE fide est contra hæresim Eutychianam, in Incarnatione Naturam divinam, & humanam mansisse distinctas, & inconfusas, atque adeò cum proprietatibus suis, terminatas tamen eadem Verbi subsistentia, ut proinde Verbum dicatur in duabus naturis subsistere. De fide etiam est contra Nestorium, in Christo non esse duas Personas; aliter Verbum solum dici posset humanatum, non verò homo; sicut Petrus dici potest vestitus, non vestis, quia cum veste solum habet unionem accidentalem, non substantialem in unitate Personæ; idcirco autem in casu nostro idem est Deus, & homo, quia eadem est Personalitas habens utramque naturam, alteram sibi identificatam, alteram substantialiter unitam. Advenit quidem Verbo natura humana per accidens, seu contingenter, & idè Verbum dicitur Incarnatum; quia tamen unio, quæ per accidens advenit, est substantialis, idè dicitur etiam Verbum factum esse caro, ac esse homo. Difficultas est, utrum Persona Christi, cum sit una, dici debeat simplex, ac composita? Negant plurimi, esse compositam. D. Th. q. 2. a. 4. docet, quòd Christi Persona secundum se considerata sit simplex, & incomposita; secus verò si consideretur, pro ut subsistit in duplici natura. Quæstio est de modo loquendi; Qui tamen in re tam gravi non est contemnendus, ut iplis vocibus utraque hæresis declinetur.

II. Dico equidem cum Angelico, Christi Personam verius dicendam esse compositam, quam simplicem.

Prob. 1. Autoritate Conciliorum, & PP. Nam VI. Synodus act. 4. *Confitemur*, inquit, *Christum ex duabus naturis compositum*, Et D. Damasc. laud. à D. Th. loc. cit. habet:

In

In Christo duas naturas cognoscimus , unam autem hypostasim ex utraque compositam.

Secundò Ratione : Illud dicitur compositum, quod constat ex pluribus ordinatis ad faciendum unum ; sed Persona Christi constat tum ex Personalitate , & natura Verbi , tum etiam ex humanitate ordinatis ad faciendum unum per se in ratione Personæ, ergo est Persona composita.

Confirm. Ex eodem S. Tho. , quia Persona Christi vel consideratur secundum quod est in se , & sic est omninò simplex , ut est natura Verbi : vel secundum quod subsistit in aliqua natura , & quia subsistit de facto in natura divina simul , & humana , idè est Persona composita : quare Christus dicitur esse unum subsistens , & quia in duabus naturis subsistit , dicitur Persona composita.

III. *Objic. 1.* Si Christus esset Persona composita ex duplici natura , sequeretur primò, quod natura divina , & humana in Christo unirentur , quòd sapit hæresim Eutychianam. Secundò , quod vera esset hæc propositio ; Christus est natura divina , & humana , qui fuit error Joan. Hus , damnatus in Concil. Constantiensi *Añ. 5.*

Resp. Naturam divinam, & humanam uniri in Christo solùm in ratione Personæ, seu in ratione habentis, & habiti, non verò in ratione naturæ, seu actûs , & potentia, ut pluries explicavimus contra Eutychem. Ad secundam si hic terminus, Christus, supponat materialiter, & specificativè pro sola Persona Verbi habente humanitatem, falsum est, quòd Christus sit etiam humanitas , si verò supponat formaliter , & reduplicativè pro omnibus , quæ Christum constituunt , verum est quod sit utraque natura. Similiter respondendum interroganti, Num Christus sit res creata, an increata ? si supponit materialiter, est res increata, si formaliter , reduplicando utramque naturam, est res partim increata, partim creata. Jo. Hus damnatus fuit, quia ut notat Valdus, de Christo materialiter sumpto dicebat , quod sit natura utraque permixta, & confusa, juxta hæresim Eutychianam.

IV. *Objic. 2.* Si Persona Christi esset composita , alterum ex componentibus esset natura divina , sed naturæ divinæ repugnat esse partem componentem ordinatam ad faciendum unum per se ; Cùm de ratione

par-

partis sit esse quid imperfectum, & incompletum; ergo &c.

Confirm. Si Christus esset Persona composita, darentur in Christo duæ Personæ, altera simplex propria Verbi, altera composita propria Christi; sicut si anima habet subsistentiam propriam, & uniatur corpori, in homine darentur duæ subsistentiæ, altera propria animæ simplex, altera propria hominis composita.

Resp. Non esse confundendum nomen Partis cum nomine componentis; pars dicitur, quæ se sola non adæquat totum; componens verò dicitur quod cum alio componente conflatur totum, esto se solo possit totius compositi perfectionem adæquare; sic complexum ex Deo, & creatura conflatur ex Deo tamquam ex componente, non tamquam ex parte, quia solus Deus complectitur totam perfectionem complexi ex Deo, & creatura. In casu nostro verum est, quod natura divina non possit esse pars constituens Personam Christi; potest tamen esse unum ex componentibus Personam Christi compositam: propterea D. Dionys. 1. de Div. nom. dicit, Christum esse compositum *ineffabiliter*, quia non est assignabilis alia substantialis compositio, in qua componentia non sint etiam partes, quæ mutuo perficiantur.

Ad Confirm. Nego *sequelam*; sicut in composito accidentali non datur duplex suppositum, alterum præjacens & simplex, alterum compositum, eò quòd accidens non concurrat in composito accidentali ut habens suam partialem subsistentiam, ita in Persona Christi non datur duplex suppositum, alterum Verbi simplex, alterum Christi compositum, quia humanitas non concurrat ad constituendum Christum, ut habens suam partialem subsistentiam, ubi è contra anima, & corpus concurrunt ad constituendum hominem, ut habentia suam partialem subsistentiam, propterea homo est Persona composita ex duplici partiali subsistentia, contra verò Christus est persona composita non ex duplici partiali subsistentia, sed ex duplici natura.

V. Ex hoc, quòd Christi Persona sit composita ex utraque natura, sequitur in Christo idiomatum communicatio, hoc est, quod de eodem Christo verificentur idiomata, seu proprietates utriusque naturæ, adeò ut dici

dici possit: Hic homo creavit mundum, est impassibilis, æternus, immensus, omnipotens, genitus à Patre Æterno &c. & è converso: Hic homo patitur, moritur, est in hoc loco, & tempore, natus ex B. Virgine. Hæc idiomatum communicatio fundatur in unitate Personæ compositæ, ratione cujus sicut Deus est verè, & non metaphorice homo, & vice versâ homo, seu habens humanitatem est propriè Deus, seu habens etiam divinitatem, ità pariter verè, & propriè de hoc homine dicuntur, quæ propriè dicuntur de Deo, & de Deo propriè dicuntur, quæ propriè dicuntur de hoc homine: Propterea Suar. *disp.* 3 s. dicit, hanc idiomatum communicationem esse adeò certam, sicut certa est unitas Personæ in Christo Domino, atque adeò negari non posse, salvâ fide, sicut enim quando duæ formæ uniuntur in eodem supposito, v. gr. logica, & musica, Anima, & corpus, tunc possunt illæ invicem prædicari in concreto, seu nomine importante idem suppositum in recto, v. gr. logicus est musicus, & è contra, logicus cantat, & musicus syllogizat; ità in casu nostro dici potest Deus est homo, & homo est Deus; Deus moritur, & hic homo est immortalis. Et ratio à priori est, quòd ad veritatem propositionum non requiritur identitas obliqui, sed sola identitas subjecti importati in recto cum prædicato, unde fit, quòd idiomatum communicatio fieri non possit in terminis abstractis, non enim dici potest: Divinitas est humanitas, sicut non potest dici, logica est musica, sed solum in terminis concretis, Deus est homo, uti logicus est musicus.

VI. Porro ad hanc idiomatum communicationem percipiendam, nonnullæ Regulæ assignantur.

Prima est: quidquid dicitur de Deo essentialiter, & de Filio Dei sive essentialiter, sive personaliter, illud solum prædicari potest simpliciter, & absolutè de hoc homine, nempe de Christo; Et ratio est, quia suppositum hujus hominis verè est Deus, & Filius Dei. Hinc dici potest, Hic homo est omnipotens, Immortalis, Mundi Creator, & sic de aliis prædicatis, quæ competunt Deo, quatenus Deus est: Et rursus de eodem dici potest, Hic homo est Genitus à Patre Æterno, & spirat Spiritum Sanctum, quæ sunt prædicata quæ competunt Filio Dei; Non potest tamen dici, hic homo est Pater, aut est Spiritus S., neque quòd generet, aut spiretur, cum hæc præ-

prædicata neque sint propria Dei, quatenus Deus est, neque Filii Dei.

Secunda ex D.Th. est: Quæcunque prædicata conveniunt naturæ sive divinæ, sive humanæ, ut habenti oppositionem cum supposito, seu cum toto, non possunt de Christo prædicari, v.gr. quia natura divina, in quantum est pars, & opposita supposito, dicitur communicabilis, & humanitas dicitur sustentata à Verbo, non potest dici, quòd Christus, seu Verbum sit communicabile, aut quòd sustentetur, vel uniatur Verbo: contra verò prædicata, quæ competunt naturæ, seu parti, non ut dicenti oppositionem cum Toto, possunt de Toto, seu de Christo prædicari in concreto. Ratio est, quia sicut de Toto prædicatur ipsa natura, ita prædicari etiam possunt omnia prædicata naturæ. Hinc quia humanitas est mortua, & sepulta, & similiter Deitas est ab æterno, immensa &c. idè per communicationem idiomatum Christus, Verbum, Deus, & Filius Dei dicitur mortuus, sepultus, & vice versâ Christus, seu hic homo per communicationem idiomatum dicitur esse ab æterno; immensus &c. abstinendum tamen ab his prædicatis absolutè prolatis, ne videamur convenire cum Ubiquitariis, qui volebant, Christi humanitatem esse ubique. Sic quamvis dicere possumus, Verbum est homo, non possumus tamen absolutè dicere, Verbum est creatura, non solum quia, si faciat sensum abstractum, propositio hæc est falsa, sed etiam quia, si faceret sensum concretum, & significaret, quòd Verbum sit habens naturam creatam, seu Creaturam eodem modo, quo Verbum est homo, quatenus est habens humanitatem, dicendo: Verbum, seu Christus est Creatura, videmur cum Arianis convenire, dicentibus, quòd suppositum Verbi sit creatum, ut notat D.Tho. *qu. 16. a. 8.*

Utrum autem vera sit hæc propositio: Verbum in quantum homo, est creatura, Angelic. *ib.* respondit, quòd si ly in quantum homo reduplicet humanitatem, propositio est vera; secus verò si reduplicet suppositum: abstinendum tamen ab hac propositione absolutè proferenda, quia nisi addatur debita explicatio, videmur cum Arianis convenire, sicuti neque dicendum absolutè: Christus est incorporeus, ne videamur convenire cum Manichæis.

Tertia Regula. Quamvis de Christo Domino ob dualitatem Naturam dici possint prædicata contraria, non tamen contradictoria. Quare dici potest, quod hic homo, seu Christus sit passibilis, & sit impassibilis, mortalis, & sit immortalis, etenim quatenus est habens humanitatem est mortalis, & quatenus est habens Deitatem est immortalis, non potest tamen dici, quod sit passibilis, & non sit passibilis &c. Ratio est, quia si negatio cadat supra copulam dicendo, quod non sit passibilis, distribuit, & negat omnem naturam passibilem, & mortalem, quod est falsum, si verò negatio cadat supra prædicatum, dicendo quod Christus sit non passibilis, seu sit impassibilis, tunc non sit propositio negativa, sed affirmativa de prædicato infinito, & ideò solum negatur passibilitas, & mortalitas de natura divina, quod est verum, quod si passibilitas negaretur de natura etiam humana, esset falsum.

Q U Æ S T I O I I

De Christi Sanctitate.

Quærendum, Utrum Christi humanitas sanctificetur formaliter, seu potius supposititaliter, an solum radicaliter à sanctitate increata substantiali naturæ divinæ sibi unitæ? & An etiam à ipsa Personalitate Verbi? & Num finite, an infinite? Num physicè, an solum moraliter? Deinde an fuerit in Christo etiam gratia accidentalis? & quomodo dicendus sit Christus, Filius ne Dei adoptivus proprius, an naturalis?

A R T I C U L U S I.

Utrum Christi humanitas formaliter sanctificetur à sanctitate increata? & An etiam physicè, ac infinite.

I. Usque adeò certum est apud Theologos, Christum fuisse substantialiter sanctum à sanctitate Verbi, ut Hurtadus putet, id esse de fide. Alii apud Lumb. n. 939 censent, oppositum esse temerarium, & censura dignum: abstinendum tamen ab his censuris, cum in opposita sententia sint Rada, Felix, & Alii Scotistæ putantes, Christum à sanctitate Verbi non fuisse sanctum
for-

formaliter, sed solum causaliter, & exigitive, exigendo scilicet plenitudinem sanctitatis creatæ, unde si humanitas, quæ peccasset, assumeretur à Verbo, & non conferretur ei gratia habitualis, putant, huiusmodi Christum in hac hypothesi fore cum macula peccati habitualis.

II. Dico 1. Humanitatem Christi esse formaliter, & substantialiter sanctam à gratia substantiali increata. Ita communiter Theologi ex PP. & Conciliis apud Vasq. d. 41. c. 3. passim asserentibus, Christum fuisse substantialiter unctum, hoc est sanctificatum, ac Deificatum unguento, sive unctione divinitatis. VI. Syn. apud Bernal. Diss. 29. hæc habet: *Assumpta humanitatis voluntas ideò non est contraria Deo, quia deificata*, atqui non est deificata causaliter, sed formaliter, ut patet, ergo pariter est formaliter sanctificata, quod enim sufficit ad deificandum, sufficit ad sanctificandum, cum sit communis notio, quòd deificatio sit sanctificatio.

Prob. Ulteriùs ex conceptu sanctitatis: sanctitas ex D. Dionysio est, ab omni labe libera, perfecta, & immaculata mundities, & ex D. Petro est participatio divinæ naturæ, unde ut ostendimus disputatione antecedenti, non solum fert impossibilitatem, saltem exigitive, cum culpa, sed etiam exigentiam potentiarum, seu habituum supernaturalium, quibus possimus ad Deum videndum tendere, & quia est participatio Divinæ naturæ, fert Dei filiationem, amicitiam, & jus ad hæreditatem. Unde Sanctitas ex Tridentino reddit hominem filium Dei adoptivum, amicum, & hæredem; atqui hæc omnia præstat perfectiori modo Sanctitas increata erga Christi Humanitatem, cui substantialiter unitur; ergo Christi Humanitas non exigitive, sed formaliter sanctificatur sanctitate Verbi. *Prob. min.* Sanctitas increata communicata Humanitati reddit Christum Filium Dei, non adoptivum, & extraneum, sed proprium & naturalem; ut dicemus articulo sequenti, ergo perfectiori modo reddit Christum Dei Filium, amicum, & hæredem, atque adeò perfectiori modo præstat effectus formales sanctitatis sanctitas increata communicata Humanitati, quàm sanctitas accidentalis.

Confirm. ; Gratia habitualis ideò reddit hominem formaliter sanctum, quia est impossibilis cum

peccato, redditque hominem Deo gratum, amicum, & cum jure ad hæreditatem, sed hæc omnia præstat perfectiori modo sanctitas increata relatè ad Humanitatem Christi, ergo, &c. *prob. min.* & primò, quòd reddat Christum impossibilem cum peccato etiam levissimo, constat ex dictis, cum de Christi impeccabilitate *disp. 2. qu. 1.* Quòd etiam reddat illum Deo gratum, & amicum, patet, quia, ut dicitur Ech. 6. Amicitia causa est communicatio, & quod facit communicationem, facit amicitiam, & quod facit summam communicationem, facit summam amicitiam; unde amicitia paterna, & materna, & omnis ea, quæ intercedit inter consanguineos, fundatur in communicatione naturæ, & gratia ipsa accidentalis idè est causa amicitia divina, quia est communicatio, seu participatio divinæ naturæ: atqui per unionem hypostaticam natura Divina communicatur Humanitati perfectissimo modo, ergo fundat amicitiam perfectissimam. Et sanè longè perfectior est participatio Divinæ naturæ in suo esse reali, & substantiali, quæ habetur per unionem hypostaticam, quàm participatio Divinæ naturæ similitudinaria, quæ habetur per gratiam accidentalem, ergo si ista fundat jus amicitia inter Deum, & creaturam, à fortiori illa.

Et hinc descendit tertia pars *min.* quòd scilicet sanctitas increata det etiam Humanitati jus ad hæreditatem: Si enim Filiatio Dei adoptiva fundat jus ad hæreditatem, juxta illud Rom. 8. *Si Filii, & hæredes*, à fortiori filiatio Dei naturalis, propterea usurpare potest humanitas Christi illud Apostoli Rom. 8. *Quomodo non etiam cum illo omnia mihi donavit?*

III. Dico secundò: quamvis dici possit, quòd sanctitas increata sanctificet Humanitatem formaliter, in eo sensu, quòd excludatur sanctificatio causalis, & radicalis asserta à scotistis; dicendum tamen veriùs, quòd sanctificet supposititaliter, quàm formaliter.

Prob. Sanctitas increata non sanctificat Humanitatem tamquam forma physica (de cujus ratione est perficere subjectum, & ab eo perfici,) sed ut forma logica, quæ perficit, & sustentat Humanitatem, quin ab ea perficiatur, non secùs ac subsistentia Verbi denominat Humanitatem subsistentem tamquam forma logica, ergo sanctificat Humanitatem potiùs suppositando illam, quàm

quàm informando , atque adeò potiùs dicendum, quòd sanctificet supposititaliter, quàm formaliter , per hoc enim, quòd sanctitas increata supponit Humanitatem , facit illam suam, reddítque incapacem omnis culpæ , ac dignam amore amicabili Dei, & beatitudine , in quibus prædicatis consistit perfecta sanctitas.

IV. *Obje.* 1. Contra primam conclusionem: Humanitas non denominatur formaliter Immensa, Æterna, Omnipotens , per conjunctionem substantialem cum his attributis divinis ; ergo neque denominatur formaliter sancta per conjunctionem cum sanctitate increata ; esto Christus per communicationem idiomatum dici possit Immensus, Æternus, Omnipotens, atque etiam infinitè sanctus.

Resp. 1. Per instantiam ; ergo neque Humanitas denominatur formaliter subsistens per conjunctionem cum subsistentia divina. 2. *nego consequentiam* : disparitas habetur ex natura ipsarum denominationum ; Non enim omnes denominationes sunt ejusdem indolis, nec habentur eodem modo : Nam quod sufficit ad unam , non sufficit ad aliam ; v. gr. ad denominationem cogniti sufficit forma extrinseca, non tamen ad denominationem Albi ; sic ad denominationem Sancti sufficit conjunctio cum sanctitate ; propterea Reliquiæ Sanctorum dicuntur sanctæ ob conjunctionem habitam cum anima habente sanctitatem. Hinc Humanitas Christi præcisè per conjunctionem cum sanctitate Verbi dicitur sancta sanctitate propria creaturæ rationalis ; hoc est Deo amabilis , & impossibilis cum peccato : contra verò Humanitas per conjunctionem cum Immensitate non dicitur formaliter immensa , nec est ubique ; sicut intellectio , quamvis uniatur animæ , quæ est in pede, non idcirco ipsa est in pede. Et eodem modo Humanitas nequit denominari omnipotens, æterna, immortalis, impassibilis, quia hujusmodi denominationes ex propria natura haberi non possunt, nisi per formam identificatam, aut per formam physicam, quæ perficiat, & perficiatur à subjecto ; quare sicut potest stare conjunctio cum forma immortalis , sine denominatione immortalis , ut corpus conjungitur cum anima immortalis, quin denominetur immortale ; ita potest stare in Humanitate Christi conjunctio cum Omnipotentia, quin ea denominetur Omnipotens , esto non possit

conjugi cum sanctitate infinita, quin denominetur formaliter infinite sancta.

V. *Objec. 2.* Si homo uniatur Angelo habenti gratiam, non redditur formaliter sanctus à sanctitate illa Angeli, ergo quamvis Humanitas uniatur Verbo identificato cum sanctitate increata, non propterea fit formaliter sancta sanctitate increata.

Respond. nego consequentiam: sanctitas enim non denominat nisi subjectum, cui immediate unitur, ergo si gratia immediate uniatur Angelo, non homini, Angelum denominat sanctum, non hominem; At in casu nostro sanctitas Verbi immediate unitur Humanitati, cum tota Persona Verbi sit terminus formalis unionis, ergo Humanitas à sanctitate Verbi denominatur formaliter sancta, non secus ac à substantia Verbi denominatur formaliter subsistens.

VI. Dubitatur hic 1. Num Humanitas reddatur formaliter sancta per solam naturam, seu sanctitatem divinam, an verò per solam Personalitatem Verbi, an per utramque simul, an demum per utramque seorsim?

Censeo equidem, ab utraque simul, & divisivè sanctificari. Ità Lugo, Lumb. Amic. *disp. 16. sect. 5.* Martinon, & Alii communius contra Gonet, & Vasq. putantes, quòd à sola Deitate, & contra Lorcam putantem, quòd à sola Personalitate Verbi.

Prob. Quia Humanitas tam si uniatur soli naturæ Divinæ, quam si soli Personalitati, ut formaliter à natura distinctæ, habet impossibilitatem cum peccato, jus ad amorem Dei, & hæreditatem, ergo ab utraque habet sanctitatem, seu participationem naturæ Divinæ in eo sensu, in quo gratia habitualis dicitur naturæ Divinæ participatio, ergo ab utraque sanctificatur formaliter. *Antecedens prob.* ex dictis in prima Conclusionem, impossibile enim est, humanitatem esse substantialiter unitam aut Divinæ naturæ, aut Personalitati, quin sit à peccato immunis, summè Deo dilecta, & cum jure ad hæreditatem, siquidem hypostasis Divina, etiam ut virtualiter distincta à Deitate, si uniatur substantialiter Humanitati, non potest non reddere illam infinite amabilem, non secus ac si uniatur Deitati, per hoc quòd reddat Christum Filium Dei naturalem.

VII. Dices I. Hypostasis Verbi non sanctificat formaliter ipsum Verbum , ergo neque Humanitatem : *antecedens patet* , quia sanctitas formalis est prima radix beatitudinis ; Hypostasis autem Verbi non est id , à quo Verbum formaliter habet primam radicem suæ beatitudinis , cum id competat formaliter naturæ Divinæ. Quare *prob. consequ.* Quia quod non est sanctitas formaliter , non potest sanctificare formaliter , hypostasis autem Verbi non est sanctitas formaliter, alioquin sanctificaret ipsum Verbum, ergo non potest formaliter sanctificare Humanitatem.

Confirm. 1. Sanctitas est radix habituum , & operationum supernaturalium , atque aded est operativa per potentias suas ; sed hypostasis Verbi non est operativa, ergo.

Confirm. 2. Hypostasis Divina ut distincta à natura , juxta probabilem sententiam non importat perfectionem , ergo non potest tribuere formaliter denominationem perfectissimam infinitè sancti.

Confirm. 3. Personalitas Divina non sanctificat quæ Personalitas, ut patet, neque quæ divina , quia sic omne attributum divinum sanctificaret formaliter , ergo.

Resp. Cùm Lumb. n. 960. Duplicem dari sanctitatem , Alteram puritatis summæ excludentis omnem immunditiam, quæ solum trahit jus ad beatitudinem, sed de se non est operativa ; alteram verò puritatis summæ de se operativam. Hypostasis divina est sanctitas primi, non secundi generis , quamvis non diceret ratione sui perfectionem. In forma omisso antecedente , de quo valde dubitat Martinon. d. 9. *Nego consequentiam , ad probationem d'linguo antecedens* : quod nullo pacto est sanctitas, non potest sanctificare humanitatem , *concedo* ; quod non est sanctitas operativa , sed est sanctitas puritatis summæ, excludentis omnem immunditiam, *nego antecedens* , propterea non sanctificat Verbum tanquam prima Radix operationum divinarum, & beatitudinis divinæ, sed excludit essentialiter ratione sui omnem immunditiam , etiam à Verbo , redditque illud infinitè amabile , quod pariter præstat erga humanitatem. Quibus adde , quod licet Personalitas Verbi non sit ipsi Personæ Verbi prima radix beatitudinis naturæ assumptæ , quatenus ratione talis personalitatis , ut

condistinctæ à deitate debetur. Humanitati beatitudo, & hæreditas æterna.

Ad primam Confirmationem juxta primam responsionem datam argumento proposito nego, sanctitatem puritatis, de qua loquimur, debere esse Radicem potentiarum, & operationum supernaturalium, sufficit, si excludat omnem immunditiam, & trahat jus ad Dei amorem amicabilem, & ad beatitudinem; quicquid sit, an possit etiam dici radix potentiarum, & operationum supernaturalium in natura assumpta.

Ad secundam, transmissio quod hypostasis divina ratione sui non dicat perfectionem, adhuc ratione sui est sanctitas puritatis summæ; sicut enim potest intelligi, quod Paternitas v. gr. non sit perfectio, & tamen sit principium generativum *ut quo*, vel saltem conditio, ita potest intelligi, quod non sit perfectio, & tamen ratione sui excludat à Deitate, & ab humanitate omnem immunditiam.

Ad tertiam Personalitas divina sanctificat humanitatem, non quia Personalitas, præscindens à divina, sed qua divina, sic enim est puritas summa fundans jus ad beatitudinem: propterea quodvis attributum divinum, si posset substantialiter humanitati uniri seorsim à Deitate, illam sanctificaret.

VIII. Dices secundò. Si Deitas ut distincta à Personalitate Verbi etiam sanctificaret formaliter humanitatem, sequeretur quod humanitas unita hypostaticè Angelo habenti sanctitatem, deberet formaliter sanctificari, quod non admittitur, quia non nisi mediatè humanitas uniretur sanctitati Angeli, atqui etiam mediatè unitur humanitas Deitati, hoc est mediâ Personalitate Verbi; ergo à Deitate non sanctificatur formaliter.

Confirm. 1. Deitas non potest reddere humanitatem formaliter Deam, sapientem &c.; ergo nec sanctam.

Confirm. 2. Si Deitas humanitatem sanctificaret, omnes tres Personæ illam sanctificarent, quia quod competit Deitati, competit tribus.

Resp. Nego sequelam; Juxta nostram sententiam humanitas immediatè unitur Deitati, sed transmissio, quod uniatur mediatè, hoc sufficit, quod humanitas dicatur deificata, ergo & sanctificata, cum deificatio essen-

essentialiter ferat sanctificationem, & immunitatem à culpa, & ius ad Dei amorem, ac ad beatitudinem, sicuti enim si gratia sit solum in voluntate realiter distincta ab anima, etiam anima diceretur sancta, quamvis esset mediata unita gratiae, ita à fortiori, si humanitas mediata unitur sanctitati solum virtualiter distincta à substantia Verbi. Et ratio à priori est, quia etiam mediata communicatio satis est, ut reddat humanitatem immunem à culpa, & cum iure ad beatitudinem: Non sic, si humanitas uniatur Angelo habenti sanctitatem: quia per accidens conjungeretur cum Angelo sanctitas, non verò per se, ut unitur sanctitas Divina cum substantia Verbi.

Ad 1. Confirmationem, humanitas est incapax, ut dicatur Dea, solum potest denominari deificata, & hoc formaliter habetur à Deitate, ergo formaliter potest etiam à Deitate denominari sancta, seu digna Dei amore: non potest tamen denominari formaliter sapiens, immensa ab his attributis Divinis ob diversam naturam denominationum, ut ostendimus, & dicendum est ab ipsis adversariis: qui licet concedant, operationes Christi formaliter dignificari à dignitate Verbi, cui mediatae uniuntur, negant tamen eas immensitari per hoc, quod mediatae uniantur immensitati Verbi.

Ad 2. Unio hypostatica, ut diximus, terminatur ad naturam, & personalitatem Verbi indivisibiliter, & ideo non terminatur ad tres Personas; ergo nec sanctificatur humanitas formaliter à Tribus Personis: respicit enim unio hypostatica Deitatem communem Tribus, non tamen ut communem, sed tantum prout est in Filio, ut explicavimus *disp. 4. q. 1.* Et ratio à priori est ex Amico *disp. 16. n. 100.* quia praedicatum, quod convenit formae non quidem absolute, sed prout informanti unum subiectum, non potest eidem convenire, prout informanti aliud subiectum: ex. gr. anima, quae dicitur posse intelligere proximè prout est in capite, non dicitur posse proximè intelligere prout est in pede; & albedo si replicetur, & terminet visionem prout est in loco A, non dicitur eandem visionem terminare prout est in loco B; ergo pariter natura Divina, quae terminat unionem hypostaticam, prout est inclusa in Verbo, non dicitur eandem terminare prout est in Patre; atque adeò non sanctificatur humanitas à Persona Patris. Quamvis autem hu-

manitas indivisibiliter sustentetur à Deitate, & subsistentia Verbi ; ità ut utraque seorsim præbeat de facto erga humanitatem influxum sustentativum solum inadæquatum ; utraque tamen seorsim, ac divisivè sanctificat humanitatem formaliter ; sicut enim unio inadæquata terminata ad Deitatem denominat humanitatem formaliter deificatam , & unio inadæquatè terminata ad personalitatem Verbi denominat humanitatem formaliter personatam, ità utraque seorsim, ac divisivè sufficit , ut humanitas dicatur formaliter sancta.

IX Dubitatur ulterius, utrùm Humanitas sanctificetur à Verbo moraliter solum, an etiam physicè ? Et num finitè, an infinitè ?

Dicendum 1. Humanitatem à sanctitate increata moraliter dignificari, ac sanctificari infinitè ; adeò ut in moralis æstimatione hujusmodi sanctitas sit infinitæ dignitatis. Ità communiter cum Angelico, qui apud Lumbier. n. 980. expressissimè dicit , Carnem Christi fuisse infinitè dignificatam à Persona assumente ; erat enim Caro Dei , ex quo habebat dignitatem infinitam.

Prob. Merita Christi , quamvis solum mediatè uniantur Verbo , adhuc moraliter dignificantur infinitè à dignitate Verbi ; ergo à fortiori humanitas , quæ unitur Verbo immediatè , cum enim propter unionem deificetur, consequenter sit condigna amore Dei, & æstimatione simpliciter infinita magis , quam una Christi operatio.

Confirm. Quia Humanitas habens sibi unitam hypostaticè Deitatem, habet donum simpliciter infinitum, ergo est moraliter æstimabilis, ac digna infinitè.

Dices, si humanitas dignificata à Verbo esset infinitè æstimabilis, & moraliter digna, esset æquè digna, ac Verbum, seu Christus , hoc autem non videtur dicendum, cum humanitas etiam sub hac dignificatione sit quid limitatum : ergo.

Resp. Quòd sicut merita Christi infinitè digna non sunt æquè digna moraliter, ac ipse Deus, cum Deus habeat suam dignitatem infinitam per identitatem, merita verò per communicationem ; ità prorsus humanitas ; quippe quæ per sanctitatem Verbi fit sancta adjectivè, & in concreto , non est ipsa sanctitas in abstracto , ut est Deus ; propterea differunt in modo participandi sanctitatè, quamvis convenient in forma infinita sanctitatis.

X. Di-

X. Dicendum 2. Humanitatem Christi etiam physice dignificari infinite à sanctitate increata, cui physice unitur. Ità etiam communiter apud Arri Haun Lumb. contra Esparz. & Lugo *disp.* 16. n. 71. qui observat, quaestionem hanc habere plurimum de modo loquendi.

Prob. Merita Christi dignificantur moraliter infinite à dignitate Verbi, cui non uniuntur physice, sed moraliter, ergo humanitas, cui Verbum physice unitur, dignificatur physice infinite à sanctitate, & dignitate Verbi.

Confirm. Si sanctificaretur physice finite, posset crescere in sanctitate, non videtur autem, quomodo possit humanitas assumpta physice crescere in sanctitate, etiam si uniretur tribus Personis Divinis; ergo sanctificatur physice infinite.

Dices: Per hoc, quod subsistentia Verbi communicata humanitati sit inhnica, humanitas non subsistit infinite, ergo nec physice sanctificatur infinite. Et ratio utriusque est, quia humanitas subsistit, & sanctificatur mediâ unione finita, & juxta capacitatem finitam, ergo tantum finite.

Confirm. Si sanctitas increata uniatur lapidi, nullatenus illum sanctificat propter subjecti incapacitatem; ergo si uniatur Humanitati, nec sanctificabit illam physice infinite, cum subjectum finitum non sit capax recipiendi effectum formalem infinitum.

Resp. Quaestionem hanc esse plurimum de nomine, & ideo *distinguo antecedens*: Humanitas non subsistit infinite, si spectetur unio, quâ subsistit, *concedo*; si spectetur totum subsistens, & denominatio subsistentis, quæ habetur à subsistentia divina, *nego antecedens*, & *distinguo etiam consequ.* Ad id, quod additur, capacitas obediencialis humanitatis sicut est ad unionem cum subsistentia, & sanctitate infinita, ità est ad denominationem subsistentis, & sancti infinitam; & quamvis unio sit finita, quia tamen forma est infinita, idè constituit denominationem physicam infinitam, eo modo, quo in meritis Christi Domini constituit denominationem moralem infinitam; & ratio est, quia ad has Denominationes unio finita non se habet ut mensura, sed ut conditio.

Ad Confir. Sicut meritum Christi licet physice finitum, est capax recipiendi effectum formalem moraliter infinitum,

tum; ità Christi humanitas, quamvis finita potest recipere physicè effectum formalem infinitum, & denominari physicè sancta, seu dignificata à Verbo infinite, eò, quòd unio hypostatica, quantumvis sit finita, potest esse conditio sufficiens, ut Humanitati communicetur effectus formalis infinitus, non secus ac communicatur meritis Christi. Quare *negò consequentiam*.

Instabis: Si denominatio sancti infinita habetur à sanctitate Verbi tamquam à forma infinita, solum infertur, quòd Christus, seu tota denominatio sit infinite sancta, quòd non revocatur in dubium, non verò, quòd humanitas unita sanctitati sit sancta infinite; ergo.

Resp. 1. Quòd si argumentum probat, humanitatem non esse sanctam infinite, probat etiam, quòd nullatenus sit sancta sanctitate Verbi; quia denominationem à sanctitate Verbi habere non potest, nisi à tali forma. Directè dico, Christum esse sanctum infinite quidditativè, & per inclusionem sanctitatis increatæ; humanitatem verò esse infinite sanctam solum per unionem, & denominationem contingenter superadditam; ità ut sanctitas increata, quæ hanc denominationem constituit, non veniat in recto, sed in obliquo, dum dicitur humanitas sancta. Contra verò dum dicitur Christus sanctus, sanctitas increata venit in recto ad talem denominationem.

ARTICULUS II.

Utrum fuerit in Christo etiam Sanctitas Accidental.

XI. Quòd Christi humanitas formaliter sanctificetur non solum sanctitate substantiali increatâ, ut hactenus diximus, sed etiam sanctitate substantiali creatâ, nempe per unionem hypostaticam præsentis ordinis, ostendimus *Disputatione antecedente qu. 2.* Ubi diximus unionem hypostaticam de facto sanctificare Humanitatem non solum ut quo, sed etiam ut quod. Inquirimus nunc: An etiam sanctificetur formaliter per gratiam accidentalem, quâ Iusti de facto sanctificantur? Et sanè, quòd hæc sanctitas accidentaliter fuerit in Christo, est addeò certum apud Theologos, ut multi putent esse de fide. Difficultas solum est in explicanda necessitate. D. Thom. *qu. 7. a. 1.* docet gratiam habitualement fuisse in Christo ex triplici capite. Primò, quia Anima Christi pro-

propter unionem hypostaticam erat propinquior Deo, quàm quævis alia anima hominum ; ergo majorem influxum gratiæ ab eo recepit. Secundò, quia ad supernaturales operationes indigebat hâc gratiâ, tanquam principio intrinseco ; sicut beatus indiget lumine gloriæ tanquam principio intrinseco ad connaturalius ponendam visionem beatificam. Tertiò, quia Christus influxit gratiam in homines, juxta illud Joan. 1. *De plenitudine ejus omnes accepimus* ; ergo debuit illam in se habere.

XII. Dico equidem, fuisse in Christo gratiam habitualem tum ad connaturalem modum operandi supernaturaliter, tum etiam ad hanc novam animæ pulchritudinem participandam, ut esset omnibus modis sanctus, & pulcher.

Prob. 1. pars, quia sicut in Beatis requiritur lumen gloriæ intrinsecum ad connaturalem modum ponendi visionem Dei, ita in Christo requiritur principium intrinsecum habituum, & operationum supernaturalium ad connaturalem modum operandi supernaturaliter, & quamvis ipsa unio hypostatica præsentis ordinis, quam diximus esse formam justificantem, bene possit dici principium intrinsecum exigens habitus infusos, illos tamen exigit tantum mediâtè, exigendo immediâtè gratiam, cujus sunt proprietates habitus infusi.

Deinde, quòd gratia accidentalis spectet etiam ad novam pulchritudinem animæ Christi, patet, quia sanctitas ex suo conceptu est animæ pulchritudo, quâ redditur anima Deo placens, ac dilecta ; atqui diversa est pulchritudo, quæ habetur per gratiam exigitam ab unione hypostatica, ab ea, quæ habetur per ipsam unionem ; sicut in corpore humano diversa est pulchritudo, quæ habetur per harmoniam humorum exigentium proportionem membrorum, & congruas qualitates, à pulchritudine, quæ habetur per ipsam membrorum proportionem exigitam, & qualitates congruas, necnon à pulchritudine, quæ habetur per ornamenta extrinseca : ergo sicut Corpori Christi Domini competit quælibet species pulchritudinis, ita animæ Christi quælibet species sanctitatis, seu pulchritudinis spiritualis ; non secùs ac intellectui Christi competit quælibet species scientiæ.

Confirm. Sicut diversa est pulchritudo ordinis naturalis in anima Christi, quæ habetur per potentias intrin-

sec.

secas naturales, ab ea, quæ habetur per unionem hypostaticam, quæ illas exigit; ità in ordine supernaturali diversa est pulchritudo, quæ habetur in anima Christi per gratiam, & per potentias supernaturales ab ea, quæ habetur per unionem, quæ illas exigit; ergo sicut non negatur Christo Domino, præter unionem hypostaticam, pulchritudo illa in ordine naturali, ità nec ista in ordine supernaturali.

XIII. Dices 1. cum Vasq. quod non auget sanctitatem præsuppositam, non pertinet ad complementum, & consummationem sanctitatis: sed gratia accidentalis in Christo non auget sanctitatem præsuppositam per unionem cum sanctitate increata, à qua sanctificatur infinitè, ergo non spectat ad sanctitatis complementum. Neque obstat, quòd sanctitas per gratiam sit novus modus sanctitatis; Nam sanctitas infinita non solum absorbet omnem sanctitatem, sed etiam omnem modum sanctitatis; quare sicut candela in præsentia Solis non perficit lucem, ità nec gratia accidentalis sanctitatem Christi infinitam.

Confirm. Quia non potest explicari, Num gratia isthæc sit finitè, an infinitè intensà; Non infinitè, si repugnet infinita intensio, neque finitè, quia in quocunque gradu ponatur, est improporcionata unioni hypostaticæ, quæ reddit Christum dignitatis infinitæ, ergo ut prius.

Resp. Quòd sanctitas accidentalis non auget intensivè sanctitatem infinitam in Christo præsuppositam, sed extensivè, quatenus perficit subjectum alio genere sanctitatis; sicut meritum Christi utpote infinitum non potest intensivè crescere, potest tamen extensivè. Quamvis autem sanctitas infinita contineat eminenter omnem modum sanctificandi, at non communicat humanitati omnem modum sanctitatis, sicut non communicat in ordine naturali potentias naturales animæ, quamvis eas contineat eminenter.

Ad Confirm. Nominal. Bernal. Arriag. docent, gratiam accidentalem in Christo esse infinitè intensam. At D. Th. Suar. & alii negantes possibilitatem infiniti Catechorematice docent, gratiam habitualement in Christo fuisse summam juxta taxam Divinæ providentiæ, hoc est summam inter naturaliter possibiles, ut proinde solum de potentia extraordinaria possit Deus producere gratiam

tiam

tiam intensiorem; & ratio est, quia sic benè salvatur, quòd Christus dignitatis infinitæ habuerit gratiam in gradu consentaneo: non potest enim illam exigere in gradu infinito, qui supponitur impossibilis, nec in quocunque gradu finito, sed in eo gradu finito, qui excedat quemcunque gradum possibilem servatis naturæ legibus, & servatâ proportionem debitâ inter partes universi optimi. Hinc tam D. Stephanus Act. 7. dicitur: *Plenus gratiâ*; quàm Beata Virgo dicitur *Gratiâ plena*: & sic etiam ipse Christus Dominus dicitur Jo. 1. *Plenus gratiæ & veritatis*: verùm quia capacitas, & exigentia istorum est diversa, ideo diversa in iis est gratiæ plenitudo.

Dices 2. In Christo non datur fides habitualis, quia ejus munus præstatur modo præstantiori à visione beata, & scientia infusa; nec datur subsistentia propria, quia ejus munus eminentiùs præstatur à subsistentia Verbi, ergo neque datur gratia habitualis, quia eminentiùs præstatur ejus munus à sanctitate increata, & ab unionem hypostaticam præsentis ordinis.

Resp. nego consequ. Sanctitas enim increata, & unio hypostatica non conferunt humanitati, quòd præstatur à gratia, nempe esse Principium intrinsecum immediatè excitivum potentiarum supernaturalium: quare sicut unio hypostatica excipit potentias naturales in Christo, ed quòd ipsa non præstet earum munus, ita excipit gratiam, & habitus infusos, qui sunt proprietates gratiæ, ed quòd non præstet earum munus; sicut nec confert pulchritudinem illam, quæ habetur per gratiam immediatè excitivam virtutum supernaturalium.

Quamvis autem caruerit Christus fide habituali, non caruit tamen habitu spei infusæ, ut ostendimus, cum de virtutibus Theologicis *disp. 5. qu. ult.* & probabiliter, ut docet Lumb. habuit etiam virtutem poenitentiae infusam, ut dicemus in de Poen. *disp. 3. qu. 4.*

XIV. Quæritur hic, Utrùm Christus, seu ejus humanitas ratione gratiæ habitualis dici possit Filius Dei adoptivus; An verò dici debeat Filius Dei proprius, ut putant Scotistæ cum Lumb. juxta illud Apost. *Proprio filio suo non pepercit*; An verò, ut docent communissimè, Filius Dei naturalis? & an dici possit Filius Dei in quantum Trini, an verò Filius solius Dei Patris.

Cer.

Certum est contra Duran. Christum non posse dici Filium Dei adoptivum, quod videtur colligi ex Concilio Francofordienti apud Lumb. cum Christus non sit Persona extranea, prout requiritur ad denominationem Filii adoptivi. Certum etiam est, Christum, seu hunc hominem, per communicationem idiomatum, posse dici Filium Dei naturalem, & genitum à Patre Æterno. Solum dubitatur, An Christus in quantum homo, dici possit Filius Dei naturalis, cum in quantum homo non sit productus in similitudinem naturæ Divinæ, prout requiritur ad Filiationem naturalem, quæ est *Origo viventis à vivente, principio conjuncto in similitudinem naturæ.*

XV. Dico equidem cum communi, Christum in quantum hominem esse Filium Dei naturalem in sensu accommodo, & quidem solius Patris Æterni.

Prob. & 1. quidem, quod Christus in quantum homo sit Filius Dei naturalis, si fiat sensus, quod in quantum est suppositum habens humanitatem, sit Filius Dei naturalis per generationem æternam, negari non potest. Ratio est, quia cum Christus importet Verbum ut habens utramque naturam, si reduplicetur ut habens humanitatem, non reduplicando humanitatem, sed reduplicando suppositum ut habens illam, seu cum respectu ad humanitatem venientem in obliquo, procul dubio est ipsum Verbum, quod est Filius Dei naturalis. Deinde si sermo sit de Christo, in quantum homine, reduplicando tum suppositum, tum etiam humanitatem (in quo sensu non est Filius adoptivus) potest etiam in sensu accommodo dici Filius Dei naturalis, quatenus hic homo, in quantum est homo substantialiter completus per Personalitatem, quæ est filiatio Dei naturalis, est Filius Patris Æterni, cum importet constitutivè ipsum suppositum Verbi. Quare aliud est, reduplicare solam humanitatem, aliud reduplicare totum suppositum constituens hunc hominem: si reduplicaretur sola humanitas, certè non posset absolute dici Filius Dei naturalis, cum non habeatur similitudo in natura Divina, ut mox dicemus; secus verò si reduplicetur humanitas ut personata Personalitate Verbi: In hoc enim sensu Christus in quantum homo dupliciter dici potest Filius Dei naturalis; Primò, quia includit Personalitatem Verbi, & sic est Filius Dei Patris; Secundò quia, ut notant Suar. & Haul. humanitas sic personata habet jus ad hæreditatem, seu

seu ad visionem Dei, atqui quod habet jus ad hæreditatem, in communi acceptione dicitur Filius, ergo humanitas sic personata est Filius Dei, nempe totius Trinitatis; sed non extraneus, seu adoptivus, ergo naturalis. Et juxta hanc acceptionem, ut notat Suar. si Spiritus Sanctus incarnaretur humanitas isthæc diceretur similiter Filius Dei naturalis; quamvis in tali hypothese per communicationem idiomatum, hic homo diceretur etiam à Patre, & Filio spiratus.

Denique si in hac propositione, Christus in quantum homo, non reduplicetur aut solum suppositum habens humanitatem, aut suppositum simul, & humanitas, sed reduplicetur sola humanitas, Christus in hoc sensu nec dicitur Filius Dei naturalis, ut jam diximus. nec adoptivus; quamvis humanitas sit affecta gratiâ habituali. Ratio est, quia, ut notat Platellius, ut gratia possit denominare Filium Dei adoptivum, debet habere conceptum naturæ supernaturalis, seu primæ radicis omnis supernaturalitatis; atqui gratia in humanitate assumpta non est prima radix, cum gratia ipsa exigatur ab unionem hypostatica, ergo non potest denominare Filium Dei adoptivum. Utrum autem humanitas denudatâ quâvis subsistentiâ, & affectâ gratiâ habituali, dici possit filia Dei adoptiva? lis est apud Theologos. Communius apud Suar. d. 49. sect. 4. negant, quia humanitas in hac hypothese esset quidem natura extranea, sed non esset Persona extranea, quod videtur essentialiter requiri ad rationem adoptionis.

QUÆSTIO III.

De multiplici Christi Scientia.

SUPponimus ex dictis in de Beatitudine *disp. 1. qu. 7.* non posse intellectum Beati reddi formaliter intelligentem per intellectiorem increatam; unde Christus quamvis quâ Deus omnia intelligat intellectu increatâ; quâ homo tamen non nisi per creatam intellectiorem objecta cognoscit. Inquirimus nunc primò: Quotuplex Scientia fuerit in creato Christi intellectu. Secundo: Utrum in Verbo clarè, & distinctè cognoscatur omnia possibilia, aut saltem omnia futura?

ARTICULUS I.

Quotuplex Scientia fuerit in Christo Domino?

I. **C**ertum est, in Christo non fuisse ullum errorem, (quidquid sit, an potuerit Deus illi infundere errorem aliquem speculativum) sicut nec fuit in Christo opinio, aut fides, quæ de se aliquam imperfectionem præferunt. Neque obstat, quod in Conciliis, & Hebr. 2. Christus dicatur fuisse per omnia similis nobis, absque peccato; Nam hoc intelligendum cum restrictione, videlicet secundum ea, quæ non dedecent Christum, & ad nostram salutem conducunt; Aliter deberet dici Christus similis nobis in conceptione, in fomite, & aliis, quæ de se peccata non sunt. Quare omnia cognoscebat cognitione scientificâ; & solum quæritur, Quotuplex esset in Christo hujusmodi cognitio?

II. Dico 1. In intellectu Christi Domini fuit scientia, seu visio beatifica, quâ intelligebat Divinam naturam in se ipsa cum suis Attributis, & personalitatibus, tamquam objectum formale, & immediatum, & simul in divina natura tamquam in speculo voluntario attingebat Creaturas tamquam objectum materiale, & merè terminativum. Conclusio hæc à Theologis admittitur tanquam dogma Fidei, ut videre est apud Vasq. *disp. 41. c. 2.* Ratio est, quia Christus etiam in via fuit comprehensor; ergo habuit scientiam beatam perfectiori modo, quam omnes Beati, atque adeò non defuit illi visio isthæc beatifica.

III. Dico 2. Fuit etiam in Christo alia scientia intrinsecè supernaturalis habitualis per se infusa, constituta vel per species impressas supernaturales ordinatas ad cognoscendas creaturas sive existentes, sive possibiles, tamquam objectum formale; & ad cognoscendum abstractivè Deum in Creaturis, tamquam objectum materiale: Vel, ut alii docent, constituta per aliquam qualitatem habituales supernaturalem tenentem se ex parte potentiae, quæ simul cum speciebus impressis naturalibus causet cognitionem supernaturalem de iis objectis. Ità communissimè cum D. Tho. *qu. 9. a. 3.*

Prob. Angelis, ex Augustino, competit, præter cognitionem matutinam, quâ vident creaturas in Verbo, etiam cognitio vespertina, quâ vident creaturas in se ipsis: Similiter

militer in Deo, præter cognitionem possibilem in se ipso, admitti debet cognitio possibilem in se ipsis, si hæc non importet imperfectionem; ergo pariter in Christo præter visionem beatam, quâ videat creaturas in Verbo, admittenda est scientia supernaturalis per se infusa, quâ videat easdem creaturas in se ipsis, cum in intellectu Christi Domini sint omnes thesauri sapientiæ, & scientiæ Dei. Pertinet enim ad perfectionem intellectus, idem objectum multiplici viâ attingere, quoties diversus modus attingendi non ferat de se imperfectionem, scientia autem per se infusa, prout illam explicavimus, non importat imperfectionem, sed specialem perfectionem; quia de se est independens à sensationibus tum præexistentibus, tum concomitantibus; adeoque in suo modo existendi, & operandi assimilatur omnino scientiæ Angelorum, quorum operationes non habent respectum ad phantasmata.

IV. Hanc scientiam per se infusam Theologi apud Suar. volunt fuisse etiam in Beata Virgine exigitam à Divina Maternitate, ratione cujus scientiæ poterat independenter à phantasmatibus cognoscere objecta, atque adeò liberè operari etiam dum somnum caperet, & sic continenter mereri, juxta illud: *Ego dormio, & cor meum vigilat.*

Cum autem hujusmodi scientia directè terminetur ad creaturas, & in creaturis Deum attingat, sequitur, quod per hanc scientiam Christus non solum attingebat Deum ut unum, sed etiam ut Trinum, & reliqua mysteria Fidei; Tum quia per hanc scientiam immediatè attingebat revelationes de talibus mysteriis, quæ erant cum iisdem mysteriis essentialiter connexæ; tum etiam quia per illam immediatè attingebat visiones beatas omnium intellectuum repræsentantes mysteria Fidei, atq; adeò in iis visionibus hæc mysteria abstractivè attingebat.

Dices: Christus Dominus perfectissimo modo attingebat omnia objecta sibi debita per visionem beatam; ergo superflua erat scientia per se infusa, quâ eadem attingeret.

Resp. Argumentum probare, quod in Angelis superflua sit cognitio vespertina, præter matutinam, quod nemo dixerit: & ratio est, quia spectat ad perfectionem intellectus idem cognoscere alio modo, ac medio; quandoquidem novum medium sciendi est nova res

scita. Hinc experimur, quòd cognitâ aliquâ conclusione scientifico medio, conetur intellectus ad eandem cognoscendam alio medio, non solum demonstrativo, sed etiam opinabili.

V. Dico 3. Præter scientiam Beatam, & per se infusam intrinsecè supernaturalem, habuit etiam Christi intellectus scientiam per accidens infusam, naturalem quoad substantiam, & supernaturalem quoad modum. Quatenus omnem scientiam naturalem, quam succesivè poterat acquirere, habuit simul supernaturaliter à primo instanti suæ conceptionis. Hæc autem scientia cum sit naturalis quoad substantiam, habet pro objecto solum res naturales, quas poterat Christus per hanc scientiam cognoscere modo connaturali, hoc est per conversionem ad phantasmata.

Prob. Scientia isthæc est perfectio naturalis intellectus humani; ergo non est deneganda Christo, cui debentur omnes perfectiones naturales, quarum est capax natura humana. Quòd si poterat hanc scientiam successu temporis acquirere, decentius fuit, ut tota simul infunderetur supernaturaliter; ne quoad hoc Christus esset inferior Adamo, de quo dicitur Eccl. 17. *Creatus fuit plenus scientia, & intellectus*, Propterea poterat eâ ad libitum uti, non secus ac Adam.

VI. Dico 4. Fuit pariter in Christi intellectu scientia experimentalis, seu acquisita consistens in speciebus relictis à cognitionibus objectorum, à quibus perseverantibus habitualiter in memoria inclinabatur ad experimentaliter judicandum de iisdem, aut similibus objectis, Hæc autem scientia non potuit esse ab instanti conceptionis tota simul infusa, quia ejus veritas erat essentialiter connexa experientiæ successu temporis habendæ. Et de hac scientia dicitur Lucæ 2. *Iesus proficiebat sapientiâ, & atate, & gratiâ apud Deum, & homines.* Et ad Hebr. 5. *Didicit ex iis, quæ passus est, obedientiam.* Didicit enim experimentaliter; quatenus exercens actus patientiæ, & obedientiæ ab iis ipsis actibus sumpsit in se patiendi, atque obediendi experientiam, ut communissimè docent Theologi.

* *

ARTI.

ARTICULUS II.

Utrum Christus Dominus clarè, & distinctè cognoscat in Verbo omnia possibilia, aut saltem omnia futura?

VII Christo Domino competit cognitio in gradu consentaneo Filio Dei naturali; adeò ut nisi repugnet cognitio infinitè perfecta, ea illi debeatur, sicut deberetur Christo gratia accidentalis infinitè intensa, nisi ea repugnaret; quòd si repugnet visio Dei infinitè intensa, admittenda est in Christo visio finitè intensa, summa inter naturaliter possibiles, prout diximus de gratia habituali. Si verò repugnet etiam cognitio, quæ clarè, & distinctè omnia possibilia, aut saltem omnia futura attingat, examinandum: Quænam objecta clarè, & distinctè de facto Christus cognoscat; quænam verò solùm habitualiter?

VIII Dico 1. Suppositâ repugnantia infiniti Categorematici, repugnat cognitio clarè, & distinctè attingens infinita individua, necdum omnia possibilia; atque adeò Christus in hac hypothesi sicut non habet gratiam infinitè intensam, ita non cognoscit clarè, & distinctè infinita objecta, nec in Verbo per visionem beatam, nec in se ipsis per scientiam infusam. Ita Lumb. n. 1509. Amicus Platel. & communius

Prob. In hypothesi, quòd repugnet infinitum, repugnant infinitæ cognitiones v. g. claræ ut unum, quarum singulæ iungulos homines attingant; ergo à fortiori repugnabit una indivisibilis cognitio, quæ attingat clarè, & distinctè infinitos homines claritate ut unum. *Prob. conseq.* Quia ista cognitio indivisibilis contineret omnem perfectionem illarum infinitarum, & simul haberet perfectionem simplicitatis, quâ carerent illæ infinitæ cognitiones distinctæ; ergo si illæ cognitiones infinitæ repugnant, adeò ut essent, & non essent ipse Deus, & comprehensio Dei, à fortiori repugnabit ista cognitio indivisibilis attingens infinitos homines, utpote perfectior illis cognitionibus infinitis collectivè acceptis.

Confirm. Evidens est, quòd cognitio indivisibilis attingens Petrum, & Paulum claritate ut unum perfectior sit duabus cognitionibus, quarum una attingat Petrum, altera Paulum claritate ut unum; edò, quòd illa cognitio indivisibilis contineat formaliter quicquid perfectionis

est in his duabus, & simul contineat perfectionem simplicitatis, quâ carent illæ duæ distinctæ; sic perfectior est calor indivisibilis intensus ut duo, quàm duo gradus caloris intensi ut unum; ergo pariter perfectior est cognitio indivisibilis attingens infinitos homines clarè, & distinctè claritate ut unum, quàm infinitæ cognitiones claræ ut unum attingentes singulos homines; atque adeò si istæ cognitiones infinitæ deberent dicere perfectionem infinitam, & Divinam, ut proinde earum collectio repugnet, à fortiori illa cognitio indivisibilis attingens clarè, & distinctè claritate ut unum infinitos homines importare deberet perfectionem infinitam commensuratam perfectioni cognitionis Divinæ, atque adeò ipsius Dei, ut iam repugnat.

Neque dicas, quòd cognitio indivisibilis attingens infinitos homines, seu omnia possibilia claritate ut unum esset solum superioris ordinis, non verò infinita: sicut visio Dei est superioris ordinis ad infinitas cognitiones Dei ænigmaticas, & potentia supernaturalis relatè ad infinitas naturales, & substantia ignis relatè ad infinitos calores.

Nam sicut calor indivisibilis continens perfectionem caloris intensioris in infinitum, non dicitur esse superioris ordinis, sed infinitus; & eodem modo virtus naturalis indivisibilis continens perfectionem infinitarum virtutum naturalium ita pariter infinita est cognitio indivisibilis attingens infinitos homines eadem claritate, quâ attingerentur ab infinitis cognitionibus. Et ratio à priori est, quia si A continet formaliter, quidquid perfectionis est in B, & aliquid plus, implicat, quòd B sit infinitum, & A non sit infinitum. Hinc meritum Christi dicitur esse infinitum, si contineat quidquid perfectionis est in meritis infinitis; Vis sustentativa ponderum infinitorum dicitur infinita; & omnipotentia est infinita, non verò superioris ordinis ad infinitas potentias creaturarum. Quare illud solum dicitur esse superioris ordinis, & non infinitum, quod per transitum indivisibilem ad gradum superiorem est perfectius infinitis, quin formaliter contineat perfectionem infinitorum, ut est visio beata relatè ad infinitas cognitiones Dei abstractivas, quippe quæ non continet formaliter perfectionem cognitionis terminatæ ad hominem, Angelum &c. Idem dicas de cognitione confusa omnium possibilibum relatè

relatè ad infinitas cognitiones claras, & distinctas singulorum possibilium; & de substantia ignis relatè ad infinitos calores. Cum autem in casu nostro cognitio illa indivisibilis attingens infinitos homines contineat formaliter quidquid perfectionis est in cognitionibus infinitis, non debet dici superioris ordinis, sed infinitè perfecta, saltem extensivè, sicut essent illæ infinitæ cognitiones, atque adeò si istæ repugnant, etiam illa: Aliter possemus somniare possibilitatem unius Creaturæ continentis in identitate perfectionem omnium creaturarum, quæ tamen solum sit ordinis superioris ad illas.

Dices: intellectus finitus potest producere cognitiones in infinitum, quin sit infinitus; ergo cognitio finita potest etiam attingere distinctè objecta infinita.

Confirm. Cognitio attingens Deum infinitum, & infinitas ejus perfectiones, non est infinita, ergo neque cognitio attingens infinitaabilia.

Resp. Intellectum eadem tendentiâ concurrere ad cognitiones, & ab hac vel illa specie impressâ determinari ad hanc, vel illam cognitionem, unde non debet esse infinitus, ut possit producere cognitiones in infinitum: Contra verò cognitio attingens infinita continet formaliter, (imò etiam eminenter, hoc est sinè imperfectione distinctionis) perfectionem infinitarum cognitionum; ergo debet esse infinitè perfecta saltem extensivè, quæ proinde non minus repugnat, ac infinita collectio cognitionum, quarum singulæ singula objecta attingant eadem claritate.

Ad Confirm. *Dist antec.* Cognitio attingens infinitas Dei perfectiones confusè, & sub una tendentiâ, est finita, *concedo*; attingens clarè, & distinctè infinitas perfectiones sub tendentiis infinitis, continendo formaliter perfectionem infinitarum cognitionum terminatarum ad singulas Dei perfectiones, est finita, *nego antec. & consequentiam.*

IX. Dico 2. Eriam admisâ possibilitate infiniti, adhuc repugnat, essetque Dei comprehensiva, cognitio indivisibilis attingens, siue in Verbo, siue in se ipsis clarè, & distinctè omniaabilia, atque adeò quamvis competere possent Christo Domino infinitæ cognitiones, quarum singulæ singulaabilia attingant, non potest tamen ei competere cognitio indivisibilis attingens clarè omniaabilia.

Prob. Argumento, quod proponit N. P. Thyrsus *to. 1. d. 5. sect. 8.* & quo in de Angelis *disp. 4. qu. 1.* impugnavi-
mus possibilitatem speciei impressæ universalissimæ Re-
pugnat Creatura, quæ in ordine reali contineat imperfe-
ctionem omnium creaturarum perfectiorum, & perfe-
ctorum; nempe hominis, Angeli, Archangeli, &c. ergo
pariter repugnat creatura, quæ in ordine intentionali
contineat perfectionem cujuscunque cognitionis termi-
natæ ad omnes species creaturarum, ad hominem, An-
gelum, &c. Atqui hujusmodi esset cognitio indivisibilis
attingens clarè, & distinctè omnia possibilia, ergo ea re-
pugnat. Antecedens ab omnibus admittitur, aliter de-
fendi etiam posset possibilitas creaturæ continentis om-
nem perfectionem Divinam, præter aseitatem; quod
juxta nostras leges dici non potest. Minor subsumpta
constat ex dictis in prima Conclusionem. *Prima consequentia
probat*; idè repugnat creatura, quæ contineat perfe-
ctionem omnium specierum creaturarum, quia esset in-
tensivè perfectissima, atque adeò Deus; sed etiam in or-
dine intentionali cognitio continens perfectionem om-
nium cognitionum terminatarum ad omnes species cre-
aturarum, nempe ad hominem, Angelum, &c. esset in-
tensivè perfectissima secundum gradus heterogeneos,
seu dissimiles, ergo hujusmodi cognitio esset divina,
& ipsa Dei comprehensio Minor hæc patet explicatione;
sicut enim Angelus est intensivè perfectior homine se-
cundum gradus dissimiles perfectionis, ita cognitio ter-
minata ad Angelum cæteris paribus est intensivè perfe-
ctior cognitione terminatâ ad hominem, cum cognitio
specificetur à suo subiecto, ergo sicut complexum ex ho-
mine Angelo, & aliis infinitis speciebus creaturarum
perfectiorum est complexum infinitè perfectum intensi-
vè secundum gradus heterogeneos; ita complexum ex
infinitis cognitionibus terminatis ad hominem, Ange-
lum &c. est complexum cognitionum infinitè perfectum
intensivè secundum eosdem gradus heterogeneos; ergo
sicut creatura, quæ contineret in identitate omnes spe-
cies creaturarum, esset creatura infinitè perfecta intensi-
vè, ita cognitio, quæ contineret in identitate omnes spe-
cies cognitionum terminatarum ad hominem, Ange-
lum &c. esset infinitè perfecta intensivè secundum eos-
dem gradus heterogeneos, hoc est prout ipsa objecta es-
sent perfectiora, & perfectiora in infinitum.

Dices:

Dices: Ista cognitio indivisibilis terminata ad omnes species creaturarum, quamvis esset infinite perfecta intensivè secundum gradus heterogeneos modo explicato, attingeret tamen singulas species creaturarum claritate finitâ, essetque v. gr. intensa ut unum, ergo secundum gradus homogeneos claritatis posset intensivè crescere, & esse clarior in infinitum, ergo non esset cognitio divina, & comprehensio Dei, sed solum esset superioris ordinis ad infinitas cognitiones creatas.

Respond. primò per instantiam: creatura continens perfectionem omnium specierum creaturarum, quamvis esset infinite perfecta intensivè, esset tamen finitè perfecta extensivè, quatenus posset numericè multiplicari, & sic extensivè crescere, ergo huiusmodi creatura non esset Deus, nec repugnat, sed esset superioris ordinis ad singulas creaturas, quod nemo dixerit.

Resp. secundò directè, quòd in utroque casu utraque pars contradictionis sequeretur: creatura enim continens perfectionem omnium creaturarum, quia non posset intensivè crescere, idèd posset, & non posset crescere extensivè, ac numericè multiplicari; ergo pariter cognitio attingens omnes species creaturarum, quia esset intensivè perfecta infinite secundum gradus heterogeneos, idèd posset & non posset crescere secundum gradus homogeneos claritatis, atque adeò esset, & non esset Dei comprehensio.

Ratio à priori in utroque casu est, quia implicat A esse infinitum in una ratione, & non esse simpliciter, & in omni ratione infinitum, atque adeò Deus, si enim habet perfectionem infinitam in aliqua ratione, habet infinitum de ente, atque adeò in ratione entis est infinitum. Quòd si hæc maxima claudicaret, non posset impugnari possibilitas creaturæ continentis perfectionem omnium creaturarum, quæ solum intensivè esset infinite perfecta, non verò extensivè, utpote numericè multiplicabilis.

Confirm. Conclusio, & maxima adducta, quia creatura, quæ in ordine reali est infinite perfecta, quatenus continet perfectionem omnium specierum creaturarum, in omnium sententia deberet etiam esse infinite perfecta in ordine intentionali, hoc est deberet esse comprehensio Dei, eò quòd deberet esse ipse Deus, ergo pariter creaturâ, quæ in ordine intentionali est infinite

perfecta secundum gradus heterogeneos, pro ut explicavimus (quatenus continet perfectionem cognitionum terminatarum ad omnes species creaturarum) deberet etiam esse infinite perfecta in ordine reali, seu continere perfectionem omnium creaturarum, atque adeò esset, & non esset Deus, ac Dei comprehensio, quæ consequentia sequitur ex illa maxima.

Confirm secundò ex celebri Augustini effato : *In iis quæ non mole magna sunt, hoc est majus esse, quod est melius esse, quod est dicere*, eodem modo discurrendum esse in quantitate molis, ac in quantitate virtutis, seu perfectionis, atqui quantitas molis, quæ in una ratione est infinita, putà in longitudine, est æquivalenter infinita in omni ratione quantitatis molis, atque adeò inmensa, sicut multitudo infinita in una ratione quantitatis discretæ, putà in unitatibus, est infinita etiam in binariis &c. ergo quantitas virtutis, seu perfectionis in una ratione infinita est æquivalenter infinita in omni ratione quantitatis virtutis, atque adeò Deus.

X. Ex quibus infertur quòd etiam data possibilitate infiniti, adhuc repugnat una cognitio indivisibilis attingens clare, & distinctè infinita individua, putà infinitos homines; ratio est, quia hæc etiam cognitio esset infinita in una ratione, nempe extensive, ergo deberet esse in omni ratione infinite perfecta. Aliter recurrit, quòd non posset impugnari creatura continens in identitate omnes species creaturarum. His adde, quòd si posset dari cognitio solum extensive, & non intensive perfectissima, non posset impugnari possibilitas cognitionis, quæ solum esset intensive, & non extensive perfectissima, nec non possibilitas alterius cognitionis, quæ simul esset intensive, & extensive perfectissima, quòd si admittatur, non posset deinde impugnari possibilitas intellectus creati infinite perfecti, & distincti à cognitione, sicut vice versà ea cognitio est infinite perfecta, & ab intellectu distinguitur, quæ tamen nemo dixerit.

XI. Dico ultimo cum D. Th. 3. p. 7. 10. a. 3. Scot. Gabr. Bonav. Vasq. *disp. 50. q. 10.* contra Duran. Christum Dominum de facto videre clare, & distinctè quæcunque futura usque ad diem judicii; Cognitiones verò proprias, & cogitationes creaturarum rationalium per totam æternitatem futuras utpote infinitas, nec non omnia possibilia non videt clare, & distinctè actu, sed ha-

habitu: quòd explicatur à Scoto per hoc, quòd Christus dominus in Verbo tamquam in speculo voluntario possit ad arbitrium videre clarè, & distinctè quamcunque collectionem finitam quarumcunque creaturarum, exigendo ratione unionis hypostaticæ, quòd Deus concurrat ad manifestanda sibi quæcunque objecta maluerit cognoscere, in quacunque collectione finita.

Prob. Prima pars, quòd scilicet omnia futura usque ad diem iudicii clarè, & distinctè cognoscat. Ex Concilio enim Senonensi apud Lumb. Beati vident in Verbo omnia, quæ pertinent ad eorum statum, ergo Christus cum sit caput electorum, & Primogenitus ante omnem creaturam, Iudex vivorum, & mortuorum, debet distinctè cognoscere quæ spectant ad electos, & reprobos usque ad diem iudicii. Deinde quòd reliqua videat habitu, non actu, patet, quia ex una parte repugnat cognitio clara, & distincta infinitorum; Ex alia parte exigit Christus Dominus cognitionem consonam unioni hypostaticæ, & filio Dei naturali, ergo in actu primo cognoscere debet omnia cognoscibilia, ità ut ad arbitrium cognoscat quæcunque maluerit in quacunque collectione finita.

Q U Æ S T I O IV.

De Christi domini Sacerdotio, Adoratione, Passionibus, & quodnam sit ejus dominium in temporalia?

I. PRO temporis angustiis plurimas Christi domini proprietates primoribus labris delibabimus. Quòd attinet ad Sacerdotium, de fide est, Christum Sacerdotem fuisse, cum illi tribuat Apostolus illud Psal. *Tu es Sacerdos in æternum*; & ratio est, quia Sacerdotis est Sacrificium offerre; Christus autem duplex obtulit Sacrificium, alterum cruentum in Ara Crucis, alterum incruentum in Eucharistia. Non requiritur ad Sacerdotium, quòd à Sacerdote occidatur victima, sed solum quòd ea offeratur nomine totius communitatis ab habente ad id specialem deputationem. Hinc fit, martyres se ipsos ad mortem offerentes non esse Sacerdotes: sicut fuit Christus Dominus, quia scilicet Martyres non sunt deputati, ut se ipsos offerant in verum Sacrificium, pro

pro peccatis populi, tamquam mediatores inter Deum, & populum, ut fuit Christus Dominus. Hujus autem Sacerdotium est sempiternum, juxta illud Apost. *Ea quod maneat in æternum, sempiternum habet Sacerdotium.* Tum quia Ministerio Sacerdotum adhuc pergit sacrificare, & se ipsum offerre. Ex Trident. *sess. 22 c. 2.* pro ut se obtulit in Cruce; & ex phrasi Scripturæ dicitur sempiternum, quodcunque durat usque ad finem mundi, ut notat Platel. *n. 401.* Tum etiam quia in æternum manet in Christo potestas Sacerdotalis, quamvis ea non sit amplius usus post diem judicii: tum demum quia in æternum perdurat effectus Sacrificii ab eo oblatis, nempe salus Beatorum.

II. Circa Christi orationem, Certum est Christum in hac vita orasse: dicitur enim Luc. 6. *Exiit in montem orare. Et erat pernoctans in oratione, &c.* Quamvis autem per scientiam infusam Christus cognosceret futura, non proinde ejus oratio erat imprudens; Tum quia dependenter ab oratione Christi erat futura v. gr. poenitentia Petri; Tum etiam quia poterat ad orationem non dirigere à scientia futurorum, sicut ad actus liberos non dirigebatur ab eorum scientia. Præterea Communius Theol. docent quod etiam in Cœlo Christus oret pro nobis; præsertim quia Hebr. 6. dicitur. *Semper vivens ad interpellandum pro nobis.* & Jo. 2. *Advocatum habemus apud Patrem JESUM Christum justum:* & ratio est, quia etiam in Cœlo est Pontifex, mediator, Caput, & Advocatus noster; atqui ad horum munus spectat orare; ergo.

Quomodo autem in Cœlo oret, propriè, & expressè, an verò impropriè, seu interpretativè, repræsentando scilicet suam passionem, & merita? Variant DD. apud Becan. Probabilius est, quod oret propriè, quia non est indecens, Christum orare, cum in terris propriè oraverit, ergo quando ascensus in Cœlum dixit, *Ego rogabo Patrem &c.* intelligendum est de oratione propriè dicta, sic enim magis commendatur Christi charitas erga homines. Neque obstat, quod non oret, qui in sua potestate habet omnia, ut Christus, qui dixit: *Data est mihi omnis potestas in cœlo, & in terra.* Nam quamvis Christus possit ratione talis potestatis autoritate propriâ applicare nobis sua merita, aut immediatè conferre dona, quæ maluerit, congruum tamen fuit, quod Patrem ora-

paret, ut contentus sit, quod propria merita nobis applicentur, & vi meritorum dona conferantur. Ne tamen videamur humanitati Christi hanc potestatem, aut Christo divinitatem cum Hæreticis denegare, non dicimus, Christe ora pro nobis, sed dicimus, Christe miserere nobis.

III. Quod attinet ad Christi adorationem. Quæritur quomodo Christus; ejusque humanitas adoranda sit?

Resp. De fide esse, Christum adorandum esse adoratione patriæ, hoc est debitâ soli Deo, quod constat tum ex Ephesino Can 4. Ubi damnatur qui dixerit, hominem assumptum coadorari debere cum Verbo tamquam alterum cum altero, & non potius una adoratione honorificari Emmanuelem, secundum quod Verbum caro factum est: Tum etiam ratione, quia Christus est Deus, ego competit illi adoratio patriæ. Unde dicitur, *In nomine ꝑ ESU omne genu flectatur cælestium, terrestrium, & infernorum.*

Humanitas autem Christi, quamvis non sit Deus, adhuc adoranda est adoratione patriæ, quando adoratur ut conjuncta cum Verbo, ex VII. Synodo, & ex PP. apud Suar. & Vasq. Ratio est, quia constituit unum, & idem esse Personale, ad quod indivisibiliter adoratio dirigitur, ac proinde una cum Verbo partialiter terminat adorationem patriæ, quippè quæ Verbo competit tamquam objecto primario, humanitati verò tamquam secundario, & concomitanter ad primum, propter increatam excellentiam ipsi communicatam per unionem hypostaticam. Hinc multi cum Epiphanio docent, humanitatem coadorari potius, quam adorari Cultu patriæ: Quod si humanitas Christi mentaliter à Verbo præscindatur, & consideretur cum gratia habituali in summo gradu, tunc adorari potest adoratione hyperdulæ, ut docet hic D. Tho. quia sicut Sanctis Dei servis ob propriam excellentiam, & ob gratiam habitualement, debetur adoratio dulæ; ita humanitati assumptæ, & B. Virgini pro ut habentibus gratiam habitualement in gradu valde excellenti debetur Adoratio Hyperdulæ. In praxi tamen non est præscindenda mentaliter Humanitas Christi à Verbo, ut cultus hyperdulæ ei conferatur, ne videamur convenire cum Nestorianis damnatis à Conciliis, & PP. qui dum duas Adorationes Christo exhi-

exhi-

exhibebant, hyperdulæ, ut homini, & dulæ, ut Deo, duas Personas in Christo somniabant.

IV. Adorantur etiam adoratione latriæ Imagines, & simulachra Christi Domini, ut definitum est in VII. Synod. generali contra Iconoclastas, & in Tridentino sess 25. Idemque dicas de Cruce, quæ habetur tamquam Crucifixi imago. Tunc enim in istorum adoratione haberetur idololatria, quando lignum, & Picturæ adorarentur ratione sui, credendo iis inesse aliquam divinitatem, non verò si adorentur simul cum Prototypo per illa repræsentato, adorando primariò & absolutè prototypum, secundario, & respectivè imaginem. Quare quando adoratio terminatur ad Christi imaginem, tunc imago non est totalis terminus adorationis; Neque est mera conditio requirita, ut excitemur ad Christum adorandum, ut putant Nonnulli; cum ex Conciliis Imagines ipsæ sint adorandæ. Unde etiam rejicitur sententia Vasq. quòd scilicet adoratio externa terminetur ad imaginem, interna ad Christum, utrumque enim simul adoratur, Christus quidem adoratione absolutâ, tamquam Deus, imago verò adoratione respectivâ, hoc est per respectum ad exemplar, quòd repræsentat: Sicuti quando quis præstat Omagium legato Regis, agnoscit quidem se Vassallum solius Regis, honorem tamen præstat legato simul, & Regi per modum unius; Regi absolutè, legato respectivè.

Omnia etiam Instrumenta Passionis adorantur adoratione latriæ, non quatenus dolorem, & ignominiam Christo attulerunt, sed quatenus sunt signa amoris Christi in nos & pignora triumphi de peccato, ac morte reportati. Quælibet etiam Crux adoratur eadem adoratione latriæ, non verò quælibet Lancea, spina, clavus: quia sola Crux non habet amplius alium usum profanum, post edictum Constantini vetantis in posterum reos crucifigi; & ideò censetur velut Crucifixi imago. Adoranda demum sunt latria quæcunque Christum tetigerunt, quia ratione contactus sacri faciunt unum moraliter cum Christo, non secus ac ejus imagines. Non expedit tamen, adoratione latriæ B. Virginem, quæ Christum tetigit, adorare, ne videamur illam reputare Deam, neque terram, quam tetigit Christus, aut Ašinam, aut alia hujusmodi utpote ad humanos etiam usus deputata, neque manum percussoris, facit enim unum cum illo Sacrilego.

V. Præterea quod attinet ad Christi Passiones, seu motus appetitus sensitivi; Certum est ex Damasc. Christum omnes naturales, & innoxias Passiones nostras assumpsisse, quia secundum naturam humanam fuit in omnibus similis nobis, excepto peccato; unde dicitur Hebr. 4. *Tentatum per omnia pro similitudine absque peccato.* Passiones autem animi in Christo vel deserviebant ad materiam meriti, vel ad comprobendam naturam assumptam. In nobis tamen excitantur nobis invitis; sed in Christo ipso volente: unde sequebantur, non ante vertebant usum rationis, & ideo, ut docet Hieron. in cap. 26. Matth. motus appetitus sensitivi in Christo dicebantur esse Propassiones potius, quam Passiones.

Hinc fit, Fomitem peccati in actu secundo, (nempe ipsos actus inordinatos, & rationi contrarios appetitus sensitivi) in Christo nunquam fuisse: si enim huiusmodi motus inordinati non fuerunt in Adamo in statu innocentiae, nec in B. Virgine, nec sunt in Beatis, à fortiori nec in Christo Domino. Fomes verò peccati in actu primo (hoc est ipsa inclinatio appetitus sensitivi in bonum delectabile contrarium rationi, seu dispositio ad actus appetitus sensitivi inordinatos, & contra rationem) neque fuit in Christo expeditus, sicut nec in Adamo in statu Innocentiae, nec in B. V., quia virtutes morales in gradu perfectissimo impediunt inclinationem in bonum delectabile dissonum rationi. Quinimò Fomes peccati in actu primo neque dicitur fuisse in Christo, & B. Virgine ligatus per externam Dei assistentiam; (ut de nonnullis Sanctis legitur, in quibus per specialem Dei protectionem non excitabantur motus inordinati) sed dicitur fuisse omnino extinctus, ut notat Gonet. quia unioni hypostaticæ, & maternitati Dei debebatur talis Dei assistentia, ut passiones non possent erumpere, nisi ad præscriptum Sanctissimæ voluntatis Christi, & Deiparæ.

Neque dicas, Christum fuisse in omnibus tentatum ad nostrum Exemplum, ergo etiam per motus Concupiscentiæ, & Carnis, seu fomitis. Nam non decuit, Christum tentari per huiusmodi motus inordinatos, qui sæpè cum aliqua culpa conjunguntur; Victoria in iis est occulta, unde non debuit Christus dare nobis hoc exemplum superandi tentationes carnis, cum sufficienter ad id impulerit multis aliis modis sibi consonis.

VI. Illud

VI. Illud facessit negotium, quomodo potuerit Christus habere dolorem, tristitiam, metum, iram, admirationem &c. Dicendum tamen, dolorem, & tristitiam potuisse in Christo cum Beatitudine essentiali miraculose componi : ità ut beatitudo versaretur circa objectum increatum, dolor, & tristitia circa objecta creata. Idem dicas de timore ; Ex Evangelio enim *Capit parvere, & cadere*. Potest autem dari timor etiam de malo certè futuro ; propterea verè timuit, non solum timore sensibili propriam mortem certò futuram, sed etiam timore filiali Dei offensas ab hominibus patrandas. Exercuit etiam iram quando fecit flagellum de funiculis, juxta illud : *Zelus Domus tua comedit me*. Potest enim ira citra culpam, immo meritorie exerceri, juxta illud Apostoli ad Eph. 4. *Ira scimini, & nolite peccare*. Admirationem pariter exercuit videns fidem Centurionis, quamvis enim nulla res poterat esse Christo inopinata, eò quòd omnia sciret per scientiam beatam, & infusam, non tamen omnia cognoscebat per scientiam acquisitam, & idè ex defectu scientiæ acquisitæ poterat affectum admirationis exercere saltem in priori ad scientiam beatam, & infusam de eodem objecto.

VII. Dubitatur ulterius, An Christo quà homini competat potestas directà in temporalia? quæ in re varii varia. Dicendum tamen cum Lumb. Munies. & aliis, unioni hypostaticæ competere hujusmodi proprietatem, non secus ac quælibet alia præferens perfectionem, & Christo non repugnans. Hinc re vera Christus etiam quà homo fuit Rex Regum, & dominus dominantium, cum de se dixerit, *Data est mihi omnis potestas in cælo, & in terra* : Noluit tamen regiam hanc potestatem exercere relatè ad temporalia, & in hoc sensu dixit : *Regnum meum non est de hoc mundo* ; Eò quòd ad humilitatis exemplum non venerit ministrari, sed ministrare.

Neque obstat primò, quòd non competat vicario Christi Domini potestas directà in temporalia, sed solum indirecta, pro ut scilicet expedit eà uti in bonum animarum. Nam sicut Christo Domino competit ratione unionis hypostaticæ potestas patrandi miracula, instituendi Sacramenta, quam tamen noluit Pontifici suo vicario communicare, ità competit potestas directà in tem-

temporalia, quam nec voluit in terris exercere, nec suo Vicario communicare.

Neque obstat secundò, quòd daretur dominium in solidum in Christo, & Aliis dominis temporalibus. Nam in dominis Creatis dominium directum in temporalia est plenum tantum positivè; in Christo verò est plenum positivè simul & exclusivè relatè ad Dominos Creatos, quatenus domini temporales creati possunt uti suis rebus ad quosvis usus non tamen invito Christo; Christus verò potest uti iisdem rebus ad omnes usus etiam invitis dominis temporalibus, & eodem modo Christus ut homo habet dominium plenum tantum positivè, non verò exclusivè relatè ad Deum, quia potest uti rebus ad libitum, non tamen Deo invito, ut explicavimus in de Justitia, & Jure.

VIII. Dubitatur etiam, An Christus inquantum homo dici possit Dei servus? Ad quod diximus *disp. 2. q. 2. n. 3.* quòd cum Christus habeat jus ad hæreditatem, & communicet in bonis, ac honore cum Deo, non possit dici Dei servus strictè, sed solum latè, quatenus divinæ subest potestati, ac Dominationi.

IX. Dubitatur demum, Num Christo competat non solum moralis, & meritoria, sed etiam physica potestas relatè ad patranda miracula, & ad gratiam nobis causandam, aliosque effectus supernaturales? Ad quod dicendum cum Suar. Gonet. *disp. 19.* & Aliis contra Vasq. Utramque illi potestatem competere. Christo enim utpote Filio Dei naturali competit quodcumque prædicatum præseferens perfectionem ipsi non repugnans, sed huiusmodi est posse, etiam physicè, patrare miracula, ergo non solum potest ea causare moraliter, seu meritorie, sed etiam per physicum influxum. Aliter quomodo dixisset Matth. ultimo, *Data est mihi omnis potestas*, &c. Hinc Luc. 6. dicitur: *Virtus de illo exibat, & sanabat omnes*, & Lucæ 7. Post curatam Mulierem emorrhosiam, Christus dixit, *Novi, virtutem de me exisse*; Quæ intelligenda sunt de virtute, seu influxu physico, quia verba scripturæ sumenda sunt in sensu proprio, si nihil obstat, virtus autem moralis non nisi improprie, ac valde metaphoricè dicitur exire de corpore.

Confirm. Ex Ephesin. 1. Can. 11. ubi dicitur *Caro Christi esse vivificatrix propter unionem cum Verbo, quod vitam habet divinam*: Atqui non est vivificatrix Caro Christi

ratione meriti, quod soli animæ competit, ergo rationis influxus Physici: propterea notat Cyrill. *lib. 4. in Joan. c. 14.* quod Christus in Mortuis exsuscitandis non solum usus est Verbo, & imperio, sed etiam adhibendo carnem suam cooperatricem; sic *Luca 7.* in resurrectione unici filii viduæ Naim *Accessit, & tetigit loculum;* Ut nimirum ostenderet, inquit Cyrillus, *Carnem quoque suam, quoniam Verbo conjuncta erat, vivificam esse,* & Euthym. addit *Quemadmodum ferrum ignitum habet ignis operationes, ita Sancta Christi Caro divinitati unita, qua divinitatis sunt, operatur.*

X. Ex quibus sequitur, ut notat Gonet. ex D. Tho. hic *q. 8. ar. 1.* Christi humanitatem, non solum dum erat in terris, sed etiam nunc existentem in Cœlis causare Physicè gratiam, miracula, & effectus omnes supernaturales; non secus ac sol in Cœlo existens causat metalla in aurifodinis. Ratio est, quia ex Concil. *Eph. can. 9.* & PP. Humanitas Christi etiam in Cœlis existens est instrumentum divinitatis relatè ad effectus supernaturales, atqui non est instrumentum morale, ergo physicum. *Probat minor,* quia Deus non est causa moralis, sed physica gratiæ, & miraculorum, ergo Christi humanitas, quæ est Dei instrumentum, est pariter instrumentum physicum, non morale; Cum debeat causa instrumentalis principali proportionari. Sed hac de re recurret sermo in de Sacramentis, ubi Deo dante ostendemus, sacramenta tamquam Christi Domini instrumenta non solum moraliter, sed etiam physicè gratiam causare. Sit itaque hic hujus annui pensus;

(*Sed oh ubi Æternitatis!*)


F I N I S.

L. D. & B. V. sine labe concepta.

T H E.



THESES PROPUGNATÆ EX HOC TRACTATU DE DIVINI VERBI INCARNATIONE.

I.  Anti mysterii possibilitas creati ingenii aciem obtundit, adeò ut naturali lumine positivè demonstrari non possit, neque à priori, aut quasi à priori, neque à posteriori. Poterit tamen negativè ostendi, dilucidè evacuando quæcumque adversùs illam impiè ad hæreticis ob-
jectantur. Unio hypostatica Verbum non immutat intrinsecè, quamvis illi de novo adveniat, præstetque effectus formales Unionis intrinsecæ, compingendo Unum per se ex extremis unitis, exigendo mutuam eorum præsentialitatem, & trahendo idomatum communicationem; propterea appellanda est cum Concilio Toletano XI. Unio quædam singularis, quippe quæ Verbo terminativè tantùm est intrinseca, non subjectivè, atque adeò inter intrinsecam, & extrinsecam, unionem mediat, particeps effectuum utriusque.

II Incarnatio fuit Deo summè conveniens, necnon Universo, cui maximam contulit venustatem, ac ipsi humanæ naturæ, quam ad solium divinitatis eve-
xit. Neque metaphysicam, neque physicam in Deo necessitatem agnoscimus ad illam ponendam, aut simpliciter, aut ex suppositione Orbis conditi, aut ex suppositione peccati. Agnoscimus solùm in Deo neces-

fitatem moralem ad hoc mysterium, & universim ad Optimum ponendum, defecant tamen ab omni imperfectione, & à quavis difficultate ad ponendum oppositum. Propterea necessitas isthæc quoad modum verius est metaphorica, non secus ac metaphoricè de Deo dicitur poenitere, cogi, irasci, quoad effectum verò non est metaphorica, siquidem universim Deus perinde operatur, ac si verè, & propriè ad optimum necessitaretur, ut proinde communissimus sit Scholasticorum, & Patrum sensus, Deum semper ad extra Optimum posuisse, & ipsum Francofordiense Concilium doceat, Deum semper velle, quæ meliora sunt.

III. Radix in Deo inclinationis ad Optimum est ipsa essentia Bonitatis, quæ ad sui diffusionem necessitatur moraliter, non ut hauriat, sed ut communicet aliis perfectiones suas, atque adeò non fundatur in defectu, sed in superabundantia perfectionis, propterea fundat iudicium prudentissimum, & moraliter certum de Optimo semper ponendo, redditque inopinabile oppositum. Hinc illa communis persuasio indita à natura, quòd plerumque Deus causarum secundarum exigentias secundet; quòd pronus sit ad preces exaudiendas, quòd prænna, ac supplicia debita largiatur, quòd Universum condiderit numeris omnibus absolutum; ut proinde jure merito dicamus, in eo de facto omnia genera, & gradus entium contineri, & relatè ad ea, in quibus non est abire in infinitum, dari quod est præstantius, relatè verò ad species, & individua dari Optimum ordinis, per hoc, quòd omnia in numero, pondere, & mensura sint disposita. Facit itaque Deus semper Optimum, non solum quia sapientissimè semper, ac honestissimè operatur, adhibendo media congrua ad finem efficaciter intentum manifestandi gloriam suam, sed etiam quia præstituit sibi finem præstantissimum manifestandi gloriam suam optimo modo.

IV. Ad condignè satisfaciendum pro mortali Incarnatio fuit simpliciter necessaria. Neque enim creatura quantumvis affecta gratiâ sanctificante condignam Deo satisfactionem exhibere potest pro offensa, etiam si mortale supponatur finitæ gravitatis, idque ob ordinis diversitatem inter offensam divinam, & satisfactionem creatam. Quinimo neque potest justus condignè mereri peccatori gratiam peccati remissionem, potest

ta-

tamen eidem mereri gratiam habitualementer alterius ordinis compossibilem cum mortali, quæ divinam naturam participaret solum per hoc, quod esset natura supernaturalis, & prima radix habituum, & actuum supernaturalium, quin simul esset formaliter deletiva peccati, quam supponimus non repugnare.

V. Absolutè tamen loquendo dicimus, Mortale in linea injuriæ esse simpliciter gravitatis infinitæ, & pelagus interminabile, atque adeò ex hoc etiam capite ad condignam satisfactionem pro peccato exhibendam, & ad meritum condignum gratiæ remissivæ peccati necessariam fuisse Incarnationem. Hanc mortalis infinitudinem plenè evincit à priori Infinita Dei Majestas, quam affectivè peccator deprimit; plenius verò illam à posteriori suadet reatus exhibendi satisfactionem etiam cruciativam, ac luendi poenam syncategorematicè in intentione, ac duratione infinitam. Hoc tamen non impedit, quo minus peccata sint inæqualia, tum in ratione malitiæ, tum in ratione injuriæ ortæ ex modo, quo Deus contemnitur, quamvis æqualia sint in ratione injuriæ ortæ ex dignitate personæ offensæ.

VI. Christi Domini pariter meritum, ac satisfactio fuit valoris infiniti in ordine ad merendum, & satisfaciendum, quamvis enim in actu secundo non omne, sed limitatum præmium condignè meruerit ob limitati præmii promissionem: & pro culpis hominum finitis condignè satisfecerit, quatenus pro finita culparum multitudine, earum scilicet, quæ usque ad diem judicii futuræ sunt, oblata fuit Christi mors, & acceptata, nihilominus quodcumque præmium possibile posset condignè mereri, si illud promitteretur, & pro culpis omnibus possibilibus condignè satisfacere, si pro illis offerretur, & acceptaretur.

VII. Infinita culpæ gravitas non obstat, quominus quælibet Christi satisfactio superabundet ad omnes omnino offensas, etiam ad infinita Christicidia, & si fuerint peccata ut coccinum, quasi nix dealbari possint Christi meritis, & satisfactionibus. Quamvis autem modica Sanguinis Christi gutta, ut habet Clemens VI. ob unionem ad Verbum pro redemptione humani generis suffecisset, integra tamen passio, & mors ad hunc effectum oblata, & acceptata fuit, & quidem pro omni-

bus omninò hominibus, etiam pro reprobis , ut fides Catholica docet contra Jansenium , esto pro electis oblata, & acceptata fuerit quoad efficaciam, pro reprobis verò tantum quoad sufficientiam.

VIII. Suppositâ possibilitate justitiæ pressè dictæ inter Deum , & Creaturam , nihil est causæ, cur negetur, Christi satisfactionem fuisse de toto rigore justitiæ ; Interfuit quippe sufficiens iurium alteritas ob dualitatem voluntatum in unitate personæ, necnon æqualitas ad actum strictæ justitiæ requisita. Porro satisfactio non fundabatur in gratia creditoris debitum ullatenus remittentis ; neque poterat ab offenso repudiari, posito consensu, quòd per Christum Vadem , ac fidejussorem compensaretur offensa, fuit etiam ea satisfactio sufficienter de bonis debitoris , quamvis simul esset sub Dominio essentiali Dei offenti. Neque fuit ex aliis debitis, cum liberè mortuus sit, oblatus, quia ipse voluit. Denique Deus etiam post exhibitas à Christo satisfactiones ex justitia tenebatur culpas remittere , prout ad id se obligaverat contractu oneroso.

IX. Christus Dominus fuit essentialiter impeccabilis in sensu composito ; trahit quippe Unio hypostatica sanctitatem substantialem in humanitatem , illamque reddit infinitè sanctam , & summè elongatam ab immunditiè, etiam levissima, ut proinde independentè à Visione beatifica competat Christo Domino tanquam Dei Filio naturali summa impeccabilitas , nec solum actuale peccatum est inconjungibile cum unione hypostatica, sed etiam habituale, adeò ut nequeat humanitas, quæ peccavit, assumi, & remanere odibilis.

X. Hinc fit , Christum Dominum incapacem fuisse præcepti pressè dicti obligantis in conscientia , & comminantis indignationem , ac vindictam in hypothese transgressionis, quare nec à præcepto positivo de morte subeunda , nec à præceptis naturalibus potuit sic obligari ; sed præceptis naturalibus obtemperabat necessariò citra libertatem , ac meritum quoad substantiam rei præceptam , quatenus à divina voluntate dirigebatur ad ea præstanda, quæ ex dictamine naturaliter debita. Potuit quidem Christus simili præcepto positivo minùs rigoroso ad mortem acceptandam necessitari, adeò ut nullatenus posset illam declinare ; in quo casu mereri non poterat in acceptatione

tione

tione mortis quoad substantiam præceptam , etiam si mereri potuisset quoad circumstantias non præceptas. De facto tamen Præceptum Mortis fuit instar Præcepti pœnalis, seu Consilii onerosi, quod citra culpam, aut defectum moralem poterat liberè præterire , ea tamen lege, ut si renuisset mori, non fuisset Generis humani Redemptor , ut de facto non fuit Redemptor Angelorum; caruissetque glorificatione Corporis , & Nominis exaltatione ut collata ex merito , non tamen ut collata ex titulo naturalis exigentiæ : propterea non fuit Præceptum comminans pœnam , sed indicens tantum carentiam Boni indebiti in hypothesi renutus. Universim in Christo Domino fuit libertas ad actus inæqualis perfectionis, & laudabilitas tam intra eandem speciem, quàm in speciebus diversis ; adeò ut posset citra ullam imperfectionem moralem, tum positivam , tum negativam strictè dictam actum minus perfectum, aut intentum elicere præ perfectiori, & intensiori.

XI. Humanitas assumpta, quatenus videns Deum , peccare divinitus potest in sensu diviso , peccato tum impeditivo, tum destructivo visionis Dei ; adeò ut possit cum visione componi Potentia ad peccandum , non secus ac de facto componi potest cum Gratia sanctificante, ut proinde Justus peccare possit peccato tam impeditivo , quàm destructivo Gratiae. Eodem modo Humanitas assumpta dum est unita Verbo specificativè accepta, divinitus potest peccare peccato saltem impeditivo, si minus destructivo unionis hypostaticæ , non tamen connaturaliter , quippe quæ nequit connaturaliter licet possit divinitus , in priori ad subsistentiam operari, ut hic supponimus : Propterea sicut visio Dei, ita etiam unio hypostatica componi potest cum potentia ad peccandum in sensu diviso , adeò ut si Potentia isthæc peccandi Humanitatis assumptæ in peccatum prodiret ; tunc nullatenus dici posset , Christus peccare , sed Humanitas ; quæ sicut potuit ante assumptionem peccare ; ita peccare potest in priori natura ad assumptionem in sensu diviso. Licet admittamus possibilem Humanitatem assumptam divinitus Peccabilem in sensu diviso , pro quando scilicet , peccaret , non esset Christus , negamus tamen , possibilem esse Christum peccabilem etiam in sensu diviso , quatenus nequit per operationes Christi , seu hujus suppositi

proprias se dividere Humanitas ab unione hypostatica. Ex eo autem quod tam Humanitas assumpta, quam Justus peccare possint in sensu diviso, non fit, quominus longè præstet Impeccabilitas Humanitatis assumptæ ; tum quia non potest hæc peccare in sensu diviso connaturaliter, ut potest Justus, tum etiam quia ne venialiter quidem peccare potest Humanitas in sensu composito assumptionis, quod tamen potest Julius in sensu composito gratiæ, tum demum quia peccatum nequit tribui divino supposito Humanitatis assumptæ ; potest verò tribui supposito habentis gratiam.

XII. In hypothese præcepti pressè dicti Christo impositi de morte subeunda ad Redemptionem Generis Humani, non videtur aptè conciliari ejus Impeccabilitas cum Libertate ad meritum obedientiæ requisita per hoc, quod potuerit Christus mortem non acceptare in sensu diviso à præcepto ; Neque per hoc quod Præceptum fuerit Voluntati extrinsecum ; Neque per hoc, quod unio hypostatica fuerit principium remotum exigens infruabiliter auxilia semper efficacia, & Christus fuerit liber ad mortem non acceptandam spectato tantum principio proximo, non verò spectatis omnibus. Rejicimus etiam viam ea conciliandi per hoc, quod Christus solum fuerit liber ad circumstantias non præceptas, non verò ad substantiam mortis, quam omnino declinare non poterat : Necnon viam admittentium Christi Libertatem solum relatè ad non acceptandum Præceptum, aut relatè ad petendam dispensationem.

XIII. Censemus tamen, optimè coherere Christi Impeccabilitatem cum libertate in actu obedientiæ, tam in hypothese, quod de potentia extraordinaria verum, ac pressè dictum præceptum fuisset Impositum Humanitati assumptæ specificativè acceptæ, quam in hypothese, quod fuerit impositum Christo Domino præceptum minus rigorosum, seu Mandatum instar consilii onerosi. In prima hypothese coheret Impeccabilitas Christi cum libertate Humanitatis assumptæ ad præceptum transgrediendum, eò quod possit Humanitas assumpta specificativè accepta divinitus peccare in sensu diviso, peccato saltem impeditivo, si minus destructivo unionis hypostaticæ, ac Visionis Dei, proinde poterat juxta hanc viam mereri etiam per observantiam præcepto-

ceptorum naturalium ; neque enim obstat ad meritum condignum, quòd Forma dignificans sit in posteriori ad actum meritorium, quod hic supponitur. In secunda verò hypothesi cohæret pariter Christi Impeccabilitas cum libertate ad non acceptandam mortem præceptam, eò, quòd poterat citra culpam, & citra quamcunque imperfectionem Mandatum illud præterire. In præsentis providentia juxta secundam hanc viam concilianda est Impeccabilitas cum Libertate : cum non constet de miraculo requisito, ut posset juxta primam viam Humanitas assumpta operari in priori ad subsistentiam, & unionem hypostaticam.

XIV. Adamo non peccante, adhuc Verbum fuisset incarnatum ex vi præsentis decreti, cujus motivum fuit & Christi Domini Excellentia, & humanæ naturæ exaltatio, ejusdémque Redemptio ex suppositione peccati. Etiam dato, quòd sola generis humani Redemptio fuerit motivum adæquatum præsentis decreti, adhuc dicendum, quòd Adamo non peccante incarnatus fuisset Deus ex vi alterius decreti, quod in ea hypothesi haberetur. Incarnatio de facto fuit in carne passibili ad redimendos homines tam ab originali, quàm à culpis actualibus.

XV. Deus unico, & simplicissimo decreto permisit Adæ peccatum, decrevit Incarnationem, & totum negotium Redemptionis humanæ citra multiplicitem signorum, non secus ac omnia contingentia unico, ac simplicissimo actu Deus cognoscit citra ullam prioritatem, ac posterioritatem in ipso actu, cum sola prioritate, & posterioritate in objectis. Hinc dicimus, Deum in posteriori ad scientiam mediam, non expectatâ scientiâ visionis de peccato Adæ absolute futuro, de facto Incarnationem prædefinivisse ut redemptivam, conferendo Adæ auxilium inefficax, non quâ inefficax, sed eo animo ut si prævidisset efficax, illud ipsum esset daturus, at non prædefinendo simul Incarnationem in remedium peccati. In priori tamen ad scientiam mediam Incarnationem ut redemptivam prædefinire non potest citra amorem culpæ.

XVI. In præsentis providentia Christi Humanitas non meruit unionem cum Verbo per operationes aut tempore, aut naturâ illam præcedentes, quippe quæ nec extitit ante assumptionem, nec potest connaturaliter in priori

ad subsistentiam operari. Divinitus tamen poterat illam promereri non solum de congruo, si præsupponeretur affectû gratiâ sanctificante, sed etiam de condigno, si præsupponeretur subsistentia Patris, aut Spiritûs Sancti terminata. Non potuit pro primo instanti unionem promereri per operationes natura posteriores ad illam, cum nequeat principium meriti cadere sub meritum. Probabiliter per opera antecedentia meruit unionis continuationem, sicut meruit Corporis glorificationem, ac Nominis exaltationem; non tamen gloriam essentialem, quippe quæ connaturaliter ab unionem hypostatica exigitur in priori ad quamcunque operationem humanitatis. Præmium in ratione præmii conferri non potest ante meriti existentiam. Gratia Sanctis Patribus collata fuerunt intuitu meritorum Christi, ea tamen relatè ad isthæc dona magis habuerunt rationem meriti Compensativi, ac Solutivi, quàm Remunerandi. Idemque dicimus de Maternitate, ac aliis donis B. Virgini, ac Angelis intuitu meritorum Christi collatis. SS. Patres meruerunt dn congruo Verbi Incarnationem, sed B. Virgo de condigno meruit Maternitatem.

XVII. Unio hypostatica est Unionum maxima, tum in ratione unionis, tum in ratione doni. Non est de se formaliter sanctificativa, nisi ut quo, quatenus trahit formam sanctificantem, nempe increatam, ac substantialem Dei sanctitatem. Unio tamen præsentis ordinis probabiliter est forma sanctificans ut quod. Putamus, non repugnare Creaturam esse instrumentum Dei saltem obedientiale; in ordine ad productionem unionis hypostaticæ; Immo Beatam Virginem fuisse elevatam tanquam physicum instrumentum ad unionis productionem, censemus necessarium, ut possit propriè Deiparentis nomenclaturam suscipere. Putamus pariter, non repugnare qualitatem supernaturalem, quæ sit connaturale instrumentum, quo vis materna ad productionem unionis hypostaticæ elevetur, instar luminis gloriæ, quo vis intellectiva elevatur ad productionem Visionis. In ea qualitate superna reponitur Dei Maternitas participativa Virtutis generativæ Patris Æterni; & probabiliter ea permanentes fuit in Beata Virgine, non ut per illam semper generaret, sed ut per illam semper formaliter sanctificaretur.

XVIII.

XVIII. In Christo Domino non datur de facto duplex unio hypostatica, altera ad Deitatem terminata, altera ad Verbi personalitatem. Quia sufficit; Quæ tamen nec primario terminatur ad Verbi personalitatem, & secundariò ad naturam Divinam, nec è contra, sed requæ primò ad naturam simul, & Personalitatem, atque adeò ad totum Verbum terminatur. Potest una Persona Divina plures naturas humanas simul assumere, necnon eadem humana natura à pluribus Personalitatibus assumi simul: Nec solum assumi potest natura humana, & Angelica, sed etiam natura irrationalis.

XIX. Persona Christi composita verius dicenda, quam simplex juxta PP. & CC. locutiones; cum duplex natura, Divina, & humana, per Incarnationem remanserint inconfusæ, & ad unum constandum ordinatæ. Compositio isthæc trahit necessariò idiomatum communicationem, adeò ut de eodem Christo prædicata contraria dici possint, putà passibilis, & impassibilis, & quæcumque de Deo, & de homine essentialiter, ac de Filio Dei essentialiter, & personaliter prædicantur. Christi humanitas uncta est unctione divinitatis, & sanctitate Verbi substantiali sanctificata, non radicaliter tantum, & exigitive, sed formaliter etiam, seu potius suppositaliter. Sanctificatur autem, & quidem infinitè, tum à sanctitate Divinæ naturæ, tum à sanctitate Personalitatis Verbi cumulative. Fuit etiam in Christo sanctitas habitualis accidentalis; à qua tamen denominationem filii adoptivi suscipere non poterat. Fuit pariter in Christo præter Visionem beatam scientia intrinsecè supernaturalis, & per se infusa; necnon scientia per accidens infusa, naturalis quoad substantiam, & quoad modum supernaturalis: ac demum experimentalis, & acquisita. Creaturas usque ad diem Judicii futuras cognoscit clarè, ac distinctè, & in individuo; reliquas verò tantum habitualiter, quatenus pro libito potest illas in quacumque collectione finita attingere distinctissimè; omnes tamen Creaturas possibiles, aut etiam infinitas sic attingere non potest, siquidem sive supponatur infiniti Cathorematici repugnantia, sive ea non supponatur, hujusmodi indivisibilis cognitio repugnat.


XX. Christus fuit verè, & propriè Sacerdos, specialiter deputatus ad offerendum duplex sacrificium, cruen-

cruentum scilicet & incruentum, quiniimò sempiternum habet Sacerdotium, tum quia usque ad diem Iudicii pergit Sacrificium incruentum offerre per Ministros suos, tum quia ejus Sacerdotalis potestas perdurabit æternum. Verè etiam ac propriè Deum oravit, & in Cœlo etiam orat tanquam noster Advocatus, Mediator, Caput, Sacerdos, semper vivens ad interpellandum pro nobis. Non est tamen strictè Dei servus, cùm sit Dei filius naturalis, & communicet in honore, ac bonis cum Deo, propterea solùm in lata significatione quà homo dici potest Dei servus, quatenus divinæ subest potestati, ac dominationi. Humanitas Christi ut Verbo conjuncta coadoranda est adoratione patriæ, ità ut primarium talis cultus objectum sit Verbum, humanitas verò secundarium, & per accidens; adoratur quippe concomitanter tanquam aliquid personæ, quæ per se, ac directè adoratur. Humanitas verò ut mentaliter à Verbo præcisa ob suas creatas perfectiones, * & gratiam habitualement in summo gradu participatam adorari potest adoratione Hyperdulæ; quamvis in praxi non sit à divinitate præscindenda, ut ei talis cultus deferatur.

FINIS.



INDEX RERUM



I N D E X

R E R U M N O T A B I L I U M,

Quæ in hac Sexta Parte

DE INCARNATIONE

C O N T I N E N T U R.

*Primus numerus designat Disputationem,
secundus Quæstionem, tertius nu-
merum marginalem.*

A



Damo non peccante, Verbum fuisset in-
carnatum, etiam ex vi præsentis de-
creti. 3. 1. 2. & in hac hypothese fuisset
etiam Christi sacrificium, quamvis in-
cruentum. 3. 1. 6.

Admiratio quomodo poterat Christo
competere? 5. 4. 6.

Adoratio latriæ quomodo competat etiam in imaginibus,
& simulachris Christi Domini? 5. 4. 4. Cuilibet etiam
Crucis ea adoratio competit; non tamen cuilibet lan-
cæ, aut spinæ, aut clavo, sed iis duntaxat, quæ fue-
runt instrumenta passionis Domini ibid.

Æternitas & Immenfitas Verbi cur non possint Human-
itati Christi communicari, sicut communicatur San-
ctitas, & substantia? 5. 2. 4.

Angé-

I N D E X

Angelus non videndo substantiam creatam in Humanitate Christi, non infert determinatè existentiam Incarnationis: 1. 1. 9.

Antiqui Patres num meruerint de congruo Incarnationem, etiam secundum substantiam? 3. 4. 2. Quomodo iis collatæ fuerint gratiæ intuitu meritorum Christi? 3. 3. 12.

B

Beata Virgo. V. Maria virgo.

Beatitudo essentialis in Christo Domino quomodo potuerit componi cum timore, dolore, tristitia, ac tædio? 5. 4. 6.

C

Christus in quantum Deus, est Unigenitus, in quantum homo, dicitur Primogenitus omnis creaturæ, quatenus est omnium creaturarum finis. 3. 1. 3.

Christus peccare non potuit in sensu composito unionis hypostaticæ. 2. 1. 1. Humanitas tamen divinitus peccare poterat peccato impeditivo Unionis. 2. 5. 20.

Christus fuit liber ad actus perfectionis inæqualis. 2. 3. 2. Eligendo actus minus perfectos nullam subiret imperfectionem moralem, neque positivam, neque negativam. 2. 3. 4.

Christi meritum relatè ad gratias antiquis Patribus collatas non habuit rationem meriti Remunerandi, sed rationem pretii pro mercede antecedenter acceptâ; atq; adeò compensativum fuit potius, quàm compensandum. 3. 3. 12. An, & quomodo Christi Humanitas mereri sibi potuerit Unionem Hypostaticam? 3. 3. 9. Meruit sibi Christus Unionis Hypostaticæ continuationem, & Corporis glorificationem. 3. 3. 14. Non tamen gloriam essentialem, aut gratiam accidentalem, quamvis potuerit divinitus ea sibi mereri. ibid. Meruit omnibus sufficienter peccatorum remissionem, & ex Christi meritis dona quæcumque supernaturalia nobis conferuntur 3. 3. 16.

Christus ratione gratiæ habitualis non est filius Dei adoptivus. 5. 2. 14 Est Dei filius naturalis, non solum per communicationem idiomatum, sed etiam in quantum homo

homo in sensu accommo dicitur Dei filius naturalis, & filius naturalis solius Patris Æterni, quatenus scilicet reduplicatur suppositum Verbi habens humanitatem. Quod si reduplicetur Humanitas ut personata à Verbo, adhuc dici potest filius Dei naturalis per hoc, quod jus habeat ad hæreditatem, & non sit filius Dei extraneus Christus in quantum homo. Si tamen sola Humanitas reduplicetur, neque dici debet Dei filius naturalis, neque adoptivus, sicut Humanitas denudata qualibet substantiâ per hoc, quod sit affecta gratiâ habituali, non est dicenda strictè Dei filia adoptiva, 5. 2. 15. Christi Persona verius est composita, quàm simplex.

5. 1. 2.

Christi Sanctitas, & scientia quotuplex. V. Sanctitas. V. Scientia.

Christus D. est Sacerdos in æternum multifariam. 5. 4. 1.

Christus in hac vita oravit, & in Cœlo propriè pro nobis orat. 5. 4. 2.

Christus in quantum homo dici potest Dei servus in lata significatione, videlicet in quantum Divinæ subest denominationi. 5. 4. 8. Illi in quantum homini competeat potestas non solum moralis, & meritoria, sed etiam physica relatè ad patranda miracula. 5. 4. 9. nec non potestas directà in omnia temporalia. 5. 4. 7.

Christi propassiones quænam fuerint, & quomodo excitarentur? 5. 4. 5. Ejus fomes in actu primo fuit extinctus, non ligatus, sicut etiam in Deipara. ibid.

Christi humanitas quomodo adoranda? 5. 1. 3.

Christi dentes, & capilli fuerunt immediatè Verbo uniti, & sunt in Eucharistia. 4. 7. 3.

Cognitio clarè, & distinctè attingens omnia possibilia, seu omnia futura, repugnat, etiamsi non repugnarent infinitæ cognitiones, quarum singulæ singula futura, aut singula possibilia attingerent. 5. 3. 9.

Contractus inter Patrem Æternum, & Filium an sit possibilis, esto sit una utriusque voluntas? 3. 3. 13.

Creatura, quæ sit saltem obedientiale Dei instrumentum in ordine ad productionem Unionis Hypostaticæ, non repugnat. 4. 4. 2. Nec repugnat qualitas supernaturalis, quæ sit instrumentum connaturale, quo virtus Materna elevetur ad producendam Unionem hypostaticam. Et probabiliter ea qualitas fuit in Deipara permanentè. 4. 4. 5.

D. De-

I N D E X

D

Decreta Divina virtualiter ex parte objecti distinguuntur ab actu voluntatis Dei necessario. 3. 2. 1.
 Multiplicitas decretorum non datur; sed unicum, & simplicissimum est Dei decretum, quo omnia omnino ab æterno decrevit. post consultationem scientiæ mediæ 3. 2. 5.

Deitas terminat Humanitatem, non prout est communis Tribus, sed prout est coarctata ad Personam Verbi. 4. 1. 5. & 5. 2. 8.

Deus potest naturam irrationalem assumere, necnon formam accidentalem. 4. 6. 2.

Dignitas Personæ satisfaciens arithmetice mensurat valorem satisfactionis. & similiter dignitas Personæ offensæ gravitatem ipsius offensæ. 1. 4. 1. & 1. 5. 3. Quid de dignitate accidentali? 1. 5. 6.

E

Ecclēsia nihil potest statuere in iis, quæ spectant ad substantiam, & valorem Sacramentorum. 2. 1. 13.
 Quare nuda manuum impositio, quæ sufficit apud Græcos ad valorem Diaconatus absque libri Evangeliorum traditione, non sufficiat apud Latinos? ibid.

Effectus prædestinationis quomodo possit esse permissio peccati? 3. 2. 8.

F

Fides habitualis cur non fuerit in Christo Domino? 5. 2. 13.

Fomes peccati in actu primo non debet dici in Christo Domino, & in Deipara ligatus per extrinsecam Dei assistentiam, sed extinctus. 5. 4. 5.

G

Gratia habitualis fuit in Christo Domino aut infinite inmensa, si ea non repugnet, aut saltem in gradu confen-

sentaneo. 5. 2. 13. Quamvis in sacris Bibliis tam D^s Stephanus, quàm Deipara, & Christus Dominus dicantur Gratia pleni, eorum tamen plenitudo est diversa pro diversa singulorum capacitate, & exigentia. ibid.

Gratia peccati alieni remissiva non potest cadere sub meritum iusti condignum. 1. 3. 12.

H

Humanitas à Verbo assumpta peccare divinitus poterat peccato impeditivo Unionis Hypostaticæ. 2. 5. 20. A Verbi sanctitate moraliter dignificatur, ac sanctificatur infinite. 5. 2. 9. Immo etiam physice. ibid. Sanctificatur autem à Sanctitate increata, non radicaliter, sed formaliter, seu potius suppositaliter. 5. 2. 3. Redditurque formaliter, seu suppositaliter sancta tam à Natura Divina, quàm à Personalitate Verbi, tum conjunctim, tum seorsim, quatenus etiam vi unionis cum Personalitate Verbi summam habet impossibilitatem cum quacunque immunditie. 5. 2. 7.

Humanitas Christi quomodo ab Unionem etiam Hypostatica sanctificetur? 4. 3. 4. Num meruerit Hypostaticam Unionem, aut ejus continuationem, & gloriam essentialem? 3. 3. 9.

I

Idiomatum communicatio quomodo habeatur in Christo Domino? 5. 1. 5.

Immensitas Verbi nequit Humanitatem immensitare, potest tamen Verbi Sanctitas, & subsistentia infinite sanctificare Humanitatem illamque reddere subsistentem. 1. 1. 6.

Impeccabilitas Christi cum merito in acceptatione mortis præceptæ duplici viâ potest optime conciliari, reiectis pluribus aliis celeberrimis. 2. 5. 1.

Incarnatio est necessaria ad condignè satisfaciendum pro mortali. 1. 3. 3.

Incarnationis possibilitas negativè tantum demonstrari potest lumine naturali, non positivè. 1. 1. 7.

I N D E X

Incarnatio ex vi præsentis decreti absolute est præfinita in carne passibili, & in remedium peccati, conditio oporteret verò in carne impassibili, si scilicet Adam non peccasset. 3. 1. 5. Principalius ea decreta fuit ad redimendum nos ab originali, quàm à culpis actualibus. 3. 1. 8. Si pauci homines, immo si unus tantum peccasset, adhuc Verbum probabiliter incarnatum fuisset in carne passibili ad præstandam Deo satisfactionem condignam. 3. 1. 8.

Incarnatam esse ipsam naturam Divinam in Verbi Incarnatione, expressè docent Sancti Patres. 4. 1. 5.

Iustus non potest de condigno mereri alteri gratiam remissionem peccati. 1. 3. 12.

L

Libertas à coactione sinè libertate indifferentiæ, seu à necessitate, non solum in natura lapsa non est sufficiens ad meritum, sed neque etiam in Christo Domino. 2. 5. 1.

Libertas in Christo fuit etiam ad actus perfectionis inæqualis, quamvis cum morali necessitate ad actum optimum, non secus ac in Deo datur moralis necessitas ad objectum optimum cum physica libertate ad illud non ponendum. 2. 5. 1.

M

Maria Virgo meruit sibi de condigno Maternitatem. 3. 4. 7. Meruit etiam cum Sanctis Antiquis Patribus de congruo Incarnationem, etiam secundum substantiam. 3. 4. 2. Elevata fuit tanquam instrumentum physicum saltem obedientiale, ad Unionem hypostaticam producendam. 4. 4. 3. Permanenter in ea fuit qualitas supernaturalis, quæ esset connaturale instrumentum, quo virtus materna elevaretur ad productionem Unionis hypostaticæ. 4. 4. 5. Utrum possit ea adoratione patriæ adorari eo modo, quo Christi Crux adoratur, per hoc, quòd tetigerit Redemptorem? 5. 4. 4.

Ma-

R E R U M.

- M**aternitas Dei non est dignitatis infinitæ. 3. 4. 6.
Meritum Christi Domini fuit valoris infiniti, non secus
 ac ejus satisfactio. 1. 5. 2. Relatè ad gratias Antiquis
 Patribus collatas meritum Christi non habuit ratio-
 nem meriti Remunerandi, sed solutivi. 3. 3. 12. Quid
 sibi, & nobis meruit Christus? 3. 3. 1.
Modos, seu entitatus modales esse divinitus separabiles
 à subjecto, quod modificant, non est improbabile.
 4. 6. 13.
Motivum Incarnationis non fuit sola Redemptio à pec-
 catis. 3. 1. 2.
Multiplicitas decretorum non est in Deo admittenda.
 3. 2. 5.

N

- N**atura irrationalis potest à Deo assumi. 4. 6. 2.
 Natura humana si à Tribus Personis Divinis assumeretur,
 non essent plures, sed unus homo; Contra ve-
 rò si una Persona Divina plures humanitates assu-
 meret, non esset unus homo; sed multiplex.
 4. 5. 7.
Necessitas moralis ad Optimum ponendum non est Deo
 deneganda. 1. 2. 6. Ea tamen est quædam necessitas
 metaphorica quoad modum, non tamen quoad effe-
 ctum; sicut cum dicimus Deum irasci, ac poenitere.
 1. 2. 10.

O

- O**ptimum est de facto Universum. 1. 2. 1. Nec esset O-
 ptimum, si in eo deessent culpæ. 1. 2. 7. Deus, & Na-
 tura semper faciunt, quod melius est. 1. 2. 11. Immo
 Deus ad optimum ponendum necessitatur moraliter,
 necessitate metaphoricâ quoad modum, non quoad
 effectum. 1. 2. 5.
Ordo prioris, & posterioris in rebus creatis non infert si-
 milem ordinem in decretis Divinis. 3. 2. 5.

Peccatum mortale est gravitatis infinitæ in linea injuriæ 1. 4. 1. Cum hoc tamen stat, quòd unum sit alio gravius, spectatâ eorum malitiâ. 1. 4. 9. Num mereatur pœnam non solum æternam, sed etiam infinitè intensam? 1. 4. 12.

Peccatum veniale est compensabile à pura Creatura, non tamen mortale. 1. 3. 5.

Permissio peccati in quonam sensu possit esse effectus prædestinationis? 3. 2. 8. & quomodo possit peccatum posterius permitti in pœnam prioris? ibid.

Personæ Divinæ possunt singulæ plures naturas creatas assumere, & omnes eandem. 4. 5. 1. Si omnes eandem humanitatem assumerent, haberetur unus homo, & si una assumeret plures humanitates, haberetur multiplex homo. 4. 5. 7.

Persona creata probabiliter potest alienam naturam assumere. 4. 6. 11.

Persona Christi D. verius dicenda est composita, quàm simplex. 5. 1. 2. & 4. 1. 6.

Potestas directâ in temporalia Christo D. etiam quâ homini debebatur. 5. 4. 7.

Potestas pariter physica, nedum moralis, & meritoria, relatè ad patranda miracula fuit debita Christo D.

5. 4. 2.

Præceptum mortis rigorosum comminativum odii, & pœnæ in hypothesi transgressionis Christo, utpote impeccabili, imponi non potuit. 2. 2. 1. Præceptis naturalibus quonam pacto Christus tenebatur? 2. 2. 3. Præceptum mortis Christo impositum non fuit rigorosum, nequè etiam fuit necessitans instar præceptorum naturalium, sed fuit instar legis pœnalis, seu consilii onerosi. 2. 2. 6.

Præceptum mortis rigorosum imponi divinitus poterat Humanitati assumptæ specificativè acceptæ, quippe quæ poterat divinitus peccare in sensu diviso ab Unionem Hypostatica 2. 5. 20.

Præceptum de cessando à Dei amore num possit Beato imponi? 2. 4. 15.

Præde-

R E R U M.

Prædeterminatio physica ad peccatum non stat finè amore peccati. 1. 1. 4.

Prædestinatio, & Reprobatio formaliter neque est ante, neque post absolutam prævisionem meritorum, aut demeritorum. 3. 2. 6. **Æquivalenter tamen tam Reprobatio est in posteriori ad demerita absolute prævisa, quàm Prædestinatio in posteriori ad merita.** ibid. **In alia providentia potest Prædestinatio esse æquivalenter in priori ad merita absolute prævisa, non tamen Reprobatio in priori ad demerita.** 3. 2. 8.

Præputium Christi D. quod in terra remansit, non est amplius unitum Verbo. 4. 7. 7.

S

Sancti Patres Antiqui de congruo Incarnationem meruerunt, etiam quoad substantiam. 3. 4. 2. **Quomodo iisdem collatæ fuerint gratiæ intuitu meritorum Christi?** 3. 3. 12.

Sanctitas substantialis Verbi Humanitatem Christi sanctificat, ac dignificat infinitè, tum moraliter, tum etiam physicè. 5. 2. 9. **Tam Sanctitas naturæ Divinæ, quàm Sanctitas Personalitatis Verbi, & simul, & seorsim Humanitatem sanctificant formaliter, seu potius suppositaliter.** 5. 2. 6. **Sanctificatur etiam Christi Humanitas formaliter ab Unione Hypostatica, quippe quæ in præsentī providentia est etiam Sanctitas ut quod.** 4. 2. 6. **Necnon à Sanctitate accidentali, seu à gratia habituali.** 5. 2. 12. **Plenitudo hujus gratiæ debita fuit Christo D. in gradu consentaneo, si repugnat ejus intensio infinita.** 5. 2. 13.

Sanguis fuit immediatè assumptus à Verbo, sicut etiam tres alii humores. 4. 7. 2. **In triduo mortis non fuit dimissus sanguis, qui ad corporis integritatem pertinebat.** 4. 7. 7.

Sanguis non venit ex vi verborum in consecratione panis, quamvis spectet ad corporis integritatem, quippe qui non est pars solida. 4. 7. 5.

Satisfactio condigna pro mortali non potest exhiberi Deo offenso à pura Creatura. 1. 3. 3. **Secus verò pro veniali.** 1. 3. 6.

I N D E X

- Satisfactio**, & meritum Christi fuerunt valoris infiniti.
 1. 5. 2. Num fuerint valoris infiniti, non solum ratione Personæ satisfaciētis, sed etiam ratione rei oblatæ infinitæ? 1. 5. 8. Etiam relatè ad Christicidium satisfactio Christi fuit superabundans. 1. 4. 12. Eaque fuit ex rigore iustitiæ. 1. 6. 2.
- Scientia visionis** de peccato absolutè futuro non fuit in priori ad præfinitionem Incarnationis in remedium peccati. 3. 2. 6.
- Scientia in Christo D.** fuit multiplex, nempe Visio beatifica, Scientia per se infusa intrinsecè supernaturalis, scientia infusa per accidens, & quoad modum dumtaxat supernaturalis, ac scientia experimentalis, Teu acquisita. 5. 3. 2. Cognitio clarè, & distinctè attingens omnia possibilìa, aut etiam omnia futura, utpote infinita, repugnat. 5. 3. 9. Hinc Christus D. clarè, & distinctè actu attingit omnia futura usque ad diem iudicii; reliqua autem futura, ac possibilìa omnia cognoscit in Verbo, tanquam in speculo voluntario, solum habitualiter, quatenus potest in Verbo attingere clarè, & distinctè quamcunque collectionem creaturarum syncategorematicè infinitam ad libitum. 5. 3. 11.
- Signa plurima** à Doctoribus assignari solent in Divinis decretis pro negotio Incarnationis redemptivæ. 3. 2. 3. & 7.
- Spes habitualis** fuit in Christo D. 5. 2. 13.
- Subsistere quid importet?** 1. 1. 6.
- Subsistentia absoluta** datur in Natura Divina præter tres subsistentias relativās 4. 2. 2. Ea neque constituit in Deo quaternitatem Personarum, neque dici potest Semipersonalitas. 4. 2. 4.

T

- T**erminare, & complere naturam creatam potest singulis Divinis Personis seorsim competere, producere tamen necessariò competit Tribus. 4. 1. 8.

V.

- V**erbum non mutatur intrinsecè per hoc, quòd fiat caro, & intrinsecè terminet Unionem Hypostaticam.
 1. 1. 2. Quod semel assumpsit, nunquam dimisit, relatè ad